

কুড়মালি লক গাহনি

মাহারাই গিত

(কুড়মালি লোক গাথা)

সমভূনাথ মাহাত্ম (বঁসরিআর)

আর

সকতিপদম মাহাত্ম (বঁসরিআর)

কুড়মালি লক গাহনি

মাত্ৰাৰাহি গিত

(কুড়মালি লোক গাথা)

~ সঁজুএতা ~

- সমভূনাথ মাহাত (বঁসরিআর)
আর
- সকিতপদঅ মাহাত (বঁসরিআর)

~ নিখরান ~

পঃ বঃ কুড়মালি একাডেমি

মহারাই গিথ
MAHARAI GIT
(KUDMALI LOK GATHA)

By

- Sambhunath Mahato (Bansriar)
- &
- Shaktipada Mahato (Bansriar)

▪ Edition I

2023

- Co-operated by Rameshwar Mahato
&
Gourhari Majumder Online Teaching

▪ Published by
‘West Bengal Kudmali Academy’ Publication

▪ ISBN: 978-93-5773-805-7

▪ Copyright © editors, 2023

▪ Printed by
Sarada Press [Hetjari, Arsha, Purulia (W.B)]

▪ Cover & Layout Design
by
Monohor Mahato

▪ Price Rs. 400-00 (Four hundred only)

উছুগুন
মাহারাই গিত গাহঅইআ



ললিত মাহাত
বাপ - ঝরি মাহাত
(হাতিরামগড়া, মানবাজার-২, পুরুইলা)

PROLOGUE

"Folklore (Lok Kotha) is a story made up of a combination of people's lives and imaginations". The tradition of telling or listening to stories has been going on since ancient times. We have been hearing stories from that childhood in the mouths of aunts, grandmothers and grandfathers. This tradition has been prevalent since ancient times. That's why the tradition of folklore is very old. When the story is narrated through prose, it is usually called 'Katha' or 'Folklore' or 'Folktale'. Again, when the story is narrated through the song, it is called Lokgatha (lockgahni). This is an excellent branch of folk literature which has enriched folk literature and culture.

The word 'Lok Katha' is used by Ashutosh Bhattacharya as a synonym of 'Lok Alap'. And as the days go by, words like 'Lok Kahini', 'Lok Golpo' etc. are being associated with it. Even today, in our rural areas, ordinary people and people of different communities tell the stories that have come or heard hereditarily as 'Kissa Stories'. Not only Bengali; this kind of stories has developed but also all over the world, and the story of one country has been found to be amazingly similar to the story of another country. However, the language of the Kurmali people is widely spoken in the adjoining states of West Bengal like Jharkhand, Odisha, and Chhattisgarh. They are permanent agricultural farmers. There are a total of 204 communities live in the state of West Bengal. Among them, the number of Kurmali language group is only 8%. They are living in rural areas of Purulia, Bankura and Jharagram districts in the extended Rarh region of the Chotanagpur sub-continent of neighbouring Jharkhand. Field surveys have shown that their neighboring indigenous peoples and other

communities can also understand and speak the Kurmali language. The Kudmis of West Bengal speak the local Bengali language – not only that, but their medium of study is also Bengali medium. Since there are no established letters or alphabets of their own language, the Kudmali language in West Bengal is written in Bengali font. Due to the lack of application of this language education, the writing of literature in this language is very limited. Some enthusiastic conscious people of Kudmi-dominated areas have been encouraged to practice literature in their own language in order to sustain their own language. Those writings and works have been published in local periodicals, and are still being done. At the same time, some people, despite not being from this language group, have been attracted to the Kurmali language literature and have tried to maintain and promote this language.

Shambhunath Mahato and Shaktipada Mahato, two researchers and language lovers of Kudmali, have edited the book "Maharai Git". And in this book We have found poems, rhymes, stories and translations related to Kudmali folk culture of all over the Rarh region. There are detailed descriptions of language, the dynamics of the language, the way of life, livelihood, religious life, culture, etc which will make the general reader interested in reading and knowing the articles. In this book, it has come up beautifully or has been used in the overall philosophy and philosophy of life of the Kudmi society. Not only the natural and social environment and situation around them have come up beautifully in this book but also the dance, song and music which are associated with the different rhythms of their lives. In this "Mahrai Git" reveals the subtle feelings, emotions and love of Kudmali Communities. It can be said that the book "Maharai Git" is a unique

collection. This effort will bring about a rapport between the present and future generations of the Kurmali language group and inspire them to sustain this language and culture.

Finally, I applaud the editors for taking the initiative to publish such a collection in the current situation. I hope this collection will be especially appreciated by all. Greetings to all the readers and well-wishers of "Maharai Git".

Dr. Arup Majumder
(M. Sc, M. phil, Ph. D)
Cultural Research Institute,
Ambedkar Bhavan, Kolkata-700054

গাড়াখু

হালুক সাহিত কর মূল সত হেলেইক লক সঁগঅত (সাহিত)। লক সঁগঅত (সাহিত) কর মূল খেজা হেলেইক লক গিত আর এহে লক গিত গিলিন কবে আর কনে জে সিরজঅলাহাত তাকর কনঅ নিমাসিমা নাহু জানাইক। আইজ হামরা জন ভাখিহিঁ কথা কহিঅ, অহে ভাখি গিলিনেক উচরঅন কন ঠিনলে হেলাহেইক উগিলিন নিছু ঠানেই পারিঅ, ঠানিত করে নিহি পারিঅ। আর এহে লকগিতগিলিন তঅ পিড়হিক পিড়হি লকেক মুহেঁ মুহেঁ গাহাই গাহাইএ আউএহেইক। জুইতসির তেঁতরানিক অভাবেঁ বহুত গিত হেঁরাই গেলাহেইক আর হেরাবে করেহেইক। তেসনে একটা গিত এক লকেক মুহ লে দসঅর লকেঁ সুনিকে গটাটাই ঠিক কে ঠিক অসনে কহে খজলে অকঅর জেসঅন সুরেক তলবিচ হেউএক তেসনে গিতেক কথাগিলিনেকরঅ হেরফের হেউএইক। পুরখারাক ঠিনলে সুনি সুনি গাহাই গাহাই হামরাক পাস পঁহচঅলাহেইক এসনে বহুত গিত আইজঅ হামরা সুনি পাইঅ। এহে লেখেন গিতগিলিন মাহান বহুত গিত আহেইক ছটঅ ছটঅ আর বহুত গিত আহেইক ডাগঅর। ছটঅ গিতগিলিনেঁ একুকটা বাচিক হালচাল ফইরছাউএক, লকেক জিনগানিক সুখ, দুখ, রিঝ ফুরতি হেনতেনেকর চিনহা দেখি পাইঅ। মেনেক অহে লক গিত মাহান বহুত এসঅন গিত হামরা সুনি পাইঅ, জন গিতগিলিনেঁ একটা বাচিক কেহনিক টঅউআ পাইঅ। কুড়মালি ভাখিক সঁগঅত (সাহিত) মাহান তেসনে বহুত এসঅন গিত আহেইক জেগিলিন একটা কেহনি লেইকেই চলেইক। এহে লেখেন গিতগিলিনকে কুড়মালি ভাখিহিঁ “লক গাহনি” (লক গাথা) কহি জানাইক। এহে নিঅর লক গাহনি গিলিনেঁ হড় জিনগানিকর সভে নিঅর সিখনঅহিত কথা গুঁথাই রহেইক গিতেক সাজান রুপেঁ। আরঅ জানি পাউআইক হড় জিনগানি সুঘড় সুখঅর নেতেঁ পুহাউএক নেগাচারি, রিত আর বহুত লেখেন কামপাইটেক ভাঁইত। তেঁই কুড়মালি ভাখি সঁগঅত (সাহিত) মাহান জেসঅন এহে গিতগিলিনেক ঢেইর মাইন আহেইক তেসনে হড় জিনগানিহুঁ বহুত মাইন আহেইক।

পুরখেনি গিত টুঁড়হেইতে জাইকে তেসনে একটা গিত পাউআলেইক জনটা “সিরিগাই” নামে ছাপালাহেইক “পুরখেনি সঁহরঅই গিত” পঁখিহিঁ। আরঅ টুঁড়হেইতে টুঁড়হেইতে হালেঁ পাউআলেইক “মাহারাই”

কহি একটা গিত। এহে গিতটাউ একটা বাচিক কেহনি লেইকেই সিরজালাহেইক
আর কুড়মালি চারি মাহান ধরঅম পুজাঁই আরঘারেঁ জেটা পিড়হিক পিড়হি গাহাই
আউএহেইক। তবে এহে গিতটাক গাহঅইআ লক দিনকে দিন থিআই সিরাই
মুহালাহাত, কাহে নঅ এতনা ডাগঅর গিত মনে রাখা ভার। এহে গিতটা হামরা
হালুক বোরো থানাক হাতিরাম গোড়া গাঁউএক ললিত মাহাতক ঠিনেঁ পহিল সুনি
পাউলাহিঅ। আর ললিত মাহাতঁই এহে গিতটা সিখঅরহে অকঅর বাপ ঝরি
মাহাতঅক ঠিন, তেসনে ঝরি মাহাতহঁ অকঅর বাপেক ঠিনলে সিখঅরহে।
গিতটা এতেক ঝাইল আহেইক জে উটা গাহঅইআক ঠিনলে সুনিকে লিখে
পারা বেজ হেলেইক। মেনেক হামরাক জিধেঁই কামটা আউসান হেই গেলেইক।
এহে গিতটা পাউআইল বাদেঁ দেখলিঅঁ জে ইটাঁই বহুত বাঁগলা সাড়া জড়াইকে
ভজনাই গেলাহেইক। এহে ভজনাইল সাড়াগিলিনকে নিছড়ি বাহরাইকুন মূল
গিত কেহনিটাক সুর, কথা আর ভাব অবিকল তেসনে রাখি ঘুরাইকে সাজাই
গজাইকে একটা পঁথিক জঁখেঁ বাহরাউএইতকে বহুত ঝকঅঝলেঁ গিরে হেলাহি
হামরাকে, তাউ কসনি ছাড়িঅ নিহি। এহে ঝকঅঝলেক কথা বিসরি মাঁইভাখিক
টানেঁ সভে সহিকুন একটা পঁথিক নিখরান করলিঅ “মাহারাই গিত” নামে,
জনটা কুড়মালি সাহিত মাহান পহিল লক গাহনি (গাথা) কর পাইতে গনালেইক।
পড়হুআরাক ঠিনে আর কুড়মালি সাহিত ভাঁড়ারেঁ একটা দমগর ঠেগ হেতেইক,
এহেটাই হামরাক খাঁখুস রহলি।

সঁজুএতা

- সমভুনাথ মাহাত (বঁসরিআর)
- সকতিপদঅ মাহাত (বঁসরিআর)

ঠেং অড় পাঁইত

খেপ

পিঠদাগ

1) সেউৱন	1
2) পিঠাই চাঁদেক ছুটখদেক কথা	5
3) পিঠাইচাঁদ আৰ লতাক বিহা	26
4) পিঠাইচাঁদ আৰ লতাক সাঁগসাৰ জিবঅন	54
5) পিঠাই আৰ লতাক গউৱা বাজাৰ ঘূৰি আউআ	82
6) লেউৰি সাঁউৱা আৰ সাত সভ বিৱেক জনঅম	93
7) লেউৰি সাঁউৱাক জিলি উমঅইৱেক কেলবি	102
8) অঝাক মুঁহে ধৱঅম পুজাক নিতি সুনান	112
9) লেউৰি সাঁউৱাক ছুটখনেক কথা	117
10) ৰজঅল বিৱেক টেডহি ভাঁগান	163
11) বানঠাক টেডহি সিরান	171
12) লেউৰি সাঁউৱাক ধৱঅম পুজা	183
13) জানকু ৰাজাক সঁগসাৱেক কথা	217
14) চনদাক বিহা	238
15) দাউনি সাউনিক বিহা	247
16) সইআকে দেখেক লাগি চনদাক ঠানমান	287
17) বানঠাক ফাঁফৰে চনদা	311
18) লেউৱিক হাঁথোঁ বানঠাক মৱঅন	331
19) চনদাক ধৱঅম পুজা	341
20) লেউৰি আৰ চনদাক পাৱাই জাউআ	347
21) লেউৰি চনদা আৰ দাউনিক মিলঅন	365

সেঁউরন

আদিগুরু বুঢ়াবাপ মর জড়অহাঁথ করি
হিআ ভরি করঁ নমঅ তহরে সেঁউঅরি,
নিগঢ়অনিআ টংগে তকে জানতঅ সঁগসারঅ
তঁহিঁ রাতি তঁহিঁ দিনা আলঅ জে আঁধারঅ,
নমঅ নমঅ বুড়হাবাপ হামর গউ।।

নমঅ নমঅ মাহামাঁই মর মুল পরকিতি
তহরি সেঁউরনে মাঁই গঅ রাখঅল মনঅ মতি
হাঁথঅ জড়ি হাঁঠুমাড়ি করঁ গঅ ধেইআনঅ
তহরিকা আসিস গুনে সুথরঅ পরানঅ
নমঅ নমঅ মাহামাঁই হামর গউ।।

সেঁউরন করঁ গঅ তকে সুরুজ মাহারাই
ধরমঠাকুর নামেউ তকে ডাকথু সভেকাই
তহর গুনে ই বসমতাঁই জিউএকর সিরজনঅ
সাঁঝেঁ কি বিহানে করঁ তহরে সেঁউরনঅ

নমঅ নমঅ ধরমরাই হামর গউ।।
নমঅ মাঁই গঅ বসঅমতা সিজজনেকর সারঅ
নমঅ নমঅ হাউআ পানি আসমান আরঅ
গাঁউ গরাম জাহিরবুড়হি জিতিআ সসটি মাঁই
বাঘুত, কুদরা, করমরাজা, গরঅইআ গঁসাঁই
তহরাকর ধেইআনে নআউঅঁ মুঁড় গউ।।

নমঅ নমঅ ডিনিমাঁইই সনাকে বরনঅ
ধান রুপে করিস তঁহি সঁগসারঅ পালনঅ
গাছ, পাহাড়, নদি, বন বহুত নিঅর লতা
সভেকে নেহরঅ এগঅ সেঁউরি গুনেক কথা
দিলা করি দিহা সুথরঅ গউ।।

পাঁচবহনি সাতবহনি বনেকর বনবুড়িহি
গরহঅ তারিআ চাঁদঅমাই নমঅ থকিতবুড়িহি
আরঅ জতেক রাই রইআ জানা কি অজানঅ
নেগাচারি রিতে নেতে - করিঅন সোঁউরনঅ

চজে চনহাঁই ভিজাই দিহা মন গউ।।

দুনিআইএক মির গুরু মাইবাপ গঅ হামরঅ
হাঁঠুমাড়ি গড়লাগিঅন ইজরা অনতরঅ
তরাকেরি গুনেক আলঁই হামঅরি সিজজনঅ
তরাকেরি গুনে গড়হল এহঅ রে জিবনঅ

মাইবাপ মর জঁঅত ভগবান গউ।।

আজাআজি, জেঠাজেঠি গুরুজনা আরঅ
জতেক আইহা সিখনাত গুরু সভেকে জহারঅ
ধাইমাইএক গুনেক কথা সোঁউরন করিকে
হাঁঠুমাড়ি গড়লাগেঁই এহঅ রে ধাইমাইকে

তরাক গড়েক ধুরাকেরি আস গউ।।

সভেকাকর আসিস মাখি ভিজাই দেহি মনঅ
মাহারাই গিত এবেরইর করবঅ উচরনঅ
সুনঅলে সুখরঅ মতি এহঅ রে হেউঅইএ
সুঘড়অ ডহরঅ দিসাঁই জিনগানি বহঅইএ

ধেইআনে গিআনে পাহাড় বল গউ।।

মাহারাই গিত সুনঅলে জিবন হেউএই সনা
মনে নিহি রহেক ভালা দুখঅ রে ভাভনা
এ বসমতাঁই রিবো রঁগে দিনা রে বিতাইএ
দিকঅত জাতন খল-কুট পাসেঁ না গতঅইএ

সঁগসারেঁ তঅ বহেক সুখেক বান গউ।।

মাহারাইঅ গিতঅ জেহঅ লকে জে সূনাউএ
হড়েকা সমাজে ভালা উ মানি রে গনাইএ
অকরঅ জিনগানি আরঅ হেউএই রে সুঁদরঅ
মুহেঁ মুহেঁ গাহতঅ রে গুনেকর আদরঅ
ধনে মানে নিচিতে জিঅইএ গউ।।

মাহারাইঅ গিত জাকর কানে না ঢুকঅইএ
তাকরঅ জিনগানি ভালা দুখে রে বিতঅইএ
সুখ সানতি সঁগসারেঁ নিহি রে ভিড়অইএ
জালা জহত জাতঅন এহঅ রে বেড়হঅইএ
বিসেক নিঅর হেউঅতঅ জিনগানি গউ।।

মাহারাই গিতকে জেহঅ ঘিনঅ রে করঅইএ
তাকরা ছতিআই নিছু দুখঅ রে জরঅইএ
কাকরঅ পাসেঁ নিহি মিলঅইএ ঠহরঅ
সাফাসুথর নেহি হেউএক জিনগানিক ডহরঅ
পাঁচেকর মজলিসে তেঁই কুকুরা গউ।।

মাহারাইঅ গিতকে জেঁহি করঅইএ রে হেলা
অকরঅ জিবনঅ ভালা হেউএক হেলাফেলা
অহঅরে পহঅরে ভালা ঠেসঅ রে বজঅড়ে
ছেঁছাইএ কুটাইএ মরেই খহঅড়ে দহঅড়ে
হড় সমাজেঁ রহেই কঁকা-বকা হউ।।

ই বসমতাই জতেক জিআ এহঅ রে জনমঅহত
পরকিতিক ধরমগুনে একদিন তঅ মরঅহত
মরলঅ জিআ ভালা ঘুরি নি আউঅইএ
আরঅ কনঅ দসর জনম নেহি রে পাউঅইএ
পাঁচভুতেক দেহি পাঁচভুতে মিলাই গউ।।

গনঅলঅ দিনা ভালা এহঅ রে থিআইএ
দিআ লেখে একদিন জাতঅউ জে নিঝাইএ
আউআ জাউআ একে নিঅর লেগেক নাহুঁ কিছু
গরব-সরব ধন ফুটানি করিস কাহে নিছু
মাটিক দেহি হেই জাতঅউ মাটি গউ।।

জনম জখন মরন তখন জিউএকর ধরমঅ
বসঅমতাই বাঁচি রহেক করমেক ভরমঅ
তবে কাহে মিছা ধনে করবঅ ফুটানি
রিঝে রুঁগে মেলিমেসি বিতাউআ জিনগানি
দিলা খলি গাহা মাহারাই গউ।।

মন মিলাই নাতা জড়ি রহবঅ সভেকাই
দেহি ধনেক গরব ভালা সঁগসারেঁ মিছাই
পরেক ভালঅ দেখি জাকর আঁখিআ জাই ফাটি
আপনেকা দসেঁ তাকর জনমটাই জে মাটি
বড়ততাই করি বড় নি হেত কেহু গউ।।

বড়অ ছটঅ গিআন ভালা জাকরঅ ধচঅরে
মানি গুনিক মানঅ খাতির রাখঅইএ গচঅরে
গুরুজনেক মাইন-খাতির করইএ জন লকেঁ
মানঅ দেলে মানঅ মিলেই আপন কামেক হকেঁ
আপন করঅমে আপন ধরঅম গউ।।

পিঠাই চাঁদেক ছুটখনেক কথা

গউরাবাজার নামে ভালা একঅ রে বসঅতঅ
মনেক সুখে বসকইত করঅইএ বহুত জাইতঅ
তাকরেকা ঘেঁসে বহেই একঅ রে নদিআ
গউরাজড়অ নামে অকে জানঅত রে বসঅতিআ
বারঅমাসেই বহেক নদি বড়ি জে জিআড়অ
গউরা বাজারেঁকর ভালা মাঁইএকা নিআরঅ
পানিক আকাল কবহুঁ নি হেউঅইএ হউ।।

চাসবাস গাঁউএকেরি এহঅ আদি পেসা
জিনগানি পুহাউএকর চাসে রে ভরঅসা
বাজারেঁকর মাথা ভালা গনাই মাহাতঅ চাসা
তাকরেকা কথাঁই সভেকাকর রহেইন আসা
নাচখেইল রিঝে রুঁগে করমঅ ধচঅরেঁ
সভেক সঁগে সভেক নাতা একে রে নিঅরেঁ
মিলিমেসি করতঅ বসঅত হউ।।

গউরাবাজারেঁক সভা দেখি জুড়াই মনঅ
সনাক মাটি সনাক আলঅ হেরিহরঅ বনঅ
কামার কুমহার তেলি তাঁতি ডম গআলা আরঅ ঘাসি
লাপিত ধপা ঘুইনা মুচি কুইরি আরঅ কুড়মি চাসি
আপন আপন পেসাঁই জড়াই চাসাকর ধেইআনে
বিতাউঅত জিনগানি বেরা সুখেকর আউতানে
মনেক সুখেঁ সঁগসার বাঁধিকে হউ।।

নামে কামে গউরাবাজার বড়ি রে নামজাইজকা
টুমে টুমে গাহি চলঅম কথা তাকঅরেকা
উঁহাকেরি সভেলক কেইসনঅ রহতঅ
কিআ করি আরঅ ভালা জিনগানি পুহাউঅতঅ
ধনি গরিব বড়অ ছটঅ সভে রে সমাজেঁ
বসতঅ করতঅ ভালা আপনেকা সাজেঁ
করম গুনে ডহরঅ মিলঅইএ হউ।।

মাহাতঅকর কথাই ভালা চলেই গাঁউ ঘারঅ
মানঅ খাতিরে আরঅ গুনেকর বিচারঅ
আপন আপন করম করি রহত সভে মাতি
এহে লেখে সভেকাকর দিনা জাইন রে বিতি
জেঁই জেসন তেঁই তেসন করি করমাই খাতঅ
সআঁগ রহেইতে কেহু পাতঅত নেহি হাঁথঅ
পরব তিহার হ্বেকর লহঅর গউ ॥

গউরাজারেঁ ভালা সুখেকর বসঅতঅ
টিকঅইচাঁদঅ একলগঅ রে রহঅতঅ একলগঅ
ফুলঅমতি নামে অকর তিরিআ রহঅইএ
অরাকেরি একঅ বেটা পিঠঅই চাঁদ কহঅইএ
করম করি জেদিন জেইসন জুটঅইএ মাড়পানি
আপনঅ সঁগসারঅ লেইএ বিতাউঅত জিনগানি
ফুলঅমতিক ফুলা লেখে মন হউ ॥

সিসু পিঠঅইচাঁদেক জখন দুই বছর উমঅইরঅ
ফুলঅমতিকে আরঅ ভালা ধরলঅ বেজারঅ
কবিরাজেক দাউআই পাতিঁই নিহি হেলেইক কামঅ
দিনে দিনে ফুলঅমতিক বেরঁগ গাতেক চামঅ
খাউআ পিআ চলা বুলাঁই হেরালেক রে আসঅ
একঅদিনঅ ফুলমতিক অটকি গেইল নিকাসঅ
চলি গেলি ঘুরি নি আউআক দেসে হউ ॥

তিরিআ হেরাইএ টিকঅই গিরি গেলাক ফেরেঁ
পিঠঅইচাঁদেঁ মাঁই হেরাউলেক দুধ ঢকা উমঅইরেঁ
কিনা করেই টিকঅই চাঁদে বুঝি নিহি পাউঅইএ
ছুট ছউআ লেইএ কেসে সঁগসারঅ চালাউঅইএ
হাইহসডু টিকঅইচাঁদঅ করেই এখন কিনা
মুড় ধরি ভাঁগঅল হিআই ভাভেই রাতিদিনা
লাগি গেলেইক ভিতরিআ গুমঅরি হউ ॥

কুলহি ডাঁড়ি আড়পসিঁই বল ভরসা দেউঅলঅ
বানার পাইকে কুটুমবাটুম সভে রে আউঅলঅ
পিঠঅইচাঁদেঁ একর অকর মুহঅ রে ভালঅইএ
এতি লগেক ভিড়ে আপন মাইএ না দেখঅইএ
একর অকর করাই ভালা এহঅ রে জাউঅইএ
মাইএকা করাকর অভাব পুরনঅ না হেউঅইএ
কাঁদি কাঁদি মাইকে ডাকঅইএ হউ।।

একঅ দিঅ তিনঅ করি দিন রে বিতঅলেক
দিনেক দিনে ফুলঅমতিকর মরখি কাম নিপটঅলেক
কুটুম বাটুম আরঅ ভালা জতেক রে আউঅলঅ
কাজ ভজ বাদে সভে ঘারা জে জাউঅলঅ
জাকর জেসন বুইধ ভরসা এহঅ রে দেউঅইএ
টিকঅই চাঁদে সভেকর কথাই মুড়অ রে লাড়অইএ
মনেক দুখ মনেই বাঁধাই রহঅলঅ হউ।।

তিরিআকা বিনু ঘারা ফাঁকা রে লাগঅইএ
ঘনে ঘনে ফুলঅমতিক কথা রে জাগঅইএ
জখন আরঅ পিঠঅইচাঁদেঁ মাইএক খজ করঅইএ
টিকঅই চাঁদেক ছাতি ভালা দুখেঁ রে ফাটঅইএ
মনেক দুখঅ জালা ভালা লুকাই রাখি মনে
কতেক মিছা কথা কহি ভুলাইএ পুতা ধনে
আইথেক লরঅ পঁছিকে পঁছাইএ হউ।।

দুধাপসা ছুউআ লেইএ সঁগসারেকর কামঅ
সামাল করি চলেই টিকঅই সাঁঝঅ রে বিহানঅ
ছুউআক মনে জখন জেটা এহঅ রে খজঅইএ
নিঅসকঅইত হেইএ ভালা মুহাইএ দেউঅইএ
মাইএক অভাব পুরা করেক করঅইএ কসঅনি
চনহা আদর ভালঅবাসা কনঅটাই রে কম নি
এহে রিতে দিনা বিতঅইএ গউ।।

কামেকর তাড়াসে টিকঅই জাঁহাঁ রে জাউঅইএ
পিঠঅইচাঁদকে সঁগে সঁগে এহঅ রে লেগঅইএ
বাপবেটা কখনঅ নিহি হেউঅতঅ ছাড়াছাড়ি
গাঁউ ঘারা আড়পড়সি দেখঅতঅ নজঅরগাড়ি
কাকরঅ কাকরঅ মনে আরঅ লাগঅইএ সনতাপঅ
টিকঅইচাঁদেক অজন কেহু করে লাগঅল নাপঅ

ফুটি কেহু করঅইএ সাবাইসঅ হউ।।

রাঁধাবাঁটা বাড়হাসড়হা ছুউআক লালন পালন
নিজেই একাই করেই টিকঅই দিখাই নি কখনঅ
মাঁই মাঁই ডাকি পিঠঅই জখন রে কাঁদঅইএ
ছাতিঁই আঁকড়াই সনাধনে আদঅরেঁ বধাউঅইএ
কতেক নিঅর জিনিস দেখাই খাইএক হরেক নিঅর
মুড়েঁ গাঠেঁ হাঁথঅ বুলাই করঅই বড়ি আদঅর

মন কাঁদেই গুমঅরি গুমঅরি হউ।।

টিকঅইচাঁদেক জহঅত দেখি গাঁউএক কেহু কেহু
আনেলাইএ কহথিক ভালা দসঅর একঅ বহু
জেঁই জেসন বুঝাউথিক অকে আপনঅ নিআরঅ
মেহরারু বিনু নিহি সাজেই রে সঁগসারঅ
পাতপালহা, ফুল ফর বিনু রে গাছঅউআ
মেহরারু বিনু তেসে বুঝিহা ঘারঅউআ

টিকঅইচাঁদেঁ সুনাই ডেগে ডেগে হউ।।

ঘারেঁ আনিহিঁ টিকঅই বহু রে একঅটি
পালিপসি দেতঅউ পুতা দেতঅউ রাঁধিবাঁটি
নউআ সঁগসারঅ জড়ি দিঅ রে পারানি
মনেকেরি সুখেঁ ভালা বিতাউবে জিনগানি
লকেকেরি কথা সুনি সঁচেই টিকঅই মনে
দসঅরা নি করঅম বিহা এহে রে জিবনে

ফুলমতিক ঠাঁউএঁ কাকঅউ নি বসাউবেই হউ।।

কহি কহি লকঅ সভে থকি না রে গেলা
বিহাক কথাই টিকঅই চাঁদঅ রাজি নেহি হেলা
পিঠঅই চাঁদে লেইএ ভালা কামঅ রে করঅইএ
কাকরেকা কথা ভালা নেহি রে ধরঅইএ
দিনে দিনে পিঠঅইচাঁদঅ হেউঅই রে ডাগরঅ
এহে রিতে বিতি জাইএ দিন মাসা বছরঅ

পুতাক মুঁ ভালি জুড়াই জে অনতরঅ হউ।।
পিঠঅই চাঁদেক জখন আরঅ আট বছর উমঅইরঅ
ভালঅ মঁদঅ বুঝে সিখেই আপনঅ নিঅরঅ
বাপেকেরি সঁগে সঁগে ঘুরি রে বুলঅইএ
জড়িপাড়ি সঁগে ভালা এহঅ রে খেলঅইএ
বাপেক আউআদানে পিঠঅই ভুলি মাইএক সগঅ
দিনে দিনে বাড়হেই দেহি জেসঅন সারঅই ডগঅ
টং ধচঅর সহলঅ উদারঅ হউ।।

আপনেকা পুতা লেইএ টিকঅই চাঁদেক মনঅ
রিঝে রঁগে ডুবি রহেক এহঅ রে হরখনঅ
পুতাকেরি মুঁহ ভালি ভুলেই দুখঅ জালা
দিনে দিনে গাঁথি চলেই আসেকেরি মালা
ছউআক লাগি ঘারা দুআইর এহঅ রে করঅইএ
জমি জাইগা খেতি বাড়ি চাসঅ রে বাঢ়াউঅইএ
গাই গরুই গহাইলঅ ভরলঅ হউ।।

নিরনঅ বিতলঅ ভালা রপামাস আউঅলঅ
চাসাভুসা লগঅ সভে চাসে রে নামহলঅ
বাঁধ পখঅইর ডভা ডাঁড়ি এহঅ নদি নালা
খেতে গঠেঁ পানি খেলেই সভে দেখঅত ভালা
টিকঅইচাঁদেঁ মনেক সুখেঁ করেই খেতিবাড়ি
রউদে সিঝি পানিই ভিজি জিআ জে রে আড়ি
খাটালিক গুনে ধনে নি আকালঅ হউ।।

ভাইগে জেটা আহেইক উটা কাটি দেতেইক কনে
ধুঁধবাসাত আইলেক একঅ পিঠঅইএক জিবঅনে
বাপবেটা দিঅ লগঅ একঅ রে রাতিআই
খাইদাইএ সুতলাহাত একঅ রে খাটিআই
রাতি বিতি হেলেইক বিহান বেরা রে উগঅলি
গটা গাঁউঘারঅ ভালা এহে রে জাগঅলি

টিকঅই চাঁদে ছাড়েই নি বিছঅনা হউ ।।

ঘুমঅ ভাঁগি পিঠঅই চাঁদেঁ হুড়কা রে খলঅইএ
দমে বেরা হেলাহি জে এহে রে দেখঅইএ
বাপুকে দেখঅইএ ভালা সুতলঅ বিছঅনাই
এখনঅ নিহি উঠঅলাহে, আহে ভালা নিদাই
দসরা দিনে ভালা উঠিকেই ভিনসারে

মড়লি দেউআ বাড়হাসড়হা করেই ঘার দুআইরেঁ

কিআ লাইএ রহলআ নিদাই হউ ।।

উঠেঁ বাপু উঠেঁ বাপু - ডাকইএ পিঠঅইএঁ
রাউ সাড়া নিহি ভালা দেউঅইএ টিকঅইএঁ
পাসেঁ জাইএ পিঠঅই চাঁদেঁ এহঅ রে ডাকঅইএ
তাহুঁ টিকঅইচাঁদেঁ ভালা রাউ রে নিহি দেউঅইএ
জেধারিঁই করঅইএ ভালা সেধারিঁই হেঅইএ
এহঅ দেখি পিঠঅইচাঁদঅ কাঁদি রে উঠইএ

কিনা হেলেইক ভাভি না পাউঅইএ হউ ।।

পিঠঅইচাঁদেক কাঁদনা সুনি বাখইরেকর লকঅ
হুড়বড়াইএ আউলা সভে- হেইকে রে হাইচকঅ
কিআ লাগি কাঁদিস পিঠঅই- খঁচঅ রে করঅইএ
পিঠঅইচাঁদেক মুঁহে ভালা কথা না সরঅইএ
“বাপ বাপ” কহেই নিছু এহঅ রে কাঁদি কাঁদি
কাঁদনাকর রেগেঁ মুঁটা জেসন দেলা বাঁধি

আইখেক লরেঁ বানঅ বহি জাই হউ ।।

আড়অ পড়সি লকৈঁ সভে বেউরা পুঁছেহেথিক
কেহু কেহু আরঅ ভালা পিঠঅইকে বধাউথিক
হিটকি হিটকি কাঁদি কাঁদি পিঠঅইএ কহলঅ
হামঅরি বাপু ভালা এখনঅ জে সুতলঅ
হাঁকাই হাঁকাই থকি গেলাঁ রাউঅ নি দেঅইএ
জেধারিঁই করটঅ করাঁউএঁই সেধারিঁই হেঅইএ
বাপেক হামর কিনা জে হেলেইক হউ ।।

পিঠঅইএকা কথাঁই কই লক ঘারা রে ঢুকঅইএ
জেহঅ ঘারেঁ টিকঅই ভালা এহঅ রে সুতঅইএ
“টিকঅইচাঁদ” “টিকঅইচাঁদ” হাঁকঅ রে পাড়অলঅ
টিকঅইচাঁদেক মুঁহে নিহি সাড়া রে মিলঅইএ
ছুইছাই দেখি ভালা হিলাহিলি করি
দেখলা জে টিকঅইচাঁদ গেলাহে হাই মরি

গটা গাঁউএঁ হেই গেলেইক সর হউ ।।
টিকঅইচাঁদঅ মরি গেলাক জানঅল গটা গাঁউএঁ
একে একে আউলা সভে টিকঅইএকর ঠাঁউএঁ
পিঠঅইচাঁদেক কাঁদনা ভালা বাড়হি নারে গেলা
অহঅ সঁগে আরঅ সভে কাঁদে রে লাগঅলা
ভুঁইএ লটাগড়ি ভালা টুঅরা রে পুতা
বাপঅ বিনু হেরাউঅলঅ সভে বলঅবুতা

কেহু নেহি পারঅইএ বধাউএ হউ ।।
গাঁউএক লকে আরঅ ভালা বুঝামাতা করি
টিকঅইচাঁদকে খাটিঁই করি আনগাই দেলথিক ধরি
তুলসিথানে উততর মুঁড়েঁ খাটি রে রাখলঅ
গুমঅরি গুমঅরি পিঠঅইচাঁদ কাঁদে রে লাগলঅ
পিঠঅইচাঁদেঁ আপন বাপকে নেহি রে ছাড়অইএ
‘বাপ’ ‘বাপ’ কহি ভালা মুঁড়অ রে ঠাঁকঅইএ

জনম টুঅর আদরেকর ধন হউ ।।

চাইরঅ লকৈঁ ধরি ভালা টিকঅইচাঁদেক খাইটঅ
লেই গেলখিক আইখেক লরৈঁ জাঁহাঁ সসান ঘাটঅ
কাঁদি কাঁদি পিঠঅইচাঁদঅ এহঅ রে জাউঅইএ
সঁগে সঁগে গাঁউএক লক এহঅ রে আউঅইএ
সইএক আইগৈঁ আরঅ ভালা টিকঅইচাঁদেক দেহি
বানি হেইকে নদিক পানিঁই চলি গেলেইক বহি

হরি বঅউল দেইএ আউলা সভে ঘার হউ।।

কুটুম বাটুম, হিতমিতান, আড়পড়সিকর সাউতাঁই
টিকঅইচাঁদেক কাজ ভজঅ সভে গেলেইক পাইরাই
মাঁই হেরা বাপ হেরা পিঠঅইচাঁদ টুঅরঅ
একরবাদে কিনা হেতেক এহঅ রে অকরঅ
কনে খাউআতেক রাঁধিবাঁটি রহতাক কাকর সঁগে
জৈঁই জেসন বজকে লাগত আপন আপন টঁগে

টুঅর পিঠঅই সুনৈই ভিড়েক মাঝেঁ হউ।।

নৈইখেখিক মামা আপন-এহঅ রে ফুফু মসি
আপনঅ কহেইতে এখন নিছু রে আড়পড়সি
পিঠঅইচাঁদেক আপাভারঅ টানেকর কুটুমে
কেহু নেহি লেউএ পারতা কহঅল টুমে টুমে
কুটুমঅ বাটুমঅ জখন নারাজ হেইএ গেলা
পিঠঅইচাঁদেক কেহু নিহি-দাই ভারঅ রে লেলা

মুঁড় নআই রহল সভেকাই হউ।।

তখন এক পড়সি ভালা সভেক মাঝেঁ উঠি
আপনঅ মনেকর কথা কহলা রে ফুটি
পিঠঅইচাঁদেক আপাভারঅ হামে রে লেঅবঅ
আপনেকা পুতা লেখে বড়অ রে করবঅ
টিকঅইচাঁদেক খেতিবাড়ি হামে রে দেখবঅ
পিঠঅইচাঁদকে হামঅরিকা ঘারেঁ রে রাখবঅ

কনঅদিনে পর না বাসবঅ হউ।।

পড়াসিকে সভেকাইএ সাবাইসঅ করঅইএ
পড়সিঁই তখন পিঠঅইচাঁদেক হাঁথঅ রে ধরঅইএ
আপনেকা ঘারা ভালা লেইএ নারে গেলা
গাঁউএঁকেরা লকে সভে এহঅ রে দেখঅলা
ঘারা লেগি পিঠঅইচাঁদেক খাইএক রে খাউআউএই
পিঠঅইচাঁদেক দিন ভালা সুখেঁ রে বিতঅইএ

পড়সিক ঘারেঁ গেলাক জে গাড়াই হউ ।।

টুঅরঅ টাপরঅ ছউআ বাথানঅ পাউঅলঅ
পড়সিকা ঘারা ভালা আপনঅ হেউঅলঅ
পড়সিকর ছউআ পুতাক সঁগে রে খেলঅইএ
এহে লেখেঁই পিঠঅইচাঁদেক দিনা রে চলঅঅইএ
টুকুটাকু আড়হান-পাড়হান-এহে রে সুনঅইএ
বড়অ লকেক কথা ভালা নেহি রে ধুনঅঅইএ

পড়সিক ঘার সঁচঅইএ আপন কহি ।।

পিঠঅইচাঁদেক চার-ধানঅ গাই-গরু আরঅ
পড়সিঁই তঅ লেইএ আনঅল আপনেকা ঘারঅ
পিঠঅইচাঁদেক ধনে পড়সিক ঘারা রে ভরঅলা
পেটেকরি টানঅ ভালা পঁছাইএ রে গেলা
আপনঅ বহুকে পড়সিঁই কহেইক কানে কানে
ঘার ভরি গেলি হামরাক পিঠঅইচাঁদেক ধনে

ছউআপুতা পসঅবঅ অলঅঠে হউ ।।

দিঅ চারি মাসঅ ভালা এহঅ রে বিতলঅ
তাকরেকা মাঝেঁ একঅ ঘটনঅ ঘটলঅ
একঅদিনঅ পিঠঅইচাঁদঅ সাঁঝেকর সমঅইএঁ
ঢুলি ঢুলি ঘুমাই দেলাক এহঅ রে বিনা খাইএ
খেলি কুদি থকঅল ছউআ নিদাইএ রহলঅ
খাইএক খাতির কেহু ভালা নেহি রে কহলঅ

ভুখঅল ছউআ উঠলঅ ভিনসারেঁ হউ ।।

ভিনসারে উঠি ছুটআ এহঅ রে ডাকঅইএ
ভুখেকর তাড়াসেঁ ভালা আহাঅ খজঅইএ
জখন আরঅ কেহু ভালা রাউ রে দেলা নিহি
রেগ ধরি কাঁদেই পিঠঅই খাইএক দে গউ কহি
কাঁদনাকর রেগে পড়সিক ঘুমঅ রে ভাঁগঅলঅ
পড়সিকর তিরিআ ভালা এহঅ রে জাগঅলঅ

দিঅ পারানি পিঠঅইকে পুঁছঅইএ হউ ॥

কিআ হেলঅউ পিঠঅই রে তর কাঁদিস কিআ লাগি
ঘুমেকেরি রাতিঁই ভালা এহঅ রে তঁই জাগি
পিঠঅইচাঁদে কাঁদি কাঁদি-খাইএক রে খজঅইএ
পড়অসিকা তখন আরঅ রাগঅ রে লাগঅইএ
এহঅ রে অভাইগা ছুটআ বড়ি জে বদজাইতঅ
খাইএক খাইএক করেই ভালা-ঘুমেকেরি রাইতঅ

একে হামে ঘারেঁ নি রাখবঅ হউ ॥

তখন আরঅ পড়সি ভালা দাঁতে দাঁত রে কুটঅই
রাগেকেরি বসে ভালা পিঠঅইকে পিটঅই
টুঅরঅ টাপরঅ পিঠঅই এহঅ রে কাঁদঅইএ
আঁখিকেরি লরেঁ ভালা ছাতিরে ভিজঅইএ
টুঅরেকা দুখঅ পড়সিঁই নেহি রে বুঝঅলঅ
আপনেকা আরঅ ভালা-সুখঅ রে খজঅলঅ

ভাঁড়িসিটি বাখানঅ পাড়অইএ হউ ॥

রাগেঁ গরঅগরঅ পড়সি আইখঅ রাঁইগা করি
জুলুম করি পিঠইচাঁদকে নেগাহাঁথেঁ ধরি
হিড়ঘিচাইএ ঘারলে ভালা বাহারঅ করঅইএ
পিঠঅই চাঁদেক ভুখেঁ ভালা পেটঅ রে জরঅইএ
টানিহিঁচড়ি গহঅলাইএ করলঅ বাহারঅ
নেহরঅ বিনঅতি করেই এহঅ পিঠঅই রে টুঅরঅ
কনঅ কথা কানে না সুনঅইএ হউ ॥

আঁখদুআরি আনি ভালা এহঅ রে ছাড়লঅ
পিঠঅইচাঁদেক রদন ভালা এহঅ রে বাড়হলঅ
বাড়িবাটে সুমি বুড়হিঁই বেইগনঅ তড়অইএ
টুঅরেকা কাঁদনা ভালা এহঅ রে সুনঅইএ
তখন আরঅ বুড়হিঁই ভালা হাঁগকারঅ রে মারি
পড়সিকে গেরিআউএইক হাঁথেক কাম রে ছাড়ি

ডরে পড়সি ঘারা রে ঢুকলঅ হউ।।

কাঁদি কাঁদি পিঠঅইচাঁদঅ কুলহিক ডহর ধরি
লরঅ পঁছি পঁছি চলেই দুখেঁ জরি জরি
জখন আরঅ সুমি বুড়হিক আঁখদুআইর পঁহচইএ
বেইগন তড়া ছাড়ি বুড়হিঁই এহঅ রে ডাকইএ
বুড়হিকেরি হাঁকে পিঠঅই পাসঅ রে জাউঅইএ
বুড়হিঁই তখন লরঅ পঁছাই আদরঅ করঅইএ

পিঠঅইচাঁদকে পুঁছে জে লাগলঅ হউ।।

সুনে রে সুনে রে বাছা বচনঅ হামরঅ
পড়সিআই কিনা দসঅ দেখলঅ রে তরঅ
কিআ দসেঁ তকে ভালা এহঅ রে মারলঅউ
মারিপিটি কাহে বাছা ঘারলে বাহারাই দেলউ
কিআ লাগি এসন ভালা করলঅউ রে তকে
একে একে সভে কথা-সুনাউঅবে তঁই মকে

টুঅর কহি দঅইআ নি জনমলঅ হউ।।

বুড়হিকেরি পাসেঁ পিঠঅই এহঅ রে সুনাউএ
হামে তঅ কনঅ দসঅ নেহি রে জানঅইএ
কালু রাতিঁই হামে ভালা ভাতঅ নি খাউঅলঁ
বেরাডুবাক বাদে হামে ঘুমাই জে রে গেলঁ
ভিনসারেঁ ভুখে হামর নিদঅ রে ভাঁগঅলি
ভুখেকর তাড়াসেঁ ভালা কাঁদনা রে আউঅলি

কাঁদি কাঁদি খাইএকঅ মাগলঁ হউ।।

জখন আরঅ হামে ভালা খজঅইএ আহাৰঅ
সেহঅ কথা সুনি পড়সি আইগেকর নিআরঅ
ঘুমেকা রাতিআই ভালা খাইএক রে মাগঅইএ
এসনেকা ছউআ আরঅ সনি রে লাগঅইএ
এহে ছউআ रहले घारेँ हामर छउआ पुता
भुखे सुखि मरि जाता हेराउता बलबुता

এহে কহি মারে লাগলঅ হউ।।

मारिपिठि गहलाई घँसड़ाई बाहार करि देला
हामर मनैक दुखा पड़सिँई नेहि रे बुराअला
पिठअईएकर दुखा बुड़हिक बिँधलअ अनतरेँ
दिअ आँखि छपछपाई गेलेईक भाला लरेँ
बुड़हिकेरी मने आरअ दईआ रे जनमलअ
पिठअईचाँदके हाँथे धरि घारा रे टुकलअ

মাঝা ঘারেঁ বসাউলেক জতঅনে হউ।।

पिठअईचाँदके बसाई बुड़हिं खाईएक रे आनअईए
खाईएक आनिके भाला एहअ रे देउअईए
भुखलअ सुखलअ छउआ आहारअ नुडअईए
पासेँ बसि बुड़हिँई आरअ आदरअ करअईए
चिउड़ा गुड़अ सानि भाला एहअ रे खाउअलअ
ताकरेका बादे भाला पानि रे पिअलअ

পিঠঅইচাঁদেক পেটঅ ভরলঅ হউ।।

जखन आरअ खाउआ भाला हेईए रे गेला
बुड़हिँई तखन पासेँ बसाई कहे रे लागअला
सुने रे सुने रे बाछा कँह रे तहरे
जेँहि तके ठेलि बाहाराई देलअउ रे डहरेँ
अहअ पड़सिका घारेँ नेहि रे जाउअबे
आपनअ बापेका टिड़हाँई एहअ रे रहबे
हामर কথা मने धरअबे हउ।।

আপনেকা মনে বুড়হিঁই কহেই দাঁজিভাঁজি
হামঅরিকা কথাঁই বাছা হেবে তঁহি রাজি
তরঅ লাইএ হামে আরঅ ডুভা রে ধরবঅ
গটে গউরাঁই মাড় মাগি তকে রে খাউআউবঅ
মাগলঅ মাড়েঁ তকে করবঅ ডাগরঅ
আঝু লে তঁই হেলে হামর বেটাকে নিঅরঅ

তর আপাভার হামে লেউঅবঅ হউ।।

বুড়হিক কথাঁই পিঠঅইচাঁদেক ভিজলঅ পরানঅ
সুরুজ আলঅ ঝলঅমলঅ হেলেইক রে বিহানঅ
বল ভরসা পাইএ টুঅর ছাড়ি বুড়হিক ডেরা
কুলহি ধরি পঁহচলঅ আপনেকা ঘারা
আড়হাই রলাক ঘারেঁ পিঠঅই গড়অ রে রাখলঅ
বাপেকেরি মুঁহঅ ভালা মনে রে জাগলঅ

সুধাঘারেঁ টুঅরঅ একলা হউ।।

আপন ঘারা পঁহচি পিঠঅই এহঅ রে টুঅরঅ
চাইরঅবাটে আরঅ ভালা ঘুরাই রে নজরঅ
ঘাঁসেপাতে বনঅ দেখেই গটে রে আঁগঅনা
ঘারেকর পাঁচিরে ভালা দেখাইরে ভাঁগঅনা
আড়হাই রলাক ঘারেঁ ছউআ এহঅ রে ঢুকইএ
মাকঅডেকা জালে ভরল এহঅ রে দেখইএ

হেহঅলমাটি জেঠিনে সেঠিনে হউ।।

গাছেকেরি ডারি ছউআই বাড়হিনঅ বেনাইএ
বাড়হিসড়হি গটে ঘারা এহঅ রে চিকনাইএ
আঁগনাকে সাফাসুতরা এহঅ রে করঅইএ
ছুটুমুড়েঁ ঠানি ঠানি বুইধঅ রে ধরঅইএ
পালহাডহরা আনি ভালা আপনঅ মনে ভাঁগি
পাঁচিরে পাঁচিরে লাদাই ছেঁদা ছাইনে টাঁগি

ভাঁগল পাঁচির লেসেই মাটি সানি হউ।।

সমঅইএ সমঅইএ বুড়হি এহঅ রে আউঅইএ
পিঠঅইচাঁদকে খাইএক ভালা আনি রে দেউঅইএ
মাগঅল মাড়েঁ ছউআ আরঅ বাড়হেই দিনে দিনে
বুইধ ভরসা পাউএই ছউআই বুড়হিকেরি ঠিনে
ছউআপুতা নাতি পুতি বুড়হিক নি রহঅইএ
পিঠঅইচাঁদকে দেখি বুড়হিই মনকে রে বধাউএ

মনেক টান তঅ বাড়অলে জাই হউ।।

বুড়হিকেরি দইআই ছউআক পেটঅ রে ভাখাইএ
এহে লেখেন পিঠঅইচাঁদে দিনঅ জে বিতাইএ
আপনেকা ঘারেন ছউআ সুখেন রে রহঅইএ
বুড়হিকেরি কথা ভালা মানি রে চলঅইএ
জখন আরঅ কনঅ কিছুক দরকারঅ হেঅইএ
বুড়হিকে कहলে বুড়হিই আনি রে দেঅইএ

আউআদানে বড়অ হেউএই পিঠঅইচাঁদ হউ।।

আপনেকা ঘারেন ছউআ একুইড়া রহইএ
সাঁগিজড়িক সঁগে আরঅ খেলঅইএ কুদঅইএ
গটেদিনা খেলিকুদি এহঅ রে বিতঅইএ
বেরাডুবি রাতি হেলে একুইড়া সুতঅইএ
জেদিন আরঅ বুড়হি ভালা নেহি রে রহঅইএ
গাঁউকেরি লকেন আরঅ ডাকি রে খাউআইএ

পিঠঅইচাঁদেক অভাব নি রহলঅ হউ।।

মাগল মাড়েঁ বিতি জাইএ পিঠঅইএকর দিনা
বিতি জাইএ আরঅ ভালা বছরঅ মহিনা
মাহারাই গিতঅ কথা সুনা রাখি মনঅ
সুখরঅ সুঁদরঅ ভালা হেতহন জিবনঅ
ঘার সঁগসারেন সুখঅ সানতি এহঅ রে রহতঅ
দুখেকর ছাঁহিরা ভালা নেহি রে গিরতঅ

সুরুজে নমিহা সাঁঝ বিহান হউ।।

গউরাজারেঁ রহেই মহিচাঁদঅ রাজা
তাখড়অ জুআনঅ ভালা জেসে সারঅই মাঝা
অকরেকা বহু আরঅ গঁগাদরি রানি
রানিকেরি মন ভালা এহঅ রে ইজর পানি
রাজা-রানিক ছউআপুতা নেহি রে রহঅইএ
গউরাকেরি লক সভে আঁটকুড়া কহঅইএ

চইখেক লরেন্ দুখঅ নি পঁছাই হউ ॥

একঅদিনঅ সাঁঝেঁ রানি রাজাকেরি ঠিনে
পাড়অইএ দুখেকর কথা কাঁদঅ কাঁদঅ মনে
এতেক সখেক ঘারদুআইর পাহাড় সমান ধনঅ
অহর পহর তাঁহঁ হামর কাঁদেইসাহি মনঅ
হামঅরিকা ছউআপুতা নেহি রে হেউঅইএ
ছউআপুতা বিনু ঘারা নেহি রে সাজঅইএ

বঁগসঅ বিনু দুনিআই আঁধার হউ ॥

আঁটকুড়া কহঅত আরঅ গটা রে মুলুকে
কথা সুনি মনঅ হামর ভরি জাই গউ দুখে
বিহানে হামরাকর মুঁই দেখঅত নেহি কেহু
ছি থু করি মুঁটা ঘুরাউলে সুনি সুখাই লহু
হামরাকে দেখি কেহু কাঁহঁ নেহি জাতঅ
মুঁ দেখঅলে হড়বড়াইএ ঘারা রে সামহাতঅ

এসন জিবনেকর কিনা দাম হউ ॥

গঁগাদরি রানি ভালা ভাঁসি লরেঝারেঁ
আপনঅ সঁইআকর ঠিনে কহইএ নেহরে
ছউআকেরি লাগি তরা বিহা করা ঘুরি
তরাকেরি গড়ে সঁইআ বিনঅতি হামঅরি
সিঁথেকা সিঁদুরা হামে বাঁটা রে করবঅ
তাকরেকা লাগি মনে দুখঅ না ধরবঅ

তরা হামর কথাটা রাখিহা হউ ॥

মহিচাঁদেক গড়ে রানি মুড়অ রে ঠঁকঅইএ
হঁফঅরি হঁফঅরি ভালা এহঅ রে খিজলাইএ
তখন আরঅ মহিঁই ভালা ধরি রে উঠাউএ
আঁইখেকেরি লর আরঅ এহঅ রে পঁছাইএ
কহে লাগল সুনৈ রানি বচনঅ হামরঅ
রাখে নেহি পারম হামে কথা জে তহরঅ

ঘুরি বিহা নেহি করবঅ হউ ।।

সঁইআকর বচনঅ সুনি গঁগাদরি রানি
একে একে সরঅ করেই মনেকর দুখানি
বঁগসঅ নি রহলে ঘারা টিপাসুইন হেউঅইএ
সেহঅ টিড়হাঁই আরঅ ভালা ভুতঅ রে নাচইএ
এসন সাজাউঅলঅ সঁগসার আর এতেক ধনে
বঁগসঅ না রহলে ভালা ভগ করতা জে কনে

সঁইআ তরা সঁচিকে দেখবেহে হউ ।।

ছউআ ছউআ করি রানি খেপিকে নিঅরা
মাঁই নিহি হেউআক দসেঁ ভাভিকে আধমরা
রানিকে দেখিকে রাজাক থিরঅ নহেক মনঅ
দিনে দিনে সুখাই রানি বুড়িকে জেসনঅ
খাউআ পিআঁই রুচি হেঁরাই রহেই মনগুমাণে
দসঅখাউ ডাকলে ভালা সুনৈই নিহি কানে

এবেইর মহিচাঁদে রানিকে কহলেইক হউ ।।

সুনৈ রে সুনৈ রে রানি বচনঅ হামরঅ
তরঅ লেখে কাঁদেই ভালা হামঅরি অনতরঅ
একঅ দুইঅ তিনঅ রানি জতেকে আনঅবে
ভাইগগে না রহলে ছউআ কাঁহা রে পাউঅবে
মাহামাঁইএ জখন ভালা নেহি রে দেঅইএ
মানুসেকর মুরাদ ভালা কেসে রে হেঅইএ

তঁই রানি বুঝিকে দেখঅবে হউ ।।

মহিচাঁদেক কথা সুনি গাঁগাদরি রানি
দসরা ডহরঅ একঅ আনলঅ রে ঠানি
ঘুরি বিহা এহঅ রাজা নি জদি করঅবে
একটা তবে পুসুআ বেটা আনি জে দেউঅবে
পুসুআবেটা লেইএ হামে দিলা জে বাঁধবঅ
অকে দেইএ হামে আরঅ সঁগসারঅ সাজাউবঅ

তরা এহে কথাটা রাখঅবেহে হউ।।

তিরিআকর কথা সুনি কহেই মহিঁই তবে
দুনিআইএ মাগলে কিনা বেটা রে পাউঅবে
হামরাকর দুখ দেখি আহাত এসন কনে
খজলেই তকে দেইএ দেতঅউ আপন করাক ধনে
নিধনিআ বাট-ভিখারিঁই কেহু নিহি দেবথু
ছউআ তঅউলি সনা দেলে তাঁহু নিহি লেবথু

এসন আসা মিছাই নাহু করেঁ হউ।।

সঁইআক কথা সুনি রানিঁই সঁচেই জে মুড় ধরি
কনে তবে বুঝতা ভালা দুখা রে হামঅরি
কতিখনঅ বাদেঁ তবে ফুটলঅ রে কথা
তরাক সঁগে হামর সঁইআ জিনগানিকর নাতা
টুঅর টাপর ছউআ ভালা মিলঅলে সঁগসারেঁ
আপন করি লেই আউবেহে হামঅরিকা ঘারেঁ

অকেই করঅব পসুআবেটা হউ।।

রানিক কথা মহিচাঁদেক লাগলঅ রে কানে
একঅ টুঅর ছউআক কথা জাগলঅ রে মনে
গউরাবাজারেঁই আহে পিঠঅইচাঁদ টুঅরঅ
মাঁইবাপ আরঅ ভালা নেখেইক জে অকঅরঅ
গাঁউএকেরি মাগল মাড়েঁ দিনঅ রে বিতাইএ
আপনঅ কহেইতে আরঅ কেহু না রহইএ

সুমি বুড়িহিঁই করতঅ জতন হউ।।

পিঠঅইএকর কথা মহিঁই এহঅ রে कहअईए
आपन घारेँ टुअर छुआ एकई रे रहअईए
एहअ কথা सुनि रानिक मनअ रे भरलअ
पसुआ बेटा करेक खातिर आसारे जागलअ
पिठअईचाँदेक छिने सँईआ एहअ रे जाउअवे
आदअरे जतने भाला घारा जे आनअवे

पिठअईके पसुआ बेटा करवअ हउ ।।

कहाँई कहींई बेराडुबि रातिरे हेउअलअ
खाउआपिआ करि भाला एहअ रे सुतलअ
जखन आरअ भिनसरा हेईए जे रे गेला
खुखड़ा डाकेँ महिचाँदेक निदअ रे भाँगअला
घुमाई उठि आरअ भाला मुँ हाँथअ धअईए
ताकरेका बादे आरअ रानिके उठाईए

गँगादरि रानि रे उठअलअ हउ ।।

महिचाँदेँ धति कामिज एहअ रे पिँधअईए
मुड़ेका पगअडि भाला एहअ रे बाँधअईए
मतिहारअ कहलका भाला एहअ रे साजईए
हँकाकर उपरे कहलका जतने चापईए
डुडूक डुडूक साड़ा करि हँका रे टानअईए
रानिँई आरअ मनैक कथा एहअ रे सुनाईए

सँपडलअ पिठअईचाँदेक घारा हउ ।।

महिचाँदअ धनिमानि ना हेउअईते बिहानअ
एकअमने करि भाला माहामाँई धेईआनअ
साजिगजि हेला आरअ घराले बाहारअ
गेँठिआईए लेला भाला चिउड़ागुड़ आहारअ
माहामाँई सेउरने भाला जाकरेका मनअ
सुथरअ हेअईए भाला ताकरअ जिवनअ

जिनगानि सुखेरे बिताउए हउ ।।

পিঠাইচাঁদেক ঘাৱা এহঅ মহিচাঁদ রে পঁহছলঅ
আগদুআইৰেঁ জাইএ ভালা এহঅ রে ডাঁড়হালঅ
পিঠাই পিঠাই কহি ভালা হাঁকঅ রে পাড়াইএ
হাঁকঅ সুনি পিঠাই আপন ঘাৱা লে বাহাৰাইএ
মহিচাঁদকে জখন ছউআই এহঅ রে দেখলঅ
মনেকা ভিতৰে আৱঅ ডৱঅ রে লাগলঅ

ছতিআ তঅ কাঁপিকে উঠলঅ হউ।।

পিঠাইচাঁদকে মহিচাঁদেঁ পাসেঁ রে ডাকঅইএ
ডৱে ডৱে ছউআ তখন এহঅ রে আগুআইএ
জখন আৱঅ পাস ভালা এহঅ রে হেউঅলঅ
সুগুমমাৰি ছউআ তখন এহঅ রে ৱহলঅ
মহিচাঁদে ছউআক মুড়েঁ হাঁথঅ রে বুলাইএ
চনহাকে দুআৱা ভালা গেলা রে খলাইএ

পিঠাইচাঁদকে আঁকঅডি ধৱলঅ হউ।।

বিহানেকৰ আলঅ ভালা ফুটি রে উঠলঅ
সেহঅ খনে বুড়হি আৱঅ এহঅ রে আউঅলঅ
ছউআকেৰি লাগি বুড়হিঁই খাইএকঅ আনইএ
মহিচাঁদেঁ চিউড়াগুড়অ এহঅ রে দেউঅইএ
বুড়হিঁই আৱঅ মহিচাঁদকে এহঅ রে কহঅইএ
বড়ি ভাইগেঁ তঁহিঁ আৱঅ ইহাঁ রে আউঅইএ

কহেঁ বাছা আনাৱঅ বানার হউ।।

বুড়হিকেৰি কথা সুনি সৈঁপঅ রে ঢকিকে
মহিচাঁদেঁ মনেক কথা কহেই রে খলিকে
হামঅৱিকা ছউআপুতা নেখে রে সঁগসাৱেঁ
সেহঅ কথা জানত গটে গউৱা রে বাজাৱেঁ
সভে তঅ জানিস বুড়হিমাঁই কিনা কহম আৱঅ
ছউআপুতা বিনু ভালা সাজেই নিহি ঘাৱঅ

বেটা খজি বুলেইহউক হামৱা হউ।।

পিঠঅইচাঁদেক মাঁই-বাপঅ মরি হেঁরাই গেলা
টুঅর টাপরঅ ছউআ একা রে হেউঅলা
পিঠঅইচাঁদকে হামে আপন ঘারা রে লেগঅবঅ
পসুআ বেটা করি ভালা পালবঅ পসঅবঅ
হামঅরিকা ধনেঁ ছউআ মালিক রে হেউঅতঅ
মাঁই বাপেক অভাব ভালা নেহি রে বুঝঅতঅ
পসুআ বেটাই ঘারা সাজাউঅব হউ।।

ধনিমানেক ঘারেঁ ছউআ এহঅ রে চলি জাতাক
দুধেভাতে আরঅ ভালা মানুসঅ রে হেতাক
এহঅ কথা সাঁচি বুড়হিক কথা না সরলঅ
হরখে হরখে ভালা লরঅ রে বরসলঅ
পিঠঅইচাঁদেক মুড়েঁ আসিস চুমা রে খাউঅইএ
আদরঅ করিকে ভালা আঁকঅড়াই ধরঅইএ
গটে অঁগে হাঁথঅ বুলাইএ হউ।।

পিঠঅইচাঁদেক হাঁথঅ ধরি মহিচাঁদঅ রাজা
আপনঅ ঘারা মুহেঁ ডহরলঅ সঝা
রাজাকেরি সাঁগে ছউআ এহঅ রে চলঅইএ
চলেইতে চলেইতে রাজাক মুঁহঅ রে ভালঅইএ
মুটুক মুটুক কতি কথা এহঅ রে পুঁছঅইএ
সুনি সুনি মহিচাঁদেক মনঅ রে রিঝঅইএ
পঁহচলঅ আপনেকা ঘারা হউ।।

ছউআ লেইএ মহিচাঁদঅ ঘারা রে পঁহচলঅ
আগদুআইরেঁ ডাঁড়হাই ভালা রানিকে ডাকলঅ
রানি তখন লরালিপা এহঅ রে করঅইএ
সঁইআকেরি হাঁকে ভালা হুঁড়কি রে বাহারাইএ
পিঠঅইচাঁদকে রানিই আরঅ নজঅরেঁ দেখঅলঅ
চাঁড়েমাড়েঁ আদঅর করি করাই রে লেউঅলঅ
ছউআ লেই ঘারা ঢুকঅইএ হউ।।

তিন লকঅ আরঅ ভালা ঘারা সামহালা
তুলসিথানে জাইএ আরঅ নমঅ রে করঅলা
সুরুজ মাহারাইকে ভালা নমঅ রে করইএ
নমঅ নমঅ করি আরঅ পাকঅ রে ঘুরইএ
সইআকেরি গড়ে রানি নআউঅলঅ মুঁড়অ
থারি ভরি সানেই আরঅ চিউড়া দহি গুড়অ

তিনঅলকেঁ বাঁটিকে খাঅলঅ হউ।।

পিঠঅইচাঁদকে করাই বসাই রানিই রে কহঅইএ
তহঅরিকা মাইবাপু নেহি রে রহঅইএ
তঁই মকে মাই কহি এহঅ রে ডাকঅবে
রাজাকে তঁই আরঅ ভালা বাপঅ রে কহবে
তকে হামরা পসুআ বেটা এহঅ রে করলিঅ
জনম নিহি দেইএ তকে করাই রে ধরলিঅ

তঁই হামরাক সাতরাজাক ধন হউ।।

মহিচাঁদেক ঘারেঁ ছউআ বড়অ জে হেউঅইএ
রাজারানিক চনহা আদর সাঁগি রে পাউঅইএ
মাই মাই কহি পিঠই রানিকে ডাকইএ
মাই ডাক সুনি রানিক দুখঅ রে সুখইএ
কনঅ দিনঅ কনঅ কামঅ নেহি রে করাউএ
সঁগসারেক কাম কনঅ নেহিরে আড়হাউএ

বিতি জাই দিনা মাস বছর হউ।।

মহিচাঁদেক ঘারা ছউআক হেলেইক রে আপনঅ
রাজারানিক নিঅর পাউলা মাই বাপু রে ধনঅ
মাই বাপেক বিছঅড় বেদন সভে রে ভুললঅ
টুঅরেকা ছাপ ভালা পঁছাইএ জাউঅলঅ
মাগঅল মাড়েক পিঠঅইচাঁদ ডুবঅল দুখেঁ ভাটেঁ
দামি দামি ইঁধন পিঁধন সাজেই আরঅ গাটেঁ

আলঅ করেক মহিচাঁদেক ঘারা হউ।।

পিঠাইচাঁদ আর লতাক বিহা

এহে লেখে বিতি গেলেইক বারঅটা বছরঅ
দিনে দিনে পিঠাইচাঁদ হেলাক রে ডাগরঅ
একদিনঅ সাঁঝে রানি সঁইআকে কহঅইএ
তরাক ঠিনে হামর একটা কথা রে রহঅইএ
গটা গউরাঁই হামরা ভালা ভউজঅ রে খালাইহঅ
ধনি গরিব কাকরঅ ঘারা বাদ নিহি দেলাইহঅ

সেহঅ দেনা মুঁড়েকর উপর হউ।।

হামর কথাঁই সূনা রাজা দিহা রিচেক কানঅ
পুসুআ বেটা পিঠাইচাঁদ হেলাহে জুআনঅ
অকর এবৈহর এহঅ রাজা বিহা রে দেঅবঅ
গটে গউরাক লককে হামরা ভউজঅ রে খাউআউবঅ
ঢাকঅ পিটি ভজ দেবেইক এহঅ রে সাতদিনঅ
সধি দেবেইন গটা গউরাক ভজেকেরি রিনঅ

তরা রাজা কেনিআই দেখে জাবে হউ।।

তিরিআকর কথা রাজাক মনে রে লাগলঅ
ছুপাঅল বিসরলঅ কথা এহঅ রে জাগলঅ
পুসুআবেটা পিঠাইচাঁদ হেলাহে জুআনঅ
নেহি রহেহেলি ভালা তালঅ রে ধিআনঅ
বিহাদান তঅ দেউএ হেতেক সমাজঅ ধরমে
সঁগসারেকর ভালঅ মঁদঅ আপনঅ করমে

এহে কথা মুঁড়ে আউঅলঅ হউ।।

বিহা দেউএক কথা ভালা জাগলঅ রে মনে
কেনিআইএক টউআ আরঅ দেতা মকে কনে
বসি বসি ভাবেই রাজাঁই কাঁহাঁ রে জাম একা
পিঠাইচাঁদেক জড়ি কেনিআই কাঁহাঁ পাউবেঁই দেখা
টানেক টানে কুটুমঘারা এহঅ রে সঁচঅইএ
কাকরেকা ঘারেঁ ভালা কেনিআইঅ মিলঅইএ

মনে নি জাগঅইএ জে এখন হউ।।

তবে রাজাঁই রানিক সঁগে সলা রে করলঅ
কেনিআইএক টউআ মুঁড়ে নেহি রে আউঅলঅ
তখন আরঅ রানিঁই ভালা कहलेইক রে রাজাকে
বিহাক কথা ফদড়অবেহে কুটুম ঘার জাইকে
কেনিআইএক টউআ আরঅ এহঅ রে মিলতঅ
কেহু না কেহু ভালা দেউএ রে পারতঅ

তরা রাজা অহটাই করঅবে হউ।।

রানিকেরি কথা রাজাক লাগঅলঅ রে কানে
বিনা জানি কাহে ভালা ঘুরঅম আনেবানে
কুটুমঘারেঁ জাইএ হামে এহঅ রে ফদড়অ
কুটুমেকর মুঁহে কেনিআই টউআ রে পাউঅবঅ
এহে ঠানি মহিচাঁদঅ নিচিতঅ রে হেলা
কখাঁই কখাঁই আরঅ ভালা রাতি হেইএ গেলা

কুলহি ডাঁড়ি হেলেইক সাঁইসুঁই হউ।।

পিঠঅইচাঁদেঁ দসর কুঠরিঁই কানঅ রে অনাইএ
মাইবাপেক কথা ভালা এহঅ রে সুনঅইএ
জখন আরঅ রানিঁই ভালা আরঅ রে ডাকঅলঅ
মাইএক হাঁকে পিঠঅই আরঅ রাউঅ রে দেউঅলঅ
রানিঁই আরঅ খাইএক ভালা এহঅ রে বাঁটঅইএ
বাপবেটা দিঅ আরঅ খাইলাইএ বসঅইএ

তাকর বাদেঁ রানিঁই খাউঅলঅ হউ।।

খাউআ পিআ করি সভে নিচিতে সুতলঅ
ভিনসারেঁ খুখড়া ডাকৈঁ রাজা রে উঠলঅ
ঘুমভাঁগি মুঁহঅ হাঁথঅ এহঅ রে ধঅইএ
সঁগে সঁগে রানি ভালা আরঅ রে উঠইএ
রাজারানিক গালসাল সুনিকে রে কানে
পিঠঅইএকর ঘুম ভালা ভাঁগলেইক সেহঅ খনে

সুনে লাগঅল মাইবাপেক কথা হউ।।

মুঁ হাঁথ ধঅইকে রাজা মাহারাই সৈঁউরঅইএ
তাকরেকা বাদে চঁউরি মেলা রে জাউঅইএ
মনঅ জখঁে ধতি কামিজ এহঅ রে পিঁধঅইএ
মুড়েকর পগঅড়ি ভালা আরঅ রে বাঁধঅইএ
মনেক জখঁে গামছি রাজাঁই কাঁধেঁ রে লেউঅলঅ
ছাতা ঠেঁগা আরঅ ভালা এহঅ রে ধরলঅ

রেসঅমেক জুতা গড়ে খাপাউঅলা হউ।।

সাজগজ করেইতে রাজাক হেলেইক রে বিহানঅ
হিআ ভরি গাঁউ গরাম করঅলঅ ধিআনঅ
হাঁথে মুঁঠাই টুএক ভালা করিকে আহাঅ
কেনিআইএক টউআই রাজা হেলা রে বাহারঅ
জখন আরঅ কুলহিক মুঁড়া এহঅ রে পঁহচলঅ
গাঁউএকরঅ লকেক সঁগে ভেঠঅ রে হেউঅলঅ

গাঁউএক লকে পুঁছতঅ রাজাকে হউ।।

সুনে জে সুনে জে রাজা কহিকে রাখঅবে
সাজগজঅ করি তঁই কাঁহাঁ জে জাউঅবে
কাঁহঁ জাইএ দেখঁ নিহি তকে জে গিআনে
কাঁহাঁ জাহিস কিনা কামে আবু এ বিহানে
তকে দেখি মনঅ হামর উঠঅলি আচঅকি
কনঅ বা নগরে রাজা চলঅলে উচঅকি

সেহঅ কথা সুনাইএঁ হামঅরে হউ।।

রাজাঁই তখন ফুটি কহল মনেক কথা জেটা
ডাগরঅ জুআনঅ হেলা পসুআ রে বেটা
পিঠাইচাঁদেক কেনিআই হামে জাঁহ রে দেখেলাই
রানিঁই ধরঅলাহি জিগিড় বিহাঘার করেলাই
ই বছরেই বিহাঘার এহঅ রে করঅবঅ

রানিকেরি মনেক আস এহঅ রে পুরাউবঅ

কেনিআই দেখি ঘারা ঘুরবঅ হউ।।

রাজাকেরি কথা সুনি কহেই গাঁউএক লকে
কন গাঁউ জাহিস রাজা সুনাউএঁ জে মকে
কাঁহাঁ ঠানঅলে ভালা পুতাকেরি কেনিআই
আগুআ পেছুআ কনে হেকঅউ রাখাবে জে সুনাই
তখন আরঅ রাজাঁই ভালা এহঅ রে কহঅইএ
কেনিআইএক টউআ এখন নেহি রে রহঅইএ
কুটুমে সুধিআই করবঅ টউআ হউ।।

সেহঅ লকে সুনাউএইক কথা রাজাকেরি কানে
কেনিআইএক টউআ রাজা আহি হামর ঠিনে
হরদি বাজারেঁ ভালা এহঅ রে জাউঅবে
পাহ রাজাকেরি ঘারেঁ কেনিআই জে পাউঅবে
পাহরাজাক বেটি ভালা লাগেই জে সুনদরি
পিঠইচাঁদেক সঁগে রাজা হেতেইক সখেক জড়ি
রাজাঁই রাজাঁই হেবেহে সমান হউ।।

মেঘ নতঅ অনাউএইতে পানি রে বরসঅলঅ
সেহঅ লকেক কথাই রাজাক মনঅ রে ভিজঅলঅ
হরদি বাজারেঁ রাজা উজাইএ রে দেলা
ডেগে ডেগে আরঅ ভালা বাটঅ রে খিজালা
মাঝঅ বাটেঁ চিউড়া গুড়অ এহঅ রে খাউঅলঅ
সতিআহিঁ ডাঁড়ি কড়ি পানি রে পিঅলঅ

তাকরবাদে ঘুরি উজাইএ হউ।।

মনেক সুখেঁ চলেই রাজা ডহরে ডহরে
সিরিসিরি হাউআ খেলেইক লহরে লহরে
ধতিকেরি কুঁচি রাজাক নাচেইক চাইলে চাইলে
কতেক কিনা সঁচেই মনে আপনঅ খেইআলে
জখন আরঅ দুপহর এহঅ রে হেউঅইএ
হরদিকর কুলহিক মুড়া পঁহঅচিএ জাউঅইএ
লককে পুঁছেই পাহরাজাক ঘার হউ।।

সুধিআই সুধিআই মহিচাঁদঅ এহঅ রে চলঅইএ
পাল্‌রাজাক ঘারা ভালা আরঅ চিনহঅইএ
আগদুআইরেন্‌ জাইএ রাজা এহঅ রে ডাঁড়হালঅ
'পাল্‌' 'পাল্‌' নামঅ ধরি হাঁকঅরে পাড়অলঅ
পাল্‌ তখন ঘারেন্‌ বসি হুঁকা রে টানঅইএ
মহিচাঁদেক হাঁকঅ আর কানে রে সুনঅইএ

হাঁকঅ সুনি চমঅকি উঠঅল হউ।।

মহিচাঁদেক হাঁকঅ সুনি পাল্‌ রে ঠানঅইএ
বারঅ বছর হামঅরি নাম কেহু নি ধরঅইএ
কনে হেকে নামঅ ধরি মকে রে ডাকঅইএ
বাউ বেগে আরঅ পাল্‌ ঘারা লে বাহারাইএ
মহিচাঁদকে দেখি পাল্‌ পুঁছে রে লাগলঅ
কন দেসেক রাজা হামর দুআইরে আউঅলঅ

পাল্‌ই তখন মহিকে পুঁছঅইএ হউ।।

কনদেসেক রাজা ভালা তঁহি রে হেউঅইএ
কিআ আরঅ নাম আরঅ তহরি লাগঅইএ
কিআ খাতিরেন্‌ মকে এহঅ রে ডাকঅলে
হামরঅ আগদুআইরেন্‌ আরঅ রে ডাঁড়াহালে
পাল্‌ই আরঅ মহিচাঁদকে ঠিকরাই রে কহলঅ
হামর সঁগে কিনা ভালা দরকারঅ পড়লঅ

সেহঅ কথা মকে তঁহি সুনাইএ হউ।।

পাল্‌কর পুঁছঅনে মহিই কহেই টুমে টুমে
নাম চিনহাপ আনার বানার সভে দেবঁ হামে
গউরা বাজারেক রাজা মহিচাঁদ মর নামঅ
তহরিকা সঁগে আরঅ আহি একঅ কাম
তহর একটি বেটি আহঅউ পাইএ জে বানারঅ
কেনিআইএক টউআ করি আউলাই তর ঘারঅ
তর বেটিকে কেনিআই দেখবঅ হউ।।

মহিচাঁদ নাম সুনি এহঅ পাহ্‌ রাজঅ
কিনা করঅত কিনা নিহি ডহর করেই খজঅ
চাঁড়েমাড়ে পাহ্‌রাজা ঘারঅ রে ঢুকঅইএ
একঅ ঘটি পানি ভালা এহঅ রে ডুবাইএ
মহিরাজাক হাঁথোঁ আনি ধরাইএ রে দেলা
গউরাকর রাজাঁই হাঁথঅ গড়অ রে ধউঅলা

গড় ধঅইএ ঘারা সামহালা হউ।।

টঁউরিমেলাঁই পাহ্‌রাজাঁই বিছনা রে পাতঅইএ
মহিচাঁদঅ রাজা ভালা এহঅ রে বসঅইএ
মতিহারঅ কইলকা পাহ্‌ই এহঅ রে সাজাইকে
তাকঅরে উপরে আরঅ আইগঅ রে সলগাইকে
মহিচাঁদেক হাঁথোঁ ভালা ধরাইএ রে দেলা
দিঅ রাজা একে সাঁগে এহঅ রে বসঅলা

গালমারি তামুকঅ খাউঅলা হউ।।

জখন আরঅ তামুক খাউআ এহঅ রে হেউঅলঅ
মহিচাঁদঅ রাজাঁই তবে পাহ্‌কে কহঅলঅ
হামর বেটা পিঠঅইচাঁদেক বিহা রে দেউঅবঅ
সেহঅ খাতির তর বেটিকে কেনিআই রে দেখঅবঅ
তরঅ বেটিকে ভালা ভেঁটাউএঁ নজঅরেঁ
দেখিসুনি জাম হামে আপঅনেকা ঠহঅরেঁ

তঁই এখন ডেরি না করঅবে হউ।।

তখন আরঅ পাহ্‌রাজা এহঅ রে উঠঅইএ
আপনঅ রানিকে ভালা সভে রে কহঅইএ
রানিঁই তখন আপঅন বেটি লতাকে ডাকঅইএ
জতঅন করি আরঅ ভালা সাজগজঅ করাইএ
জখন আরঅ সাজগজ এহঅ রে হেউঅলঅ
মহিচাঁদেক পাসেঁ ছউআ এহঅ রে আউঅলঅ
হাঁঠুমাড়ি গড়অ লাগঅইএ হউ।।

মহিচাঁদে ছউআ দেখেই হেঁঠঅ রে উপরঅ
আঙপেছু আরঅ ভালা ঘুরাইএ নজরঅ
কেনিআই দেখি মহিচাঁদেক পসঁদ রে হেউঅইএ
পাহুরাজাকে তখন ভালা এহঅ রে কহঅইএ
একঘটি হরঅইদ পানি তিনটি আরুআ চারঅ
সিঁদুর কাজর অহঅ সঁগে আনে রাজা আরঅ
মই কেনিআই গননঅ করবঅ হউ।।

এহঅ কথা সুনি পাহু ঝাটঅ রে জাউঅইএ
একঘটি হরঅইদ পানি এহঅ রে আনঅইএ
সিঁদুর কাজর আরুআচার থারিঁই রে আনঅলঅ
মহিরাজাক পাসেঁ ভালা এহঅ রে রাখঅলঅ
তখন আরঅ মহিরাজা উঠি রে ডাঁড়হাইএ
সামানপাতি লেইএ আরঅ তুলসিপিঁড়হা জাইএ
রাজারানি ভালঅইএ ডাঁড়হাইএ হউ।।

তুলসিথানে মহিরাজা পুরুব মুহেঁ বসঅলঅ
ঘটিকেরি হরঅইদ পানি থারিঁই রে চারঅলঅ
তিনটি আরঅ আরুআচার এহঅ রে কুড়হাইএ
সিঁদুরঅ কাজরঅ ভালা দেলা জে পিঁধাইএ
একঅ মনে আরঅ ভালা হাঁথঅ জড়অ করি
বুড়হাবাপ মাহামাঁই মাহারাই সেঁউঅরি

তিনটি চার থারিঁই ছাড়অলঅ হউ।।

দুইটি চারকে বর কেনিআই এহঅ রে ঠানঅলঅ
একটি চারকে লগদিন বুড়হি আরঅ রে মানঅলঅ
তিনটি চার থারিক পানিঁই এহঅ রে ঘুরঅইএ
বর কেনিআই চার দুইটি লটকি রে জাউঅইএ
লগদিন বুড়হি চারটি ভালা পেছুহিঁ রহঅলঅ
পাহুরাজা রানিঁই আরঅ আইখে রে দেখঅলঅ
মহিরাজা হরঅখি উঠঅলঅ হউ।।

মহিচাঁদে উঠি এবের পাছকে কহঅলঅ
হামঅর আরঅ গনঅন ভালা এহঅ রে হেউঅলঅ
বর কেনিআইএক মিলন বড়ি রে সগুনঅ
বুঝিকে পাউলাই হামে করি রে গনঅনঅ
হামর ঘারা কবে পাছ বর দেখেলাই জাবে
সঁচিবুঝি দিনখেনঅ মকে জে সুনাইবে

দিনা সুনি ঘারা ডহরবঅ হউ।।

মহিরাজাক কথা সুনি পাছই দেলা কহি
দিনেক কথা হামি রাজা কহে পারঅম নিহি
দিন একটা তঁহি বাছেঁ ভালঅ মদঅ বুঝি
সেহঅ দিনে তহর ঘারা জাব জে সাজি গজি
তবে রাজা দিনটা টুইএক টাঁগঅ জে করঅবে
কুটুমকে জানাউএক তেঁহেঁ সমঅই টুইএক দেবে

তুরতা-তুরতি নেহি পারঅবঅ হউ।।

মহিচাঁদেঁ কহেই তবে আজু ভুড়কাবারঅ
আউএহেইক ভুড়কাবারেঁ জাবে হামঅর ঘারঅ
পাছরাজাঁই মুড় লাড়ি হঁ সঁকার করঅইএ
মহিরাজা বিদাই লেইএ ঘারঅ রে ডহরঅইএ
মহিরাজকে বিদাই করি পাছই রে রানিকে
কহে লাগঅল মনেক কথা এহঅ রে ঠানিকে

হঁকাইর দেই পাছকর রানিই হউ।।

পাছকেরি একঅ কথা ঠহরঅ আউঅলঅ
বসিকুনে একঅ মনে এহঅ রে সঁচঅলঅ
কাকরঅ জদি কাঁছ কেছ নেহি রে রহঅইএ
আপঅন ঘারেক খামখুটাকে এহঅ রে বুঝঅইএ
কাকরঅ সঁগে বুঝামতা নেহি রে করিকে
ভুল বধহই করল হামে দিনা রে ধরিকে

কুটুম বাটুমে কহতা মকে কিনা হউ।।

কিনা সাঁচি পাহুরাজা ঘারলে রে বাহারাইএ
পড়সিকর ঘার ভালা এহঅ রে ডহরঅইএ
পড়সিকর আগদুআইরে এহঅ রে ডাঁড়হাইএ
পড়সিকে নামঅ ধরি আরঅ রে হাঁকাইএ
রাজাকেরি হাঁকে ভালা পড়সি রে আউঅলঅ
পাহুরাজাক ঠিনে আইএ এহঅ রে কহঅলঅ
কহেঁ রাজা কিনা কহঅবে হউ।।

তখন আরঅ রাজাঁই ভালা কহেই টুমে টুমে
সুনে রে পড়অসি জেটা কহঁ তকে হামে
আউএহেইক ভুড়কাবারেঁ হামঅরি বেটিকরঅ
বর দেখেলাই জাইএ হেতঅউ জানি রাখেঁ বানারঅ
ধতি কামিজ সাফসুথঅর এহঅ রে করঅবে
উদিন আরঅ কনঅ কাম নেহি রে ধরঅবে
বিহানে বিহানে জে বাহারাব হউ।।

জানেক খাতির পড়সিঁই আরঅ রাজাকে পুঁছঅইএ
কন দেসেক রাজা ভালা বরঅ রে হেউঅইএ
পড়সিকর কথা সুনি কহেই পাহুঁই সঝা
গউরাজারেঁ আহে মহিচাঁদঅ রাজা
অকর বেটা পিঠঅইচাঁদকে ঠানঅলাইঁ বরঅ
ধনে মানে হেকে রাজা হামঅরি উপঅরঅ
কানে সুনলাইঁ অকর নাম হউ।।

গাঁউএক আরঅ একে একে দেলা রে বানারঅ
বেরাডুবি গেলেইক পাহুক ঘুরেইতে রে ঘারঅ
জখন আরঅ রাতি ভালা হেইএ জে রে গেলা
খাউআপিআ করি রাজা নিচিতে নিদালা
বেটিক বিহাক নামে রানিক নিদ নেহি হেউঅইএ
গটা রাইত কিনা সাঁচি জাগি রহঅইএ
রাজাকে তঅ কহেইক নিহি কনঅ হউ।।

ভিনসারেঁ পাহুরাজাক নিদঅ রে ভাঁগঅলঅ
আপনঅ তিরিআ ধনে এহঅ রে ডাকঅলঅ
সঁইআকর হাঁকঅনে জাগেই সঁউঅতি রে রানি
মু-হাঁথ ধউএক খাতির ভালা দেলেইক দতঅইন পানি
রাজাঁই আরঅ মু-হাঁথ এহঅ রে ধউঅলঅ
কুটুমঘার জাইএক খাতির আরঅ রে সঁপড়অলঅ
সে খাতির সাজে লাগঅইএ হউ।।

ইজঅর ধতি কামিজ পিঁধঅই এহঅ রে আপঅন মনে
মুড়েকর পগঅড়ি পাল্ই বাঁধেই রে জতঅনে
কাঁধেকর গামছি ভালা এহঅ রে লেউঅলঅ
ছাতা ঠেঁগা আরঅ ভালা হাঁথে রে ধরঅলঅ
সাজিগজি রাজা তবে নি হেউঅইতে বিহানঅ
গাঁউ গরাম দেউআ ভুতা করিকে ধেইআনঅ
ডহরঅলা কুটুমেকা ঘার গউ।।

পাহুরাজা সসুর ঘারা এহঅ রে পঁহচলঅ
সাস সসুরাকে আরঅ গড়অ রে লাগঅলঅ
মাঝঅঘারেঁ বসেই পাল্ সালারাকর সঁগে
গাল মারামারি চলেইক কতি না রে টঁগে
সরঅজিনে আরঅ ভালা গড়অ রে ধউআইএ
ঘারেকেরি আনার বানার এহঅ রে পুঁছঅইএ
পাল্ই তখন কহে লাগঅলঅ হউ।।

গউরাবাজারেক রাজা আউরহে মর ঘারেঁ
কেনিআই দেখেলাই অকর বেটাকর খাতিরেঁ
লতাকে দেখিকে ভালা পসঁদ রে করঅইএ
বর দেখে জাইএক তেঁহেঁ দিনঅ রে দেউঅইএ
ভুড়কাবারেই জাই হেতেইক গউরা রে বাজারেঁ
তাকঅর আগুদিনে তরা জাইহা হামঅর ঘারেঁ
ভেইআদরাক সঁগে বইঠঅকি করঅবঅ হউ।।

সসুর ঘারেঁ কহি রাখি পাহ্ মহাজনঅ
গেলা দসঅর কুটুমঘার জাঁহাঁ জাঁহাঁ মনঅ
ধরঅল দিনা ডিনিবারেঁ কুটুম রে আউঅলঅ
পড়সি ভেইআদ জনে পাহ্ই রাতিই রে ডাকঅলঅ
রাজাকেরি ঘারেঁ ভালা বইঠকি রে বসঅইএ
ভালঅ মদঅ খজ পুঁছার কথা রে হেউঅইএ

বজকে লাগঅল আরঅ কতেক নিঅর হউ।।

সভেকাকর পাসেঁ রাজাঁই কথা রে আনঅইএ
রাজাকেরি কথা ভালা সভেকাই সুনঅইএ
কাইল হামরা জাব সভে গউরা রে বাজারে
সাধেক বেটি লতাকর বর দেখেকর খাতিরে
কখন বাহারাইএ হেতেইক কথা বুঝি-সুঝি
সেহঅ নিঅর সভে ভালা রহঅব সাজিগজি

সভেকাই বুঝামতা করে লাগঅলঅ হউ।।

বুঝামতা করি সভে আউঅলঅ একমতে
বেরা উগেক আগুই সভে বাহারাব রে অনগুতে
গুড় চিউড়া আরঅ ভালা সঁগে রে লেউঅবঅ
কাকরঅ আরঅ মুহ ভালা নেহি রে দেখঅবঅ
একলক আগুই ভালা এহঅ রে বাহারাবে
কুলহিকেরি মুড়াই আরঅ বসি রে রহঅবে

কুলহিক মুড়াই দেখাদেখি হেউঅবঅ হউ।।

জখন আরঅ বইঠকি এহঅ রে ভাঁগঅলঅ
খাউআপিআ করি সভে নিচিতে সুতঅলঅ
ভিনসারে ডাকাডাকি সভেকাই উঠঅইএ
সাজাগুজা করি চিউড়া গুড়অ রে গোঁঠিআইএ
একলকঅ কুলহিক মুড়া আগুআইএ রে গেলা
একে একে আগু পেছু সভে রে বাহরালা

কুলহিক মুড়াই সভেকাই জহড়অলা হউ।।

কুলহিক মুড়াই সভে জখন এহঅ রে জহড়লা
গউরাজারেক বাটে আরঅ রে ডহরঅলা
ভালঅমদঅ গালমারি মনকে রে রিঝাইএ
বজকি বজকি আরঅ ভালা ডহরঅ খিজাইএ
চলেইতে চলেইতে একঅ জুড়িআ রে দেখঅইএ
আড়সি লেখেঁ ইজঅর পানি কলকলাই বহঅইএ

অহঅঠিনে সভেকাই ডাঁড়হালা হউ।।

জুড়িআ দেখি পাহরাজাঁই কহিকে উঠঅলঅ
একডাঁগ বেরা আরঅ এহঅ রে হেউঅলঅ
এহেঠিনে মু-হাঁথ ভালা সভেকাই ধউঅবঅ
চিউড়া গুড় সানি ভালা এহঅ রে খাউঅবঅ
রাজাকেরি কথা সুনি আরঅ রে জনাকি
মু-হাঁথ ধঅউএ নাভঅল হাঁথেক সামান রাখি

জুড়িআক পানিই মু-হাঁথ ধঅউঅইএ হউ।।

মু-হাঁথ ধইকে সভে একঠিনে বসঅলঅ
চিউড়া গুড় বাঁটি আরঅ সানি রে খাউঅলঅ
জখন আরঅ খাউআ ভালা এহঅ রে হেউঅইএ
ডাঁড়ি কড়ি সভেকাইএ পানিআ পিঅইএ
অহঅ বাটে আউএই আরঅ একঅ রে পথঅতি
মুড়েঁ পগড়ি হাঁথে ঠেঁগা পিঁধঅনে মিরজাই ধতি

সটাঁগ সটাঁগ গড়অউআ চলঅইএ হউ।।

জখন আরঅ পাসেঁ ভালা এহঅ রে হেউঅলঅ
একঅটা কুটুমেঁ ভালা অকে রে কহঅলঅ
ঘার কাঁহাঁ পথঅতিআ কাঁহাঁ রে জাউঅবে
হামরাকে সেহঅ কথা এহঅ রে জানাউঅবে
পথঅতিআই কহেই ভালা জাইঁ বেটি ঘারঅ
গউরা বাজারেক লাগঁ সুনা কথা আরঅ

হামে বেটি আনেলাইএ জাইঁ হউ।।

তখন আরঅ পথঅতিআই পুঁছেই এথরাকে
কাঁহাঁকর লাগিহা তরা সুনাইবেহে মকে
এতেক লকঅ হাঁকাডাকা তরা জে জাইহা
সেহঅ কথা মকে রিচিক এহঅ রে সুনাইহা
তহরাকে দেখি হামঅর জাগেইসাহি মনে
দেখা সুনাক খাতির কিনা জাইহা সাঁগি বানে
মকে তহরা কহিকে সুনাইবেহে হউ।।

পাহুরাজাঁই কহেই তবে সুনৈ হউ পথঅতি
হরঅদি নগরৈ ভালা হামঅরি বসঅতি
উহাঁকেরি রাজা হামে পাহু নাম হামঅরঅ
কুটুম আর পড়সি এরা সুনৈ হউ বানারঅ
গউরা বাজারে জাইহঅ হামরা জে সভেকাই
মহিচাঁদেক বেটাকে ভালা বরঅ রে দেখেলাই

কেসঅন অরা সুনাইএ রাখঅবে হউ।।
পথঅতিআই কহেই তবে সুনৈ সাঁচা কথা
মহিচাঁদ রাজাক ভালা নেখথিক ছউআপুতা
আঁটকুড়া হেকে সুনৈ রাজা মহিচাঁদঅ
আহেইক একটা পসুআ বেটা নাম পিঠঅই চাঁদঅ
টুঅরঅ টাপঅরঅ ছউআ মাড় মাগি খাইহেলা
আঁটকুড়া রাজাঁই অকে পসুআ বেটা রে করঅলা
কনঅ কথা নি রাখঅম লুকাই হউ।।

কথা সুনি সভেকাইএ চকাইএ রে গেলা
মুড়েকর উপরে জেইসন ঠেরঅ গিরঅলা
মহিচাঁদেক নিজেক বেটা নেহি রে রহঅইএ
পরেকেরি ছউআ ভালা আপঅনঅ কহঅইএ
পথঅতিআই কহেই তবে কথা হউ হামঅরে
পততুক নি হেলে চরচি লিহা হউ দসঅরে
এহে কহি বাটঅ ধরঅলঅ হউ।।

সভেকাকর মনে ভালা খুড়ুক রে জাগঅইএ
কিনা করঅব কিনা নেহি এহঅ রে সঁচঅইএ
একঅ লকে আরঅ ভালা কহি দেলা ফুটি
পসুআ বেটাকে নেহি দেউআ জাতেক বেটি
গউরা বাজার আরঅ নেহি রে জাউঅবঅ
এহে ঠিনলেই হামরা সভে ঘারা রে ঘুরঅবঅ
এসন ঘরঅনা নেহি রে মানঅবঅ হউ।।

তখন আরঅ পাহঁই ভালা কহেই রে হঁকিকে
পথঅতিআক কথাঁই কাহে বসলেহে বাঁকিকে
মহিরাজাক ঘারা হামরা জাবে রে করঅবঅ
দসঅর লকেক কথা হামরা নেহি রে ধরঅবঅ
রাজা হেইএ জখন হামে ধরঅলাই দিনা
গউরাবাজার জাবে করঅব সভেকাইএ সুনা
সাঁচা মিছা হঁআই জানঅবঅ হউ।।

পাহঁ রাজাক কথাঁই ভালা সভেকাই বুঝঅলা
গউরা বাজার ডহঅর ধরি এহঅ রে ডহরঅলা
মহিরাজাক ঘারা আরঅ এহঅ রে পঁহচঅইএ
আগদুআইরে জাইএ ভালা এহঅ রে ডাঁড়হাইএ
কুটুম বাটুম দেখি মহি হরখলঅ মনে
হাঁথঅ জড়ি জহার জানাই এহঅ ঝানে ঝানে
ঘুরাইকে জহার করঅলঅ কুটুমে হউ।।

ঘেইলাঁই ঘেইলাঁই হরঅইদ পানি এহঅ রে আনঅইএ
ঘাটঁই ঘাটঁই আরঅ ভালা কুটুমকে দেউঅইএ
কুটুম সভে একে একে গড়অ রে ধউঅলঅ
তাকঅরেকা বাদে ভালা চঁউরিমেলাঁই বসঅলঅ
টুইএক বাদে আরঅ ভালা মহিচাঁদঅ রাজাঁই
মতিহারঅ কইলকা ভালা আনঅলঅ জে সাজাই
সভে কুটুমে হঁকা টানঅইএ হউ।।

তামুক তুলা খাউআ ভালা এহঅ রে হেউঅলঅ
একঅর বাদে বর দেখঅব কথা রে উঠঅলঅ
পিঠঅইচাঁদকে সাজাই সুজুই নাউআ রে পিঁধঅনে
হাজির করাউলেক রাজাঁই কুটুমেকর ঠিনে
পিঠঅইচাঁদেঁ কুটুমকে আরঅ গড়অ রে লাগঅলঅ
সভেকাকর মাঝেঁ ভালা এহঅ রে ডাঁড়হালঅ

জনে জনে বরকে ভালঅইএ হউ।।

পিঠঅইচাঁদকে নামঅ ভালা এহঅ রে পুঁছঅইএ
বাপেক নাম মামাঘার সভে রে জানঅইএ
পিঠঅইচাঁদেঁ একে একে সভে রে কহঅলঅ
পথঅতিকর কথাক সঁগে মিলঅ রে হেউঅলঅ
সুখিআসুখি হেউআক বাদেঁ পিঠঅই গেলাক চলি
কুটুমে কুটুমে করঅত মুহঅ ভালাভালি

পাহুরাজাক ঘেরঘেরি লাগঅলঅ হউ।।

হেঁটঅ মুড়েঁ পাহুই তখন সঁচেই মনে মনে
পসুআবেটাকে বেটি দেবেই রে কেসঅনে
কুটুম বাটুম গাঁউঘারেঁ সুনলে কিনা কহতা
কেহু ভালা মানতা নেহি এহঅ নিঅর নাতা
কুটুম ভেইআদ পড়সিকে কহঅতঅ নেহঅরে
কিনা করা জাতেইক কহা তরাকর বিচারে

কুটুমে তঅ কহে লাগঅইএ হউ।।

সুনে সুনে পাহুরাজা কহেই হামঅর মনঅ
পসুআ বেটাকে বেটি নি দেবেইক কখনঅ
মহিরাজা জতেক বড়অ হেউঅক ধনিমানঅ
পিঠঅই অকঅর নহেইক ভালা বেটা জে আপনঅ
ঘুরি কেনিআই দেখাক দিন নেহি রে দেউঅবঅ
চালা সভে এবেইর হামরা ঘারা রে জাউঅবঅ

একে একে সভেকাই উঠঅলা হউ।।

জখন আরঅ কুটুম সভে চঁউরিমেলা ছাড়ি
বাহারাইএ আউঅত ভালা ফুসুর ফাসার করি
পাহুরাজাঁই আরঅ ভালা মহিচাঁদকে কহঅইএ
হামরাকর বর দেখা এহঅ রে হেউঅইএ
এখনঅ হামরা ভালা ঘারা জে জাউঅবঅ
বুঝামতা করি ঘুরি দিনা রে দেউঅবঅ

এখন তড়িক এহে কথাই রহঅলি হউ।।
মহিচাঁদেঁ কহেই তবে কিনা আর কহবঅহন
বর জখন সভেকাকর পসঁদ রে হেলঅহন
একর বাদে তরা হামর ঘারা দেখি লিহা
ঘারাকেরি ধনে আরঅ নজরঅ মিলাইহা
এহে কহি ঘারেক কেউআড় এহঅ রে খলঅইএ
চিকঅন চাকঅন ঘারেঁ ভালা মনউআ ডলঅইএ
বর আরঅ ঘার পসঁদঅ করঅবে হউ।।

কুটুমে তঅ কানে কানে করঅত কহাকহি
এহে ঘারেঁ জখন হামরা বেটি দেবেইক নেহি
একর ঘার ধন দেখি আহি কিনা লাভঅ
তাকঅর লে চালা সভে ঘারা রে জাউঅবঅ
মহিচাঁদেক কথা ভালা কাটে নেহি পারঅলা
লারিপারি অগরঅজে ঘারা জে সামহালা

ধনে পুরঅল ঘারা দেখঅলা হউ।।
ঘারা দেখি কুটুম জনা সঁপড়ে লাগঅল ঘারঅ
মহিচাঁদে কহে লাগঅল তখনঅ জে আরঅ
তহরা এখন আরঅ ভালা নাহানঅ করবেহে
খাউঅন দাউঅন করি ভালা ঘারা জে জাবেহে
খাউআ পিআ বিনু হামে নেহি জে ছাড়অবঅ
তহরিকা সঁগে আরঅ পতঅরি পাড়অবঅ
তেল আনি দেলেইন কুটুমজনে হউ।।

বাঁধেকা পিঁড়ে সভে এহঅ রে পঁহচলা
পিঁড়ে বসি আরঅ ভালা ঠানে রে লাগঅলা
মহিচাঁদেক ঘারা আরঅ নিহি রে ঘুরঅবঅ
এহে ঠিনলেই চালা হামরা ঘারা রে জাউঅবঅ
পাছ রাজাঁই কহেই তবে সুনী সভে জনঅ
এসঅন করা ভালঅ আরঅ নহেক জে কখনঅ
তহরা টুইএক মনে মনে বুঝি দেখা হউ।।

একঅ কুটুমে ভালা কহঅইএ পাছকে
এক বাট্টেলে কথাটা তঅ কহেহিসে ঠিকে
হামঅর কথাটা টুএক সাঁচিকে দেখঅবে
জাকঅর ঘারে তঁই আর নাতা নি জড়অবে
অকর ঘারে কেসে তবে পানিআ হেঁটঅবঅ
পানি হেঁটি কাহে ভালা দেনা রে করঅবঅ
সেহঅ দেনা সধবেসিক কবে হউ।।

তখন আরঅ পাছ রাজাঁই এহঅ রে সুনীএ
এসঅন করি ঘার পাৱা নেহি জে মানীএ
টুইএকেই নাম ভালা টুইএকেই বদনামঅ
জানিবুঝি করঅব নেহি এহঅ রে এসন কাম
পাছকেরা কথাই সভে নাহানঅ করঅইএ
নাহান করি মহিরাজাক ঘারা রে ডহরঅইএ
পঁহচি গেলা মহিকর আঁগঅনা হউ।।

বসেকেরি বইসনা রাজাঁই দেলা রে বিছাইএ
পানিকেরি ঘটি আরঅ দেলা রে ধরাইএ
সভে কুটুম বসি গেলা পাঁতা ধরি ধরি
তখন আরঅ মহিরাজাঁই দেলা রে পতঅরি
চিউড়া গুড়অ দহি ভালা এহঅ রে দেউঅলঅ
সভেকাকর পতরিই আরঅ এহঅ রে গিরঅলঅ
পেটভরি সভেকাই খাউঅলঅ হউ।।

জখন আরঅ খাউআ ভালা এহঅ রে হেউঅলঅ
মু-হাঁথঅ ধইকে সভে চঁউরিমেলাই জে বসলঅ
তখন আরঅ পাহ্ রাজাঁই সঁচেই মনে মনে
মহিচাঁদেক ঘারেঁ ভালা হেল মারেই রে ধনে
পসুআ বেটাকর হাঁথেই বেটি দেবেঁই দানঅ
ধনে মানে বেটিক হামঅর নেহি হেতেক টানঅ

এহে কথা সভেকে সুনাইঅল হউ।।

পাহ্ রাজাক সালাই তখন পাহ্কে কহঅলঅ
পিঠইচাঁদকে তর জখন ভালঅ রে লাগঅলঅ
হামরা তবে মিছাই মিছাই কাহে করবঅউ মানা
মহিচাঁদেক সঁগে তবে করেঁ বিহাক দিনা
গউরাক রাজাঁই সুনিকুনে সভেকে কহঅইএ
তহরা আরঅ কেনিআই তরফ এহঅ রে হেউঅইএ

দিনটা তঅ তহরাই করঅবে হউ।।

পাহ্‌কর কুটুমে ভালা কহঅইএ পাহ্কে
বুঝিসুঝি বিহাক দিন ঠানেই হেতঅউ তকে
পাহ্ রাজাঁই কহেই তবে এতেক লক রহেইতে
হামি একাই দিনটা ভালা করঅম কিনা হঁতে
ভালঅ দেখি তহরাই একটা দিনঅ রে বাছিহা
একর মাঝেঁ তহরা ভালা মকে না রাখিহা

তবে দিনটা টুইএক বাড়হাইকে করঅবে হউ।।

তখন আরঅ সভে কুটুম বুঝামতা করি
মহিচাঁদ রাজাকে ভালা বসলঅ রে ধরি
তঁই লাগিস বরেক বাপ সуне কথা তবে
বিহাক দিন ধারিজ ভালা তঁহি রে করঅবে
তখন আরঅ মহিচাঁদেঁ দেলা রে সুনাইএ
আজু তঅ ভুড়কাবার এহঅ রে গনাইএ
আউএহেক ভুড়কাবারেই হেলেইক দিন হউ।।

দিন ধরিজ আরঅ ভালা এহঅ রে হেউঅলঅ
কুটুম সভে আরঅ ভালা ঘারা রে সঁপড়অলঅ
তখন আরঅ মহিচাঁদেঁ কহেই জড়ি হাঁথঅ
খাউঅন দাউঅন করি লিহা রাঁধাহেইক জে ভাতঅ
সভেকাকর ঠিনেঁ হামেঁ কহেইহন নেহঅরি
ঘারা জাবেহে তহরা খাউআ-পিআ করি

তাকর আগু নি হেতেইক বিদাই হউ।।

বড়অ দেখি খাসি ভালা এহঅ রে কাটঅইএ
মাস ভাত তিঅন আরঅ রাঁধা রে হেউঅইএ
জখন আরঅ রাঁধারাঁধি এহঅ রে হেউঅলঅ
পানিকেরি ঘটি রাজাঁই ধরাইএ দেউঅলঅ
ঘটি ধরি সভে কুটুম খাইএ রে বসঅলা
আমভা পুরঅন করি সভে এহঅ রে খাউঅলা

দহরা তেহেরা পরসনঅ ঘুরঅলঅ হউ।।

জখন আরঅ খাউআপিআ এহঅ রে হেউঅইএ
মহিরাজাক ঠিনে তখন বিদাই রে মাগঅইএ
পাহুরাজাক সঁগে মহি আঁকাইড়অ লেউঅলঅ
গড় লাগালাগি ভালা এহঅ রে হেউঅলঅ
মহিরাজাঁই আরঅ তখন বিদাই রে দেউঅইএ
সভেকা কুটুমঅ ভালা ঘারা রে ডহরঅইএ

ঘরঅনা তঅ জড়াইএ গেইল হউ।।

কুটুম বাটুম সভে ভালা বিদাই হেইএ গেলা
মহিচাঁদেঁ রানিক সঁগে করে লাগঅল সলা
কুটুমঘারেঁ নেউতা বুলা সারভার মুহামুহি
ভজেক আড়াপাটা আরঅ হেলা কহাকহি
ভাই ভেইআদ ডাকি ভালা আপাভার দেউঅলঅ
সভেকাকর সলা ভালা এহঅ রে লেউঅলঅ
বুঝামতাঁই রাতিআ হেউঅলঅ হউ।।

বিহানে উঠি মহিচাঁদঅ মু-হাঁথঅ রে ধইকে
নেউতা দেউএ বাহারাইএ টহলুকে রে লেইকে
দুই এক দিনেক ভিতরেই নেউতা পুরাইএ রে দেলা
গাঁউঘার হিতমিতান বাকি নেহি জে রাখঅলা
বিহাঘারেক সভে সামান জগাড়া হেউঅলঅ
রেবাইর লগঅন পাইরাই ভালা ভুড়কাবার আউঅলঅ

কুটুমবাটুম পঁহচে লাগঅলা হউ।।

মহিচাঁদেঁ কহে লাগঅল টহলুকে রে ডাকি
গটা গউরাঁই কেহু জেসঅন নেহি রহঅত বাকি
ঘারেঁ ঘারেঁ সামহাই ভালা কহিকে আউঅবে
রাজাঘারেক বিহাঘারেঁ সভে রে পঁহচঅবে
রাজাকেরি হুকুম মানি টহলু রে চলঅলঅ
গটা গউরাঁই আরঅ ভালা নেউতিএ দেউঅলঅ

সভে লকঅ জড়া হেউঅলঅ হউ।।

কুটুমে কুটুমে রাজাক ভরি গেলেইক ঘারঅ
হবেকর লহঅরঅ খেলেই ভিতরঅ বাহারঅ
জাকঅর জেটা কাম ভালা আড়াহানে আড়াহানে
করে লাগঅল রিঝেঁ রঁগেঁ মানে রে গুমানে
মরদনাকর কাম ভালা মরদনাঁই করঅইএ
মেহেরারুক কাম আরঅ মেহেরারুকই সারঅইএ

ছুটু ছউনারা কুদিএ বুলঅত হউ।।

লাপিত লাপিতাইন বিরিত ধরি রাজাঘার আউঅলঅ
লাপিতেঁ তঅ কামাঝামা করে জে লাগঅলঅ
লাপিতাইনে মেহেরারুকে রঁগঅ রে পিঁধাইএ
বাখঅইরেকর একঅ বুড়হিঁই তেলঅ রে বসাইএ
হরঅইদ চার লেইএ লাপিত ঘারেঁ ঘারেঁ গেলা
হরঅইদ তেল লেউএক খাতির জানাইএ রে দেলা
গাঁউ ভাঁগি লক ভালা সভে আউঅলা হউ।।

ডম ডমিন আরঅ ভালা এহঅ রে আউঅলঅ
বিহাক ডালা সাজনি ডালা নটঅই রে আনঅলঅ
তাঁত্টিই আরঅ লুগাপাটা এহঅ রে আনঅইএ
জাকঅর জেটা আনেক কথা আনি রে দেউঅইএ
ছামড়া বাঁধা মাড়ুআপুজা জেঠাঁই জে করঅলঅ
বনঅমালা আরঅ ভালা আজাঁই সাজাউঅলঅ
বিহাগিত্তে বানঅ খেলি জাই হউ।।

বিহাকেরি নেগিজগি এহঅ রে চলঅইএ
বড়িপাড়া খুভড়াভাত সভে জে হেউঅইএ
সঁগে সঁগে খাউঅন দাউঅন হেউএ রে লাগঅলঅ
কুটুমে বাটুমে ভালা ঘারা রে ভরঅলঅ
বিহাক ডালা সাজনি ডালা রান্দিই রে সাজাইএ
হেহঅলমাটি, খাপটি ভাঁগা কনঅ বাদ নি রহঅইএ
ঠানি ঠানি সভে মুহাউলা হউ।।

তবে আরঅ গাঁউএক লক রাজাকর আড়হানে
ঝানে ঝাপানে ঠেসি গেলা গাড়ি রে সাজানে
কেহু কেহু পালকি ভালা সাজানে ঠেসঅলঅ
সাজানে গুজানে কাঁহুঁ ফাদা নি রাখঅলঅ
জখন আর বেরাডুবা হেইএ জে রে গেলা
বর সঁপড়া খাইএক খাতির টহলুঁই জানাই দেলা
বরিআত জাউঅইআ সভেকাই আউঅলঅ হউ।।

রাজাকর আঁগনাঁই সভে খাইএ রে বসঅলা
কেহু আরঅ পতরি ভালা দেউএ রে লাগঅলা
পতরিঁই আরঅ সভেকাই পানি রে পাউঅলঅ
তাকর বাদে পতরিঁই পতরিঁই ভাতঅ গিরঅলঅ
ডাইল তিঅন নুন আরঅ দেলা বাঁটি বাঁটি
ভাতেক উপর মাস আরঅ চলেইক ডাঁটি ডাঁটি
বর সঁপড়া ভাত খাউআ চলঅলেক হউ।।

বিহাক সারভার সভে ভালা হেলেক মুহাজুঁহাঁ
নেগিজগিক কাম আরঅ আহেইক জাঁহাঁ জাঁহাঁ
পিঠঅইচাঁদেক বহনঅই নাতাক ঘড়া রে হেউঅলঅ
তৈঁহি তঅ আরঅ ভালা বাঁধঅ কড়ি দেউঅলঅ
বর ভালা সেহঅ বাঁধে এহঅ রে নাহাইএ
মামাঘারেক বরেক সাজ এহঅ রে পিঁধঅইএ

মামাঘারেক আনঅল খাইএক খাউঅলঅ হউ।।
বাজ বাজনাঁই বর ভালা আমা তরৈঁ গেলা
বহনঅইএঁ আরঅ ভালা কাখনা বাঁধি দেলা
মামি মসি জেঠি কাকি অমলঅ রে খাউঅলঅ
সভেকর আঁখিরে অমলঅ রানিঁই খাউঅলঅ
জখন আরঅ অমলঅ খাউআ এহঅ রে হেউঅলঅ
কাঁহাঁ জাহিস রানিঁই বরকে এহঅ রে পুঁছঅলঅ
বরৈঁ কহঅল কামিন আনে জাহঁ গউ।।

বর বরিআত সাজি গজি এহঅ রে সঁপড়অইএ
বিহাক সারভার সাজনি ডালা সভে রে লেউঅইএ
পিঠঅই চাঁদকে নিমছি রানিঁই পালকিঁই বসাই দেউঅলঅ
দসর একটা পালকিঁই ভালা মহিচাঁদ উঠঅলঅ
এক সঅ দুই সঅ তিন সঅ গাড়ি জড়িএ রে দেলা
বড়অ বড়অ বরঅদ ডাঁগঅর চলে রে লাগঅলা
হরঅদি নগরঅ চলি গেলা হউ।।

বাজ বাজনাঁই আরঅ ভালা সাটি রে লেগঅইএ
সুতঅল জিআ আরঅ ভালা এহঅ রে জাগঅইএ
বরঅদেকর ঘাঁটিক সবঅদ মানাই লাগঅল ভারি
মসালেকর আলঅঁই ভালা পঁছঅইএ আঁধারি
বর আর বরিআত সভে চলঅত রিঝে রুঁগেঁ
জৈঁই জেসঅন ফুরতি করঅত আপঅন আপঅন টুঁগেঁ
গাড়িক লাতাইড় সিরালে না সিরাইক হউ।।

গটা গউরাক লকেঁ আরঅ ভালি রে রহঅইএ
বড়ি ঠাঁঠেঁ জাঁক জমঅকেঁ বর বরিআত জাউঅইএ
গউরা বাজারেকর লকেঁ এসঅন টহঅবরেঁ
বর বাহারাই দেখঅত নিহি কবঅউ রে নজঅইরেঁ
মহিচাঁদকে সভেকাইএ করঅতঅ সাবাইসঅ
ঠাটবাটেঁ পাহ্ রাজাকে দেখাই দেতেইক রাইসঅ

এসন রাজা হাজারে একঅটা হউ।।

গাঁউএকেরি কুলহিক মুড়াঁই বরঅ বরিআতঅ
গরাম মাঁইকে নমঅ করঅত জড়ি দিঅ হাঁথঅ
গরাম মাঁইএক সেঁউরন করি সভেকাই উজালা
ডেগে ডেগে হরদি নগঅর পঁহচিএ রে গেলা
মহিচাঁদঅ এবেইর ভালা পালকি লে নাভঅইএ
কুলহিক মুড়াক নেগি-জগি এহঅ রে সারঅইএ

তিন ঠপা সিঁদুরঅ ভুঁইএঁ গিরাউলা হউ।।

বাজনাকর টাসিলেঁ হরদি নগর রে জাগঅলঅ
কুলহিকর দুআইরে ভালা সভে জে আউঅলঅ
গাড়িকর লাতাইড়অ দেখি আচাক সভেক মনঅ
আজু তড়িক কেহু নি দেখঅত রে এসঅনঅ
পাহ্‌কর দুআইরে বর পঁহচিএ রে গেলা
বর দেখেক খাতির সভে এহঅ রে বাহরালা

চাঁদেক নিঅর বর জে দুআইরে হউ।।

কেনিআই ঘারেক লকেঁ ভালা সভে রে বরিআতে
গড় ধউআ পানি আরঅ দেলা হাঁথেঁ হাঁথেঁ
গড় হাঁথ ধঅইকে সভেকাইএ বসলা ছামড়া তরেঁ
বিহাক গিতেক গহঅগহি চলেক কেনিআই ঘারেঁ
বিহাক সারভার সাজনি ডালা ছামড়া তর পঁহচলঅ
কেনিআইএক ভউজিঁই আরঅ চকঅ রে পুরঅলঅ
বর কেনিআইএক কাকারা ডুভা ভাজঅন সারঅলা হউ।।

কেনিআইকে আরঅ ভালা ছামড়া তর আনঅইএ
সনা পিতঅর আরঅ ভালা এহঅ রে করঅইএ
জখন আরঅ সনা পিতঅর পাইরাইএ রে গেলা
কেনিআইকে নেগে জগে ঘারঅ রে ভিতরাউলা
তাকঅর বাদে কেনিআই ভালা মহল তর জাউঅইএ
নেগে নেগে মেহেরারু ভালা গিত রে গাহঅইএ

মামি মসি মাই অমলঅ খাইএ ঘারঅ সামহালা হউ।।

বরকে আরঅ গুআটিকা করি রে জতঅনে
ছামড়া তরকে লেলে গেলা নেগেকর বাঁধঅনে
পিঠঅইচাঁদঅ ছামড়া তরৈ এহঅ রে ডাঁড়হালঅ
সালা ধতি আরঅ ভালা এহঅ রে হেউঅলঅ
পান খাউআ খাউই ভালা সালাকর সঁগে
পাইরাইএ গেলেইক আরঅ কতেক রিঝেঁ রঁগে

সালাই বরেক পগড়ি ধতি লুটঅলা হউ।।

ডালাই করি কেনিআইকে ছামড়া তর আনঅইএ
হরঅইদ গাবঅল সাড়ি ভালা অঁগে রে মানাইএ
বর-কেনিআই মুহামুহি এহঅ রে বসঅলঅ
মালা বদঅল সিনঅই বদঅল আরঅ রে হেউঅলঅ
কাকাক করাই কেনিআই ভালা এহ রে বসঅইএ
বরৈ আরঅ কেনিআইকে সিঁদুরঅ ঘঁসঅঅইএ

সভেকাই কহঅলা হরি হরি বল হউ।।

সিঁদরাদান জখঅন আরঅ পাইরাইএ রে গেলা
সিঁদরাদানেক গিতৈ ভালা মেহেরারু মাতঅলা
বরৈ আরঅ কেনিআইকে ধরি নিজেক হাঁথে
ডাঁড় করাউলেক কেনিআইকে আপঅন নেগাবাটে
কেনিআইএক বহিনে আরঅ গড়অ রে ধউঅইএ
খাঁখাড়ি ধরা নেগ ভালা এহঅ রে করঅইএ

বর কেনিআইকে ঘারঅ সামহাউলা হউ।।

সিঁদরাদানেক বাদে পাহুঁই কহে লাগঅল বাতঅ
সভে কুটুমে খাইলিহা সিঁদরাদানেক ভাতঅ
কুটুম-বাটুম পাঁতাধরি এহঅ রে বসঅলঅ
পতরিঁই পতরিঁই ভাত ভালা এহঅ রে পরসঅলঅ
বেহাই পতরি রাখি আরঅ বেহাইকে ডাকঅইএ
নাতাক টানে বেহাই বেহাই এহঅ রে বসঅইএ
পতরি বদঅল করি দেখা এহঅ রে খাউঅলা হউ।।

জখন আরঅ এহঅ ভালা হেলেক রে বিহানঅ
বর কেনিআইকে আরঅ ভালা বসাইএ চুমানঅ
চুমানেকর বাদে আরঅ ঘারভরা হেউঅলঅ
একে একে নেগি-জগি নিপটে রে লাগঅলঅ
নেগি-জগি আরঅ ভালা নিপটঅনেকর বাদে
বরিআতরাকে ডাকিকুনে কহেইন মহিচাঁদে
সুনা সুনা কুটুমঅ আপঅন হউ।।

তহরা সভে মরজাইত এহঅ রে রহঅবে
মরজাইতেক খাউঅন দাউঅন আরঅ রে করঅবে
মঁই এখঅন গউরাবাজার এহঅ রে চলঅল
হামঅর মনেক কথা ভালা সুনাইএ রে দেল
বর কেনিআই লেইএ তহরা এহঅ রে জাউঅবে
এখন তহরা সিনান নাহান আরঅ রে করঅবে
সভে কিছু বুঝাইএ রাখঅলঅ হউ।।

পাহুঁ রাজাকে আরঅ ভালা কহে রে লাগঅলঅ
বিহাকেরি কাম বেহাই নিপটিএ জাউঅলঅ
বর বরিআত সভে ভালা এহঅ রে রহঅইএ
হামঅরিকা রহা আরঅ নেহি রে হেউঅইএ
গউরা বাজার মকে ভালা আগুআই জাইএ হেতি
হরঅস মনে বিদাই দিহা রহঅলি বিনঅতি
আগুআই নি গেলে হেতেইক হপঅসটঅ হউ।।

বেহাইএঁ বেহাইএঁ আরঅ আঁকাইড়অ লেঅলঅ
বঁহরঅতাক দিন ভালা এহঅ রে হেউঅলঅ
পাহ্ রাজাঁই আরঅ ভালা বিদাইঅ দেউঅইএ
পালকিঁই চঘি মহি রাজা ঘারা রে ডহরঅইএ
বর বরিআত মরজাইত এহঅ রে রহঅলঅ
আমভা পুরুন ভজ ভালা সভেকাই খাউঅলঅ
খাইদাই বর-বরিআত করঅলা সাঁথান হউ।।

মহিচাঁদঅ গউরাবাজার এহঅ রে পঁহচলা
পিঠঅইএকর বাপঅতি টিঁটা চলি জে রে গেলা
লক জন ডাকি ডাকি এহঅ রে জহড়াইএ
আড়হাই রলাক ঘার ভালা জুতিআ রে করাইএ
জখন আরঅ জুতিআঅল এহঅ রে হেউঅলঅ
নিজেকর ঘার ভালা আরঅ রে আউঅলঅ

ভজেক আড়াপাটা করে লাগঅলা হউ।।

ঘুরিদিন বাজবাজনাঁই বর-বরিআত এহঅ রে আউঅলঅ
গটা গউরাবাজার ভালা আরঅ ঘুরাউঅলঅ
জখন আরঅ পঁহচি গেলা কুলহিকেরি মুড়া
কুলহিক মুড়াঁই পিঠঅই চাঁদেক বাপঅতি রে টিঁডহা
বর কেনিআই উহাঁই ভালা এহঅ রে রাখঅলঅ
মহিচাঁদে আপঅন ঘারা নেহি রে লেগঅলঅ

আড়হাই রলাক ঘারেঁ ঠহঅরঅ হেউঅলঅ হউ।।

গাঁউএক লকেঁ মহিচাঁদকে এহঅ রে কহঅইএ
তর রাজা এতেক বড়অ মহঅলঅ রহঅইএ
বর কেনিআই কাহে কুলহিক মুড়াঁইএ রাখলেসিন
আড়হাই রলাক ঘারেঁ ভালা ডেরা বাঁধি দেলসিন
তঁই রাজা হামরাকে কহি জে সুনাইবে
তহর মনেক বিবেচনা এহঅ রে জানাইবে

কাহে রাজা এসঅনঅ করঅলে হউ।।

মহিচাঁদেঁ লকেক কথাই জবাব নি দেউঅলঅ
রানিক মানা করঅল কথা দাবাইএ রাখঅলঅ
বর কেনিআই কুলহিক মুড়াইএ হঅ রে রহঅলা
গাঁউএক লক একে একে ঘারা চলি গেলা
পিঠঅইচাঁদেঁ মনে মনে হঅ রে সঁচঅইএ
কিনা লাগি রাজা বাপেঁ এসঅনঅ করঅইএ

ভিতঅরে ভিতঅরে কাঁদে লাগঅলঅ হউ।।

ঘুরিদিনঅ বঁহরঅতা হঅ রে আউঅলঅ
মহিরাজাক ঘার ভালা কুটুমে ভরঅলঅ
গটা হরঅদি নগঅরেকর কুটুম বাটুম আরঅ
পাহুরাজাঁই লেইএ আনঅল মহিচাঁদেক ঘারঅ
জখন আরঅ পাহুরাজাঁই হঅ রে সুনঅইএ
বর কেনিআই কুলহিক মুড়াইএ হঅ রে রহঅইএ

সুনিকুনে হাইচকি লাগঅলঅ হউ।।

মহিচাঁদেক মহঅল দেখি ঘরঅনা জড়অইএ
পসুআ বেটাকর হাঁথে বেটি রে দেউঅইএ
পাহুরাজাক মুড়েঁ ভালা ঢুকঅলঅ ঘেরঘেরি
কিনা করঅম কিনা নেহি সঁচেই মুড়অ ধরি
রাজাকর মহঅলেঁ বেটিই ঠহঅর নি পাউঅলঅ
কুলহিকেরি মুড়াই ভালা বসঅতঅ হেউঅলঅ

বেটিকে মু দেখাউবেই কেসঅনে হউ।।

পাহুক সঁগে বর দেখেলাই আউরহঅত রে জাখরা
কথাক কাঁড়েঁ পাহুক দিলা করঅইএ বাঁঝঅরা
পুসুআ বেটাকে বেটি দেউঅইতে করঅরহঁ মানা
ধনঅ দেখি তখন রাজা হেই গেলে জে কানা
বেটিক সুখ দেখেক খাতির দুখেঁ রে ডুবাউলে
চাঁদেক নিঅর বেটিকে আইজ জঁঅতে মরাউলে
তঁই রাজা মাহাপাপি গনালে হউ।।

একর অকর কথা সুনি পাহ্ রাজাক মনঅ
দুখেকেরি আইগে ভালা দগদগাই জেসনঅ
নিজেই নিজেকে রাজাঁই ছি থু রে করঅইএ
মহিচাঁদকে ডাকি ভালা এহঅ রে করঅইএ
পসুআবেটাকে আপঅন বেটা রে করঅলে
বিহা দেইএ কাহে তবে বাহারে রাখঅলে

এখন মর বেটিক কিনা হাল হেতেইক হউ।।
মহিচাঁদেঁ কনঅ কথাক জবাব নিহি দেউঅলঅ
পাহ্রাজাক কথা সুনি সুগুমে রহঅলঅ
আইখ রাগাঁইএ পাহ্ তখন আইগেকর নিআরঅ
আপঅন কুটুম বাটুম লেইএ হেউঅলঅ বাহারঅ
মহিচাঁদেক ঘারেঁ ভালা পানি নি হেঁটঅলঅ
গউরাবাজার ছাড়ি সভে ঘারা রে ডহরলঅ

মহিরাজাঁই ভালিএ রহঅলঅ হউ।।
বেটিক সঁগে পাহ্ রাজাঁই দেখা নি করঅলঅ
ঘুরাই লেগেক কথা মনে নেহি রে সঁচঅলঅ
লরঅ পাঁছি পাঁছি আরঅ ঘারা চলি গেলা
রাজ মহল দেখি ভালা বকা রে সাজঅলা
কুলহিক মুড়াঁই বর কেনিআই একাই রে রহঅইএ
অরাকেরি পাসেঁ ভালা কেহু নি জাউঅইএ

রাজাক মহঅল সপুনে রহঅলঅ হউ।।
মহিচাঁদেক ঘারেঁ ভালা ভজঅ রে চলঅইএ
গটে গউরাবাজার আরঅ ভজঅ রে খাউঅইএ
বর কেনিআই আরঅ ভালা দেখি নি পাউঅইএ
ই উ কানাকানি এহঅ রে ফদড়অইএ
বর কেনিআই কুলহিক মুড়াঁই ভজ রাজাঘারেঁ
এসঅন কাম মহিরাজাঁই করেই কন বিচারেঁ
কেহু কনঅ বুঝি নি পাউঅইএ হউ।।

পিঠাইচাঁদ আর লতাক সঁগসার জিবঅন

মহিচাঁদেক ঘাৱেঁ ভজ পাইরাইএ রে গেলা
আমভাপুৱা গটা গউৱা ভজঅ ভালা খালা
দিনেঁ দিনেঁ আরঅ ভালা দিনঅ রে বিতঅলঅ
পিঠাইচাঁদ লতাকে দেখে গাঁউএক লক আউঅলঅ
দিঅ লক বসি বসি সঁচঅত রাতি দিনা
কামপাইট জানঅত নেহি, কৱঅত ভালা কিনা

জিনগানি পুহাউঅত কেসঅনে হউ।।

সাঁচি সাঁচি দিঅ পাৱানি জেৱা হেই জাউঅইএ
গাছেক ফৱ ফুৱ খাইএ দিনা বিতাউএ লাগঅইএ
খাইএক টানে ঝাটকি ঝাটকি বুড়হা লেখেঁ হেলা
এক দিনা মহিৱাজা অৱাক ঠিন আউঅলা
পিঠাইচাঁদ লতাকে ভালা দেখেইন নিজেক আইখেঁ
সআঁগ ঝাড়ি বুড়হা দেখাত খাইএকেৱি দুখেঁ

ৱাজাক মনে ভাভঅনা জনমলা হউ।।

মহিচাঁদেঁ তখন আরঅ সঁচেই আপঅন মনে
এৱাকেৱি দুখ ভালা দেখতা এখন কনে
কিআ লাইএ কৱলঁ ভালা ঘাৱা লে বাহাৱঅ
ধনঅ দেখাই বড়অ কৱি নি দেহেই আহাৱঅ
কনঅ কামঅ এতিদিনে নেহি রে সিখাউলঁ
বসাই বসাই আদঅৱে ভালা দুধভাত খাউআউলঁ
কাম সিখাউলে খাটিএ খাইতেলাক হউ।।

ৱাজা তখন সটসটাই ঘাৱা জে আউঅইএ
গঁগাদৱি ৱানিকে ভালা এহঅ রে কহঅইএ
পসুআ বেটা পিঠাইচাঁদ ভুখেই বুড়হাই গেলাক
ভুখেঁ সুখি সুখি ভালা মৱাক দাখিল হেলাক
তঁই ৱানি অখৱাকে খাইএক জে দেউঅবে
হামঅৱি এহে বিনতি এহঅ রে ৱাখঅবে
নেহি হেতি ধনেকৱঅ কমি হউ।।

রাজাকেরি কথা সুনি গঁগাদরি রানি
কহে লাগঅল মনেক কথা ভালঅ-মদঅ সানি
এতেক দিন পিঠঅইচাঁদ একাই রে রহঅইএ
রাজাক বেটি বিহা করি দুখ রে সহঅইএ
এখন হামরা দুই লক এহঅ রে দেখঅবঅ
বিনা কামে খাইএক ভালা নেহি রে দেউঅবঅ

তহরা রাজা কথাটা সুনঅবে হউ।।

মহিচাঁদেঁ তখন আরঅ কহে লাগঅল কথা
বারঅ বছর রাখলেসিক করি আদঅরেকর পুতা
কনঅ দিনে কনঅ কাম নেহি আড়হাউলে
কনঅ কাম সিখেক খাতির নেহি রে বাতলাউলে
ঘুরি বসি খেলিকুদি বিতঅলেকঅ দিনা
সেহঅ ছউআই আজু ভালা করি দেতঅউ কিনা

তঁই রানি বুঝিসুঝি দেখেঁ হউ।।

রাজাকেরি কথাই রানিই কহে রে লাগঅলঅ
বেটাছউআ হেইকে বুইধ নেখঅন জে তহঅরঅ
হামঅরি কথা রাজা এহঅ রে সুনিহা
গটা গউরাক গরু তরা পিঠঅইএ গতাই দিহা
অকঅর বহু হামরাক ঘারেঁ কামঅ রে করঅতি
বাড়হা-সড়হা ধউআ পঁছাই সঁগঅ জে দেউঅতি
খাটালিক ভাতেঁ জিনগানি পুহাউতা হউ।।

রানিকেরি কথা সুনি চলঅলঅ মহিচাঁদঅ
আড়হাই রলাক ঘারেঁ জাঁহাঁ আহে পিঠঅইচাঁদঅ
জখন আরঅ পঁহচি গেলা পিঠঅইএক দুআরি
পিঠঅইচাঁদ পিঠঅইচাঁদ কহি ডাকেই নামঅ ধরি
মহিচাঁদেক রাউ ভালা এহঅ রে পাছনাইএ
রাউ দেইএ আরঅ ভালা ঘারা রে বাহারাইএ
মহিচাঁদেক পাসেঁ আউঅলঅ হউ।।

রাজাঁই তখন কহে লাগঅল আপঅনঅ বিচারেঁ
চালে রে পসুআবেটা হামঅরিকা ঘারেঁ
তরঅ বহকে আরঅ ভালা সঁগে লেইএ জাবে
দিঅ লককে কাম দেবঅউ কাম করিএ খাবে
মহিচাঁদেক কথা সুনি দিঅ রে পারানি
হঁ সিঁকার করলা ভালা মনে ভাভি গনি

রাজাক সঁগে চলি আউঅলঅ হউ।।

মহিচাঁদেক ঘারা ভালা এহঅ রে পঁহচলঅ
অরাকে দেখিকে রানি পারসেঁ রে আউঅলঅ
দিঅ লকেঁ রানিকে তখন গড়অ রে লাগঅইএ
গড়েকেরি ধুরা ভালা মুড়ে রে লেউঅইএ
রানিঁই তখন চঁউরিমেলা এহঅ রে দেখাইকে
বসেলাই কহঅল ভালা পিঠঅই আর লতাকে

ঠাইএ করি গুড় চিউড়া দেলেইন হউ।।

রাজাঁই তখন গটা গউরা এহঅ রে ডাকঅলঅ
সেহঅ হাঁকেঁ গাঁউএক লক সভেকাই আউঅলঅ
গাঁউএক লকেঁ আরঅ ভালা জানে রে খজঅইএ
কিআ লাগি গটা গউরা এহঅ রে ডাকঅইএ
সেহঅ কথা তঁহি রাজা হামরাকে সুনাউবে
তহঅর আরঅ মনেক কথা এহঅ রে জানাউবে

সভেকাই কহে লাগঅলঅ হউ।।

মহিচাঁদেঁ তখন আরঅ কহে রে লাগঅইএ
পিঠঅইচাঁদেঁ আরঅ ভালা সঁগসারঅ করঅইএ
তরা এখন হামঅর কথা এহঅ রে সুনঅবে
গটা গউরাক গরু তরা গতনু রে দেউঅবে
অকঅর বহু হামঅর ঘারেঁ কাম জে করঅতি
রানিকেরি আড়হান বাড়হান এহঅ রে সুনঅতি
কাম করি খাতা দিঅ পারানিঁই হউ।।

গটা গউরাক লকৈঁ রাজাক কথা রে মানঅলঅ
পিঠঅইচাঁদকে গরু সভে গতনু রে দেউঅলঅ
রাজাঁই আরঅ গাই গরু গনতি রে করঅইএ
বাহাননঅ হাজার গাই গরু এহঅ রে হেউঅইএ
মহিচাঁদেক কথাঁই পিঠঅই বাগালঅ সাজঅলঅ
গটা গউরাক গরু ভালা গতনু রে লেউঅলঅ

বুড়হা কহি সভেকাই ডাকে লাগঅলা হউ।।

নিজেক ঘারেঁ জাইএ পিঠঅই এহঅ রে বসঅইএ
মুড় ধরি আরঅ ভালা এহঅ রে সঁচঅইএ
বাহাননঅ হাজার গাই গরু গতনু রে লেলিঅন
গটা গাঁউএক লককে আরঅ গলা রে মানলিঅন
হামঅর ঘারেঁ এখন একটি সাটিকঅ জে নেখি
কেসে করি গাই গরু ঘুরাউবেইন টেকি টেকি

সুধা হাঁথৈঁ বাগালি নি সাজেই হউ।।

সঁচেইতে সঁচেইতে বুড়হা বাড়ি বাটে ভালঅলঅ
একটা আরঅ কেঁদ গাছ নজঅইরে ভেঁটঅলঅ
তুরতা-তুরতি বুড়হা তখন ঘারা রে সামহাইএ
একটা আরঅ টাঁগা ভালা লেইএ রে বাহরাইএ
কেঁদ গাছেক পাস ভালা এহঅ রে পঁহচঅলা
কমঅরেঁ পিঁধনা আরঅ এহঅ রে সাঁকটাউঅলা

কেঁদগাছেক তঅ নমঅ করঅলা হউ।।

উঁচুক মারি বুড়হা আরঅ গাছঅ রে উঠঅইএ
কেঁদগাছেক জঁটে ভালা এহঅ রে ধরঅইএ
দিঅ হাঁথৈঁ আরঅ ভালা হেঁচকা রে মারঅলঅ
সড়সড় সবঅদেঁ গাছা এহঅ রে গিরঅলঅ
ডগ কুঁদা, মুল কুঁদা কাটি রে ফেঁকঅইএ
মাঝেক কুঁদাক সলঅ হাঁথেক সইলি ডাঁগ জঁখঅইএ

ঠেসি গেলা ঠেঁগা বেনাউএ হউ।।

গটা দিনঅ বুড়হাঁই ঠেঁগা ছলঅইএ ছাঁছঅইএ
জখন আরঅ বেরা ডুবা এহঅ রে হেউঅইএ
ঠেঁগা ছলা ছঁছা ভালা সাইতঅ রে হেউঅলঅ
ঠেঁগাটিকে আরঅ ভালা কাঁইধাঁই রে লেউঅলঅ
আড়হাঁই রলাক ঘারেঁ ভালা দেলেইক রে টেঁড়রাইএ
ঘারটা তখন আরঅ ভালা উঠঅলঅ চড়চড়াইএ

ঘার লে বুড়হি ডরেন্নে রে বাহরালি হউ।।

জখন আরঅ বুড়হি ভালা ডরেন্নে রে বাহরাইএ
বুড়হাঁই তখন বুড়হিকে এহঅ রে কহঅইএ
সুনে জে সুনে জে বুড়হি কথাটা হামঅরঅ
ডরেন্নে কাঁহাঁ বাহরাহিস হরিনি নিঅরঅ

কাহে কাঁপেহিস বুড়হি পালহাকে জেসঅনঅ
কিনা হেলঅউ সেহঅ কথা কহবে এখঅনঅ

কিনা দেখঅলে নজঅইরে হউ।।

বুড়হিঁই তখন বুড়হাকে এহঅ রে কহঅইএ
আচাক ধুঁধকুড়িঁই ঘারটা চড়চড়াই উঠঅইএ
পারাঁই বুড়হা নিহিতঅ জে জাঁকাইএ মরঅবে
ঘারেক ভিতর তরা এখন নেহি রে সামহাবে
চালা হামরা গাছ তরেন্নে ডেরা রে লেউঅবঅ
এসঅন ভাঁগঅল ঘারেঁ এখন নেহি জে রহঅবঅ

তরা হামর কথাটা সুনবেহে হউ।।

বুড়হিক কথা সুনি বুড়হা হাঁসি রে উঠঅলঅ
মনটাকে থিরঅ করাই এহঅ রে কহঅলঅ
রাজাঁই আরঅ কাম ভালা দেখাই দেলা বাছি
সেহঅ খাতির ঠেঁগা হামে বনাইকে ছলিছাঁছি
অহঅ ঠেঁগা হামে আর ঘারেঁ রে অঁগঠাউল
ঠেঁগাকেরি ভরেন্নে ঘার চড়চড়াই উঠঅলঅ

ধুঁধকুড়ি নেহি আউঅইএ হউ।।

বুড়হাক কথা সুনি বুড়হিঁই নিকাসঅ গাড়অইএ
ঘারা সামহাই আরঅ রাঁধাবাঁটা রে করঅইএ
জখন আরঅ রাঁধাবাঁটা এহঅ রে হেউঅলঅ
দিঅ লকে আরঅ ভালা বিআরি খাউঅলঅ
খাউআ পিআ করি অরা নিচিতে সুতঅইএ
আড়হাই রলাক ঘারেঁ রাতি সুখে রে বিতঅইএ

দুখেক কথা মনে নি আউঅলঅ হউ।।

রাতি বিতি ভিনসরা এহঅ রে হেউঅইএ
ভুড়কা তারা আরঅ ভালা আকাসে উঠঅইএ
খুখড়াকর ডাকে বুড়হাক নিদঅ রে ভাঁগঅলঅ
সঁগে সঁগে বুড়হি আরঅ এহঅ রে জাগঅলঅ
বিহানেক কাম লেইএ বজকঅত দিঅ রে পারানি
দেখেইতে দেখেইতে ভালা হেলেইক রে বিহানি

বুড়হা বুড়হি ঘার লে বাহারালা হউ।।

বুড়হা তখন মু হাঁথ ধউএ গেলাক দেখা চলি
বুড়হিঁই আরঅ মু-হাঁথ ধই দেলেইক রে মড়অলি
জখন আরঅ মড়অলি দেউআ এহঅ রে হেউঅলঅ
ঘার দুআইর বাড়হা-সড়হা করে রে লাগঅলঅ
বুড়হা আরঅ মু-হাঁথ ধই ঘারা রে ঘুরঅইএ
বুড়হিক সঁগে বুঝামতা এহঅ রে করঅইএ

ঝলমলাই বেরা উগঅলি হউ।।

চিউড়া গুড় বুড়হাঁই আরঅ এহঅ রে খাউঅলঅ
সলঅ হাঁথেক সইলি ঠেঁগা হাঁথে রে লেউঅলঅ
মুড়েঁ আরঅ গামছি ভালা এহঅ রে বাঁধঅইএ
ধতি আরঅ সাঁকটঅ করি এহঅ রে পিঁধঅইএ
মাহারাই গিত ভালা জাকঅর সামহাইক কানে
সুখেকর জিনগানি পাউএই সেহঅ জে ভাইগমানে

ধনে গুনে বাঢ়অই জে ধিআ-পুতা হউ।।

পিঠঅইচাঁদে গরাম মাইকে সৈঁউরনঅ করি
ঘার লে বাহারালোক ভালা হাঁথৈঁ ঠেঁগা ধরি
গটা গউরাঁই হাঁক পাড়ি জানাইএ জে দেলা
রাউ সুনি সভে লকৈঁ গাই গরু খলঅলা
কুলহিঁই কুলহিঁই গাই গরু দেলা জে রে ডহরাই
সভে গরু পঁহচি গেলা কুলহিকর মুড়াঁই

বুড়হাঁই তখন গাই গরুকে কহঅলঅ হউ।।

সুনা সুনা সভেকাইএ বচঅনঅ জে হামঅরঅ
তরা আরঅ আইহা ভালা বাহাননঅ হাজারঅ
হামি আরঅ হেলঁ সুনা একুইড়া বাগালঅ
একাহিঁ রাখে হেতি সভেকর খেইআলঅ
ঘাঁসেঁ পাতেঁ আরঅ ভালা এহঅ রে চরবেহে
কাকরঅ কনঅ খতি ভালা নেহি রে করবেহে

নিহিতঅ সহিলি ঠেঁগাঁই মারঅবঅ হউ।।

গাই গরু সভেকে বুড়হাঁই সমুঝাইএ জে দেলা
ধলি আর সাঁউঅরি গেইআ আগুঁই রে চলঅলা
অরাকেরি পেছুঁই পেছুঁই সভেরে ডহরঅইএ
তাকঅরেকা পেছুঁই আরঅ বুড়হা রে উজাইএ
কারি পিঁপঅড় বন ভালা এহঅ রে পঁহচলঅ
গাই গরু গটা গঠ চরে রে লাগঅলঅ

বুড়হাঁই বাখান টাঁইড়অ করঅলঅ হউ।।

কারি পিঁপড় বনে গরু চরঅত ঘাঁসে পাতেঁ
বুড়হা আরঅ টুঁটুঁই বসি ভালেই ঠেঁগা হাঁথৈঁ
অহঅ বনে আরঅ একঅ বাঘঅ রে রহঅইএ
গরু দেখি আপঅন মনে এহঅ রে ঠানঅইএ
বারঅ বছঅর খাইএক হামর নেহি রে জুটঅলঅ
আইজ আরঅ খাইএক ভালা পাসেঁ রে আউঅলঅ
নেজ থসড়ি ফুরতি করে লাগঅল হউ।।

আমভা পুরুন করি বাঘা খাইএকেরি আসেঁ
লুকাই লুকাই আউএই ভালা গরু ডাভেক পাসেঁ
বাঘা দেখি গরু সভে ভিড়ভিড়াই পারাইএ
বুড়হাঁই তখন উঠি ভালা এহঅ রে ভালঅইএ
বাঘা দেখি আরঅ বুড়হাঁই হাঁগকারঅ মারঅইএ
ঠেঁগা জসাই আরঅ ভালা বাখানঅ পাড়অইএ

বাঘা তখন ঠমঅকি ডাঁড়হালাক হউ।।

বুড়হাঁই তখন আরঅ ভালা বাঘাকে কহঅইএ
তঁই আরঅ মাঁইএক দুধ এহঅ রে পিঅইএ
মঁইঅ তঅ মাঁইএক দুধা এহঅ রে পিঅলাই
দুধেকেরি গুনে মঁই বলিমান জে হেলাই
তঁই এখন হামর সঁগে লড়হাঁই রে করঅবে
জদি আরঅ হামকে ভালা এহঅ রে ভাগাউবে

তবে হামঅর গরু ধরঅবে হউ।।

সলঅ হাঁথেক সইলি ঠেঁগা জসাইএ রে ধরি
গরজি ডাঁড়হালাক পিঠঅই হাঁগকারঅ রে মারি
একঅ ঠেঁগাঁই তকে ভালা হামে রে মারঅবঁ
গরু ধরা সখটা তর পুরাইএ রে দেবঁ
বুড়হাকর হাঁগকারেঁ বাঘা এহঅ রে ডরাইএ
বহনঅই বহনঅই কহি আরঅ নাতা রে জড়অইএ

ধিরে ধিরে বুড়হাক ঠিন আউঅলঅ হউ।।

বুড়হাক ঠিনে আইকে বাঘাঁই কহঅইএ নেহরেঁ
বারঅ বছঅর আই হামে এহঅ রে বিন আহারেঁ
গরু দেখি সাঁচঅরহঁ করঅবঅ সিঁকারঅ
তকে দেখি সিঁকার ভালা হেলি নেহি আরঅ
তর গরু ধরি নেহি দেবঁ জে জিবঅনে
বনচু ঘুরাই ঘুরুই দেবঁ জাঁহাঁই রহঅত বনে
নেগা দাহিনে বাঘেঁ উড়া মালঅইট মারেই হউ।।

সভে গরু বুড়হাক পাসেঁ জড়অ রে হেউঅলঅ
বুড়হাঁই তখন বাঘকে ভালা কহে রে লাগঅলঅ
বাহাননঅ হাজার গাই গরু চিনহিহিন হামঅরঅ
এরাক বাটে কবঅউ নি দেবসিন কুনজঅরঅ
তঁই এখন আরঅ ভালা ঘারঅ রে জাউঅবে
দুপহর হেলে বাঘা ঘুরি রে আউঅবে

তকে হামি আহাঅরঅ দেবঁ হউ।।

বুড়হাক কথা সুনি বাঘা ঘারা গেলাক চলি
গাই গরু চরে লাগঅল রিঝেঁ হাঁসি খেলি
বনেকর চাটানে বুড়হা বসি রে ভালঅইএ
আরঅ কনঅ জনতু বাছেঁ এহঅ রে আউঅইএ
ঘনে ঘনে বুড়হাঁই আরঅ ঠেঁগা রে ঠঁকঅইএ
আপঅন মনে গুনগুনাই গিতঅ রে হাঁকঅইএ

নানা জাইতেক পাখুড়অ ডাকঅইএ হউ।।

বুড়হাঁই আরঅ রাজাঘারেঁ বাড়হা সড়হা করঅইএ
বাড়হা সড়হা করি ভালা বেসিআমঅ খাউঅইএ
জখন আরঅ বেসিআম খাউএ এহঅ রে হেউঅলঅ
রাজাঘারঅ ছাড়ি বুড়হি মইধ কুলহি পঁহচলঅ
মইধ কুলহিঁই লুগা ভালা এহঅ রে মেলঅইএ
ঘারেঁ ঘারেঁ চারভিজা বেসিআম খজঅইএ

বাহারাই বাহারাই সভেকাই দেউঅলঅ হউ।।

কাকরঅ ঘারেঁ সেরহা ভালা কাকরঅ ঘারেঁ পুআ
তুরুতে ডিঁগালেক চার এহঅ রে কমঅর ছুআ
গটা গাঁউএক মাঁই বহিন দেখিকে নজঅইরেঁ
বুড়হিকে আরঅ কহে লাগঅল নিজেকর বিচারেঁ
কেসঅন করি তঁই বুড়হি বেসিআম রে লেগঅবে
অহঅ কুলহি আইজ ভালা বাদঅ রে রাখঅবে
এতেক খাইএক উভে নি পারঅবে হউ।।

একঅর অকঅর কথা সুনি বুড়িঁই রে কহঅইএ
হামঅর বুড়হাক পেট ভালা নেহি রে ভরঅইএ
আইজ জদি অহঅ কুলহি রহি জাইক বাকি
কাইল কেসে খজে পারঅম নাম ডাকি ডাকি
বুড়িঁই আরঅ গটা গাঁউ আদাইঅ করঅইএ
কনঅ ঘারঅ বাদ ভালা নেহি রে রহঅইএ

আসি মন চার ডিঁগাইএ গেইল হউ।।

সভে চারকে বুড়িঁই আরঅ এক মটে বাঁধঅইএ
গটা গাঁউএক মাই বহিনকে এহঅ রে ডাকঅইএ
সভে মিলি মট ভালা এহঅ রে ধরিহা
হামঅরিকা মুড়েঁ আরঅ লাদাইএ রে দিহা
সভে মাই বহিনেঁ ভালা এহঅ রে ধরঅইএ
উঠা তঅ ধুরেক কথা লড়াউএ নি পারঅইএ

সভেকাই তঅ ঘামি সিনাই গেলা হউ।।

তখন আরঅ বুড়িঁই ভালা এহঅ রে কহঅইএ
তরাকেরি বল আরঅ নেহি রে রহঅইএ
এতেক লকে একে সঁগে উঠাউএ নি পারেইহা
কেসঅন সআঁগ লেইএ তরা বাঁচি জে রে আইহা
উঠাইএ না দেলে হামে বেসিআম লেগঅম কেসে
বুড়হা তঅ বসি আহে ভালা চারভিজাকর আসে

নিহি লেগলে ভুখেঁ মরঅতা হউ।।

তখন আরঅ দুই এক লকেঁ কহে রে লাগঅলঅ
হামরাকর বলেঁ মট ভালা নেহি রে লড়অলঅ
সেহঅ মট কেসে বুড়হি লেগবে মুড়েঁ লাদি
তর কথা সুনিকুনে মনে লাগেই ধাঁধি
কতেক বল আহঅউ তর এহে রে সআঁগেঁ
সনকাপাটি নিঅর ভালা দেখাইস টংগে টাংগেঁ
লাদাই লেলে জাঁকাই জে মরঅবে হউ।।

বুড়িঁই তখন আরঅ ভালা কহে লাগঅল দাঁদি
এক মাই-বাপেক ছুটা ভালা লাগাঁ হামি জদি
এহঅ মট একাই ভালা হামে রে উঠাউঅম
নিজেকেরি মুড়ে আরঅ লাদাই লেবে করঅম
বুড়িকেরি বল তরা দেখা বসি বসি
হাঁসি দেউঅল মু তরাক দেবঅহন জে ঘাঁসি

মট উঠাই দনদনাইএ চলি জাম হউ।।

বুড়িঁই এবৈইর আরঅ ভালা হাঁথঅ জড় করি
বুড়হাবাপ মাহামাইএ ভালা কহঅইএ সৈঁউঅরি
তরা আরঅ হামঅর দুখ এহঅ রে বুঝঅবে
আসিমন চারেক মট উঠাইএ দেউঅবে
তাকঅরেকা বাদেঁ বুড়িঁই মটঅ রে ধরঅইএ
গটা গউরাক মাই বহিনেঁ ইরখা রে করঅইএ

ভিতর ভিতর হাঁসে লাগঅলঅ হউ।।

একঅ হেঁচকানে বুড়িঁই হাঁঠুই রে উঠাউএ
গটা গউরাক মাই বহিনেক চইখ রে ফুটাইএ
দিঅ হেঁচকানে মট কাঁধে রে উঠঅলঅ
সভেকাকর দেখি ভালা হাইচকি লাগঅলঅ
তিনঅ হেঁচকানে আরঅ মুড়েঁ রে লাদঅইএ
দিঅ হাঁথঅ লাড়ি বুড়িঁ চলে রে লাগঅইএ

সভেকাইএ ভালি রহঅলঅ হউ।।

বুড়িঁ আরঅ দনদনাইএ এহঅ রে চলঅইএ
বুড়হাঁই আরঅ বেসিআম ভালা এহঅ রে ভালঅইএ
বুড়িঁ আরঅ বুড়হাক ঠিনে পঁহচি জে রে গেলা
বুড়হাক পাস জাইএ ভালা চারভিজা রাখঅলা
চারভিজা দেখি বুড়হাঁই আরঅ মু-হাঁথ ধউঅইএ
তাকঅরেকা বাদে ভালা খাই রে বসঅইএ

বুড়িঁই তখন চারভিজা বাঁটি দেলেইক হউ।।

চারভিজা বেসিআম বুড়হাঁই খঁইছাই রে লেউঅলঅ
মুসুর মুসুর করি ভালা খাইএ রে লাগঅলঅ
বুড়হি আরঅ ঘার বাটে এহঅ রে ডহরঅইএ
ঘারেকেরি আনার বানার কহি রে রাখঅইএ
জখন আরঅ বুড়হাক খাউআ এহঅ রে হেউঅলঅ
ছপললঅ গাই গরু ঘুরাউএ লাগঅলঅ

দেখেইতে দেখেইতে দুপহর হেউঅইএ হউ।।

দুপহরে গাই গরু বুড়হাঁই রে সমটঅইএ
বাথানটাইড়ে আরঅ ভালা দেলা রে গঠাইএ
গরু গঠাই বুড়হা আরঅ এহঅ রে সাঁথালঅ
সাঁথাই সুঁথুই গরুকে ঘুরি রে ডহরাউঅলঅ
ছপঅলি ছাপঅলি গরু এহঅ আরঅ রে চরঅইএ
ঘাঁসেঁ পাতেঁ চরি চরি পেটঅ রে ভরঅইএ

সভেকাকর পেট টিলটিলাইএ গেলা হউ।।

জখন আরঅ সাঁঝ বেরা এহঅ রে হেউঅলঅ
বুড়হাঁই তখন গাই গরুকে ঘার ডহরাউঅলঅ
ডহঅরে ডহঅরে গরু এহঅ রে ডহরঅলা
সতিআকর পানি ভালা এহঅ রে পিঅলা
ঘারেঁ ঘারেঁ গরু আরঅ দেলা সমুঝাইএ
মহিচাঁদেক গরু আরঅ দেলা খহঅড়াইএ

চলি গেলা আপনঅ ঘারা হউ।।

বিহানে উঠিকে বুড়হা ফুরফুইরা রে মনে
গরু লেইএ চলি জাই কারি পিঁপঅড় বনে
বুড়হিঁই আরঅ খাইএক লেগি দেইক নিতিনিতি
দুই চারি মাস ভালা এসনেই গেলেইক বিতি
বেরা উগাই বাহারাই বুড়হা ঘুরেই বেরাডুবাই
বুড়হিক সঁগে গালমারেইতে কখনে জাই নিদাই
বুড়হাক হাল বুড়হিঁই বুঝে পারেই হউ।।

একঅ দিনঅ সাঁঝেঁ বুড়হা আউঅলঅ রে ঘারঅ
বুড়হিঁই রাঁধাবাঁটা করেই সতে দিনেক নিঅরঅ
মাচিকর উপঅরেঁ বুড়হা এহঅ রে বসঅলঅ
সঁগসারেক আনার বানার পুঁছে রে লাগঅলঅ
রাঁধারাঁধি করি বুড়হিঁই কহেইক রে বুড়হাকে
সুনা সঁইআঁ একঅ কথা কহেইহন তহরাকে

মন লাগাই কথাটা সুনবেহে হউ।।

বুড়হিক কথাঁই বুড়হাঁই আরঅ দেলেইক জে রে কানঅ
থকিতে আলিসে ভালা কাজাপ হেলাইহা অসানঅ
বিহানে উঠিকে তরা জাইহা জে বাগালি
গটাদিন বিতঅহন গরুক পেছুঁই বুলি বুলি
হামি আরঅ রাজাঘারেঁ করঁ বাড়হা-সড়া
তাকঅরেকা বাদে আরঅ থাইএক লেগেক চাঁড়া

আপঅন সঁগসারেক কাম নি হেউএহেক হউ।।

পরেক কামে বাঝাই রহি বিতি জাহেইক দিনা
আপঅন ঘারেক কাম হামরা করেইহ কথা কিনা
পরেক ঘারেঁ কাম ভালা করঅব জে আর নেহি
মনেক কথা ফুটিকুনে দেলিঅন ভালা কহি
বুড়হাঁই কহেইক কিনা কাম এহঅ রে করঅবে
সেহঅ কথা তঁই মকে কহিকে সুনাউবে

দসঅর কাম তঅ জানঁ নেহি হউ।।

বুড়হাক কথা সুনি বুড়হিঁই দেখাই রে জুকঅতি
পরেক কামে খাটি এহঅ দিনঅউআ জাইস বিতি
অহঅ মাঝেঁই করে হেতি সঁগসারেকর কামঅ
আপঅনঅ সঁগসার বিনু নাহ্ কনঅ দামঅ
পেটেকেরি মাড়েঁ ভালা কতেক আর খাটঅবঅ
কবে হামরা বাড়তি ধন এহঅ রে অরজঅবঅ
পরেঁ কিনা বসাইএ খাউআউতন হউ।।

বুড়হিঁই কহেই সুন্য বুড়হা উঠঅবঅ ভিনসারেঁ
হামি আরঅ জাম ভালা রাজাকেরি ঘারেঁ
বাড়হা-সড়হা করি হামি ঘুরি রে আউঅবঅ
ঘারাকেরি কাম ভালা এহঅ রে করঅবঅ
তরা আরঅ গরু লেইএ জাবেহে বিহানে
খাইএক হামি লেগি দেবঅহন কারি পিঁপড় বনে
কথাঁই কথাঁই রাতি হেউঅলঅ হউ।।

দিঅ লকেঁ বাঁটা করি খাউঅলঅ বিআরি
নিচিতে সুতঅলা ভালা বিছঅনা রে করি
রাতি বিতি ভিনসারেঁ খুখড়া রে ডাকঅলঅ
বুড়হা বুড়হি আরঅ ভালা এহঅ রে উঠঅলঅ
নিদাই উঠি বুড়হি চলি গেলি রাজাঘারঅ
বুড়হাঁই তখন অগরি রহেই আপঅনঅ সঁগসারঅ
মু হাঁথ ধইকুন সাইতঅ করঅইএ হউ।।

রাজাকর দুআইরেঁ বুড়হিঁই ঠকঠকাই কেউআড়অ
গঁগাদরি রানিঁই ভালা খলঅইএ দুআইরঅ
কেউআড়অ খলিকে রানিঁই বুড়হিকে দেখঅইএ
দেখিকুনে আরঅ ভালা ছি থু রে করঅইএ
আঁটকুড়ি বুড়হিক মু দেখলঁ নিদাই উঠি
গাইর বাখান পাড়ে লাগেইক দাঁত কুটি কুটি
কহেই মর দিনটাই মাটি হেলি হউ।।

আঁটকুড়িঁই বুড়হিকে কহেইক রে আঁটকুড়ি
এসঅন কথা সুনি বুড়হিক মনটা গেলেইক পড়ি
রাগেঁ দুখেঁ বুড়হিঁই ভালা এহঅ রে ঠানঅইএ
জেহঅ রানিঁই বিহা দেইএ মকে রে আনঅইএ
ছিটপিটাই বুড়হি আপঅন ঘারা রে ঘুরঅলি
কাঁদি ভাভি আরঅ ভালা গুমঅরি মরঅলি
কিনা করতি বুঝি নি পাউএইস হউ।।

মনে মনে এক কথা জাগেই বুড়হিক মনে
আটকুড়ি রানিই মকে कहलि रे केसअने
धिक रे एसअन जिवन धिक एसअन कामअ
रानिके आपनअ भांति पाउलँ किना दामअ
फुँफुआई फुँफुआई उठेई बुड़हि एहअ रे रहि रहि
ठानेई एहे मु आर काकअउ देखाउअम नेहि
एहे जिवन नेहि राखअम हउ॥

पाँच मुलुकक भाभना बुड़हिक मगअजे आउअलअ
बुड़हाकेरि कथा आरअ मने रे जागअलअ
हामि जदि मरँ एखन रानिक कथाक टंगेँ
घारा घुरि बुड़हा आरअ मरि जाता सगेँ
भांभेईते भांभेईते बुड़हिक घुमे रे घेरअलअ
राँधावाँटा खाउआ पिआ कनअ नि करअलअ

उगअल बेरा पछिमे डहरअलअ हउ॥

बाखान टाँईडेँ आरअ बुड़हाँई खाईएक रे भालअईए
भालि भालि आरअ भाला आँखि रे टाँटाईए
बेसिआम दुपहर बिंति साँझ बेरा हेउअलअ
ताँहँ बुड़हि खाईएक लेईए नेहि रे पँहचअलअ
भुखेँ बुड़हाक पेट जरेईक रागेँ रे गरअजे
बाखान पाड़ेई बुड़हिके आरअ जे आउएक मगअजे

बेरा तअ डुबिऐ गेईल हउ॥

गटा दिना आरअ बुड़हा भुखेँ रे रहअलअ
कनअ किछु खाईएक भाला नेहि रे जुटअलअ
गरु लेईए बुड़हा आरअ गाँउअ रे घुरअईए
सभेकाकर गरु भाला देला समुवाँईए
आपअन घर बुड़हा आरअ एहअ रे डहरअलअ
आगदुआईरेँ आईके भाला एहअ रे पँहचअलअ
रागेँ तअ बुड़हिके हाँकाउएई हउ॥

বুড়হি বুড়হি হাঁকাই বুড়হা ডাঁড়হাইএ দুআরাই
রাউ নি পাইকে আরঅ রাগে রে গরগরাই
গড়েকেরি লহ্ বুড়হাক মুড়েঁ রে উঠঅইএ
গাইর বাখানে মুহেঁ ভালা খইঅ রে ফুটঅইএ
আইজ বুড়হি তকে হামি এহঅ রে মারঅবঅ
সলঅ হাঁথেক সইলি ঠেঁগাঁই কমঅর জে ভাঁগঅবঅ
দেখবঁ আজু কনে তকে বাঁচাউতঅউ হউ।।

তাহঁ জখন রাউ বুড়হাঁই নেহি রে পাউঅইএ
লুকাই লুকাই কেউআড় কুনে এহঅ রে হুলকঅইএ
বুড়হিকে আরঅ ঘুমাইল ভালা দেখিকে নজঅরে
হড়বড়াই ঢুকেই বুড়হা ঘারা রে ভিতঅরে
ভুঁইএঁ ঠেঁগা বাজড়াই বুড়হাঁই হাঁগকারঅ মারঅইএ
বুড়হি তখন হড়বড়াই এহঅ রে উঠঅইএ

উঠিকুনে কাঁদে লাগঅলঅ হউ।।

কাঁদি কাঁদি বুড়হিঁই আরঅ কহেই রে বুড়হাকে
গটাদিনা ভুখেঁ ভালা রাখলিঅন তরাকে
সেহঅ খাতির মকে তরা দসঅ নানঅ দিহা
হামঅর মনেকেরি বেথা এহঅ রে সুনিহা
গঁগাদরি রানিঁই মকে আঁটকুড়ি কহঅলি
সেহঅ কথা সুনি হামঅর ছাতি রে ফাটঅলি

তহরাক গড়েঁ জিবঅনঅ গুচাউঅম হউ।।

বুড়হিক কথা সুনি বুড়হাক রাগ জে গেলেইক নিঝি
মুড়েঁ হাঁথ বুলাউএ লাগঅল তিরিআক দুখ বুঝি
পরেক কথাঁই ভুঁইএ ভাত কাহে রে করঅবঅ
আপঅন দিসা বিচারেঁ জিআ রে ধরঅবঅ
মহিরাজাক ঘার ভালা জাবে নেহি আরঅ
নিজেক মাটিঁই কাম করি দেখঅবে সঁগসারঅ
হামঅর কথা রাখঅবে ধেইআনে হউ।।

বুড়হুঁই আরঅ কহে লাগঅল বুড়হাক গড়অ ধরি
সুনা জে সুনা বুড়হা কহঅই নেহঅরি
এহে রাজাক দেসেঁ ভালা নেহি রে রহঅবঅ
দসঅর রাজাক দেসেঁ আরঅ ডেরা রে গাড়অবঅ
বুড়হিক কথা সুনি বুড়হুঁই মুড়অ রে লাড়অইএ
বুঝি সুঝি আরঅ ভালা হুঁকাইরঅ দেউঅইএ
বুড়হিক মন তঅ থিরঅ হেউঅলঅ হউ।।

রাঁধাবাঁটা করি দিঅ লকেই রে খাউঅলঅ
খাউআপিআ করি আরঅ নিচিতে সুতঅলঅ
রাতি বিতি ভিনসরা হেউঅলঅ জখঅনঅ
বুড়হুঁই বুড়হিকে জাগাই কহেই রে বচঅনঅ
আঝুকেরি দিন হামরা ই গাঁউএ রহঅবঅ
গটা গউরাক ঘারেঁ ঘারেঁ সমুঝাই রাখঅবঅ

কাইল লে বাগালি নি করঅবঅ হউ।।
বিহানে উঠি বুড়হুঁই আরঅ বুঝাই বুড়হিক মনঅ
গটা গাঁউএক গরু লেইএ ডহরঅলঅ জে বনঅ
একটা আরঅ কুড়হাইর ভালা সঁগে রে লেউঅলঅ
কারি পিঁপড় বনে গরু ছপঅলাই দেউঅলঅ
একটি আরঅ কুইলা কাঠ এহঅ রে কাটঅইএ
কুইলাকাঠেক বাঁহুক ভালা এহঅ রে করঅইএ

চিহড় লতাক আরঅ সিঁকা বেনাউঅল হউ।।
তিনটি চিহঅড় পাতেঁ আরঅ উঁগা বেনাউঅলঅ
জখেঁ জখেঁ বাহুঁকে আরঅ এহঅ রে বাঁধঅলঅ
বেরা ডুবু ডুবু খনে গরু রে ডহরাইএ
ঘারেঁ ঘারেঁ সঁভেকাইকে দেলা সমুঝাইএ
আপন আপন গাই গরু গনি গাঁথি লিহা
বাদে আরঅ মকে কেহু দসঅ নাহু দিহা
কাইল লে বাগাল নেহি করঅবঅ হউ।।

সভেকাইকে কহি বুড়হা ঘাৱেঁ রে আউঅলঅ
কাঁধেকেরি বাহুঁক ভালা এহঅ রে রাখঅলঅ
বুড়হিকে দেখেইক আরঅ আহি মনগুমানে
রসেঁ রসেঁ গেলাক বুড়হা তিরিআকর ঠিনে
রাঁধাবাঁটা খাউআপিআ কনঅ নি করঅইএ
ঘাৱেঁ আরঅ দিআ ভালা নেহি রে জরঅইএ

বুড়হিকেরি মুহঅ রে মলিন হউ।।

বুড়হাঁই কহেই সুনে বুড়হি হামঅরি বচঅনঅ
রাঁধাবাঁটা খাউআপিআ করেঁ রে এখঅনঅ
রাতিবিতি জখন আরঅ হেতেক রে ভিনসরা
এহে রাজাক দেস ছাড়ি চলি জাব হামঅরা
এহে দেসেক চজ ভালা এহঅ রে বিসরঅবঅ
দসঅর দেসেঁ জাইএ হামরা ডেরা রে বাঁধঅবঅ

তঁই এখন রাঁধাবাঁটা করঅবে হউ।।

বুড়হাঁই কহেই রাঁধেলাই মঁই নেহি জে হউ পারঅম
বিনা খাইএ আরঅ ভালা এহঅ রে মরঅম
বুড়হাঁই কহেই রানিঁই তকে আঁটকুড়ি কহলঅউ
অকঅর কতেক ছউআপুতা গনি দেখাই দেলঅউ
কানিহিঁ দসঅর লককে কহেইক জদি কানি
মনটাকে বিসাই লেলে সেহঅ কথা মানি

তঁই বুড়হি বকাই রহি গেলে হউ।।

বুড়হিকেরি দিসাদসা দেখিকে নজঅরে
নিজেই ঠেসি গেলাক বুড়হা রাঁধাবাঁটা করে
দুই আঁছিআ চুলহাঁই ভালা হেউএক রে রাঁধঅনঅ
একবাটে ভাতেক অধঅন দসঅর বাটে তিঅনঅ
সুখঅল কাঠফাড়া ভালা চুলহাঁই ঠেসাই দেলেইক
দেখেইতে দেখেইতে রাঁধঅল এহঅ রে হেই গেলেইক
বুড়হাঁই ভাত বাঁটে লাগঅলঅ হউ।।

বুড়হাঁই তখন বুড়হাকে দেলেইক ভালা কহি
কনঅ খাইএক মন মর করেইস আরঅ নেহি
সেহঅ সুনি বুড়হাঁই আরঅ বুদধি রে করঅইএ
দুই উঁড়রাঁই ভাত ভালা এহঅ রে ভরঅইএ
একঅ উঁড়রাঁই তিঅন ভালা আরঅ রে বাঁটঅলঅ
টাঁগনাঁই আর জতঅন করি লড়কাই রে রাখঅলঅ
বুড়হাঁই কিছু মুহেঁ হাঁথোঁ করঅলঅ হউ।।

বুড়হাঁই আরঅ বিছনাপাতি এহঅ রে করঅলঅ
বুড়হিকে আরঅ ভালা সুনাইএ রাখঅলঅ
ভিনসারেঁ খুখড়া ভালা জখঅনঅ ডাকঅইএ
তখঅন তঁই মকে বুড়হি দেবে রে জাগাইএ
আঁধারি রহেইতেই জেসে গউরা বাজার ছাড়িঅ
গাঁউএক লকেক নজঅরেঁ জেসে নিহি রে গিরিঅ
দেখলে তঅ জাই নেহি দেতা হউ।।

গাঁইট মট বুড়হাঁই ভালা বাঁধি রে রাখঅলঅ
একঅঠিনে গুঁছিআই রাখি এহঅ রে সুতঅলঅ
পহঅরে পহঅরে বুড়হিক ঘুমঅ রে ভাঁগঅইএ
তিনঅ পহঅরে ভালা খুখড়া রে বাঁগঅইএ
খুখড়া ডাকে চাঁড়ে-মাড়েঁ উঠঅত বুড়হা বুড়হি
গাঁইট মট লেইএ ভালা করঅত সঁপড়া সঁপড়ি
বুড়হাঁই গাঁইট মট মুড়েঁ লাদঅলঅ হউ।।

কুইলা কাঠেক বাহঁক বুড়হাঁই এহঅ রে কেঁধিআইএ
খাইএক পাতি ঘটি ডুভি এহঅ রে লেউঅইএ
গাঁউ মাইমাটিকে ভালা মুড়অ রে ঠেকাউঅলঅ
গউরা বাজার নি জাগেইতে এহঅ রে বাহরালঅ
সটসটাই বুড়হা বুড়হি এহঅ রে চলঅইএ
কুলহিক মুঁড়া পঁহচি বুড়হি পেছুবাটে ভালঅইএ
আঁইখেক লর টসটসাই গিরঅলঅ হউ।।

বুড়হা বুড়হি গালমারি চলে রে লাগলঅ
এক রাজাক দেস ভালা এহঅ রে পঁহচলঅ
সেহঅ দেসেঁ মন ভালা নেহি রে ঠহরঅইএ
গাঁইঠ মঠ লেইএ দিঅ এহঅ রে ডহরঅইএ
লুবুক লুবুক বুড়হা বুড়হি এহ রে চলঅলঅ
আর একঅ দেস ভালা এহঅ রে মিলঅলঅ

সেহঅ দেসঅ পাইরাইএ গেলা হউ।।

একঅ দেস পাইরাইএ ভালা দিঅ দেস পাইরাইএ
তিনঅ দেসেঁ আরঅ ভালা এহ রে পঁহচঅইএ
চলেইতে চলেইতে একঅ বাঁধঅ রে দেখঅলা
অহঅ ঠিনে বুড়হা বুড়হি এহঅ রে ঠড়হআলা
তখন আরঅ বেরা ভালা মুড়েকর উপরঅ
বুড়হাঁই আরঅ কহেইক ভালা হেলেইক দুপহরঅ

এহেঠিন হামরা খাইএক নুড়ি লেপ হউ।।

বাঁধেক আইড়ে গাঁইঠ মুইঠ এহঅ রে রাখঅইএ
দিঅ পারানিঁই ভালা মু হাঁথ রে ধউঅইএ
উঁড়রাকেরি ভাত ভালা আরঅ রে খললঅ
ভাগ বাঁটা করি আরঅ খাইএ রে লাগলঅ
খাইদাই বুড়হা বুড়হি লেলা রে সাঁথানঅ
জিরাইকুন আরঅ ভালা করলঅ নাহানঅ

থকিত তঅ নেহি রহলঅ হউ।।

তখন আরঅ বুড়হাঁই ভালা কহেই রে বুড়হিকে
এহঅ দেসেই রহঅব হামরা ডেরা রে গাড়িকে
এহঅ দেসেই খাটিলুটি বিতাব জিনগানি
তঁই আরঅ এহে কথা লেবে বুড়হি মানি
দিঅ লকেই কাম করঅব দসরেকর ঘারেঁ
দিন চালা নহেক জালা দিঅকর সঁগসারেঁ

এহে দেসেঁ মন মর বসঅলি হউ।।

বুড়িহঁই তখন বুড়হাক পাসেঁ এহঅ রে মেহনাইএ
ছুপঅলঅ ছাপঅলঅ কথা আরঅ রে সুনাইএ
এহে দেসেক লকেঁ জখন জানতা হামরাক কথা
বুড়হা বুড়হিক আরঅ ভালা নেখথিন ছউআপুতা
আটকুড়া আটকুড়ি কহতা ইহাঁক লকে
কেহু কাহুঁ জাতা নেহি হামরাক মু দেখিকে
এহঅ জালা সহে নি পারঅব হউ।।

বুড়হাঁই তখন কহেই ভালা সুনাই তবে অকে
আটকুড়ি কহবথু নিহি কন দেসেক লকেঁ
ভাইগে জখন হামরাক আরঅ নেখঅত ছউআপুতা
তখন তঅ সুনাই হেতঅউ লকেক মঁদঅ কথা
জাহাঁ জাবে কাপাড়াটা তঅ সঁগে সঁগেই জাতঅউ
জিবনটাকে চঁথি লেলঅউ সঁগ নেহি ছাড়তঅউ
একঅর বাদে তঁহিঁ বুঝি দেখেঁ হউ।।

বুড়িহঁই কহেই সুনা বুড়হা কুচেই হামঅর মনে
কাম কিনা আহি কহা এহে অভাইগা জিবনে
বাঁচি রহা মানেই তঅ দুখেঁ ডুবঅল হালঅ
তাকরলে মরি জাউআ সতঅ গুনে ভালঅ
চালা হামরা নদি বানে ঝাঁপঅ রে দেউঅবঅ
নদিকেরি বানে আরঅ বহাইএ মরঅবঅ
কেহু কাকরঅ মরন নি দেখবঅ হউ।।

বুড়হিক কথা মানি বুড়হা চলে রে লাগলঅ
অরাকর বজকনি কিছু লকে সুনলঅ
তখন বুড়হাকে অরা সুনাইলেখিক কানে
বুড়হিক কথাই কাহে ভালা মরে খজিস বানে
বুড়হি জদি মরেই তবে তঁই কাহে মরঅবে
খাটিকেরি পুআ লেখেঁন বহু রে বদলবে
তঁই ঘুরি বিহা করঅবে হউ।।

বুড়হাঁই আরঅ কাকরঅ কথা রে নেহি ধরলঅ
বুড়হিকেরি সঁগে ভালা ডহরৈঁ ডহরলঅ
কতিধুরে জাইএ আরঅ নদি রে দেখতাইএ
আপনঅ সুড়ুরৈঁ ভালা নদি জে বহঅইএ
ডেগে ডেগে নদিকেরি পাসেঁ রে পঁহচলঅ
আইখেকর মিটিকৈঁ ভালা বানঅ রে সুখলঅ

বুড়হা বুড়হি নদি কিনারে বসলঅ হউ।।

নদিআ কিনারে বসি বিতলঅ গটেদিনা
বান নেহি আউএক নদিঁই করঅত এবৈঁইর কিনা
বেরা আরঅ ডুবে মুহাল দেখতঅ নজঅরে
পাইখ পাখুড জে-জাহার ঘুরঅত নিজ ঠহঅরে
বুড়হাঁই তখন বুড়হিক সঁগে করঅইএ জুকঅতি
এহেঠিনে আজু হামরা বিতাউঅব ভালা রাতি

মঁই একটা ঘারঅ রে বেনাউঅহঁ হউ।।

আগুবাটে আরঅ বুড়হাঁই একটা তালগাছ দেখি
সটপটাই জাইকে গাছে উঠলঅ উঁচঅকি
তিনটা আরঅ তালবাগড়া এহঅ রে কাটঅলঅ
কাঁধে লদকাই আরঅ ভালা লেইএ রে আনঅলঅ
মুখঅইন করলঅ ভালা এহঅ রে কুইলা কাঠেঁ
তিনটা তালবাগড়া টেঁররাই দেলেইক জে তিনবাটেঁ

পুব মুহেঁ দুআইরঅ রাখলঅ হউ।।

অহঅ ঘারেঁ বুড়হাবুড়হি এহঅ রে বসঅলঅ
দিনরাইত আরঅ ভালা এহঅ রে বিতঅলঅ
নদিবাটে দিঅ লকেক রহঅইএ ধেআনঅ
নদিঁই আরঅ নিহি ভালা আউএইক জে রে বানঅ
বুড়হা বুড়হিক মনে ভালা ঢুকঅলঅ ঘেরঘেরি
বসি বসি দিঅ লকঅ সঁচঅত মুড়অ ধরি

কিআ করঅতঅ এখন হউ।।

বুড়িহঁই এবৈইর খিজলাই খিজলাই কহেইক জে বুড়হাকে
হাইরে কেসন জনম বিধি দেলা জে হামরাকে
দুনিআইএক মহাপাপি হামরা রে লাগিঅ
নি হেলে এসন জাতঅন কাহে রে ভুগিঅ
হামঅর কথা রিচেক তরা সাঁচি দেখা মনে
জেহঅ নদি গটে বহঅর রহেইক ভরঅল বানে
হামরাকে দেখি সুখাইএ গেলা হউ।।

নদিআ কিনারে ভালা দিঅ জে পারানি
মনেক দুখৈ বসি রহঅল জিউ করি পানি
একাকার বারঅ বহঅর এহঅ রে বিতলঅ
তাইঁ নদিই বান ভালা নেহি রে আউঅলঅ
একদিনঅ সাঁঝে বুড়িহঁই বুড়হাকে কহঅইএ
জিবনঅ জাতনঅ আর নেহি রে সহঅইএ
হামরাকে দেখি নদি নিঠুর হেলা হউ।।

উঠিবসি বুড়ি আরঅ সাঁচেই রে অনতরৈ
একঅ আরঅ দহঅ ভালা ভেঁটলঅ রে ধুরেঁ
বুড়হাকে তখনঅ ভালা এহঅ রে কহঅইএ
অহঅ দেখা ধুরেঁ একঅ দহঅ জে রহঅইএ
ভিনসারেঁ হামরা দহেক ডহরঅ ধরঅবঅ
অহঅ দহেঁ ডুবি ভালা হামরা তঅ মরঅবঅ
জিনগানি জাতনা পঁছঅবঅ হউ।।

ভিনসারে দিঅ লকঅ গেলা নদিক পাসেঁ
ধরাধরি হেইএ ভালা মরঅনেকর আসেঁ
জখন আরঅ দহেক পাস এহঅ রে পঁছলঅ
বুড়িহঁই তখন বুড়হাকে কহে রে লাগঅলঅ
ধরাধরি হেইএ দহেঁ ডুবঅ রে দেউঅবঅ
কেহ কাকরঅ মরন ভালা নেহি জে দেখঅবঅ
বুড়িহঁই বুড়হাকে গড়অ লাগঅইএ হউ।।

ধরাধরি দিঅ লকঅ দহেঁ রে ঢুকঅইএ
নদিমাইএঁ আরঅ ভালা এহঅ রে দেখঅইএ
ঘসঘসাই ঢুকেই বুড়হা দহেকর ভিতরঅ
পেছুই পেছুই ঢুকেই বুড়হি আপনঅ নিঅরঅ
এক কমঅর পানিই বুড়হা পঁহচলঅ জখনঅ
একহাঁঠু পানিই ভালা বুড়হি রে তখনঅ

দিঅ লকে হেলা ভালাভালি হউ।।

বুড়হিই আরঅ বুড়হাকে কহলঅ ঝোনঝোনাই
এক কমঅর পানি ভালা ঢুকলেহে মনমনাই
ভিতঅর বাটে ঢুকেইতে কেথিই রে ধরঅহন
বুঝেলাই পারঅহঁ মরেক মন নিহি করঅহন
বুড়হিক কথা সুনি বুড়হাক রাগঅ রে জনমলঅ
পানি ঠেলি ঘেঁচা পানি এহঅ রে ঢুকলঅ

নদিমাইএ হাঁগকারি ডাকঅইএ হউ।।

বুড়হিই আরঅ বুড়হাকে এহঅ রে কহঅইএ
কনে আরঅ ডাকেই ভালা এসনঅ সমঅইএ
সুনা বুড়হা হামঅর কথা আউআ হউ পেছুআই
জানি লিঅ কনে ভালা ডাকঅইএ কিনালাই
বুড়হিক কথাই বুড়হা তখন পেছুআই আউঅলঅ
চাইরঅ বাটে আরঅ ভালা নজরঅ ঘুরাউঅলঅ

কাকঅউ তঅ দেখি নি পাউঅইএ হউ।।

কাকঅউ দেখি নি পাইএ বুড়হা রাগেঁ গেলাক জরি
বুড়হিকে বাখানঅ পাড়েই কথাকর অড় ধরি
জেনিক কথাই চলে গেলে ফেরঅ রে কাপাড়েঁ
আইজ হামি বুঝা ভালা এহঅ রে হাড়েঁ হাড়েঁ
মরেইতে ডর বুড়হি আহঅউ সলঅ আনা
সেহঅ খাতির এখন ভালা করেহিস তঁই মানা

খাঁখড়িক নিঅর আগুআইস আর পেছুআইস হউ।।

বুড়হাক কথাই বুড়হি রাগেঁ এহঅ রে ধরাধরি
ঘসঘসাই ঢুকি গেলা দহেকর ভিতঅরি
একঘেঁচা পানি ভালা এহঅ রে পঁহচলঅ
একঅর বাদে ডুবেক কথা মনে রে সঁচঅলঅ
নদিমাইএ তাকি তাকি এহঅ রে রহঅইএ
বুড়হা আর বুড়হিকে ভালা ডাকি রে কহঅইএ
কিআ লাইএ ডুবি মরিহা হউ।।

নদিমাইএক কথাই বুড়হিই জড়অলঅ রদঅনা
কিনা কহি দেবঁ মাই হামরাকর জাতনা
হামরাকেরি ছউআপুতা নি রহাক খাতিরেঁ
আঁটকুড়া কুড়ি কহঅত এহঅ রে সঁগসারেঁ
ভিনসারেঁ হামরাক মু দেখঅলে রে কেহু
ছি-থু করি বাখান পাড়অত সুনি পানি লহু
এহঅ জিবনেকর কিনা দাম হউ।।

আগফেড় সঁচি ভালা দিখাল ই জিবনে
বাঁচেকর আসাদিসা এহঅ নেহি রাখিঅ মনে
মনেকর দিখে দুখেঁ ডুবি জে মরঅবঅ
এসন জিউ বাঁচাই রাখি কিনা জে করঅবঅ
গটে জিনগানি হামঅর কাঁদেইতে জে গেলি
কনঅ দিনঅ এহে কাপাড়েঁ সুখ নেহি হেলি
আঁটকুড়ি নাম সহে নিহি পারিঅ হউ।।

বুড়হিক কথা নদিমাইএঁ লেলেক জে রে লুটি
কহেইন দহেক পানি ছাড়ি ডাঁগাঁই আউআ উঠি
হামি লাগঁ নদিমাই এহঅ রে সরঅসিনি
তহরাকর মনেক বেথা রাখঅলঁ রে সুনি
হামঅর আসিসেঁ তহরাক হেতঅহন ছউআপুতা
ভাঁগঅল দেহিই পাউবেহে এহঅ রে বলবুতা
হামঅর আসিস বেকার নিহি হেতি হউ।।

পানিলে ডাঁগাঁই উঠি বুড়হা-বুড়হি ধরাধরি
নদিমাইকে কহে লাগঅল হাঁথঅজড় করি
হামরাকর উমঅইর ভালা গেলাহি জে বিতি
দাঁত ভাঁগি চুইল পাকি হেঁরাউলাইহঅ জতি
এহে উমঅইরেঁ ছউআপুতা হেতা গউ কেসঅনে
তহঅর কথা সুনি মাই দইসত খেলেই মনে
তহঁ মাই ইরখা করেহিস গউ।।

নদিমাইএঁ বুড়হা বুড়হিক সুনি রে গালমারা
কহে লাগঅল হামঅর কথা মানি চলা তহঅরা
দিঅ লকঅ দহেঁ ভালা ডুবঅ রে দেবেহে
পানিক ভিতঅর টমড়ি আরঅ জেহঅ ফর পাউবেহে
সেহঅ ফর ধঅউআ পানি খাবেহে এক ধেইআনে
ছউআপুতাক মুঁ দেখবেহে হামঅর আসিসদানে
মনে কনঅ দঅইসত নাহু রাখিহা হউ।।

নদিমাইএক কথা সুনি দিঅ রে পারানি
ঠিরকা-ঠিরকি হেই ভালা নাভঅলঅ ডুবান পানি
দিঅ লকঅ ভালাভালি এহঅ রে হেউঅলঅ
দহেকর পানিই আরঅ ডুবঅ রে দেউঅলঅ
গগলি ঝিনুক কাড়হা লেখেঁ এহঅ রে টমড়অইএ
বুড়হাঁই আরঅ গুআ ভালা এহঅ রে পাউঅইএ
বুড়হিঁই তঅ হরতকি পাউঅলঅ হউ।।

দহঅ লে উঠলঅ বুড়হাবুড়হি দিঅ ঝনঅ
পানি লে উঠি দেখঅত ভালা নদিমাই তঅ ছনঅ
চকাইকুনে হিঁদে হুঁদে ভালি রে দেখঅলঅ
নদিমাইএক দেখা আরঅ নেহি রে পাউঅলঅ
কিনা বুঝি দিঅ পারানি আপনঅ বিচারেঁ
ডহরলা ফর হাঁথেঁ তালবাগড়াক ঘারেঁ
বারঅ বছর জাহাঁ ডেরা গাডঅরহত হউ।।

ডেরা পঁহচি বুড়হা বুড়হিঁই খালা রে টিপঅলঅ
ফর ধউআ পানি ভালা এহঅ রে পিঅলঅ
দুইচারি মাস আরঅ বিহানে বিহানে
ফর ধউআ পানি ভালা পিঅত এক ধেইআনে
বুড়হা বুড়হিক গাতেক বরঅন বদলি রে জাউঅইএ
জুআনি উমঅইর তাখড় ভালা ঘুরি রে আউঅইএ
চিমড়অল চাম চিকনঅ চাকঅন হেলা হউ।।

মুড়েক পাকঅল চুইল আরঅ কেরিআরে হেউঅলঅ
ভাঁগঅলঅ দাঁত সভে ঘুরি রে আউঅলঅ
বুড়হা বুড়হি আরঅ ভালা কহতা এখন কনে
নদিমাঁইএঁ ঘুরাই দেলেইন হেঁরাইল দেহি ধনে
নদিআ কিনারে ভালা রহঅলা কতিদিনঅ
সাঁঝ বিহান গড় লাগি নদিমাঁইঅ ঠিনঅ

ফরোঁ ফুরোঁ বিতেইক দিনঅপাতঅ হউ।।
আরঅ কতিদিনা ভালা বিতলঅ এসঅনে
একদিনঅ বুড়হিঁই কথা পাড়েই বুড়হাক ঠিনে
নদিআ কিনারে হামরা রহঅব নিহি আরঅ
কুটুম ঘেঁসে রহে হেতি সুন্য হউ বানারঅ
নদিমাঁইএক আসিস বুড়হা হেলাহি জে সাঁচা
জিনগানিক আস ভালা পাউলিঅ সাঁচা

মঁই বুড়হা ভালঅ জানঅহঁ হউ।।
বুড়হিক কথা সুনি বুড়হাক হরখলঅ মনঅ
নদিমাঁইকে জহাইর জহাইর করেই সতঅখনঅ
সুখঅল কাঠ আরঅ ভালা হেরিহর হেউঅলঅ
পাতেঁ ফুরোঁ ফুরোঁ ভালা এহঅ রে ঝবরলঅ
গবর কুড়েঁ পদদঅ ভালা চাটান উপঅর ধানঅ
ফুটলঅ আলঅ করি নদিমাঁইএক দানঅ
চাল বুড়হি কুটুম ঘেঁসে রহঅব হউ।।

কাঁহাঁ হামরা জাব বুড়হি, সুনাতাবে মকে
তর মুঁ লেই সুনেক খাতির পুছঅহঁ জে তকে
বুড়হিই কহেই জাম হামে সসুরেকঅর টিঁড়হা
দসঅর দেসেঁ দসঅর ঘারেঁ নেহি মাগঅম পিঁড়হা
ঘুরি চালা জাব হামরা অহে গউরাবাজার
জাঁহাঁ হামরাক আহি ভালা আড়হাই রলাকেরি ঘার
উহাঁই হামঅর সুখেকর ঠহঅর হউ।।

বুড়হাঁই কহেই সুনে বুড়হি গাহেই হামঅর মনে
গউরাঁই কনে রহতা ভালা তর পাসেঁ হর খনে
হামকে তঅ কামেক খাতির বাহার জাইলাই হেতি
ঘারেঁ বসি রহলে কিনা দিনঅপাত রে চলঅতি
তাকঅর লে চালেঁ বুড়হি তর আপঅন নইহর
উহাঁ গেলে সভে পাউবে জতঅন আদঅর
তকে হামে লেগি রাখবউ হউ।।

নইহরেক কাথা সুনি উঠলি বুড়হি কাঁকাঁই
কিআ লাইএ জাম উহাঁ কেথিকর আসাঁই
এতেক দিনে জে মাঁইবাপে নেহি লেলা বানার
ভুলি রহলা ফেঁকি দেইএ আবজড়অ নিআর
সেহঅ ঘারেঁ মকে তরা জাইলাই কহেইহা
তরাউ কিনা এবের মুড়েক বঝা রে সঁচেইহা
জা চলি তরা হামি একাই রহঅম হউ।।

রাগেঁ গরগরাই বুড়হি আইগেক নিঅর দেখি
ডরেঁ বুড়হাক চুঁধিআঘারা গেলেইক আরঅ সুখি
রসেঁ রসেঁ কহে লাগঅল বুড়হিকর ঠিনে
মকে চিনহে পারলে নিহি তঁহি এতিদিনে
একাঘার সঁচি তহর নইহর আনলঁ টানি
সেহঅ কথাঁই জখন তহর মনে রে দুখানি
গউরাবাজারেই চালে জাব হউ।।

পিঠাই আর লতাক গউরা বাজার ঘুরি আউআ

জখন আরঅ বুড়হিক ভালা রাগঅ ভাঁগঅলঅ
গাঁইটমট আরঅ দিঅ লকেঁ বাঁধে রে লাগঅলঅ
নদি মাইকে গড় লাগি দিঅ রে পারানি
গউরাবাজার সঁপড়লা থাহি ঠহঅর ঠানি
মন দেইএ সুনিহা মাহারাই গিতঅ
মানি চলিহা সুঘঅড় সমাজেকর রিতঅ

জগাই রাখিহা হড়েকর ধরঅম হউ।।

তালবাগড়াক ঘারা ছাড়ি দিঅ বুড়হাবুড়হি
গউরাবাজার মুহেঁ চলঅত আসা নউআ অড়হি
একঅ, দিঅ তিনঅ দেস পাইরাইএ রে গেলা
গউরাকর কুলহি মুড়াঁই এহঅ রে পঁহচলা
গটা দিনঅ চলি চলি বেরাডুবু খনে
আপঅন ভুঁইএ পঁহচি ভালা থির করি মনে

কুলহিক মুড়াঁই দিঅ পারানি বসলঅ হউ।।

কুলহিক মুড়াঁই জড়ামহ্ল গাছঅ রে রহঅইএ
বুড়হাঁই আরঅ বুড়হিকে এহঅ রে কহঅইএ
এহে মহ্লআ তরেঁ হামরা রাতি রে কাটঅবঅ
বিহানেঁ আপঅন ঘারা এহঅ রে ঢুকঅবঅ
মহ্লআ গাছেক হাউআ বড়ি মিঠা রে লাগঅইএ
গটাদিনেক থকিত ভালা এহঅ রে ভাঁগঅইএ

মঁই বুড়হি বিছনা বিছাউঅহঁ হউ।।

বুড়হিঁই কহেই কুলহিক মুড়াঁই মহ্লআকর তরেঁ
নেহি জে সুতবঅ হামরা রাতি রে আঁধারেঁ
ভালঅমদঅ বাউ ভালা বাহারে বহঅইএ
হামঅরিকা গাতে জদি এহঅ রে লাগঅইএ
দস লাগে পারেই বুড়হা হামঅর এহঅ গাতে
বাহারে নি রহঅব ভালা সেহঅ রে হঁতেঁ

হামরা আপঅন ঘারেঁ রহঅব হউ।।

আড়হাই রলাক ঘাৰেঁ বুড়হা-বুড়হি রে আউঅলঅ
ঘাঁসেঁ পাতেঁ ভরঅল ঘাৰ এহঅ রে দেখঅলঅ
লতেঁপাতেঁ, ঝিঁগালতে চালঅ নেহি দেখাই
সাঁকাৰে পাতাৰে ঘাৰ ডাঁড়হাই আহেইক একাই
ঘাৰা দেখি তখন বুড়হাঁই কহেই বুড়হিক পাৰেঁ
এসঅন হালে এহে ঘাৰেঁ রাতি কাটঅবঅ কেসে
ঘাৰা তঅ সাঁকাৰেকর কুঁড় হউ।।

এসন ঘাৰেঁ রাতি বুড়হি কেসে রে বিতঅবে
সেহঅ খাতিৰ হামঅর কথা তঁহি রে সুনঅবে
পড়সিকর ছাঁছাতৰেঁ কাটঅব আজুক রাতি
বুড়হাক কথা সুনি বুড়হিক কাঁপি উঠঅল ছাতি
বুড়হিঁই কহেই সুনে বুড়হা ঘুমেকর ঘেৰেঁ
পিঁধনা লুগা গিৰেই জদি এহঅ রে ছাঁছতৰেঁ
পাছে কনঅ দস লাগি জাতি হউ।।

বুড়হাঁই তবে কহেই ভালা কিনা রে করঅবঅ
বুড়হিঁই কহেই আপঅন ঘাৰেই এহঅ রে রহবঅ
বুড়হা তখন কদাইর মাগে পড়সিঘাৰঅ গেলা
পড়সি দুআইরে পঁহচি নাম ধরি ডাকঅলা
হাঁক সুনি পড়সি আরঅ ঝাটঅ জে বাহরাইএ
পিঠঅইচাঁদকে আরঅ ভালা দেখিকে কহঅইএ
কিনা কহেহিস লাগিস তঁই কাঁহাঁক হউ।।

পিঠঅইএঁ কহেইক এখন চিনহাফ দেউএক সমঅই নহি
বিহানে হামঅর নাম ঠেকান সভে দেবঁ কহি
তঁই একটা কদাইর ভালা দেবে জে এখঅনঅ
কদাইরেকর কথাঁই পড়সিক কাঁচুমাচু মনঅ
জানঁ নিহি চিনহঁ নিহি কাঁহাঁক বাহাৰিআ
কদাইর লেইএ পাৰাইএক তাল ভাঁড়ুক ধচঅৰিআ
তকে কদাইর নিহি জে দেবঁ হউ।।

পিঠঅইএঁ তখন মুচকি হাঁসি কহেইক রে পড়সিকে
সাঁচাই কিনা চিনহে নেহি পারেহিস তঁই মকে
আঁইখগিলা পঁছিকুনে নিখরাই টুএক ভালৈ
দুআইর ঘেসেক পড়সিকে তুরুতে না ভুলৈ
আঁইখ পঁছি পড়সিই ভালা এহঅ রে গমঅইএ
বাচিক করি কহে লারেই কনে জে হেউঅইএ
পড়সি দইসতে গিরি গেলা হউ।।

সেহঅ খনে বুড়হাঁই কহেই সুনৈ রে পড়অসি
রাউ ভাঁউ দিসা উসা গেলা হউ তর ধসি
টিকঅইচাঁদেক বেটা মঁই পিঠঅইচাঁদ রে লাগঁ
তহঅরি দুআইরৈ ডাঁড়হাঁই কদাইরঅ জে মাগঁ
বারঅ বছঅর আগু ভালা গউরাবাজার ছাড়ি
বুড়হাবুড়হি গেরইহঅ লেইএ ডেরা ডাঁড়ি

আউলিঅ বাহারঅ ঘুরি হউ।।

পড়সিই তখন চিনহিকুনে কদাইর রে দেউঅলঅ
কদাইর লেইএ পিঠঅই তখন ঘারা রে আউঅলঅ
ঘার দুআইরেক ঘাঁস পাত করেই ছলাছলি
বুড়হি আরঅ বাড়হা সড়হাঁই এহঅ রে ঠেসঅলি
ছলিছাঁছি ঘার দুআইর সাফ-সুথঅর করঅইএ
কাঠেঁ কাঠ ঘাঁসি ভালা আইগঅ রে জরাইএ

আপঅন ঘারেঁ নিচিতে রহঅলঅ হউ।।

রাতি বিতি বিহানে ছপললঅ বানারঅ
একে একে জানলা গটে গউরা রে বাজারঅ
বুড়হা বুড়হি আউলা ঘুরি বারঅ বছঅর বাদেঁ
বাহার ঘুরে গেরঅহত মনেকেরি সাধেঁ
গাঁউ ভাঁগি সভে ভালা দেখেলাই আউঅলা
আড়হাঁই রলাক ঘারেঁ আরঅ ভিড়অ রে জমঅলা
পুঁছে লাগঅল আনারঅ বানারঅ হউ।।

রংগেঁ টংগেঁ বুড়হা বুড়হিক জুআনঅ উমইরঅ
দেখিকুনে সভেকাকঅর জুড়াই জে নজইরঅ
বুড়হা বুড়হি বানা ভালা কহেইতে সরঅমঅ
নাতা ধরি ডাকঅত এখন জগাইএ ভরঅমঅ
বারঅ বছঅর জেহঅ ঘারেঁ সাড়া সবঅদ নেহি
সেহঅ আড়হাই রলাক ঘারেঁ লকেকর গহগহি

দিঅ পারানিক রিবোকর লহঅর হউ।।

বাহার ঘুরি ঘারা ঘুরঅল পিঠঅইচাঁদ আর লতা
মহিরাজাক কানে ভালা পঁহচল এহে কথা
রাজাঁই তখন ডাকে ভেজঅল এহঅ রে টহলুকে
বানার পাইএ আউলা টহলু রাজাকেরি হাঁকে
রাজাঁই তখন টহলুকে এহঅ রে কহঅইএ
হামঅর পুসুআ বেটা পিঠঅই ঘুরি রে আউঅইএ

তঁই অকে ডাকি আনঅবে হউ।।

রাজাক হুকুম সুনি টহলু একঅ রে নিকাসেঁ
পঁহচি আরঅ গেলা ভালা পিঠঅইএকর পাসেঁ
রাজাকেরি হুকুম আরঅ সুনাই দেলেইক কানে
কহে লাগেই ডেরি নেহি জাই হেতঅউ এখনে
পিঠঅই তখন টহলুক সঁগে এহঅ রে চলঅলা
গালমারি দিঅ লকঅ চলে রে লাগঅলা

পঁহঅচি গেলা রাজাকেরি ঘার হউ।।

রাজাবাবা কহি পিঠঅই হাঁকঅ রে পাড়অইএ
রাউ সুনি রাজা আরঅ ঘারা লে বাহারাইএ
পিঠঅই চাঁদকে দেখি রাজাক ঘুরেইক নি নজরঅ
আচঅক হেইএ ভালেইক আরঅ হেঁট লে উপরঅ
জুআনি উমঅইরেক আলঅ ফুটেইক রে গতঅরেঁ
মন জুড়াই গেলেইক রাজাক রিঝঅ রে অনতরেঁ

পুঁছে লাগঅল আনারঅ বানার হউ।।

রাজাঁই আরঅ জানে খজেই থিরঅ রাখি মনঅ
এতেক দিনা কাঁহাঁ রহেহেলিস বাছাধনঅ
কনজুগে গেরঅহিস ছাড়ি জনম ভিটা মাটি
বারঅ বছঅর বাদে বেটা আউঅলে কাল কাটি
সভে কথা তঁহি এখন মকে রে সুনাইবে
কেসে হেলঅউ জুআন দেহি সেহঅ রে জানাউবে

কন দেসেঁ বাছা বাঁধঅরহিস ডেরা হউ।।

পিঠঅইচাঁদেঁ কহে লাগঅল রাজাকেরি ঠিনঅ
তিন দেস ডেগি ভালা বিতাউএহেলিঅ দিনঅ
জেহঅ নদিঁই বারঅ মাসেঁ খেলেই ডুবান বানঅ
তাকঅর কিনারে ভালা লেরঅইহঅ বাথানঅ
ফর-ফুর খাইএ ভালা বিতাউএহেলিঅ কালঅ
নদি মাঁইএঁক আসিস গুনেঁ জিবনঅ হেলি আলঅ

বারঅ বছঅর বিতাউলিঅ অহে ভুঁইএঁ হউ।।

রাজাঁই আরঅ গুড় চিউড়া এহঅ রে দেউঅলঅ
তাকঅর বাদে আরঅ ভালা কহে রে লাগঅলঅ
তঁই আরঅ গরু গতনু এহঅ রে লেউঅবে
গটা গউরাক গরু ভালা তঁহি রে চরাউবে
তর হাঁথেঁ গাই গরুক ভালঅ আহেইক বাইড়অ
সভেকাইএ এহঅ কথা কহে লাগঅল ঝাইরঅ

তর নিঅর বাগাল মিলা ভার হউ।।

এহঅ কথা সুনি পিঠঅই ফুটি দেলেইক কহি
হামি আরঅ গরু বাগাল করে পারঅম নেহি
গটা গাঁউএক লক ভালা জড়অ রে হেউঅইএ
পিঠঅইচাঁদেক কথা আরঅ সভেকাই সুনঅইএ
সভেকাইএ একে সঁগে করঅইএ নেহঅরঅ
গরু গতনু লেউএ হেতঅউ আগুঅর নিঅরঅ
তঁই হামরাক কথাটা রাখঅবে হউ।।

গাঁউএক সভে লকৈঁ জিগিড় ধরি রে বসঅলঅ
অহঅ সঁগে মহিচাঁদেঁ আরঅ রে কহঅলঅ
পিঠঅইচাঁদেঁ তখন ভালা কহেই মনেক কথা
গরুবাগাল করলে কনে খাইএক লেগি দেতা
মর বহু ঘার লে ভালা নেহি রে বাহারাতি
গরু বাগাল করলে মকে ভুখেই মরে হেতি

তরাই কহা কিনা করঅম হউ।।

পিঠঅইচাঁদেক মনেক কথা বুঝি রে সভেকাই
সঁচে লাগঅত নিজে নিজেই টুঁড়হত রে একর উপাই
একা ঘারেক লক পিঠঅই তিরিআ আসাপতি
খাইএক লেইএ টাঁইড় টিকঅর কেসে ঘুরি বুলতি
রাজাকেরি ঘারেঁ বসি করঅত বুঝামতা
ডহঅর তঅ একটা বাছেই হেতেইক সভেকাকর কথা

কানাকানি করে লাগঅলা হউ।।

খনেক বাদে মহিচাঁদেঁ কহেই ভালা ঠানি
ভালঅ বুঝলে হামঅর কথা লিহা তরা মানি
বিহানৈঁ পিঠঅইচাঁদেঁ খাইএক খাইএ লেতাক
তাকর বাদে গাই গরু লেইএ বাগাল জাতাক
ঘারাঘুরি বেরাডুবাঁই আরঅ রে খাউঅতঅ
রাইতেকেরি বিআরি ভালা বাঁচি রে জাউঅতঅ

রাজাক কথা সভেকাই মানঅলা হউ।।

গটা গউরাক লকৈঁ জখন রাজাকেরি কথাই
সাই দেলা তখন পিঠঅই হঁ সিকাৰে মাথাই
মনে সঁচেই কনঅ না কনঅ করে হেতি কামঅ
সঁগসার করি ঘারেঁ বসি রহলে কিনা খামঅ
সভেকর পাসেঁ কহি দেলেইন তরাক কথাই রাজি
কাইল লে বাগালি বাহারাম মঁই খাইএক দিহা সাজি

এহে কহি ঘারা ডহরলঅ হউ।।

রাজাঘার লে পিঠাইচাঁদ আউলাক আপন টিঁড়হাঁই
দেখেই লতাই বাড়হাইন বাঁধেই বসি ঘারেক পিঁড়হাঁই
তিরিআকর পাসেঁ পিঠাই এইহা রে বসঅলঅ
রাজাঘারেক কথা সভে বজকে রে লাগলঅ
লতাই কহেই ঠিকে আহেইক হামঅরঅ বিচারেঁ
কাম তঅ কনঅ করেই হেতেইক রহলে সঁগসারেঁ
পিঠাই চাঁদেঁ মনে বল পাউঅলঅ হউ।।

তিরিআকর পাসেঁ পিঠাই কথা রে ফুটঅলঅ
গরুবাগাল কাম হামঅর এইহা রে জুটঅলঅ
তঁই আর ঘারেঁ বসি কতেকে রহঅবে
বাড়হা সড়হা কামেক খাতির রাজাঘার জাবে
রাজাঘারেক নাম সুনি লতাকর জিবঅনঅ
রাগেঁ উঠঅলঅ জরি ধঁধঅউরা জেসনঅ

সঁইআকে কহি সুনাউএ লাগঅলা হউ।।

নিজেকর ঘারেঁ হামে ভুখে রে সুতঅবঅ
তাঁহঁ রাজাঘারেক সিমাঁই গড়অ নি রাখঅবঅ
রানিঁই মকে আঁটকুড়ি এইহা রে কহঅলাহি
রাতিদিনে সেহঅ দুখা মনে বিঁধেইসাহি
নদিমাঁইএক আসিসেঁ মর হেলে ছউআপুতা
উ রাঁড়িকে সেহঅ খনে সুনাউবেঁই জে কথা

অহঅদিন ভালিকে হামি আই হউ।।

খাউআ পিআ করি পিঠাই নিতে রে বিহানে
গরু লেইএ চলি জাই কারি পিঁপঅড় বনে
গটাদিন গরু ভালা এইহা রে চরাইএ
বেরাডুবাই ঘারা ঘুরি টঁড়হা রে ভরাইএ
আপঅন সঁগসারেক কামে বাঝাই রহেই লতা
বেরাডুবাই সঁইআ সঁগে গাহেই মনেক কথা
এহে লেখেঁ দিনা বিতি জাই হউ।।

ৰাতি বিতি দিন আউএক দিনেক বাদে ৰাতি
এহে লেখেঁ মাস ভালা জাই বিতি বিতি
সরাবনেঁ রপাডভা এহঅ রে হেউঅলঅ
ভাদর মাসেক হাউআ ভালা এহঅ রে বহঅলঅ
করম পরঅবেঁ আরঅ নাচঅত বহু বেটি
ঢল নাগড়া বাজেই ভালা উদকি উঠেই ছাতি

গউরাবাজার হবে গহঅগহঅ হউ।।

গটাদিনা পিঠঅইচাঁদঅ ঘুরেই বনেঁ বনেঁ
গরু লেইএ ঘারা ঘুরেই বেরা ডুবা খনেঁ
পরঅব তিহার রিঝে রঁগে রহেই পিঠঅই আগুআই
পানিমাঁড়েঁ খাটি-খুটি আপনঅ কাম নিপটাই
করম পরঅবঅ ভালা পাইরাইএ জে গেলা
জিতিআ পরবঅ ভালা এহঅ রে নইজকলা

সারভার নইহরেক আউঅইএ হউ।।

ছউআক মাইরা জিতিআ পরঅব এহঅ রে করঅইএ
পিঠঅইচাঁদেক ঘারেঁ পরঅব নেহি রে হেউঅইএ
জাকঅর ঘারেঁ পরঅব নাহু আঁকুরঅ দেউঅলঅ
আঁকুরেঁ পিঠঅইএক ঘারেঁ পেছিআ রে ভরঅলঅ
সঁইআ তিরিআ আরঅ ভালা মনে সখ রে করি
আঁকুরঅ খালা ভালা জিতিআমাই সেঁউঅরি

উদিন ৰাতিঁই নিহি রাঁধঅলা হউ।।

আসাপতি লতাই আরঅ দিনঅ মাস গনঅইএ
ভালঅ মদঅ কথা আরঅ সঁইআকে সুনাইএ
জখন আরঅ নঅ মাস এহঅ রে হেউঅলঅ
নঅ মাসিক কথা ভালা মনে রে জাগঅলঅ
নঅ মাসেঁ আসাপতিক খাইএক আসা জাগেই
ভালঅ মদঅ আহাৰ ভালা জিউএ রে মাগেই

পরকিতিক এহে তঅ নিঅমঅ হউ।।

বিহানে পিঠাইচাঁদ সভে দিনেক নিঅর
গরু লেইএ চলি গেলা বনেকেরি ভিতঅর
গাই গরু ছপলি গেলা চরঅত ঘাঁসেঁ পাতে
সলঅ হাঁথেক ঠেঁগা নাচেই গরখিআকর হাঁথেঁ
উগঅলঅ বিহানেঁ বেরা ঝালমলঅ আলঅ
সিরিসিরি বাউ খেলেই লাগেই বড়ি ভালঅ

পাইখ পাখুড় গিতঅ গাহঅইএ হউ।।

বসি বসি পিঠাইচাঁদ এহঅ রে সঁচঅইএ
হামরঅ কুটুম বাটুম নেহি রে রহঅইএ
তিরিআকে নঅ মাসি আনি দেতা কনে
সেহঅ কথা ঘনেঘনে জাগেই ভালা মনে
আপঅন কহেইতে হামঅর নেখঅত কেহ দুনিআই
নামে আহেইক সসুরঘার কামে নিহি গনাই

কেসে হেতেইক একরঅ উপাই হউ।।

এহেখনে দেখেই পিঠাই আপনঅ নজঅইরে
জড় পঁড়কি বসি আহাত মল্হআকর ডাইরে
উঠিকুনে কেঁদগাছেক ডাইর রে ভাঁগঅইএ
পালহা পাত মুহড়ি টুঁগি ফাভড়ি রে বনাইএ
জড়পঁড়কি জহিকুনে ফাভড়ি রে মারঅলঅ
ফাভড়িকর চটেঁ ভালা পঁড়কি রে গিরঅলঅ

সেহঅ পঁড়কি ধরি ভালা ঘারা জে লেগঅল হউ।।

জড় পঁড়কি কুড়হাই পিঠাই লতেঁ রে বাঁধঅইএ
মনে মনে আরঅ ভালা সঁচে রে লাগঅইএ
একঅ পঁড়কিকর মাসেঁ পিঠা রে করঅবঅ
দসঅর পঁড়কিকর মাসেঁ তিঅনঅ রাঁধঅবঅ
সখ করি তিরিআকে খাউআউবেই জতঅনে
মঁই বিনু অকঅর ভালা আহেইক আরঅ কনে

জেটা খাতি মুহাইএ দেবেই হউ।।

গটেদিনা বনে বনে গরু রে চরঅলঅ
জখন আরঅ বেরা ভালা এহঅ রে ডুবঅলঅ
তখন আরঅ পিঠঅইচাঁদেঁ হাঁকঅ রে পাড়অইএ
হাঁকঅ সুনি সভে গরু মচড়াই রে ঘুরঅইএ
ঘার মুহেঁ ডহরল খনেঁ আরঅ এহঅ জানি
সভেকাইএ পিঅলা ভালা জুড়িআকর পানি
গরুক পেছুঁই চলেই পিঠঅইচাঁদ হউ।।

গাইগরু সমুঝাইএ দেইএ ঘারেঁ ঘারেঁ
পিঠঅই আরঅ চলে লাগঅল আপনঅ ঠহঅরেঁ
আপঅন ঘারা পঁহচি ভালা তিরিআকে ডাকঅইএ
সঁইআক রাউ পাইএ লতাই সাড়া রে দেউঅইএ
জড়া পঁড়কি দেখাই পিঠঅই এহঅ রে কহঅলঅ
হামঅরি হাঁখেঁ এরা সিঁকারঅ হেউঅলঅ

এখন তঁই কথাটা সুনঅবে হউ।।

একঅ পঁড়কিকর হামরা করঅবঅ রে পিঠা
দসঅর পঁড়কিক কহরি করি মুঁহঅ করঅব মিঠা
তঁই এখন আরুআ ধান এহঅ রে কুটঅবে
আরুআচার আরঅ ভালা ভিজে রে দেউঅবে
লতাই তখন আরুআধান কুটে রে লাগঅলঅ
চার পছড়ি-পাছড়ি আরঅ ভিজে রে দেউঅলঅ

ততবিরে কামঅ করঅইএ হউ।।

জখন আরঅ লতাই ভালা গুঁড়ি রে কুটঅইএ
পিঠঅইচাঁদেঁ তখন জড়া পঁড়কি রে পুদকঅইএ
টুঁড়সা-টুঁড়সি বেনাবেনি করেইতে লাগঅলঅ
তাতকে লতাক গুঁড়িকুটা সাইতঅ রে হেউঅলঅ
হরঅইদ বাঁটা মসলা পিসাই নেহি হেলেইক ডেরি
সভে মুহাই বসি গেলা চুলহাকেরি ধারি

সুখঅল কাঠ গনগনাই জরঅইএ হউ।।

মাসপিঠা তাতঅল তাতঅল ভাগাভাগি করি
দিঅ লকেঁ খাইএ লাগঅল তার ধরি ধরি
মাসপিঠা জখন আরঅ এহঅ রে সিরাইএ
মাসভাত খালা আরঅ টুএকঅ জিরাইএ
খাউআপিআ করি দিঅ নিচিতে সুতঅলঅ
আড়হাই রলাক ঘার ভালা সাঁই-সুঁই রে হেউঅলঅ

দুখেক ঘারেঁ সুখেকর আলঅ হউ।।

ভিনসারেঁ উঠি লতা মু হাঁথঅ ধঅইএ
তুলসিখানেঁ ঘার দুআইরেঁ মড়অলি দেউঅইএ
ঘার আঁগনা বাড়হা-সড়হা করে রে লাগঅলঅ
সঁইআকেরি খাইএক আরঅ মুহাইএ দেউঅলঅ
পিঠঅইচাঁদে খাউআপিআ করি রে বিহানে
গরু ডহরাই আপঅন কামে চলি গেলা বনে

হাঁথে সলঅ হাঁথেক সইলি ঠেঁগা হউ।।

দিন ফুরাই দিন আউএক পরকিতিক নিঅমে
জিনগানি বহি চলেইক সেহঅ রে ধরঅমে
একঅ দিনঅ পিঠঅইচাঁদঅ বাখান টাঁইডেঁ বসি
একাই একাই সঁচে লাগেই কাপাড় ঘাঁসি ঘাঁসি
তিরিআকর আরঅই ভালা নেইজালেইক দিনা
একাঘারেক লক হামে করঁ ভালা কিনা

গটা দিন তঅ বনেই বিতাউঅঁ হউ।।

ঘারেঁ এবেইর ছুটু ছুটুআ এহঅ রে আউঅইএ
তিরিআকর পাসেঁ ভালা কনে জে রহঅইএ
আগুপেছু সঁচি মনে জাগেই রে ঘেরঘেরি
ঘনে ঘনে এহঅ কথাই আউএক ঘুরিফেরি
কনঅ জে ডহরঅ ভালা খজি নি পাউঅইএ
এহে সঁচি টঁড়হা ভরি আহাৱ নি খাউঅইএ
তিরিআ টানে এক কান খাড়া রহঅইএ হউ।।

লেউরি সাঁউরা আর সাত সত্ৰ বিবেক জনঅম

বেরাডুবাঁই গরু ঘুরাই ঘারা রে ঘুরঅলঅ
আপঅনঅ তিরিআ ভালা সুতঅলঅ দেখঅলঅ
চুলহা চঅউকা রাঁধারাঁধি কনঅই নিহি করঅইএ
ভুখେঁ পিঠঅইচাঁদেক জিউএঁ কলবলি ধরঅইএ
বিনা খাইএ সুতি আহি বেজার বধহই হেলি
মনে রাগ জনমলঅ মেনেক মন গেলেইক গলি

তিরিআকে কহে লাগঅলা হউ।।

কিনা হেলঅউ আঁধার ঘারেঁ আহিস জে তঁই সুতি
ঘারেঁ নিহি জরঅইএ আরঅ এহঅ রে দিআবাতি
খলি কথা সুনাতঅবে তঁহি জে রে মকে
একঅর আগু এহে নিঅর দেখঁ নিহি তকে
নিদাই নেহি জাগি আহি পিঠঅইএকর লতা
কান অনাই সুনাইসাহি সঁইআকেরি কথা

পিঠঅইচাঁদেক মনঅ নহেক থির হউ।।

খনেক বাদেঁ লতা এবাইর কহে লাগঅল থিরেঁ
নউআ ছউআক জনম ভালা হামরাকেরি ঘারেঁ
ছাইন ঢাডহাউআ তরা না করিহা ডেরি
ঘারেকর দিআ আরঅ এহঅ রে দিহা জরি
রিঝঅল মনেঁ বুডহা তখন ছাইনঅ রে ঢাডহাউএ
অঁহাঁ অঁহাঁ করি ছউআ কাঁদি রে উঠঅইএ

ঘারেঁ তঅ দিআ জরি দেইল হউ।।

পিঠঅইচাঁদেঁ তিরিআকে এহঅ রে কহঅইএ
সাঁপুই নঅ বেঁগুই ভালা ঘারা রে আউঅইএ
লতাই তখন সঁইআকে এহঅ রে কহঅলঅ
হামরাকেরি ঘারা সঁইআ সাঁপুই রে আউঅলঅ
পিঠঅইএকর মন তখন উঠেইক নাচি নাচি
কিনা করম কিনা নেহি পাউএই নিহি সাঁচি

নদিমাইকে সেঁউরি করেই নমঅ হউ।।

সটসটাই পিঠঅই আরঅ এহঅ রে ডহরঅলঅ
ধাইমাইএক ঘার ভালা এহঅ রে পঁহচলঅ
আগদুআইরে ডাঁড়হাই আরঅ ধাইমাইকে ডাকঅইএ
হাঁক সুনি ধাইমাই আপঅন ঘারা লে বাহারাইএ
পিঠঅইএ তখন সভে কথা দেলেইক ভালা কহি
সুনি-সানি ধাইমাইএঁ ডেরি করঅল নেহি

পিঠঅইএকর ঘারা ডহরলঅ হউ।।

ডহঅরেঁ ডহঅরে পিঠঅই ধাইমাইএক সঁগে
গালমারি আউঅহত ভালা ভিজি রিঝে রঁগে
ফিঁগফুটা ইজতিআ এহঅ রে হাঁসঅইএ
মাহামাই পরকিতিঁই আরঅ রে সঁচঅইএ
নদি মাইএঁ একঅ বেটা লতাকে দেউঅলঅ
হামঅরঅ দেউএক আস এহঅ রে জনমলঅ

মইঅ একটা বেটা দেবেঁই অকে হউ।।

মাহামাইএ একটা ছউআ করঅলি সিরজনঅ
আঁউআরে ঝাঁউআরে ভালা আলেবর জেসনঅ
জেহঅ ডহঅরে পিঠঅই এহঅ রে আউঅইএ
সেহঅ ডহঅরেক ঝুঁড়েঁ রাখি রে দেউঅইএ
জখন পিঠঅই পাসাপাসি এহঅ রে পঁহচলঅ
ঝুঁড়ে পাতে আরঅ ছউআ সড়বড়অ করঅলঅ

পিঠঅইচাঁদেক কানে রে আউঅলঅ হউ।।

কিনা সড়বড় করেই এহঅ রে অহঅ ধুঁধেঁ
দিঅ লকঅ ঠমকি গেলা ভালঅত হিঁদেঁ হুঁদেঁ
পিঠঅইচাঁদেঁ তখন আরঅ কহঅইএ হুঁকঅরি
কনে হেকিস সমসা সমসি আউএঁ রে বাহারি
বাখানঅ পাড়অইএ আরঅ ডাঁগঅ রে জসাইএ
ধুঁধেঁকেরি পাসে ভালা এহঅ রে ঘেঁসাইএ

আলছউআ কাঁদি উঠলঅ হউ।।

অহাঁ অহাঁ কাঁদেই ছউআ উলঅট পালঅট মারি
চাঁদেক আলঅ ছউআক গাঠেঁ গিরঅইএ ঠিকঅরি
পিঠঅইচাঁদেঁ ধাইমাঁইকে দেখাউলেক নজঅইরে
দইআ জনমলঅ ভালা দিঅ লকেক অনতরে
পিঠঅইএ তখন পাতপালহা জড়অ রে করঅইএ
বুঁদিকর আইগে আরঅ পালহা রে ধরাইএ

আইগেক আলঁই দেখেই আলছউআ হউ।।
আঁউআরে ঝাঁউআরে ছউআ এহঅ রে রহঅইএ
দেখিকুনে পিঠঅই তখন ধাই মাঁইকে কহঅইএ
হামর তিরিআই মকে ভালা তর ঘারা পাঠাইকে
পেছুঁই পেছুঁই ডহরাই দেলেইক এহে আল ছউআকে
রাগেঁ তাতি গেলা পিঠঅই তিরিআকর উপঅরেঁ
কহে লাগেই বিচার হেতেইক জাইকুনে ঘারেঁ

ঢাড়হাই অকঅর কমঅর ভাঁগি দেবেই গউ।।
খইনছাঁই আরঅ ছউআকে এহঅ রে লেউঅলঅ
ধাইমাঁইএক সঁগে ভালা ঘার মুহেঁ চলঅলঅ
রাগেঁ গুরগুরি পিঠঅই পঁহচি আগ দুআরি
আপঅন তিরিআকে রাগাই আইখ কান ফাড়ি
কিআ লাগি বাখান পাড়েই সঁইআই রে হামঅরঅ
গাইর সুনি লতাক মনে লাগি গেলেইক ডরঅ
বুঝে নিহি পারঅইএ কনঅ হউ।।

বাখান পাড়ি পাড়ি পিঠঅই ঘারা রে সামহাইএ
লতা আরঅ ডরেঁ ভালা মুঁড়অ ঠঁকঅইএ
কিআ জে হেলেইক ভালা সঁইআকর হামঅরঅ
ভাঁড়িসিটি বাখান পাড়েই খেপাকর নিঅরঅ
পাসাপাসি জখন ভালা এহঅ রে হেউঅইএ
লতাই আপন সঁইআকে এহঅ রে পুঁছঅইএ
কিনা হেলঅহন কহিকে সুনাইবেহে হউ।।

রাগেক মাথাই কহেই পিঠাই তিরিআকে আপঅনে
তঁই আরঅ মাইএক কুলে জনমলে কেসঅনে
তর নিঅর পাপিন দসঅর নেখঅত ই দুনিআই
আরঅ কতেক মটাসরু কথা দেলেইক সুনাই
পিঠাইএকর কথা সুনি লতাকর হাইচকি
কিনা ভেদেঁ সঁইআই মকে করঅত বকাবকি

পাছে মাথা বগঅড় হেউঅলঅ হউ।।

কাঁদুমাঁদু হেইএ লতাই সুতি সুতি কহঅইএ
কেথিক লাগি তরাক ভালা রাগঅ হেউঅইএ
কিনা দস করলাই হামে বুঝে নি পারঅই
তবে কাহে এসন তহর মতি জে দেখঅই
খলি কথা তরা এখন ফদড়অবেহে মর ঠিনেঁ
এসন রাগ তরাকর দেখিঅ নি কনঅ দিনেঁ

লরেঁ লতাক ছতিআ ভিজঅইএ হউ।।

পিঠাইএঁ কহেই জানি-বুঝি করি এসন কামঅ
কিনা সঁচেহিস ইটাই হেতঅউ বড়ি নামঅ
ধাইমাইএক ঘার ভালা পাঠাইকুন মকে
পেছুই পেছুই ভেজি দেলসিক আল রে ছউআকে
সঁইআক কথা সুনি লতাক লাগঅইএ ঘেরঘেরি
বকেই কিনা আনসান মাথা জাইক রে ঘুরি

কিনা করতি সঁচি নি পাউঅইএ হউ।।

আপঅন সঁইআকে এবের কহে লাগঅল লতা
সুনা তরা এখন এহঅ হামঅরঅ জে কথা
গটাদিন বাগাল করি চঁধিআ ঘাঁস ডেগি
বুইধ ভাঁউ হেজাউলাইহা সাজঅলাইহা রগি
নিহিতঅ কনঅ ভুতে ভালা ছাঁহিরাউলাহন তহরাকে
সেহঅ খাতির ইটাসেটা বকেইহা হউ মকে
জা মুড় চভড়াই আউবেহে তরা হউ।।

লতাই আপঅন ছউআ ভালা দেলেইক রে দেখাইএ
পিঠঅই আরঅ কহেই ভালা হাইটাটকা হেইএ
ছউআ দেখি আরঅ ভালা সাঁচি মনে মনে
খইছাক ছউআ ঝুঁড়ে তবে রাখি দেলা কনে
করাক ছউআ এবের পিঠঅই এহঅ রে বাহারাইএ
দিঅ ছউআ একে সঙ্গে দেলা রে সুতাইএ

জামা ছউআ মানাইএ গেলা হউ।।

ধাইমাইএ নাইর ভালা এহঅ রে কাটঅইএ
দিঅ ছউআকে আরঅ ধউআপঁছা রে করঅইএ
ছাগঅরিকা দুধা ভালা পিআউএই জতঅনে
ধাইমাইএক গুনেক কথা ভুলি জাতা কনে
এক কহেইতে দিঅ ছউআক বাপ হেলা রে পিঠঅই
দিঅ পারানিক দিলা সেহঅ রিঝেঁ রে নাচঅই

ছউআক রুপেঁ ঘারা করেই আলঅ হউ।।

ধাইমাইএ ধউআপঁছা করি দিঅ ছউআ
কহে লাগঅল সাঁচেঁ পিঠঅই জনঅম হেলা জাউআ
আদঅরে জতঅনে ভালা দিঅ রে ছউআকে
দিঅ লকেঁ বড়অ করিহান পালিকে পসিকে
ছউআরাকর মুহঅ দেখি কহেই হামঅর মনঅ
ভাইগ গুনেঁ পাউঅলাইহা এসঅন সনা ধনঅ

গুনঅমান গনাতা দুনিআইএ হউ।।

ছউআক লেইএ কতেক কথা ফদড়ে রে লাগঅলা
সেহঅ খনে মহিরাজাক লক রে পঁহঅচি গেলা
ধাইমাইকে আরঅ ভালা দেলা রে সুনাইএ
গঁগাদরি রানিক ভালা বেটি রে হেউঅইএ
ধাইমাইএ জখন আরঅ এহঅ রে সুনঅলঅ
রাজাক লকেক সঙ্গে ভালা এহঅ রে ডহরঅলঅ
পঁহঅচি গেলা রাজাকর ঘারা হউ।।

গঁগাদরি রানি ভালা জেহঅ ঘারেঁ রহঅইএ
ধাইমঁই অহঅ ঘারেঁ এহঅ রে সামহাইএ
চাঁদেক নিঅর ছউআ ভালা আরঅ রে দেখঅইএ
জতঅন করি আরঅ ভালা নাইর জে কাটঅইএ
ধউআপঁছা আরঅ ভালা এহঅ রে করঅলঅ
ছাগঅরিকা দুধা ভালা এহঅ রে পিআউঅলঅ
বেটিক রুপেঁ ঘার আলঅ হেলা হউ।।

ধাইমঁইএঁ আপঅন কাম করঅলঅ জতঅনে
কথা পাড়ে লাগঅল আরঅ রাজাকরঅ ঠিনে
তরঅ বেটিক নাইর হামে কাটি জে দেউঅলঁ
এখনেকর কাম ভালা সভে রে করঅলঁ
জড়াবেটাক জনঅম হেলা পিঠঅইচাঁদেক ঘারেঁ
অকঅর ঘার জাম এখঅন তেঁতারে সুঁসারেঁ
তাকঅরবাদে ঘুরি জে আউঅম গউ।।

গঁগাদরি রানিঁই ভালা কাঁদনা রে জড়অলঅ
ধাইমঁইএক কানে কাঁদনা এহঅ রে বজড়লঅ
তুরুতে রানিকর ঠিনে এহঅ রে পঁহচঅইএ
কাঁদনাকর কারন ভালা জানে রে খজঅইএ
রানিকেরি কাঁদনা ভালা নেহি রে টুঁটঅইএ
মুহেঁকেরি কথা ভালঅ নেহি রে ফুটঅইএ
ধাইমঁই তঅ চকাই রহঅলি হউ।।

ধাইমঁইএঁ পুঁছে লাগঅল রানিকেরি ঠিনে
কিআ দুখেঁ কাঁদনা তহঅর এসনঅ জে দিনে
চাঁদেক নিঅর বেটি ভালা আউলউ তর সঁগসারেঁ
এসঅন সুঁদঅর ছউআ নেখঅত গউরা রে বাজারেঁ
ছউআ ছউআ করেহেলিস ছউআ পাউলে কঁখাঁই
লরেঁ ঝরঅ ঝরঅ আঁখি তবে রে কন দুখাঁই
তঁই মকে কহিকে সুনাউএঁ হউ।।

খনেক বাদে রানিঁই তবে কহেই মনেক কথা
সুনে ধাইমাই কহঁ হামঅর মনেকেরি বেথা
বুড়হাক ঘারেঁ কাঁথাছিঁড়া নেহি রে রহঅইএ
অকঅর ঘারেই জড়া বেটা এহঅ রে হেউঅইএ
সনাক আঁচির সনাক পাঁচির এতেক হামঅর ধনঅ
হামঅর ঘারেই আউলি বেটি কাঁদেই জে মর মনঅ

বুড়হা বুড়হি ভাইগমান গনাত হউ।।

রানিক কথা সুনি তবে সাঁচি আপন মনে
ধাইমাইএঁ সুনাতএক কথা রানিকে জতঅনে
কাপাড় গুনে কাপাস মাই গউ এহঅ রে ফুটঅইএ
জাকঅর জেসঅন ভাইগ তেসঅন ধনঅ রে জুটঅইএ
পরেক দেখি ছেঁছাই মরা নেহি রে সাজঅইএ
ধরমেকর হাঁথোঁ ভালা সভে জে হেউঅইএ

আপঅন ধনে রহঅবে সুখি হউ।।

ধাইমাইএঁ রাজাকে এহঅ রে কহঅইএ
রানিমাইএক মন দসঅর ডহঅরে বহঅইএ
বেটিধনঅ পাইকে করাঁই দুখঅ জাগেক মনে
তঁই রাজা অকে টুএক বুঝাউহিঁ জতঅনে
পুআতিকর খাইএক রাজা এহঅ রে মুহাউবে
কুরখি সিঝা, চিউড়া ভুজা এহঅ রে খাউআউবে

এখন বুড়হাক ঘারা চলঅলঁ গউ।।

পিঠঅইএকর ঘারা ধাইমাই এহঅ রে পঁহচলঅ
দিঅ ছউআকে ভুঁইএঁ ভালা এহঅ রে দেখঅলঅ
ধাইমাই গেরহি ভালা খাটিঁই রে সুতাইএ
চাইরঅ পুআ আহেইক ভালা মাটিঁই রে থাসাইএ
ধাইমাইএ দেখি ভালা এহঅ রে কহঅলঅ
দিঅ ছউআ আরঅ ভালা বিরঅ রে জনমলঅ
বল দেখি হেলেইক আটকাল হউ।।

ধাইমাইএঁ পিঠঅইকে এহঅ রে ডাকঅলঅ
তিন ঠুঁগরা সারঅই কাঠ এহঅ রে খজঅলঅ
অহঅ কাঠেক পসকি ভালা এহঅ রে করঅইএ
পিঠঅইচাঁদকে আরঅ ভালা এহঅ রে কহঅইএ
এহে পসকি আইগ তঁই কাকঅউ নিহি দেবে
হামঅর এহে কথা ভালা খেইআলঅ রাখঅবে
পাঁচদিনে পঁসবুড়হি বাহারাউঅব হউ।।

ধাইমাইএঁ পসকি ভালা এহঅ রে জরাইএ
আরঅ জতেক কাম ভালা এহঅ রে করঅইএ
দামকড়ি লেইএ ধাইমাই ঘারা রে ডহরলঅ
পুআতিকর খাইএক বিধি কহিকে রাখঅলঅ
পিঠঅইচাঁদে ঠানি ঠানি সভে রে মুহাউঅইএ
তিরিআকর পাসে পাসে এহঅ রে রহঅইএ

এখন গরু বাগালঅ নেহি জাই হউ।।

জেহঅ রাতিঁই বুড়হাক বেটাক জনঅমঅ হেউঅলঅ
সেহঅ রাতিঁই সাত সঅ বিরা আরঅ রে জনমলঅ
আগু জনমলঅ ভালা পিঠঅইএকর বেটা
লেউরি নাম দেলা আরঅ দেখি ভাব চেঠা
ঝুঁড়ে পাউঅল ছউআক নাম সাঁউরা রে রাখলঅ
লেউরি সাঁউরা দুই ভাই এহঅ রে হেউঅলঅ
দিঅ ভাইএক একে জে গড়হন হউ।।

তাকরবাদে জনমলা বিরা রজল ধবা
আরঅ জনমলা বানঠামুচি কামার সিবা
বাঁকারাজা পেঁড়রি বিরা দনিরাজা আরঅ
ফড়িঁগা রাজা খটু দুবরাজ গুনেকর আধারঅ
সহদেবা, কানুহা, সাঁউরু আরঅ ধাঁউরু বিরা
একে একে জনমলা গুনেকেরি হিরা
বলেঁ কেহু কম নিহি গনাত হউ।।

আরঅ জনমলা ভালা চনদা বিরুআনি
তাকঅরেকা বাদে জনমেই এহঅ রে রজঅলিনি
লুড়কি নামে বিরুআনি এহঅ রে জনমলি
বসমতা মাইএক কঁখেঁ আঁখিআ মেলঅলি
গবর মহন হাঁথি বিরা আরঅ রে জনমলঅ
হরিহরঅ ঘড়া বিরেক জনঅম রে হেউঅলঅ

আর জনমলা দলটাঁটু ঘড়া হউ।।

জেহঅ রাত্তিই লেউরি সাঁউরাক জনঅম রে হেউঅলঅ
আরঅ কতেক পকা মাকঅড় এহঅ রে জনমলঅ
লেউরি সাঁউরাক জনঅম কথা আরঅ রে ছপলঅইএ
গটা গউরাঁই বুড়হা বুড়হিক গুনঅ রে খেলঅইএ
জখন আরঅ ছপলি গেলা গউরা রে বাজারেঁ
হুজা হুজা আউঅত সভে পিঠঅইএকর ঘারেঁ
ছউআ দেখি মনঅ ভরঅইএ হউ।।

এক দুই তিন চাইর দিনঅ রে বিতঅলঅ
পাঁচদিনেঁ ধাইমাইএঁ পঁস বাড়হা করঅলঅ
পিঠঅইচাঁদ বাগাল এখন নেহি রে বাহরাইএ
গটা গউরাক গরু ভালা ঘারেই রে রহঅইএ
মহিচাঁদেক গহাইল আরঅ দঁকি ফুটি গেলা
রাজাকেরি মনে তখন ভাভনা রে জাগঅলা
পিঠঅইচাঁদকে ডাকি পাঠাউঅলা হউ।।

লেউরি সাঁউরাক জিলি উমঅইরেক কেলবি

মহিরাজাক ঘার পিঠঅই এহঅ রে আউঅলঅ
ডাকেকর কারনঅ ভালা জানে রে খজঅলঅ
রাজাঁই তখন পিঠঅচাঁদকে এহঅ রে কহঅইএ
কইদিন লে গাইগরু ঘারেঁ রে রহঅইএ
তঁই জদি বাগাল ভালা বাহারাৰে রে নিহি
গাই গরু মরি জাতা ঘারেই বাঁধাইল রহি

তঁই এবেইর বাগালঅ বাহারাঁই হউ।।

মহিচাঁদেক ঠিনে পিঠঅই এহঅ রে সুনাইএ
মনেক কথা টুমেঁ টুমেঁ আরঅ রে মেহেনাইএ
জড়াবেটাক নঅ দিনে নারঅতা রে করঅবঅ
তাকঅরেকা বাদে ভালা বাগাল রে বাহারাবঅ
একাঘারেক লক হামে বুঝি দেখেঁ মনে
নেগিজগিক মুহাজুহা করি দেতা কনে

সভে তঅ মকেই করে হেতি হউ।।

তখন আরঅ মহিচাঁদেঁ কহেইক রে পিঠঅইকে
হামঅরিকা কথা তঁহি সুনঅবে মন দেইকে
তর দিঅ বেটাক জেদিন নঅ বছর রে হেতউ
হামরঅ বেটিকর উদিন নঅ বছর গনাতউ
মর বেটিক নঅ বছরেঁ নারতা রে করঅবঁ
তর দিঅ বেটাক নারতা সঁগেই করাই দেবঁ

তিন ছউআক নারতা একে সঁগ করঅব হউ।।

আণ্ডক নিঅর তঁই গরু লেইএ রে বাহারাৰে
তর সঁগসারেক কথা নেহি রে সঁচঅবে
মর বেটিক নারতাক সঁগে তর বেটারাক নারতা
দেখি সুনি গটে গউরা সভে বুঝে পারতা
মর কথা ঘারেঁ জাইকুন এহঅ রে ফদড়বে
কহিকুনে আপঅন কামে এহঅ রে সঁপড়অবে
গাই গরু ছটপটাহাত গহাইলে হউ।।

রাজাক কথা সুনি পিঠাই ঘারা চলি গেলা
রাজাই আরঅ টহলুকে এহঅ রে ডাকঅলা
টহলুকে ডাকিকে রাজাই কহে রে লাগঅইএ
মর বেটিক নারতা দিনা এহঅ রে আউঅইএ
গটা গউরাক মুদিকে তঁই ডাকি রে আনঅবে
হামঅরঅ হকুম ভালা কহিকে সুনাউবে

রাজাক আড়হানে টহলু চললঅ হউ।।

মুদিরাকর ঘারেঁ ঘারেঁ টহলু রে পঁহচলঅ
রাজাকরঅ হকুম ভালা গাহে রে লাগঅলঅ
গটা গউরাক মুদি তখন পাইকে কথাক অড়অ
মহিচাঁদ রাজাক ঘারেঁ তুরুতে হেলা জড়অ
বেউরা জানেক খাতির সভে আউলা ডাকাডাকি
হউআ লে বুড়হা ভালা কেহু নিহি বাকি

ভালি রহঅল রাজাকেরি মু হউ।।

নেহর করি সভেকাইএঁ রাজাকে কহঅলে
কিনা লাইএ তঁই রাজা হামরাকে ডাকঅলে
তখন আরঅ মহিচাঁদেঁ কহেইন মুদিরাকে
জে খাতিরেঁ ডাকাউলাহিঅন সুনা মন লাগাইকে
মর বেটিক নঅ বছরেঁ নারতা রে করঅবঅ
সেহঅ খাতির তহরাকে এখন কামে রে জড়অবঅ

কিনা করে হেতঅহন সুনা হউ।।

তিনটা গেড়িআ ভালা এহঅ রে কড়িহা
কড়ি কড়ি পানি ভালা ফুটাইএ রে দিহা
তখন একঅ মুদি বুড়হাঁই রাজাকে কহঅইএ
বাঁধ পখঅইর গেড়িআ তহর সাঁগি জে রহঅইএ
তবে কাহে নউতন কড়েক আসা তহর মনে
সেহঅ কথা কহেঁ রাজা হামরাকর ঠিনে

মন দেইএ সুনঅবঅ সভেকাই হউ।।

ৰাজাই তখন কহে লাগঅল মুদিৰাকৰ পাসেঁ
গেড়িআ কড়াউঅম হামে সুনী কিআ আসেঁ
একটা গেড়িআ ভালা তেলে রে ভরঅবঅ
আর একটা গেড়িআ হরঅদি চারঅবঅ
বাকি আর এক গেড়িআই আরঅ ভরঅবঅ রে পানি
তিনটা গেড়িআ হেতেইক ভালা একঅ রে ঠিনি

তরা আপঅন কামে রে ঠেসিহা হউ।।

তখন একঅ মুদিঁই ভালা কহি রে উঠঅইএ
তর কথা রাজা হামঅর মুড়ে নি ঢুকঅইএ
তিন গেড়িআই তিন নিঅর তেল হরঅইদ পানি
এসন কাহে কৰিস রাজা কিনা মনে ঠানি
ৰাজাই কহেই মর বেটিক নারতা রে করঅবঅ
গটা গউরাবাজার ভালা এহঅ রে নেউতবঅ

খালাঁই খালাঁই কতেক তেল দেউঅবঅ হউ।।

পানিকর গেড়িআই সভে গড় হাঁথ রে ধউতা
বাঁধবাগান কৰি আরঅ অহঅ গেড়িআই রে জবড়তা
তেলেকর গেড়িআই ভালা নাহাতা মরদনা
হরঅদি গেড়িআই মেহেৰাৰুৱা কান অনাই সুনী
নাহাই নাহাই আপঅন আপঅন ঘাৱা চলি জাতা
জিনগানি ভর সভেকাইএ এহঅ কথাই গাহঅতা

জাউআ জনম হেলাহি হামঅর ঘাৱেঁ হউ।।

মুল মুদিঁই তখন আরঅ কহেইক জে রাজাকে
মুদিৰাক মুল মানতা জানবে রাজা মকে
মঁই আরঅ গেড়িআ কড়াঁই ছেউ জে দেউঅবঅ
তিন গাঁইত বসমতাইএ এহঅ রে মারঅবঅ
নউতন ধতি তঁই ভালা মকে জে পিঁধাউবে
গুড়চিউড়া আরঅ ভালা এহঅ রে দেউঅবে

তবে হামি ছেউঅ মারঅবঅ হউ।।

তিন গেড়িআই তিন চট এহঅ রে মারঅবে
 তর জেটা পাউনা ভালা এহঅ রে পাউঅবে
 রাজাক কথা সুনি মুদি গাঁইত রে ধরঅলঅ
 তিন গেড়িআই তিন গাঁইত এহঅ রে মারঅলঅ
 ঝানে-ঝাপানে সভে মুদি ঠেসিএ রে গেলা
 দেখেইতে দেখেইতে গেড়িআ বনাইএ রে দেলা
 দাম কড়ি লেইএ ঘারা চলি গেলা হউ।।
 মনেক জঁখঁ গেড়িআ রাজাঁই জেসঅন খজেহেলা
 তেসনে গেড়িআ ভালা বনাইএ রে দেলা
 রাজাক বোটিক নারতা দিন এহঅ রে আউঅলঅ
 লাপিত ধবা ধাইমাঁই সভেকাই পঁহচলঅ
 গঁগাদরি রানিক ভালা নইহরেক লকজনঅ
 নেউতা পাইকে পঁহচলা রিঝেঁ ভরঅল মনঅ
 কনঅ লক বাদ নিহি রহঅলা হউ।।
 ভিনসরা লে মহিচাঁদেক ফুরসঅইত নিহি কামে
 আড়হান বাড়হান লক বাতলান চলেইক পুরা দমে
 রাজাকেরা টহলু আরঅ রাজাকর আড়হানে
 তেলিঘার কুইরিঘার গেলা রে বিহানে
 জাকঅর জেটা কাম সভে আড়হাইএ রাখঅইএ
 কামেকেরি ফাঁকে টহলুই চিউড়া রে ফাঁকঅইএ
 হ্বেক বাজঅন বাজেই রাজাঘারেঁ হউ।।
 ভারেঁ ভারেঁ মুড়েঁ মুড়েঁ তেলিরা তেল আনি
 তেলেকর গেড়িআই ঢারঅত জেসে বাঁধেক পানি
 কুইরিরা হরঅইদ গেড়িআ হরঅইদেঁ ভরঅলঅ
 কচা কনা আরঅ ভালা বাদঅ নিহি রহঅলঅ
 পানিকর গেড়িআ আরঅ পানি ভারিআরা
 ইজঅর পানিঁই ভরাই দেলা বরিসাক নিঅরা
 দেখি রাজাক মন গেলেইক জুড়াই হউ।।

রাজাঁই এবের লাপিতকে এহঅ রে হাঁকাইএ
রাজাক হাঁকে লাপিত ভালা আউঅলঅ ঝাঁকাইএ
জখন আরঅ লাপিত ভালা পাসে রে আউঅলঅ
রাজাঁই তখন লাপিতকে কহে রে লাগঅলঅ
গটা গউরাই হরঅইদ চার এহঅ রে বুলাউবে
কনঅ ঘারা আরঅ ভালা নেহি জে ছাড়অবে

নারতা নাহানে আউতা সভেকাই হউ।।

হরঅইদ চার লেইএ লাপিত এহঅ রে চলঅলঅ
গটা গউরাক ঘারে ঘারে আরঅ রে বুলঅলঅ
খেইআল করি করি ভালা এহঅ রে চলঅইএ
কাকরঅ ঘারা জেসে আরঅ নেহি রে ভুলঅইএ
গটা গউরা নেউতা বুলা এহঅ রে হেউঅলঅ
লাপিত আরঅ রাজাঘার ঘুরি রে আউঅলঅ

কামাবুমা করে লাগঅলঅ হউ।।

গটা গউরাক লক ভালা আউঅত ডাকাডাকি
ছউআ বুড়হা আদি করি কেহ নেহি বাকি
তেলেক গেড়িআ হরঅইদ গেড়িআ পানিক গেড়িআ দেখি
সভেকাকর মন ভালা উঠঅলঅ হরঅখি

রাজাকরঅ কাম দেখি দেউঅতঅ রে সাবাসি
নাচঅত কুদঅত ছুট ছউআ রিঝে ভাঁসাভাঁসি

জেই জেসঅন গালঅ মারঅতঅ হউ।।

টহলুই আরঅ সভেকাইকে সুনাই মনেক কথা
রাজাক বেটিক নিছু আজু না জানিহা নারতা
বাগালখাটা বুড়হাক আরঅ দিঅ রে বেটাকর
একে সঙ্গে নারতা ভালা হুকুম রে রাজাকর
পানিকর গেড়িআই সভে গড়হাঁথ রে ধইহা
তেলেকর গেড়িআই ভালা মরদনা নাহাইহা
মেহেরারুরা হরঅদি গেড়িআই হউ।।

টহলুকে সভে লকেঁ কহে রে লাগঅলা
লাপিতেকর মুহেঁ হামরা সুনলাইহঅ কথাগিলা
হামরা এখন নাহান ভালা এহঅ রে করঅবঅ
নারতা নাহাই ঘার ভালা সভেকাই ডহরঅবঅ
টহলু আরঅ রাজাঘারা এহঅ রে চলঅইএ
মনেকরঅ রিঝেঁ ভালা দেহি রে ডলঅইএ

মনে মনে সঁচেই আরঅ কিনা হউ।।

রাজাঘারেঁ বেহাইন দেখা এহঅ রে হেউঅইএ
হাঁসি ফুরতি রিঝা রঁগেঁ বানঅ রে বহঅইএ
ঢউলিআকর সঁগে চলেইক তেল হরঅইদ মাখামাখি
ভাই ভেইআদ পড়সি সভে হেলা ডাকাডাকি
লাপিতাইনেঁ রঁগ ভালা পিঁধাইএ দেউঅইএ
মেহরারু আরঅ ছউআক ভিড়েঁ আনগা নি দেখাইএ

দুধুমাইরা নাচে লাগঅলা হউ।।

বড়অ বড়অ খাসি ভালা এহঅ রে কাটঅইএ
খাসি দেখি টহলুই আরঅ ঠাঠঅ রে চাটঅইএ
জখন আরঅ বেনাবেনি এহঅ রে হেউঅইএ
টহলুই আরঅ ফকসাগিলা খালুই রে ভরঅইএ
সরুপাঁটা ভঁঠি আরঅ ধবিঁই রে রাখঅলঅ
মনে মনে আরঅ ভালা এহঅ রে সঁচঅলঅ

ঘার লেগি পিঠা পড়াই খাম হউ।।

মাস ভাত রাঁধারাঁধি জখন রে হেউঅলঅ
রাজুঁই আরঅ টহলুকে এহঅ রে ডাকঅলঅ
ডাকি আনিহিন ভালা গটা গউরাকর লককে
মাস ভাত খাতা সভে হামঅর ঘার আইকে
টহলু তখন বিঁড়ুর বেগে চলিএ রে গেলা
গটা গউরাক সভেকাইকে জানাইএ রে দেলা

গাঁউ ভাঁগি সভেকাই আউঅলা হউ।।

পাঁতাসাইর সভে লক এহঅ রে বসঅলঅ
পতরিঁই পতরিঁই মাসভাত এহঅ রে পরসলঅ
সভেকাই খালা ভালা আমভা পুরঅন করি
মাসভাত পরসে লাগঅল দহঅরি তেহঅরি
খাইদাই সভে আপঅন ঘারা চলি গেলা
কুটুমবাটুম কেহু আরঅ বাদ নিহি রহঅলা
খাউঅন দাউঅনে বেরা ডুবি গেইল হউ।।

পিঠঅইচাঁদেক গটা দিনা বনে রে বিতঅইএ
বেরাডুবাই ঘারা ঘুরি থকিতে সাঁথাইএ
আপঅন ছউআক একুইসা এহঅ রে নজকলঅ
তখন আরঅ রাজাকে জাইএ রে কহলঅ
দিঅ ছউআক হামে ভালা একুইসা করঅবঅ
সেহঅ দিনা গরু হামে নেহি জে খলঅবঅ

আপঅন গরু দেখিহা অহঅদিন হউ।।

বুড়হাক কথা সুনি রাজাই কহেইক রে পিঠ থাপড়াই
হামঅর কথা সুনে টুইএক জাইস নাহু রে ঘাবড়াই
হামঅর বেটিকর ভালা একুইসা করঅবঅ
তর দিঅ বেটাক আরঅ সাঁগে করাই দেউঅবঅ
বেটাক একুইসাকর খাতির নেহি রে সাঁচঅবে
সভে দিনেক নিঅর তঁই গরু রে চরাউঅবে

কিনা কিনা মুহাউলাহিস কহেঁ হউ।।

বুড়হাই কহেই মুহেঁ আরঅ কিনা জে সুনাইব
হামঅর ঘার চালেঁ রাজা দেখাইএ জে দেবঁ
তখন রাজা পিঠঅই সাঁগে এহঅ রে ডহরলঅ
আড়হাই রলাক ঘার ভালা এহঅ রে পঁহচলঅ
রাজাকে লেইএ পিঠঅই ঘারা রে সামহাইএ
মুহাজুহা সভে কিছু এহঅ রে দেখাইএ

রাজাই তখন দেখে লাগঅলা হউ।।

মটেঁ মটেঁ চিউড়া বাঁধঅল দেখেই রাজা মহি
হাঁড়হাঁই হাঁড়হাঁই দুধ আহেইক হেতেইক ভালা দহি
ঠিলিআই ঠিলিআই ঘিউ আরঅ আহেইক রে ভরঅলঅ
কুমেঁ কুমেঁ গুড় ভালা আহেইক রে ধরঅলঅ
পতরিকর ডিঁগ আরঅ দেখি ঘারেক কনাঁই
রাজাঁই তখন পিঠঅইচাঁদকে কহঅলঅ মনমনাই

এতেক কিছু মুহাউলে কখন হউ।।

পিঠঅইচাঁদে কহেই তবে কিনা কহম আরঅ
বেরাডুবাঁই গাইগরু পঁহচাই ঘারা ঘাইরঅ
ঠানি ঠানি গটা গউরা এহঅ রে বুলঅলাই
সভেকাইএ দেলা জাকে জেটা খজঅলাই
অরাকর কামেক খনে ঘুরাই দেউএ হেতি
নি হেলে মান খাতির নেহি জে রহঅতি

তকে রাজা আর কিনা বুঝাউবঁ হউ।।

রাজাঁই কহেই গটা গউরা এহঅ রে কহঅলে
হামকে আরঅ কনঅ কিছু নেহি রে খজঅলে
পিঠঅইচাঁদে তখন আরঅ কহেই মনেক কথা
তর খরঅচে পাইরাই দেলে মর বেটারাক নারতা
ঘুরি আরঅ খজঁ নিহি আপনঅ ইমানে
সেহঅ খাতির তঁহি রাজা রাগ বাসিস নাহু মনে

মনেক কথা খলিকে কহলঁ হউ।।

তখন আরঅ মহিচাঁদেঁ মুচঅকি রে হাঁসি
পিঠঅইচাঁদকে কহে লাগঅল আপঅন লক রে বাসি
তর বেটারাক একুইসা পাইরাইএ রে দেবঁ
জহড়াউঅল ধন তর একমুঠাউ নি লেবঁ
হামঅর উপর পততুক ভালা তঁহি রে রাখঅবে
তর জেটা কাম সেহঅ কামে রে রহঅবে

সুনি বুড়হাঁই মুড়অ লাড়অইএ হউ।।

একুইসা দিন ভালা পঁহচিএ রে গেলা
রাজাঁই আরঅ টহলুকে ডাকঅ রে দেলা
টহলু তখন রাজাঘারা এহঅ রে আউঅলঅ
রাজাঁই আরঅ কামেক কথা সুনাইএ দেউঅলঅ
গটা গউরা বাজারেঁ জানাই দিহিন বানারঅ
একুইসা করঅব ভালা বেটিক রে হামঅরঅ

বুড়হাক বেটারাকর অহঅ সঁগে হউ।।

ইঠিন উঠিন বজকে লাগঅত মেহেরারু মনে
কনে জাইহা রাজাক ঘার বুড়হাক ঘারা কনে
কেহু কহঅত রাজাঘারা হামে রে জাউঅবঅ
ভালঅ মদঅ খাইএক ভালা খাইলাই রে পাউঅবঅ
সাধ করি বুড়হাক ঘারা জদি রে জাউঅবে
জেহঅ মুহেঁ জাবে ভালা অহঅ মুহেঁই আউঅবে

আউআ জাউআই থকিত হেতেইক সার হউ।।

কতেক কতেক বুড়হি আরঅ হেইএ গেলা জড়অ
দসঅর কথাঁই অরা নেহি হেলা থড়অ-বড়অ
বাগাল খাটা বুড়হাক ঘারেই হামরা রে ডহরবঅ
কনঅ কথাঁই হামরা ভালা নেহি রে বগড়অবঅ
বুঢ়ানতি উমঅইরে দিঅ বেটা রে পাউঅলঅ
আড়হাই রলাক ঘার ভালা আলঅ রে হেউঅলঅ

হামরা গেলে মনে বল পাউঅতা হউ।।

জাকঅর জেটা ভালঅ ঠানঅত এহঅ রে বুঝাইএ
কেহু রাজাঘার কেহু বুড়হাক ঘার উজাইএ
কতিজনা বুড়হাক ঘার এহঅ রে পঁহচলঅ
রাজাকেরি চইখে ভালা আরঅ রে বাঝঅলঅ
সভেকাইকে জড়অ করি তেলঅ রে দেউঅইএ
নাহাই নুহুই আউআ তরা নেহঅরে কহঅইএ
সভে মেহেরারু নাহানে গেলা হউ।।

নাহাই নুহই সভে লক এহঅ রে আউঅলঅ
পাঁতা সারি সভেকাইকে বসে রে কহঅলঅ
পতরিঁই পতরিঁই গুড় চিউড়া এহঅ রে বাঁটঅইএ
চাপ-চাপ দহি ভালা আরঅ রে দেউঅইএ
ঠনগিঁই ঠনগিঁই ঘিউ ভালা পতরিঁই রে পরসঅইএ
চাইরঅ বাটে রাজাক আরঅ নজঅইরঅ ঘুরঅইএ
লুলুহা চাটি সভেকাই খাউঅলঅ হউ।।

জখন আরঅ খাউআ দাউআ এহঅ রে হেউঅলঅ
রাজাঁই তখন সভেকাইকে আরঅ রে কহঅলঅ
তরা এখন হামর ভালা বেটিকে দেখিহা
পিঠঅইচাঁদেক দিঅ বেটা আরঅ দেখি লিহা
সভেকাই রাজাবেটি এহঅ রে দেখঅইএ
ছউআ দেখি জেঁই জেসঅন ফদড়ে রে লাগঅইএ
করাঁই লেঅইতে হেউঅত ঠেলাঠেলি হউ।।

রাজাঘারঅ ছাড়ি আরঅ মেহেরারু সভেকাই
ডহরলা পিঠঅইঘারা এহঅরে একাই একাই
আড়হাই রলাক ঘারা পঁহচি আরঅ রে দেখঅইএ
দিঅ ছউআ খাটিঁই ভালা সুতি রে রহঅইএ
ছউআক পাসেঁ বসি লতাঁই খেদেই ভালা মাছি
লক দেখি মন অকর রিঝেঁ উঠেইক নাচি

সভেকাইকে বইসনা দেউঅলঅ হউ।।
মন সভেকর ভরি গেলেইন দিঅ ছউআ দেখি
অহঅ সঁগে আরঅ ভালা লাগলেইন হাইচকি
মাটিঁই ভাঁসি আহেইক ছউআক খাটিকেরি পুআ
ফদড়ে লাগঅল বিরেক বির জনমলা দিঅ ছউআ
ভাইগমান হেকঅত ভালা পিঠঅইচাঁদ আর লতা
সভেকাইএ কহে লাগঅত এহে একে কথা
এরা সভে রনে জিতঅতা হউ।।

অঝাক মুহেঁ ধরঅম পূজাক নিতি সুনান
বুড়হা বুড়হিক কথা ভালা গাহি সভে লকে
আপঅন ঘারা ডহরলা বসি রহতা কতেকে
জখন আরঅ বেরা ভালা এহঅ রে ডুবঅলঅ
গাই গরু লেইএ বুড়হা গাঁউ রে পঁহচলঅ
ঘারেঁ ঘারেঁ গাইগরু সমুঝাইএ দেলা
তাকঅর বাদেঁ আপঅন ঘার এহঅ রে আউঅলা
দিঅ ছউআ কাঁদি উঠঅলা হউ।।

ছউআক কাঁদঅন সুনি ভালা দিঅ রে পারানি
হড়বড়াই পঁহচলা এহঅ রে ছউআক ঠিনি
দিঅ লকেঁ দিঅ বেটা করাঁই রে লেউঅলঅ
কতেক নিঅর রেগ ধরি বধাউএ লাগঅলঅ
দিঅ বেটা আদাবাদি এহঅ রে কাঁদঅইএ
মাইএকেরি দুখঅ ভালা নেহি রে পিঅইএ
কিনা হেলেইক বুঝি নি পাউঅতঅ হউ।।

বেটারাকর কাঁদনা জখন বাড়হি রে জাউঅইএ
কনঅ করি সুগুম ভালা নেহি রে হেউঅইএ
লতাই তখন সঁইআকে কহেই দমাট রাগাই
কেহু হামঅর সনাধনে দেলা নজঅইর লাগাই
এখনে তরা অঝাঘার এহঅ রে জাউঅবে
তুরুতে অঝাকে ভালা ডাকি হউ আনঅবে

কন রাঁড়িক নেহি জে পসালেইক হউ।।
তিরিআকর কথাঁই পিঠঅই নাহু করঅল ডেরি
সটসটাই অঝাঘার দেলা রে ডহঅরি
অঝাকর দুআইরেঁ ভালা হাঁকঅ রে পাড়অইএ
বুড়হাক হাঁক সুনি অঝা ঘারা লে বাহারাইএ
সভে কথা অঝাকে কহি রে দেউঅলঅ
অঝা তখন পিঠঅই সঙ্গে এহঅ রে ডহরলঅ
পঁহচি গেলা আড়হাই রলাক ঘার হউ।।

ঘারা ঢুকি অঝাঁই আঠিকুঠি রে করঅইএ
তেল খড়হি আরঅ ভালা হাঁথে রে ধরঅইএ
ভুতেক নামে তেল ভালা এহঅ রে ফেঁকঅলঅ
ডাইন জুগিনেক নামে আরঅ এহঅ রে ঢারঅলঅ
তেলেক সঁগে খড়হি ভালা আরঅ রে ছাড়অইএ
ভুত ডাইন জুগিন নজঅইর নেহি রে গড়অইএ

অঝাঁই তখন কহে লাগঅলা হউ।।

ডাইন জুগিন ভুতেক ভর এহঅ রে নেহি দেখাই
এতেক এতেক আঠিকুঠি করে গেলঁ ফাঁকাই
দিঅ ছউআক কাঁদনা ভালা নেহি রে টুটঅইএ
অঝাঁই মুড় গাড়ি আরঅ ডহর বুইধ খুঁটঅইএ
ধরমেক নামে তেল ভালা ঝাঁটি রে দেউঅলঅ
অহঅ সঁগে খড়হি ভুঁইএঁ জতঅনে রাখঅলঅ

ধরমঠাকুর সেঁউরন করঅইএ হউ।।

অঝা এবেইর রিঝাই উঠি কহে রে লাগঅলঅ
হামর মনেক কথা ভালা খাঁটি রে হেউঅলঅ
সুনে সুনে পিঠঅইচাঁদ হামঅরি বচঅনঅ
ধরম ঠাকুরেকর মানসিক করঅবে এখনঅ
পিঠঅই তখন হড়বড়াই কহেইক রে অঝাকে
কিনা কিনা করে হেতি বুঝাই দেবে মকে

মানসিক হামে এখনে করঅবঅ হউ।।

অঝাঁই কহেই তঁই এখন গড়হাঁথ রে ধউঅবে
পিঁধঅন লুগা বদলাই ভালা দসরা পিঁধঅবে
একঘটি পানি আনি দিঅ হাঁথে ধরি
তুলসি তরেঁ ডাঁড়হাবে পুবে মুহ করি
সুরুজে সেঁউঅরি আরঅ পানি ঢারঅ দেবে
জড়হাঁথঅ করি ভালা এহঅ রে গিরঅবে

এক ধিআনে মানসিকঅ করঅবে হউ।।

অঝাক কখাঁই পিঠঅই ভালা এহঅ রে সঁপড়লঅ
জেসঅন জেসঅন করে কহঅল সভে রে করঅলঅ
খনেক বাদে দিঅ ছউআ কাঁদাকাঁদি ছাড়ি
বিছনাহিঁ খেলে লাগঅল গড় হাঁথঅ ঝাড়ি
দিঅ পারানিক তখন থিরঅ হেলেইন মনঅ
ঘনে ঘনে চুমা খাত ছউআকে আপঅনঅ

ছউআই দুধা চুহে লাগঅইএ হউ।।

কামারঘার লে বেড়ি আরঅ বেনাইএ আনঅবে
ধরঅমেকর নামে বেড়ি ছউআকে পিঁধাউবে
জেহঅ দিনে ধরম পূজা এহঅ রে করঅবে
সেহঅ দিনে ছউআরাকর বেড়ি খলি দেবে
নিহি পারলে পিঠঅই আরঅ আহেইক দসঅর নেগি
বিহাক আগু গহাইলৈঁ নাউআ কুলা দেউএ হেতঅউ টাঁগি

বিহাক বাদেঁ নেগেজগে পূজা করঅবে হউ।।

পিঠঅইচাঁদে অঝাকে জে পুঁছে লাগঅল আরঅ
ধরঅম পূজাঁই কিনা কিনা লাগেইক সারভারঅ
কেসঅন কেসঅন করে হেউএক নেগিজগি কিনা
ধরমঠাকুরেকর পূজা হেউএক কন দিনা
একে একে সভে কিছু সুনাইবে তঁই মকে
নেহঅর করি অঝা হামে কহঁ ভালা তকে

এহে আরদাস তহরঅ ঠিনে হউ।।

অঝাঁই কহেই সূনে পিঠঅই এহঅ রে একমনে
ধরমপূজাক নেগিজগি সুনাইবঁ এখঅনে
পূজাক বিধি সারভার দিনখন আরঅ
একে একে কহি জাহঁ এহঅ সভে সারঅ
ভাঁগাবারেঁ বার হেউএক নেগাচারি রিতে
বেরাবারেঁ পূজা হেউএক বেরা নতঅ উগেইতে
পিড়হিঁই পিড়হিঁই করে হেউএক একখাঁউ হউ।।

সারভার কই এবেরইর সুনো ভালঅ করি
একে একে কহি জাই অড় ধরি ধরি
আরুআ চার দুধ ঘিউ আরুআ চারেক গুঁড়ি
দিআ ধুনা বেইলপাত চুকরি মাটিক হাঁড়ি
সারঅই পাতেক পতরি দনা সিঁদুর মধু গুড়অ
পেরুআ ছউআ আরঅ ভালা লাগেইক জে একজড়অ
পাঁঠা ছাগঅইর বেইলপাত আর তুলসিপাত হউ।।

ধরমপুজাক নেগিজগি হেউএক তুলসিথানে
কুটুমবাটুম ডাকে হেউএক এহঅ রে নেউতনে
জেহঅদিনে ছউআরাকর করবে ধরম পুজা
কিনা কিনা করবে তাকর দেহঁ তকে সুঝা
ভাঁগাবার দিন দেখি বারঅ রে করঅবে
কামাই নাহাই ভাত বাদে দসঅর খাইএক খাবে

আঁইস আমঅল উদিন আহেইক মানা হউ।।

জখন আরঅ বেরা ভালা এহঅ রে ডুবতঅউ
নাহাইনুহুই তুলসিথানে জাগঅর জরে হেতঅউ
মাহারাই গিত সুনি গাহি রাতি রে বিতাউবে
বেরাবার ভিনসারেঁ ভেইআদেক সঁগ নাহাইকে আউঅবে
সারভার লেই তুলসিথানে বসঅবে একমনে
ধরম মাহারাইএক ভালা এহঅ রে সৈঁউরনে

ছউআরাউ নাহাই তুলসিথানে ডাঁড়হাতা হউ।।

তুলসিথানেক পাসেঁ একটা চুলহা রে বেনাউবে
অহঅ চুলহাঁই আরঅ ভালা জুড়ি রে করঅবে
আরুআ চারেক গুঁড়িই পাঁচটা খঁড় রে গড়হঅবে
পাঁচ রাই রইআক নামে ফুল পানি ভালা দেউঅবে
জুড়িকর পাঁচটা ঢুলা করিকে জতঅনে
পাঁচঅ খঁড়েঁ দেবে ভালা একমনে সৈঁউরনে
হাঁঠুগাড়ি গড়অ লাগঅবে হউ।।

জড়া পেরুআক মুড়েঁ ভালা পানি রে ছিমকাউবে
অহঅ সঁগে সিঁদুর দাগ এহঅ রে দেউঅবে
পাঁঠা ছাগঅইরকে করবে অহে জে নিআরঅ
তিনটা সিঁদুর দাগ তরাইলৈঁ দেবে আরঅ
তাকরবাদে জড়া পাখুড় আর পাঁঠা ছাগঅরি
চরাইকুহ্নন কাঠরা বেনাই দেবসিন বলি করি

ধরমঠাকুরকে সৈঁউরি নমঅ করঅবে হউ।।

বলিক কাম আরঅ ভালা নিপটঅতেইক জখনঅ
ছউআক মুড়েক চুইল লাপিতৈঁ কামাউতেইক তখনঅ
মুড়েক চুইল অহঅঠিনে তপি রে দেউঅবে
চিউড়া গুড় সানি ভউগ সভেকে বিহলাউবে
ছউআরাকর বেড়ি ভালা খলঅবে তখঅনে
মাসভাত কুটুমবাটুমকে এহঅ রে খাউআউবেসিনে

মুড়েক মাস গুসটিক লকেই খাবেহে হউ।।

ধরমপুজাক নেগিজগি নিতি বিধান আরঅ
কহি দেইএ অঝা ভালা ডহরল আপঅন ঘারঅ
লতাই আরঅ রাঁধাবাঁটা এহঅ রে করঅলঅ
মনেকর হড়বড়ি জতেক এহঅ রে বিসরঅলঅ
খাউআপিআ করি দিত ছউআকেরি সঁগে
হাহিফাড়ি সুতঅলা পেরুআ জেসে টঁগে

একঘুমে বিহানঅ হেউঅলঅ হউ।।

মাহারাই সুনি ভালা সানতি মিলেই মনে
সুরুজ বিনু জিউ কাঁহাঁ জানেই নিহি কনে
জিউএকর মূল গনাই সুরুজ মাহারাইঅ
অকঅর সৈঁউরনে মন রাখিহা জাগাইঅ
ফুটানি গরঅবে জিউএঁ ডাকি আনঅত খতি
বুঝিসুঝি ডহঅর চলা থিরঅ রাখি মতি

মাহারাই সৈঁউরিহা বিহান সাঁঝে হউ।।

লেউরি সাঁউরাক ছুটু থনেক কথা

পিঠঅইচাঁদ আর লতা ভালা দিঅ রে পারানি
ছুটুআক সঁগে মনেক সুখেঁ বিতাউঅত জিনগানি
গটাদিনা বুড়হাঁই আরঅ গরু রে চরাউএইন
ঘারেক কামেক মাঝেঁ লতাই ছুটুআ তেঁতরাউএইন
এহে লেখেঁ বিতি জাই দিন মাস বছঅরঅ
লেউরি সাঁউরা দিনে দিনে হেউএ লাগঅল বড়অ

হামাগড়ি দেই চলে লাগঅলা হউ।।

মাঝাঘারেঁ দিঅ ভাই এহঅ রে খেলঅইএ
ঘারাকেরি মাঝা আরঅ খালঅ রে হেউঅইএ
বেটা দেখি বুড়হা বুড়হিক ভরি জাই রে মনঅ
নিরঅস মুহেঁ ফুটলেইন হাঁসি পাইকে সনা ধনঅ
দিঅ পারানি ভালা গালঅ রে মারঅতঅ
আটকুড়া নামে আর কেহু নেহি জারঅতঅ

বির ছুটুআ ঘারেঁ জনমঅলঅ হউ।।

আরঅ কতেক দিন ভালা এহঅ রে বিতঅলঅ
লেউরি সাঁউরা থাপাক-থুপুক চলে রে লাগঅলঅ
ঘার দুআইর জাঁহাঁ জাঁহাঁ গড়অ রে রাখঅইএ
সুপলি ভইড় মাটিই ভালা ভাসি রে জাউঅইএ
দিঅ ভাই খেলঅত বুলঅত আপঅনঅ খেইআলে
মাঁই মাঁই করে লাগঅত এহঅ রে ভুখাউলে

মাঁইএক আঁচঅর ধরিকে টানঅতঅ হউ।।

সভেদিন পিঠঅইচাঁদ উঠিকে বিহানে
গরু লেইএ চলি জাই কারি পিঁপঅড় বনে
দিন ভরতি লেউরি সাঁউরাক বাপেক সঁগ নি দেখা
পিঠঅইচাঁদ বনে বনে বুলেই একা একা
বেটারাকর তেঁতার জতঅন ঘারেকর কাম আরঅ
একাই করি চলেই লতাই নি থকিত বেজারঅ
এহে লেখেঁ বিতি জাই দিনা হউ।।

একদিনঅ বুড়হি ভালা উঠিকে বিহানে
ঘার আঁগনা বাড়হা সড়হা করেই আপঅন মনে
দিঅ ভাইএঁ আরঅ ভালা দেখি রে পাউঅইএ
লেউরি আইকে বুড়হিকর পিঠে রে চঘঅইএ
সাঁউরাঁই আরঅ বাড়হঅইন ধরি ছাড়লে নি ছাড়েই
কিনা সখে বাড়হা সড়হা কাম করে রে ভাঁড়েই

বুড়হিক কাম নেহি জে হেউঅইএ হউ।।

দিঅ ছউআই কাম ভালা এহঅ রে ভাঁড়অইএ
বুড়হিঁই তখন মনে মনে বুইধ রে ঠানঅইএ
দিঅ বেটাকে ভালা বগচাই রে বগঅলে
রাখি আউঅলঅ আরঅ এহঅ রে পিঁদাড় কলে
ঘুরি আইকে কামে বুড়হি এহঅ রে ঠেসঅলঅ
বাউ বেগে দিঅ ছউআ ঘুরি রে আউঅলঅ

মাঁইএক কাম ভাঁড়ে লাগঅলঅ হউ।।

বেরেবেতে করি মারঅত লেউরি রে সাঁউরা
দিখেঁ বুড়হিঁই ছাড়ি দেলেইক এহঅ রে বাড়হা সড়হা
দিঅ ভাইএঁ বাড়হঅইন ধরি করঅত লুটালুটি
মুহেঁ আধা আধা কথা এহঅ রে বাহারাই ফুটি
বাড়হঅইন ধরি আনগা ভালা আরঅ রে বাড়হঅইএ
অহঅ সঁগে ঠেলাঠেলি এহঅ রে লড়হঅইএ

দেখি বুড়হি হাঁসেই আড়ে আড়ে হউ।।

লেউরি সাঁউরা দিঅ ভাই আঁগনাঁই রে খেলঅইএ
ঘার সামহাই বুড়হিঁই তখন চুলহা রে ধরাউঅইএ
আইগ কাঠি আরঅ ভালা করে রে লাগঅলঅ
টুইএক বাদে দিঅ ভাই হেঁইড়সার পঁহচঅলঅ
লেউরিঁই আরঅ হাঁড়ি ভালা এহঅ রে ডাঁড়হাইএ
জুমড়হা ঝাঁকি সাঁউরাঁই আরঅ ঝিকমিক খেলঅইএ
বুড়হিঁই ডরেঁ রাঁধাই তেকথঅ দেইল হউ।।

খাটি বিছাই বুড়ি তখন দিঅ পুতা ধরি
সুতি রহঅলঅ ভালা গটা দিনা ভরি
বেরাডুবাঁই বুড়হা আরঅ ঘারা রে ঘুরঅলঅ
রাঁধাবাঁটা চুলহা চউকা নেহি রে দেখঅলঅ
তিরিআকে পুঁছে লাগেই দেঁ নঅ মকে কহি
কিআ খাতির তঁই রাঁধারাঁধি করিস নেহি

সুতি আহিস হেলাহঅউ তর কিনা।।

বুড়িঁই তখন খলি কথা সুনাইএই সঁইআকে
সুতি কিনা আই হামি ভালা মনেকর সুখেঁ
দিঅ পুতাই গটাদিনা বেরবেতাই মারঅতঅ
কনঅ কাম মকে ভালা করে নি দেউঅতঅ
টাইড়ে বনে ঘুরি বুলিহা বুঝবেহে কিনা
বেটারাকর সঁগে হামঅর বিতেই কেসে দিনা

একঅ দিনা রহি দেখিহা ঘারেঁ হউ।।

সভে কথা বুড়িঁই ভালা বুড়হাকে সুনাইএ
কিআ লাইএ রাঁধাবাঁটা নেহি রে হেউঅইএ
কথা সুনি বুড়হা এবের হাঁসি রে উঠঅলঅ
পেটেক ভুখ মনেক দুখ এহঅ রে টুটঅলঅ
দিআ বাতি জরাই ভালা এহঅ রে আপঅন ঘারেঁ
নিজেই ঠেসি গেলাক বুড়হা রাঁধাবাঁটা করে

বুড়িঁই দিঅ বেটাকে খেলাউএইন হউ।।

দিঅ আঁছিক চুলহা বুড়হাঁই ধরাইকে তখঅনঅ
একবাটে দেল ভাতেক অধঅন দসর বাটে তিঅনঅ
ফাডাকাঠেক আঁচঁ ভালা ডেরি নেহি সহঅলঅ
তুরুতে ভাত তিঅন ভালা এহঅ রে হেউঅলঅ
বেটারাকে খাউআউলেথিন হাঁথে ধরি ধরি
তাকঅর বাদে বুড়হা বুড়িঁই খালা বাঁটা করি

খাইদাই নিচিতে সুতঅলঅ হউ।।

দিনেক দিন সমঅই নেতৈ এহঅ রে বিতঅইএ
লেউরি সাঁউরা আপঅন মনে হুঁড়কি রে বুলঅইএ
দিঅভাই একে সঁগে খেলঅতঅ কুদঅতঅ
এক নিমিকঅ ছাড়াছাড়ি নেহি রে হেউঅইএ
একঅ দিনঅ দুই ভাই কুলহি রে বাহাৰাইএ
ধুৱা উড়াই আপঅন মনে এহঅ রে খেলঅইএ
কুলহি এক হাঁঠু খাল হেউঅলঅ হউ।।

একঅ পড়সিঁই আৱঅ ভালা দেখিকে নজঅৱে
কিনা কৱঅম কিনা নেহি কাঁপে লাগঅল ডৱে
পিঠঅইচাঁদেক বেটাগিলা কিনা রে জনমলা
খেলেইতে খেলেইতে কুলহি খালঅ কৱি দেলা
হামৱাকৱ ছউআপুতা ঢুকলে অহঅ খালে
গড়হাঁথ ভাঁগেই নঅ মচকে ই এসনঅ রে হালে
ভাভি পড়সিক মাথা ঘুৱি জাই হউ।।

জখন আৱঅ লেউরি সাঁউৱাক ভুখঅ রে লাগঅইএ
ঘাৱা জাইকে আপঅন মাঁইকে খাইএক রে খজঅইএ
খাত আৱ খেলঅত অৱা কুলহিকেৱি মাঝঅ
বেৱা ঘুৱি আৱঅ ভালা হেই গেলেক সাঁঝঅ
পিঠঅইচাঁদ গৱু লেইএ ঘুৱলাক রে জখঅনঅ
বেটাৱাকে দেখি পাউএই কুলহিঁই রে তখঅনঅ
হাঁথে ধৰি ঘাৱা লেলে গেইল হউ।।

সঁথঅল কুলহি খাল হেলেইক দেখঅত গাঁউএক লকে
কনে এসঅন কৱলা কাম পাউঅত নি বুঝিকে
পড়সিঁই তখন সভে কথা জানাইএ রে দেলা
লেউরি সাঁউৱা দিঅ ভাইএঁ এসঅন কৱি গেলা
সুনিকুনে সভেকাকৱ লাগঅলঅ হাইচকঅ
পহিলে তঅ কেহু নিহি কৱঅইএ পততুকঅ
বাদে সভে বুঝি জে পাউঅলা হউ।।

লেউরি সাঁউরাক কথা ভালা ফদড়ত সভে লকেঁ
এরাক নিঅর ছউআ দসঅর জনমত নিহি মুলুকেঁ
বুড়হাঁই আরঅ সঁচে লাগঅই আপঅন ঘারেঁ বসি
কুলহি খাল হেলে লকেক ঘারা জাতেইক ধসি
পানি বরসঅলে কুলহি ডুবি রে রহঅতঅ
গাঁউএক লকেঁ তখন আরঅ গাইর দেউঅতঅ

ঘেরঘেরি মুড়েঁ লাগঅলঅ হউ।।

বুড়হিক সঁগে বুড়হাঁই আরঅ সলহা রে করঅইএ
কিনা করে হেতেইক সেটা মনে নি ধরঅরঅইএ
বেটারাক কাম দেখি ভালা ডর জাগেই মনে
বড়অ ছটঅ কথা এবেইর সুনাতা লকজনে
কথাক মাঝেঁ বুড়হাক মুড়েঁ উপাই রে সুঁঝঅলঅ
বুড়হিকে তখন আরঅ ভালা এহঅ রে কহঅলঅ

এবেইর কুরহল খেইলঅ হেতেইক হউ।।

বুড়হাঁই পুঁছেইক কুরহল লেইএ খেলতা ছউআ কেসে
বাপেক জনমে এসঅন খেইল দেখঁ জে নিহি দেসে
বুড়হাঁই কহেইক কুরহল লেইএ খেলতা জখন বেটা
কুলহি খাল হেতেইক নিহি জানি রাখেঁ ইটা
গাঁউএক লকঅউ ছটঅ বড়অ কথা নেহি কহঅতা
মনেক সুখেঁ কুলহি মাঝেঁ ছউআরা খেলঅতা

বুড়হিক তখন মগঅজে ধরঅলঅ হউ।।

কথাক মাঝেঁ রাঁধাবাঁটা হেউএহেইক অহঅ সঁগে
লেউরি সাঁউরা নাঁচঅত কুদঅত কতি না জে টংগে
মাঁইএক করাঁই বসঅত ভালা কখনঅ বাপেক করাঁই
কখনঅ আরঅ লটাগড়ি এহঅ রে মাঝা ঘারাঁই
রাঁধাবাঁটা আরঅ ভালা হেউঅলঅ জখঅনঅ
বিআরি খাইকুনে চাইরঅ সুতঅলঅ তখঅনঅ

ভাচাক ভুচুক ডিবু জরেই ঘারেঁ হউ।।

ভুড়কা উঠঅলঅ ভালা খুখড়া রে ডাকঅলঅ
বুড়হা বুড়হিক আরঅ ভালা নিদঅ রে ভাঁগঅলঅ
দিঅ পারানি উঠি ভালা হাঁথ মু রে ধঅউঅইএ
বুড়হিঁই আরঅ মড়অলি এহঅ রে দেউঅইএ
ইটা সেটা ঘারেক কাম করেইতে করেইতে
ফরাঅইর বিতি বিহান ভালা হেলেইক রে তুরুতে

বুড়হাঁই গুড় চিউড়া খাউঅইএ হউ।।

গুড় চিউড়া খাইকে বুড়হাঁই ধরঅলঅ রে ঠেঁগা
অহঅ সঙ্গে হাঁথেঁ একটা লেলাক চখঅ টাঁগা
ঘারলে বাহারাইএ বুড়হাঁই হাঁকঅ রে পাড়অলঅ
গটা গউরাক লকেঁ ভালা গরু রে খলঅলঅ
গরু ডহরাই আরঅ বুড়হা কারি পিঁপড় বনে
চলে লাগঅল গিত গাহি হরখলঅ মনে

বনে গরু ছপলাইএ দেলা হউ।।

কারি পিঁপড় বনে গরু এহঅ রে চরঅইএ
কুরহঅলেকর লাগি আরঅ কাঠঅ রে খজঅইএ
একটি মটা কুসুম গাছ আরঅ রে দেখঅলঅ
সেহঅ গাছকে দেখি ভালা ফেড়েই রে কাটঅলঅ
ডগ কুঁদা কাটি কুটি ফেঁকি রে দেউঅইএ
মুল কুঁদাউ আরঅ ভালা এহঅ রে ছাঁটঅইএ

মইধ কুঁদাঁক কুরহঅল জে ছলঅলঅ হউ।।

ধউ কাঠেক ডাঁড়ি আর সিকল চিহড় লতা
বাগালিকর সঙ্গেঁ সঙ্গেই হেলেইক বুড়হাক গতা
জখন আরঅ বেরা ভালা ডুবে জে মুহাইএ
ছপলঅল গাই গরু সমটি ঘারা রে ডহরাইএ
ঘারেঁ ঘারেঁ গরু পঁহচাই কুরহঅল কাঁধে করি
আপঅন ঘার চলে লাগঅল কুলহিক ডহঅর ধরি
ঘার পঁহচি কুরহঅল টেঁড়রাই দেইল হউ।।

কুরহলঅ টেঁড়রাইএ পিঠঅই ঘারা রে ঢুকঅলঅ
লেউরি সাঁউরা দিঅ ভাইএঁ এহঅ রে দেখঅলঅ
বাপ বাপ করি ভালা আরঅ রে আগুআইএ
করাঁই কাঁধে দিঅ ভাই এহঅ রে চঘঅইএ
জতঅনে আদঅরে ভালা বেটা করাঁই করি
গটা দিনেক থকিত আরঅ গেলা জে বিসঅরি

ছউআক সঁগে বজকঅত কতি কথা হউ।।

পিঠঅই চাঁদেঁ কহেইন তবে সূনা রে বেটারা
কাইল লে ভালা কুরহঅল লেই খেলবেহে রে তরা
বুড়হিঁই আরঅ হেঁইড়সারেঁ গোঁঠি রে বনাউএই
বাপ বেটারাক বজকঅনি এহঅ রে অনাউএই
কুরহঅল লেইএ কেসে ভালা খেলতা রে দিঅ ভাই
পিঠঅইচাঁদেঁ সভে কিছু দেলেইক আরঅ সমুঝাই

বিআরি খাই সভেকাই সূতঅলঅ হউ।।

জখঅন আরঅ বিহান ভালা এহঅ রে হেউঅলঅ
পিঠঅইচাঁদ আপঅন কামে আরঅ রে ডহরঅলঅ
লেউরি সাঁউরা দিঅ ভাই নিদ লে রে উঠঅইএ
বুড়হিঁই তখন কুঁড়হা ভালা এহঅ রে কুটঅইএ
কুঁড়হা খাইএ দিঅ ভাই কুরহঅলেক পাস গেলা
দিঅ ভাইএঁ ছুইছাই দেখে রে লাগঅলা

লতাই তখন ভালেই আড়ে আড়ে হউ।।

লেউরিঁই এবের কুরহঅল ভালা লেলাক রে কাঁইখাইএ
সঁগে সঁগে সাঁউরা চলেই সিকঅল রে লাদাইএ
কুলহি মাঝেঁ লেউরিঁই আরঅ টানঅইএ কুরহঅলঅ
সাঁউরাঁই আরঅ কুরহঅল ডাঁড়ি এহঅ রে ধরঅলঅ
গটা কুলহিক ধুরাবালি করি দেলা জড়অ
কুলহি মাঝেঁ হেই গেলেইক ধুরাকর পাহাড়অ
গটা গউরা বাজার গেলেইক গাবি হউ।।

লেউরি সাঁউরা খেলে লাগঅত এহঅ রে আপঅন মনে
সেহঅ দেখি কুলহিক ছউআ আউলা খেলেক টানে
আইকুনে কহে লাগঅত লেউরি আর সাঁউরাকে
তরাক সঁগে খেলঅব ভালা মেসাউআ হামরাকে
একে একে সভে ছউআই কহে রে লাগঅলঅ
তখঅন আরঅ দিঅ ভাইএঁ হঁ সিঁকার করঅলঅ

কুলহিক ছউআ নাচে লাগঅল রিবো হউ।।

লেউরিঁই তখঅন কহে লাগঅল সূনা তবে তরা
সভে মিলি একে সঁগে কুরহঅল ডাঁড়ি ধরা
হামঅর ভাই সাঁউরাঁই এখঅন নেহি রে ধরঅবে
ধুরাক ডিঁগে তঁই ভালা উলফা রে মারঅবে
টান মারি লেউরিঁই কুরহঅল দেলেইক রে রিঁগাইএ
ডাঁড়ি ধরঅল সভে ছউআ গেলা রে বিগাইএ

খেপড়অ হেইএ সভেকাই গিরঅলা হউ।।

রাগেঁ তখঅন লেউরিঁই ভালা বকেই নিজেক তালৈঁ
ডাঁড়ি ধরেইতে তরা গিরলেহে বেতালৈঁ
তরা এবের কুরহঅল টানা এহঅ রে দেইহন ছাড়ি
হামি এখন ধরঅম আরঅ কুরহলেকর ডাঁড়ি
নিকাস ধরি লেউরিঁই ভালা কুরহলঅ জাঁকঅলঅ
এক কমঅর মাটিঁই কুরহঅল এহঅ রে ডুবঅলঅ

টানেইতে ছউআ পেট দাবড়ি হেউঅলঅ হউ।।

লাদালাদি হেইএ ছউআ এহঅ রে গিরঅলা
মুহেঁ কানেঁ ধুরাঁই ভালা সভেকাই ভরঅলা
রাগেঁ লেউরিঁই এক ছউআকে মারলেইক রে গহাড়ি
ছউআক কমঅর ভাঁগি গেলেইক কাঁদেই রে হা ফাড়ি
তখঅন আরঅ দিঅ ভাই ঘারা রে পারাইএ
আগুড় কুনেঁ লুকাই রহল নেহি রে বাহারাইএ
কুরহঅল তঅ কুলহিঁই রহি গেইল হউ।।

ছউআক রদঅন সুনি পড়সি আউঅলঅ হুঁড়অকি
ডরৈঁ আরঅ কতি ছউআ পারালা ভিড়অকি
আপঅনঅ বেটাকে পড়সিই পুঁছেক রে আদঅরে
কিনা হেলঅউ কাঁদিস কাহে সুনাইএঁ হামঅরে
কাঁদি কাঁদি ছউআই তখঅন কহে রে লাগঅলঅ
লেউরিঁই বাপু মকে ভালা গহাডি মারঅলঅ

মই এখঅন চলে নি পারঅই হউ।।

ছুই ছাই দেখেই পড়সিই বেটাকর কমঅরঅ
ভাঁগি গেলাহেইক ভালা নেহি পাউএই জরঅ
পড়সিই তখঅন রাগেঁ আরঅ মটা টাঁটি করি
বাখানঅ পাড়েই বুড়হাক সাত গুসটিক নাম ধরি
বড়ি রে দমবাজ লাগঅত বুড়হাকরঅ বেটা
হামঅর ছউআক আরঅ ভালা ভাঁগি দেলেইক কমঅরটা

বাখানেক অড় টুঁটলে না টুঁটঅইএ হউ।।

বাখান পাড়ি পাড়ি পড়সি ছউআ করাই করি
ধাই মাইএক ঘারা জাই কুলহিক ডহঅর ধরি
ধাই মাইএক আগ দুআরাই এহঅ রে পঁহচঅলঅ
ধাইমাই ধাইমাই কহি আরঅ হাঁকঅ রে পাড়অলঅ
পড়সিকর হাঁকে রাউ দেলেইক রে ধাই মাইএঁ
পড়সিকে দেখি কহেইক বানার কিনা সুনাইএঁ

কিআ খাতির হামঅরি দুআইরঅ হউ।।

পড়সিই কহেই কিনা কহঅম দুখেকেরি কথা
একে সঙ্গে খেলেহেলা কুলহিক ছউআ পুতা
বুড়হাক বেটা লেউরি সাঁউরা দমবাজঅ রে বড়ি
কন তালে মর ছউআকে মারলেইক রে গহাডি
ছউআকেরি কমঅর ভালা এহঅ রে ভাঁগঅইএ
চলা তঅ ধুরেক কথা ডাঁড়হাই নিহি পারঅইএ

সেহঅ খাতির আউঅল তরঠিন হউ।।

ধাইমাইএঁ চিপিচাপি এহঅ রে দেখঅলঅ
চিপানিক টাসিলেঁ ছউআ কুঁথিকে কাঁদঅলঅ
চিপি চাপি পরখি ভালা ধাই মাইএ কহঅইএ
তর ছউআক কমঅর পড়সি নেহি রে ভাঁগঅইএ
চুকি ভসকঅলাহেইক সুনো হামঅরঅ রে কথা
এখনে জুতিআইএ জাতেইক রহতেইক নিহি জে বেথা
তর ছউআ ঠিক হেই জাতঅউ হউ।।

পাসেঁ তেল রাখি ধাইমাই গড় মেলি বসঅলঅ
তাকঅরঅ উপঅরেঁ ভালা ছউআটা সুতঅলঅ
তেল হঁসতি হঁসতি চুকি দেলেইক রে বসাইএ
ছউআকরঅ কাঁদনা দুখা গেলেইক রে হেঁরাইএ
উঠিকে বসঅলঅ ছউআ নিজেকেরি বলে
দেখিকে পড়সিকর মন উঠঅলঅ হরখলে

ধাইমাইকে জানাউএই সাবাইস হউ।।

ছউআকে লেইএ পড়সি ভালা ঘারা জাইএক খনে
ধাইমাইএঁ ডাকি ভালা কহেইক আপঅন মনে
মরঅ একঅ কথা ভালা খেইআলে রাখঅবে
লেউরি সাঁউরাক সঁগে ছউআ খেলে নিহি দেউঅবে
জখন আরঅ জনমঅরহঅত অহঅ দিঅ ছউআ
খাটিঁই রাখেইতে মাটিঁই ভাসি গেরহেইক পুআ
দিঅ ভাই বিরে জনমঅলাহাত হউ।।

লেউরি সাঁউরাক বল ভালা পাছনাউলাহঁ হামে
অড়ি নি জাতা অরা কনঅ জে আঁট কামে
অরাক সঁগে জেহঅ ছউআ এহঅ রে খেলে জাতা
খুখড়ি মচড়া মচড়ি ভালা ফাভড়াই রে মারঅতা
সেহঅ খাতির আগুই ভালা সতরাই দেহঁ তকে
দিঅ ভাইএক বলেক কথা জানঅত সভে লকে
গড়েক ভরেঁ মাটি ভাসি জাইক হউ।।

পড়সি তখন রাগে ভালা এহঅ রে গুরগুরাই
মিছাই হুঁ হুঁকাইর করি ঘার বাটে মুড় ঘুরাই
মনে মনে কহেই টুইএক জাই দেঁ নঅ ঘারঅ
একে ঠুঁগরুই বুড়হাক বেটারাক সধি দেবেইন ধারঅ
আইজে তঅ বুড়হা বুড়হিক হেতেইন রে আটকালঅ
মই কেসঅন লক লাগাঁ গুড়িআ নঅ ঝালঅ

হুউআ লেইএ ঘারা চলঅলঅ হুউ।।

আগুড় কুনেঁ লেউরি সাঁউরা ডরে আহাত সটি
বুড়হিঁই আরঅ নজঅরে পাউএইন নেহি ভেঁটি
জখঅন আরঅ রাঁধাবাঁটা এহঅ রে হেউঅলঅ
বুড়হিঁই তখন বেটারারে ডাকে রে লাগঅলঅ
দিঅ ভাই ঠেলাঠেলি এহঅ রে হেউঅইএ
লতাই তখন বেটারাকে আরঅ রে দেখঅইএ

লুকালাহাত কাহে নিহি জানেই হুউ।।

দিঅ ভাইএক ভাত বুড়হিঁই এহঅ রে বাঁটঅইএ
খাই লেঁ খাই লেঁ বাছা কহি আরঅ জে ডাকঅইএ
ডাক সুনিঅ আগুড় কুন ছাড়অত নি জখঅনঅ
দিঅ ভাইকে হাঁখেঁ ধরি বাহারাউলেইন তখঅনঅ
পড়সিকে লেউরি সাঁউরাই দেখঅলঅ রে ধুরেঁ
দিঅভাই ইড়কি তখন ঢুকঅলঅ রে ঘারেঁ

বুড়হিকে তঅ গহলাই লেগঅতঅ হুউ।।

দুআইরেক আগুড়েঁ বুড়হি বজঅড়অ খাউঅলঅ
আঁইখ মু কান কাপাড় ছলাই রে জাউঅলঅ
বুড়হিঁই তখন নাপারকখেঁ এহঅ রে ছাড়অইএ
দিঅ ভাই পারাতভালা তুরুত হড়বড়াইএ
দুখানি জলঅনে ভালা করি অ-বাপ অ-মাই
কসটই মসটই উঠি বুড়হি ঘারেঁ দেলেক ঘুমাই

লেউরি সাঁউরা ডরেঁ সামালা পাড়অন তরেঁ হুউ।।

রাঁধঅল ভাত রাঁধঅল ভালা এহঅ রে রহঅলঅ
তিন মাঁই বেটাক ভিতঅর কেহু নিহি রে খাউঅলঅ
জখন আরঅ সাঁঝবেরা আরঅ রে হেউঅইএ
বুড়হা পিঠঅইচাঁদ তখন ঘারা রে আউঅইএ
ঘারৈঁ আরঅ সাড়া সবঅদ এহঅ রে নি সুনাই
মনে মনে সঁচেই বাছে সভেকাই গেলা নিদাই

বুড়হি বুড়হি হাঁকঅ পাড়অল হউ।।

বুড়হাক ডাকে বুড়হিঁই এবৈইর রাউ রে দেউঅলঅ
দুখানিকর রাউ বুড়হাঁই সুনি রে পাউঅলঅ
বেজারি হেলাহি বুড়হি মনে রে সঁচঅইএ
কিনা হেলঅউ পাসে জাইকে এহঅ রে পুঁছঅইএ
বুড়হিঁই তখন অড় মুড়া সভে দেলেইক কহি
গহলানি আর বজড়ানিঁই অসান লাগেইক দেহি

মু ফুলি হেলাহেইক টাঁকিক নিঅর হউ।।

দিঅ ছউআ কাঁহা আহাত নেহি পাউএইন দেখি
লেউরি সাঁউরা নাম ধরি করেইন ডাকাডাকি
দিঅ ভাই তখন আরঅ পাড়অন পেঁদা ছাড়ি
রসেঁ রসেঁ বাহারালা গাতেক ধুরা ঝাড়ি
আপঅন বাপু দেখি মনে সাঁহাঁসঅ জনমলঅ
বুড়হাকে জাইএ ভালা ঝাঁপঅটি ধরঅলঅ

বুড়হাঁই তখন আদঅরঅ করঅইএ হউ।।

দিনেকেরি রাঁধঅল ভালা রহেহেলেইক জেটা
খাইলাই বসঅলঅ আরঅ তিনঅ রে বাপবেটা
জখঅন আরঅ খাউআপিআ এহঅ রে হেউঅলঅ
সাঁউরাঁই তখঅন আপঅন বাপকে কহে রে লাগঅলঅ
হামঅর দাদা হেকে বাপু কুটনাহা রে বড়ি
খেলেইতে খেলেইতে কুলহিক ছউআক সঁগ জাই লড়ি
তর সঁগে একে বাগাল লেলে জাবে হউ।।

বুড়হাঁই কহেইক এখন ভালা ছুটু আইহা তরা
তরাক তাইএ এখঅন নিহি গরু বাগাল করা
গরুক পেছুঁই বনে বনে ঝুঁড়েপাতে ঢুকি
বাগাল করে পারতাক নিহি ভুখ পিআসে সুখি
বিহান বেরি বাহরা আর বেরাডুবাঁই আউআ
গটাদিনে খেমাই জাতাক এহে ছুটু ছউআ

তরা এখঅন খেলি বুলবেহে হউ।।

সাঁউরাঁই তখঅন আরঅ একটা বুইধ রে আঁটিঅলঅ
আপঅনঅ বাপেকর ঠিনে এহঅ রে ফুটঅলঅ
ঘারেঁ ঘারেঁ বুলি বুলি সভেকে কহবেসিন
গটা গউরাক ছাগঅইর ভালা গতাইএ জে দেবসিন
বেসিআম খাইকুনে ছাগঅইর বাগালি রে জাতাক
আড়বেরাঁই আরঅ ভালা ঘুরি রে আউঅতাক

কাকরঅ সঁগে খেলে নি পাউঅতাক হউ।।

বুড়হা বুড়হাঁই আরঅ ভালা সলহা রে করঅইএ
সাঁউরাকর কথা আরঅ মনে রে ধরঅইএ
বুড়হাঁই এবের কহেই ভালা সূনে বেটা লেউরি
পারবে নঅ টাঁইড়ে টাঁইড়ে চরাউএ ছাগঅরি
মুড় লাড়ি লেউরি তখঅন হঁ সঁকার করঅলঅ
মনে মনে অকঅর আরঅ ফুরতি রে জাগঅলঅ

রিবো রঁগে নাচে লাগঅলঅ হউ।।

কুলহি কুলহি বুড়হাঁই আরঅ হাঁকঅ রে পাড়অইএ
ঘারা ছাড়ি সভে জনা কুলহি রে বাহারাইএ
জখঅন আরঅ সভে লক হেই গেলা জড়অ
বুড়হাঁই কহেইন মর বেটা হেলাহাত জে বড়অ
সেহঅ খাতির একঅ কথা কহেইহন তরাকে
গটা গউরাক ছাগঅইর ভালা গতি দিহা অকে

লেউরিঁই ছাগঅইর চরাইএ দেতঅহন হউ।।

বুড়হাক কথাই গাঁউএক লক এহঅ রে বুঝিসুঝি
একে টুমে সভে লক হেই গেলা রে রাজি
কহে লাগঅল কাইল লে হামরা ছাগঅইর দেবেইন গতাই
আর কনঅ নেখি কহেক এহে কথাক কথাই
বুড়হা এবের আপঅন ঘার এহঅ রে ডহরঅলঅ
ঘারা পঁহচি লেউরিকে আরঅ রে কহঅলঅ

কাইল লে তঁই বাগালি বাহরাবে হউ।।

বাপেক কথা সুনি লেউরিঁই কহেইন সুনি লিহা
বিহানেই নিদলে তরা মকে জাগাই দিহা
বেসিআমে হামি ভালা চারভিজা রে খাইকে
টাঁইড় আরঅ চলি জাম ছাগঅরি রে লেইকে
কথাই কথাই আরঅ ভালা বাড়হঅইএ রে রাতি
বুড়হিঁই কহেইন দিহা থুম নিঝাউআহাক বাতি

আপঅন আপঅন সভেকাই নিদালা হউ।।

ভুড়কা উঠঅলঅ আরঅ খুখড়া রে ডাকঅলঅ
বুড়হা বুড়হিক নিদ ভালা এহঅ রে ভাঁগঅলঅ
মাঁইবাপেক বজকনি সুনি আরঅ কানে
লেউরি সাঁউরা জাগি গেলা আপঅনঅ রে মনে
লেউরিঁই কহেইক বাগালি জাম ঠেঁগা দেঁ গউ ছলি
সুধা হাঁথে ছাগঅইর বাগাল বড়ি ঝাঁকঅঝালি

পিঠঅই ঠেঁগা ছলে বসঅলঅ হউ।।

ধিরে ধিরে বিহান ভালা এহঅ রে হেউঅলঅ
পিঠঅইচাঁদ ঠেঁগা হাঁথে বাগালি চলঅলঅ
লেউরিঁই আরঅ খাই দাই এহঅ রে সঁপড়অইএ
গটা গউরাক কুলহিঁই কুলহিঁই হাঁকঅ রে পাড়অইএ
হাঁক সুনি সভেকাইএ ছাগঅইর খলি দেলা
গটা গাঁউএক ছাগঅইর ভালা একে সঁগ মেসঅলা
লেউরিঁই তখন ডহরাইএ দেলেইন হউ।।

গাঁউএক কতেক ধুরেঁ আরঅ মেঘালি চাটান টাঁড়ি
সভে ছাগঅইর উহাঁ লেগি দেলেইন ভালা ছাড়ি
ছপলি চরে লাগঅল ছাগঅইর ডগ কচি ঘাঁসেঁ
চাটানে বসিকে লেউরি ভালেই চাইরঅ পােসেঁ
ছুটু ছুটু ছাগঅইর ছউআ উঠিকে চাটানেঁ
নাচঅত কুদঅত উলফা দেহথিক হ্বেকেরি টানে

লেউরিক তঅ মনঅ ভরি জাই হউ।।

ছাগঅইর ছউআক দেখাদেখি লেউরিঁই রে তখঅনঅ
উলফা উলঅট বাজি সিখেই ছাগঅরি জেইসঅনঅ
জখঅন আরঅ আড়বেরা এহঅ রে হেউঅলঅ
ছপলঅল ছাগঅইর সভে আরঅ সমটঅলঅ
ছাগঅরি লেই গাঁউ মুহেঁ এহঅ রে ডহরঅইএ
ঘারেঁ ঘারেঁ ছাগঅইর ভালা সমুঝাই দেউঅইএ

লেউরি আপঅন ঘারা উজালাক হউ।।

ঘার পঁহচি লেউরিঁই আপঅন মাঁইকে রে ডাকলঅ
বড়অ বেটাক হাঁক লতাক কানে রে পঁহচলঅ
ভাত বাঁটি লেউরিকে এহঅ রে মুহাই দেলেইক
সাঁউরাকে আরঅ ভালা এহঅ রে ডাকঅলেইক
দিঅভাই আরঅ ভালা খাইএ রে বসঅইএ
বুড়হিঁই আরঅ অরসন পরসন এহঅ রে দেউঅইএ

দিঅ ভাইএঁ পেট ভরি খাউঅলঅ হউ।।

দিনাম লেউরিঁই ছাগঅইর বাগাল করেই মনেক সুখেঁ
ছাগঅরি আরঅ ভালা রহঅত নিহি ভুখেঁ
এহে লেখেঁ বিতি গেলেইক দিঅ চারি মাসঅ
ঘারেক কামেউ মাঁইবাপেঁ পাউঅত রে উসাসঅ
খাইদাইএ সাঁউরা আরঅ বুলেই রিঝে রঁগে
খেলিকুদি বিতেইক দিন কুলহিক ছউআক সঁগে
বুড়হিঁই আপঅন সঁগসার সামলাউএই হউ।।

একঅদিন ঝাইড ভালা এহঅ রে করঅলঅ
ঝরঝর পানি ভালা বরসে জে লাগঅলঅ
লেউরি উদিন ছাগঅইর বাগাল নেহি রে বাহারাইএ
গটা গউরাক ছাগঅইর আরঅ গহাইলেই রহঅইএ
পুরুবেঁ অনাউঅল ঝাইড ছাড়লে নিহি ছাড়েই
একঅ দুঅ তিনঅ দিনঅ ঝাইডঅ জে রে বাড়হেই
ভুখেঁ ছাগঅইর মেমাত রাতিদিন হউ।।

গাঁউএক লক মত করি এহঅ রে একঅ দিনঅ
ডাকাডাকি ডাব বাঁধি আউলা বুড়হিক ঠিনঅ
সভে লকেঁ বুড়হিকে এহঅ রে কহঅইএ
তর বেটা ছাগঅইর বাগাল নেহি রে বাহারাইএ
হামরাকর ছাগঅইর ভুখেঁ মেমাই রে মরঅহত
লাদেঁ পেসাবেঁ গহাইল আরঅ কাদা ফুটাউঅহত
তর বেটাকে কহিহিঁ বুঝাই হউ।।

বুড়হিঁই এবেইর কহেই ভালা সুনি অরাক কথা
ঝাইড়ে কিনা ছাগঅইর ছেড়ি টাঁইড়ে রে চরঅতা
সিটিক সিটিক বরসেইক পানি কখনঅ রে ঝরঝরাই
এসনে কেসে বাগাল জাতাক কহা নঅ ভালা তরাই
তাউ জখন জিগিড় ধরি কহেইহা তরা মকে
বুঝাই সুঝাই দেখেহেঁই মরঅ বেটা লেউরিকে
ঝাইড়েঁ ঝাইড়েঁ বাগালি করেলাই হউ।।

বুড়হিঁই তখন লেউরিকে এহঅ রে ডাকঅলঅ
গাঁউএক লকেক কথা ভালা সুনাইএ দেউঅলঅ
মাইএক কথা সুনি লেউরিঁই ফুটি দেলেইক কহি
এসঅন ঝাইড়েঁ ছাগঅইর বাগাল করে পারঅম নেহি
তুঁ তঅ দেখেঁ মাই মনে বুঝি সুঝি
কেসে করি বাগাল করঅম পানিঁই ভিজিভিজি
ভিজঅল ঘাঁসেঁ ছাগঅইর চরঅতা নেহি গউ।।

গাঁউএক লকেঁ তখন আরঅ কহঅত জর ধরি
ছাগঅইর নিহি খলালে ভালা সভে জাতা মরি
এহে ঝাইড়েঁ তকে লেউরি ছাগঅইর খলে হেতঅউ
ঘারেঁ বসি রহলে ভালা দিনা নেহি জাতঅউ
গাঁউএক লকেঁ জখন আরঅ ধরি রে বসঅলঅ
বুড়হিঁই তখন এহঅ কথাঁই সাই রে দেউঅলঅ

লেউরিকে বুঝাউলেক আদঅরেঁ হউ।।

বুড়হিক কথাঁই লেউরিঁই ভালা হঁ হুঁকাইর করঅলঅ
গাঁউএক লকেক মনে আরঅ ফুরতি রে ধরঅলঅ
আপঅন আপঅন ঘারা সভে এহঅ রে গেলা চলি
সিটিক সিটিক গিরেইক পানি সিরাইক নিহি তলি
অহঅ লেখেঁই লতাঁই ঘারেক কামঅ রে করঅইএ
সুখঅল কাঠ বিছি আনি ছাঁছ তরে রাখঅইএ

সাঁউরা নাচঅইএ আঁগঅনাঁই হউ।।

লেউরিঁই এবের মাইএক ঠিনে ধরঅলঅ রে অড়ি
বাগাল গেলে গাতে মাই গউ জাড জাতি গড়ি
ঝাইড়ে আরঅ গটাদিন ছাগঅইর লেইএ রহা
কালহা হাউআঁই আরঅ ভালা বসি জাতি চউহা
জদি তঁই জনহাইর ভালা ভুজি দেবে মকে
হেলেই হামি ছাগঅইর বাগাল জাম কহঅহঁ তকে

নিহিতঅ বাগালি নেহি জাম হউ।।

লেউরিক কথা সুনি বুড়হিঁই করেই নিহি ডেরি
আইগ কাঠি করি চুলহাঁই চঘাউলেইক খাপঅরি
নঅ খাঁড়ি জনহাইর মুহাই ভুজে রে বসঅলঅ
জনহাইর ফুটাক সবঅদে কুলহিক সভেকাই জাগঅলঅ
সবঅদ সুনি আরঅ ভালা কুলহি ডাঁড়িক লকঅ
কিনা হেলেক কিনা নেহি হেই গেলা হাইচকঅ

ডরেঁ সভেকাই বাহার নিহি বাহারাত হউ।।

জখন আরঅ জনহাইর ভুজা এহঅ রে হেউঅলঅ
লেউরিঁই আরঅ জনহাইর ভুজা খঁইছাই রে লেউঅলঅ
জনহাইর ভুজা লেইএ ভালা ঘার লে বাহারাইএ
গটা গউরাক কুলহিঁই কুলহিঁই হাঁকঅ রে দেউঅইএ
হাঁকঅ সুনি সভেকাইএ ছাগঅইর দেলা খলি
মেঘালি চাটানে লেউরি এহঅ রে গেলা চলি

ছাগঅরি তঅ দেলা ছপঅলাইএ হউ।।

টিকঅর দেখি দেখি ছাগঅইর এহঅ রে বুলঅইএ
একটি আখটি আরঅ ভালা ঘাঁসঅ রে খুঁটঅইএ
মেঘালি চাটানে লেউরি এহঅ রে বসঅইএ
লটে লটে জনহাইর ভুজা আরঅ রে ফাঁকঅইএ
পুব বাটে একঅ মেঘঅ অনাউঅলঅ ভারি
রদরদাই গিরেইক পানি কুলাঁই চারাচারি

লেউরি তঅ হকচকাই গেলাক হউ।।

লেউরিঁই তখন আরঅ ভালা ঠানেই আপঅন মনে
রদরইদা পানিক লে হাই বাঁচঅবঅ কেসঅনে
আসি বিঘাক চাটান ভালা এহঅ রে তাকঅর ঘেঁসেঁ
একটা কাদাজাম গাছ আহেইক আপঅন ভেসেঁ
অহঅ গাছ ফেড়েক বাটেঁ লেউরি রে কুদঅলঅ
অকে দেখি সভে ছাগঅইর উহাঁই রে জহড়অলঅ

লেউরিকে বেড়হি রাখঅলঅ হউ।।

সভে ছাগঅইরেঁ ভালা গাতঅ রে ঝাড়অতঅ
সেহঅ পানিঁই লেউরিকর সরসঅপাই জাই গাতঅ
সেহঅ খনে মনে মনে বুইধ রে আঁটঅইএ
একটা লেদা ডাইর ভালা নজঅরেঁ ভেঁটঅইএ
উঁচকি চুড়পি দিঅ হাঁথেঁ ডাইরটাকে ধরঅলঅ
সলগিকে আরঅ ভালা উঠিকে বসঅলঅ

ডাইরেঁ বসি জনহাইর ভুজা ফাঁকঅইএ হউ।।

একটি দুইটি জনহাইর ভুজা ভুঁইএঁ রে গিরঅইএ
খাইএক লাগি ছাগঅইর ভালা ঠেলাঠেলি করঅইএ
সেহঅ দেখি লেউরিক মনে ফুরতি রে জাগঅলঅ
ফাঁকেইতে ফাঁকেইতে আরঅ গিরাউএইতে রহঅলঅ
জনহাইর ভুজাই লেউরিক এহঅ পেটঅ ভরি গেলেইক
উবরলঅ জনহাইর সভে এহঅ গিরাইএ রে দেলেইক

সভে ছাগঅইরোঁ খাইএ লাগঅলঅ হউ।।

লেদা ডাইর লে লেউরিঁই আরঅ খঁইছা দেলেইক ঝাড়ি
জনহাইর ভুজাই সভে ছাগঅইর মুড় দেলখিক গাড়ি
ঠেলাঠেলি গুতাগুতি জাকঅর জেসঅন জরঅ
অহঅ নিঅর খাইএ লাগঅল রিঝে রে ভঅরভরঅ
জখন আরঅ জনহাইর ভুজা এহঅ রে সিরাইএ
সভে ছাগঅরিঁই তখন আরঅ লেউরিকে ভালঅইএ

লেউরিঁই তঅ খঁইছা আজড়াই দেইল হউ।।

জাম ফেড়েঁ সভে ছাগঅইর এহঅ রে বসঅলঅ
মচমচ পাইজ ভালা কাটে রে লাগঅলঅ
পাইজ কাটা দেখি লেউরি মনে রে সাঁচঅইএ
ছাগঅইরোঁ হামকে ভালা ভেঁসাই রে দেউঅইএ
জতেক খন জনহাইর ভুজা এহঅ রে রহেহেলা
মলঅক ঝালঅক দেইএ সভে এহঅ রে খাই লেলা

খাইকুনে ভেঁসানি দেখাউঅহত হউ।।

লেউরিকর মনে সাঁগি রাগঅ রে জনমঅলঅ
লেদা ডাইরলে লুঝকিকে হেঁঠে রে নাভঅলঅ
এক ছাগঅইরকে ধরি ভালা দসঅরে বজড়াইএ
কনটাকে আরঅ রাগে চাটানে কাচড়াইএ
ঢেকাক উপঅর ঢেকা মারি ভাঁগেই জেসঅন চাসা
রাগে গুরগুরাই লেউরিঁই ধরঅল অহে নেসা

সভে ছাগঅইর গেলা টিঁড়ুআই হউ।।

থারাতাইর ছাগঅইর সতে গিরি রে রহঅলঅ
একটিঅ জঁঅত ভালা নেহি রে রাখঅলঅ
লেউরি আরঅ লেদা ডাইরৈঁ ঘুরি রে বসঅইএ
সিটিক সিটিক পানি ভালা এহঅ রে বরসঅইএ
জখন আরঅ সাঁঝ বেরা আরঅ রে হেউঅলঅ
পানিকর বাইড় ভালা বাড়হে রে লাগঅলঅ

লেদাডাইরে লেউরি চঘিএ রহঅলঅ হউ।।

গটাদিনা বিতি গেলেইক ডুবঅলি রে বেরা
রসেঁ রসেঁ এঁধরিআই বিছাউএই রে ঘেরা
লেউরি আরঅ গাছলে ভালা নেহি রে নাভঅইএ
ঘারা ঘুরি জাইএক কথা নেহি রে সাঁচঅইএ
কাদাজাম গাছেক ডাইরৈঁ আহে রে নিঝুমঅ
মুহেঁ কনঅ সাড়া নেহি একদমে সুগুমঅ

ভিজি সরঅসপঅ হেলাহে হউ।।

গরু লেইএ পিঠঅইচাঁদ ঘুরলাক বেরাডুবাঁই
ঘারেঁ ঘারেঁ আরঅ ভালা দেলেইন রে সমুঝাই
গাঁউএক লকেঁ পিঠঅইচাঁদকে দেখিকে কহঅইএ
লেউরি আরঅ ছাগঅইর লেইএ কাঁহাঁ রে রহঅইএ
বেরাডুবি আঁধার ভালা এহঅ রে হেউঅলঅ
ছাগঅইর লেইএ তহঅর বেটা নেহি রে আউঅলঅ

মনে তঅ দঅইসতঅ খেলঅইএ হউ।।

এসঅন কথা সুনি বুড়হাক মাথা গেলেইক ঘুরি
বাইড় বাদঅইরে কাঁহাঁ তবে রহঅলঅ রে লেউরি
সটসটাই ঘারা ভালা এহঅ রে পঁহচঅলঅ
তিরিআকে লেউরিক বানার আরঅ রে পুঁছঅলঅ
বুড়হাঁই কহেইক লেউরি তঅ ঘুরেই নিহি ঘারা
বুড়হাক তখঅন ডরেঁ সুখাই গেলেইক চুঁধিআঘারা
কিনা করেই সাঁচি নিহি পাউএই হউ।।

কিনা করঅম কিনা নিহি বুড়হা ছটঅপটঅ
কঁদে জাম ছউআক খজে ভাভি লটঅপটঅ
এতেক খনঅউ ছউআ জখঅন নেহি ঘুরেই ঘারঅ
হেলে কিনা লেউরি ভালা বাঁচি আহে আরঅ
ঝইড়েঁ কালহাঁই কনঅ ঠিনে মরি আহে গিরি
সেহঅ কথা সাঁচিকুনে উঠেই বুড়হা সিহিরি

বুড়হি তঅ কাঁদে লাগঅলি হউ।।

বুড়হাঁই এবেইর কাঁদি কাঁদি মেহেনাই বুড়হাক ঠিনে
কই ঘানি জনহাইর ভুজি দেলেই রে বিহানে
সেহঅ সেইএ লেউরি হামঅর বাগালি রে গেলাক
বেরাডুবি আঁধার হেলেইক তাউ নিহি ঘুরঅলাক
কাঁহাঁ আহে ছউআ হামঅর কনে দেতা টউআ
বিকলাই লাগেইক বুড়হিক মন বড়ি দউআ ভউআ

আঁইখেক লরেন্ মানা নিহি মানেই হউ।।

ঝটঅ বেগেঁ বুড়হা আরঅ ঘারা লে বাহারাইএ
সুটুঁগ সুটুঁগ আপঅন মনে চলেইতে রহঅইএ
বাপেক পেছুঁই পেছুঁই সাঁউরা এহঅ রে ডহরঅলঅ
বুড়হাঁই আরঅ সাঁউরাকে দেখিকে কহঅলঅ
তঁই বাছা হামঅর সঁগেঁ এহঅ রে কাঁহাঁ জাবে
কনঅ কিছু দেখলে ভালা এহঅ রে ডরাবে

তঁই তর মাঁইএক সঁগেঁ রহবে হউ।।

বুড়হাঁই আরঅ সাঁউরাকে আরঅ রে কহঅইএ
ঝইডঅ আঁধারিঁই ভালা বেড়হি রে রহঅইএ
এসঅন খনে তকে হামি নেহি লেগবঁ সঁগে
দুসমি বজড়ি কাচাড খাবে সহাতঅউ নি অঁগে
তখন তকে তেঁতরাউবঁ নঅ লেউরিকে খজঅবঅ
কন বেজ কঁদে ভালা এহঅ রে সামহলাউঅবঅ

তঁই হামঅর কথাটা বুঝাবে গউ।।

বুঝাই বুঝাই বুড়হাঁই আরঅ সাঁউরাকে কহঅইএ
তর দাদা জদি ভালা বাঁচি নি রহঅইএ
দিলা বাঁধঅবঅ হামরা তর মুহঅ দেখি
এহে বসমতাঁই নামটা আরঅ দেবে রাখি
বাপেক কথা সুনি সাঁউরা ঘারা রে ঘুরঅলঅ
আপঅনঅ মাইকে ভালা এহঅ রে কহঅলঅ।

বাপেঁ মকে সঁগে নি লেগঅলঅ গউ।।

সাঁউরাক কথা সুনি লতাঁই কহিকে উঠঅলি
লেউরিক লাগি পরান হামঅর করঅইএ বিকঅলি
ইড়কি জাঁই তঁই বেটা তর বাপকে এঁটিআউবে
দিঅ লকেঁ মিলি লেউরিক টউআ রে করঅবে
চাঁড়েঁমাড়েঁ জাঁই বেটা ডেরি নাহঁ রে করেঁ
তর বাপকে পাউবেসিক এহঅ গাঁউমুড়ি ভিতরেঁ

মুহেকর সঁগি তঁই হেবে গউ।।

মাইএক কথা সুনি সাঁউরা দম ধরি কুদঅইএ
কুলহিক মুড়াঁই আপঅন বাপকে এহঅ এঁটিআইএ
সাঁউরাকে দেখি বুড়হাঁই কহেইক রে কথাটা
আউএলাই মানা করলঁ তাউ আউলে বেটা
বাপেক কথা সুনি সাঁউরাঁই এহঅ রে ঢক গিলি
কহে লাগঅল সঁগ দেউএ মাইএই গঅ পাঠাউঅলি

হামঅর বাপু কনঅ নেহি হেতি গউ।।

তখন আরঅ বাপবেটা এহঅ রে চলঅলা
মেঘালি চাটান টাঁড়ি পঁহচিএ রে গেলা
একঅঠিনে ডাঁড়হাঁই বুড়হাঁই নজঅরঅ ঘুরাইএ
সাঁউরা আরঅ চাইরঅ বাটে এহঅ রে হুলকঅইএ
কাদাজাম তরেঁ সাঁউরাঁই দেখঅলঅ নজঅরেঁ
হাগঅইর মরি বিরবিথান পালহাকর নিঅরে
দেখি তঅ মাথা ঘুরি গেইল হউ।।

সাঁউরাঁই এবের বাপহারিকে ডাকেই চাঁড়েমাড়ে
কাঁপি কাঁপি রাউ ভালা বিঁধেক বুড়হাক হাড়ে
পুঁছে লাগঅল কিনা হেলঅউ সুনাইএঁ রে হামকে
সাঁউরাঁই তখঅন আঁগুর বাড়হাই দেখাউঅলঅ বাপকে
দেখিকুনে বুড়হাক মন বড়ি রে দুখাইএ
এবের কিনা হেতেইক সাঁচি মু গেলেইক সুখাইএ
চাটান উপরেঁ বসিএ গেলা হউ।।

ছাগঅইর মরি বিরবিথান দেখিকে নজঅরেঁ
বুড়হাকর মন ভালা কাঁপি উঠলেইক ডরেঁ
মুঁড়েঁ হাঁথ লেইএ আরঅ সঁচেই মনে মনে
এসঅন দসাঁই দেখবেঁই কিনা মর লেউরি ধনে
কাঁদি উঠঅলঅ ভালা বুড়হাকেরি মনঅ
হাই হাই করে লাগঅল খেপাকে জেসঅনঅ
মুড়অ থাপড়াউএই ঘনে ঘনে হউ।।

সাঁউরাঁই আরঅ হিঁদে হুঁদে এহঅ রে ভালঅইএ
জতেক ধুরঅ নজঅর ভালা এহঅ রে চলঅইএ
বাদরি ইজতিআঁই একটা ছাঁহির রে দেখঅলঅ
হড়েকরা ছাঁহির ভালা মালুমঅ করঅলঅ
গাছ ফেড়েঁ আইকে সাঁউরাঁই ঘুরাউএই নজঅরঅ
লেউরিকে গমলেইক লেদা ডাইরেকর উপঅরঅ
সুগুম মারি বসি জে আহে হউ।।

বাপ বাপ করি সাঁউরাঁই হাঁকঅ রে পাড়অলঅ
হাঁকঅ সুনি বুড়হা আরঅ চমঅকি উঠঅলঅ
কিআ দেখঅলে বেটা এহঅ রে পুঁছঅইএ
মনেকেরি ধাঁধি কিনা সাঁচা রে সঁচঅইএ
সাঁউরাঁই কহেইক দেখিহিঁ বাপু জামেক লেদাডারি
দাদা কেসঅন বসি আহে সুগুমঅ রে মারি
দেখি বুড়হাঁই মনে বল পাউঅলঅ হউ।।

দিঅ লকে লেউরিকে এহঅ রে ডাকঅলঅ
ঝাঁপুড়রা দেইএ লেউরি গাছলে রে নাভঅলঅ
বুড়হাঁই তখন লেউরিকে এহঅ রে ধরঅইএ
ভিজি সরঅসপঅ দেহি চেপ চেপ রে করঅইএ
সাঁউরাকে কাঁধে চঘাই লেউরিকে করাঁই করি
ঘারা ডহরঅলঅ বুড়হা নি করঅলঅ ডেরি

পঁহচি গেলা আপঅনঅ ঘারঅ হউ।।

জখন তিন বাপ বেটা ঘারা রে পঁহচঅলঅ
দেখি বুড়হিক মন তখন রিঝেঁ রে নাচঅলঅ
লেউরিকে আরঅ ভালা আঁকড়াই রে ধরঅইএ
দিঅ আইখে হ্বেকর লরঅ রে ঝরঅইএ
পুঁছে লাগঅল রহিস কাঁহাঁ এসঅনঅ আঁধারেঁ
তর লাগি হামরাক ভালা জিউ হেলি হাটা রে

সেহঅ কথা মকে সুনাইএঁ গউ।।

বুড়হাঁই কহেইক সুনৈ বুড়হি মরিবাঁচি আধা
উসভ কথা বাদেঁ হেতেইক সমঅই আহেইক গাদা
ভিজঅল পিঁধনা বদঅল করি খাই বসঅব হামরা
বাঁটাবাঁটি চাঁড়েঁ করেঁ ভুখেঁ হেলিঅ আধমরা
বুড়হাঁই তখন বাঁটাবাঁটি করিকে জতঅনে
তিনঅ লককে মুহাই দেলেইন জেটা রহেইক রাঁধঅনে

তিনঅ বাপবেটা খাই বসঅলা হউ।।

জখন আরঅ খাউআপিআ এহঅ রে হেউঅলঅ
বুড়হাঁই এবের লেউরিকে পুঁছে রে লাগঅলঅ
কেসে করি মরলা বাছা সভে রে ছাগঅরি
সেহঅ কথা তঁই মকে সুনাইবে এবেরি
গটা গাঁউএক ছাগঅইর ভালা উভড়িএ গেলা
ফড়অন দেউঅইতে আরঅ একটিঅ নি রহঅলা
সাঁচা কথা ফুটিকে কহবে হউ।।

বাপেক কথা সুনি লেউরি সুগুম রে রহঅইএ
একটিঅ কথা ভালা নেহি রে কহঅইএ
লেউরিকে সুগুম ভালা রহেইতে রে দেখি
সাঁউরাঁই কহেই বুঝেইতে মর তিলঅ বাকি নেখি
মর মনে কহেইসাহি তরাউ সাঁচি লিহা
লেউরা বড়ি কুটনা হেকে মকেই দস দিহা

রাগেঁমাগেঁ করঅলাহে এসঅন কাম গউ।।

তিনঅ লকে লেউরিকে ধরি রে বসঅলঅ
বহুত কথাক বাদে লেউরিঁই সিঁকারঅ করঅলঅ
সভে কথা আরঅ ভালা সুনাইএই একে একে
কথা সুনি গুম রহি গেলা তিনঅ লকে
বুড়হিঁই কহেইক হেঁ রে বাছা করলে এসঅন কাহে
কতেক খতি করি দেলসিন নি রহি রাহেবাহে

গাঁউএক লকেঁ কহতা এবেরি কিনা গউ।।

বুড়হা বুড়হিক মনে ভালা ঢুকঅলঅ ঘেরঘেরি
কিনা করঅম কিনা নিহি সাঁচঅত ঘুরিফেরি
কেসঅন করি গাঁউএক লককে বুঝাউএ রে হেতি
মুহেক কথাঁই মানতা কিনা এতেক বড়অ খতি
উঠিবসি ডহঅর খজঅত দিঅ রে পারানি
খাইল মাড়টা আরঅ ভালা হেই জাইক রে পানি

ছাগঅইর চাসা সভে আউতা ঘার হউ।।

বুড়হাঁই কহেইক সুনে বুড়হি রিচিক সাঁচি মনে
কিনা জবাব দেবসিন ভালা গাঁউএক লকেক ঠিনে
বুড়হিঁই কহেই হামঅর মুড়েঁ কনঅ নিহি আউএইস
হামঅর লে তরাক ঠিনেই বুইধ ভাঁউ আহঅন বেইস
মাহারাই গিত সুনি ভালা ইজঅর রাখা মতি
আপঅন ভাখি চারি ধনে জিআই হেতন গতি

মিলতঅহন সুখেকর জিনগানি হউ।।

বুড়হাঁই আরঅ বুড়হিকে কহি রে রাখিকে
ঘারা লে বাহার হেলাক পগঅড়ি মেটিকে
গটা গউরাঁই কুলহিঁই কুলহিঁই হাঁকঅ রে পাড়অইএ
হাঁকঅ সুনি সভে ভালা ঘারা লে বাহারাইএ
পুঁছে লাগঅল কিআ লাগি এতেক হাঁকাহাঁকি
সভেকাইএ বাহার হেলা হাঁথেক কাম রাখি
তঁই বুড়হা কহিকে সুনুউএঁ হউ।।

বুড়হাঁই তখঅন কহে লাগেই এহঅ রে রমে রমে
কথাটা কহেইতে ভালা দুখানি জাগেই দমে
মেঘালি চাটানঅ ঘেঁসে কাদা জামগাছ তরৈ
মন কাঁদা ঘটঅন ভালা দেখলঁ নজঅরৈ
ঝইডেঁ পানিঁই গটা গাঁউএক এহঅ রে ছাগঅরি
মরি বিরবিথান হেই সভে আহাত গিরি

বাছি বাছি লেলে আনিহান হউ।।

গটা গাঁউএক ছাগঅইর চাসাঁই সুনি এহঅ কথা
মনে মনে পাউলা ভালা এহঅ রে বড়ি বেথা
তখন আরঅ মসাল ধরাই সভেকাই ডহরঅলঅ
কাদাজাম গাছ তরৈ ভালা এহঅ রে পঁহচলঅ
মরঅলঅ ছাগঅইরেক ডিঁগ নজঅরে রে দেখি
সভেকাকর মন ভালা এহঅ রে গেলা সুখি

কিনা করঅত ভাভি নি পাউঅতঅ হউ।।

কহাকহি করে লাগঅত এসঅন রে ঘটঅনঅ
বাপেকর জনঅমে নেহি দেখঅলাইঁ কখঅনঅ
কাহে এসঅন হেলেক ভালা করঅত কানাকানি
বাছে কনঅ দেউআভুতাক এহঅ রে রাগানি
ভালি দেখঅত একটিঅ ছাগঅইর নেখঅত বাঁচি
গটা গউরাক ছাগঅইর পুঁজি কনে দেলাক পাঁছি
সভেকাকর মনে দঅইসত জাগঅলঅ হউ।।

দুই একটা বুইধগরেঁ ভালা কহে লাগঅল সূনা
জেটা হেউএক হেলাহেইক সাঁচি হেতেইক কিনা
আপঅন আপঅন ছাগঅইর ভালা এহঅ রে বাছি বাছি
লেইকুনে ঘারা চালা ভেনভেনাহাত জে মাছি
তখন আরঅ ছাগঅইর বাছে ঠেসলা রে সভেকাই
ঘারা ডহরঅলঅ ভালা কাঁধে পিঠে লদকাই

মসালেক আলঅঁই ঘারা পঁহচলা হউ।।

গটা গউরাঁই ছাগঅইর মাসেক এহঅ রে হেলহেলি
ঘারেঁ ঘারেঁ একে নিঅর কুলহি কিনা গলি
খালাঁই খালাঁই আউএক মাস পিঠঅইচাঁদেক ঘারেঁ
সভেকাই আনি দেহেথিক আপঅনঅ বিচারেঁ
মাসেকর টাসিলেঁ গটা গউরা রে বাজারঅ
মহঅকে লাগঅল ঘারাঘেইর ভজঘারঅ নিআরঅ

মাস খাই সভেকাই সেকলাসেইক হউ।।

মাসভাত খালা সভে এহঅ রে ঘারেঁ ঘারেঁ
ছাগঅইর পুঁজি উভড়ি গেলেইক গউরা বাজারেঁ
লেউরিকর রাগেঁ ভালা হেলেইক এসঅন দসা
কেহু কনঅ কহলা নিহি মন নি হেলেইন গসা
ঝাইডেক মুড়েঁ দাই চাপাই লেউরিক হেলেইক রেহাই
সভে খনে সাজতেইক নিহি মিছা মিছি দহাই

সাঁউরাকর মনে বিঁধঅলঅ হউ।।

সাঁউরাঁই এবেরইর পিঠঅই চাঁদকে কহঅইএ নেহঅরি
মন দেইএ সূনে বাপ কথা এক হামঅরি
দাদাকে গরু বাগাল সঁগে লেলে জাবে
নিহিতঅ একঅর লাগি গাইর বাখান দমে খাবে
ছউআক সঁগে খেলঅলে ভালা করেইন মারামারি
ছাগঅইর বাগাল জাইকুনে রাগটা দেলেইক তারি

তঁই একে সঁগে সঁগে ঘুরাউবেসিক গউ।।

সাঁউরাক কথা সুনি বুড়হাঁই কহেই ঢকি সৈঁপঅ
সাঁচা কথাই কহলে বেটা বুঝলঅ মঁই সভে টেঁপঅ
মেনেক হামঅর ডর ভালা লাগেই দসঅর ঠিনে
লেউরি জদি হামঅর সঁগ রহেই গটা দিনে
ভুখ পিআসেঁ খেমাই জাতাক ঝমরি জাতাক গিরি
বিনা ফেরেক ফের তখন সুনে কান চিরি
লেউরিকে সঁগে নেহি লেগবেঁই গউ।।

সাঁউরাঁই তখন আরঅ একঅ বুইধ রে আঁটঅলঅ
মঁই বাপেক ঠিনে ভালা এহঅ রে ফুটঅলঅ
গটা গউরাক বাছুর ভালা গতি দিহঁ একে
বাছুর বাগাল করতেইন দাদাঁই মনেকেরি সখে
জদি আরঅ বাছুর ভালা মারেইক রাগেক বসেঁ
গাঁউ আর পাঁচকুটুমে ধরবেথিক পাঘাদসেঁ

তখন বুঝতাক হাড়েঁ হাড়েঁ হউ।।

বুড়হাঁই কহেইক ঠিকে কহলাহিস সাঁউরা বেটা
বড়ি মনে লাগলি হামঅর এহে তর কথাটা
গটা গউরাক বাছুর গতাই দেবেইক রে লেউরিকে
এহে কথা সভেকাইকে সুনাইবেইন রে টউরিকে
কামেক সঁগে দামঅ হেতেইক সুধরঅতাক রে লেউরি
এহে আসা করঅহঁ মঁই মাহারাইকে সৈঁউঅরি

বিহানেই হামে সভেকে কহবেইন হউ।।

বিহান জে হেলেইক ভালা উগঅলি রে বেরা
গাঁউ বুলে গেলাক বুড়হা জানাউএলাই বেউরা
কুলহঁই কুলহঁই আরঅ ভালা হাঁকঅ রে পাড়অইএ
রাউ সুনি সভেকাইএ গরু রে ছাড়অইএ

সভে লককে কহেইন বুড়হাঁই এহঅ রে সুনিহা
লেউরিকে গাঁউএক বাছুর গতাইএ রে দিহা

আঝুলে লেউরিঁই বাছুর চরাউতেইন হউ।।

গাঁউএক লকৈঁ বুড়হাক কথা এহঅ রে সুনঅলঅ
বুঝি সুঝি সভেকাইএ হঁ করি মানঅলঅ
ঘাৰেঁ বানার দেইএ বুড়হা গরু লেই ডহরঅলা
কারি পিঁপঅড় বন ভালা এহঅ রে চলি গেলা
ছপলাইএ দেলেইন গরু হেরিহরঅ বনে
টুঁটুঁই বসি নজঅর আরঅ ঘুরাউএই ঘনে ঘনে
নিফিকিৰে গরু চরে লাগঅলা হউ।।

জখঅন আরঅ বেসিআম ভালা এহঅ রে হেউঅলঅ
বাছুর বাগাল তেঁহেঁ লেউরি আরঅ রে সঁপড়অলঅ
গটা গাঁউএঁ হাঁকঅ পাড়েই এহঅ রে রেগ ধরি
সভেকাইএ খলি দিহা বাঁধঅলঅ বাছুরি
হাঁকঅ সুনি ঘাৰাঘেইর বাছুরা খলিকে
গনি গাঁথি দেলখিক বুঝাই চলিকে বুলিকে
দুধ খাউআ বাছুরেঁ হেলেইক গঠ হউ।।

কুলহি কুলহি চলেই লেউরি ডহরাই রে বাছুরা
খুরেঁ খুরেঁ আরঅ ভালা উড়অইএ রে ধুরা
মহিচাঁদেক ঘাৰেক বাছুর মেসাইএ রে দেলা
বাছুরে বাছুরে ভালা কুলহি টাপি লেলা
কুলহিকেৰি মুড়া জখঅন এহঅ রে পঁহচঅলঅ
সভে বাছুর ঘাৰা বাটে নেজ উঠাই পিদকঅলঅ
লেউরিক মনে রাগঅ জনমঅলঅ হউ।।

ঘুরঅলে নি ঘুরঅত বাছুর কুদঅত জেজাহারঅ
লেউরিকর রাগ তখন আইগেকর নিআরঅ
একুকটা বাছুরকে ভালা ইড়কি ইড়কি লাতড়াই
নেজে ধরি মুড়েক উপর দেইন চাঁইপাক ঘুরাই
সভে বাছুর ঢনঅঢপঅ চলে পারঅত নেহি
মুহঅ লে আরঅ ভালা এহঅ রে বাহরাই দহি
কুলহি মাৰোঁ ঘলটি রহঅলঅ হউ।।

মহিচাঁদঅ রাজাক বোটিই দেখঅলঅ নজঅরোঁ
লেউরিকর করঅম দেখি কাঁপে লাগেই ডরোঁ
এসনঅ করঅলে ভালা বাছুরা বাছুরি
দমবাজ ছুউআক হাঁথে সভে জাতা মরি
এহে উলাবাঁইডাক হাঁথে গতাউবেইন রে নেহি
এখনে মর বাপুকে জাই সভে দেবেই কহি

কাইললে বাছুর হামিএ চরাউবেইন হউ।।

কুলহিক মুড়াই সভে বাছুর গঠাই রে রহঅলা
চরাপিআ কনঅ বাছুরোঁ নেহি রে করঅলা
লেউরি আরঅ একাই একাই এহঅ রে খেলঅইএ
খেইলেক মাঝে আরঅ ভালা নজঅরঅ ঘুরঅইএ
জখন আরঅ আড়বেরা এহঅ রে হেউঅলঅ
সভে বাছুর ঘারোঁ ঘারোঁ সমুঝাই দেউঅলঅ

চলি গেলাক নিজেকর ঘারঅ হউ।।

আপঅন ঘারেক চঁউরিমেলাই মহিচাঁদঅ রাজা
বসি বসি হুঁকা টানেই দেহি সারঅই মাঝা
সেহঅ খনে চনদা ভালা উহাঁ রে পঁহচলি
আপঅন মনেক কথা ভালা কহেইতে সঁচঅলি
বোটিকে দেখিকে রাজাঁই পুঁছঅলেক রে অকে
কনঅ কথা তঁই ভালা কহবে কিনা মকে

মু দেখি হেউএইস জে মালুম গউ।।

সুনেঁ বাপু মন দেইএ কথাটা হামঅরি
লেউরিকর বিরদাপ দেখি গাত গেলাহি সিহরি
অকে বাছুর গতনু দেউআ এহঅ রে চলতেক নিহি
ফুটিফাটি সেহঅ কথা দেই তকে কহি
আবু অকঅর করঅম ধচঅর দেখিকে হামঅরঅ
দুখে বেথাঁই বারঝারাই গিরঅলাহি লরঅ

বিসকুইটলা হেকেইক অকঅর মন গউ।।

মহিচাঁদঅ গরজি উঠি কহেইক কমঅর মেটি
লেউরিকর কিনা দস দেখলেসিক বেটি
সেহঅ কথা হামঅর ঠিনে সুনাইবে এখঅনঅ
তবে তঅ বুঝঅম হামে দসটা রে কেসঅনঅ
সভে সুনাইএঁ বেটি তরঅ মনেক কথা
কিআ লাগি কহে আউলে পাউলে কিনা বেথা
নিডঅরে কহেঁ একে একে হউ।।

সুনে বাপু দমবাইজা লেউরিকর বিরদাপঅ
নিসইততা তালকানাক দসেক নেখেক নাপঅ
কুলহিক মুড়াই কুদঅল বাছুর এহঅ রে রগঅদি
নেজে ধরি চাঁইপাক ঘুরাই দেইহেলেন লেবঅদি
সভে বকনা বাছুর বাপু ঢনপটাই ঢনপটাই
দহি উলগে লাগলা ভালা গিরিকে অচেঠাই
লেউরিক হাঁথে বাছুর নি বাঁচঅতা গউ।।

বাছুর সিরাই গেলে বাপু বুঝি দেখেঁ তঁহি
কেসে করি হেতেক ভালা দুধ ঘিউ ঘর দহি
হামরঅ দুধ খাউআ নেহি হেতি আরঅ
দুধেকর আকালৈঁ গিরতেক গউরা রে বাজারঅ
লেউরিকে গতনু দেলে বাছুরেক মরঅনঅ
সেহঅ খাতির সুনে বাপু কহেই হামঅর মনঅ
কাইল লে বাছুর মঁইএঁ চরাউবেইন গউ।।

বেটিক কথা সুনি রাজা হাঁসঅলঅ মুচঅকি
লড়িচড়ি আরঅ ভালা বইসঅলঅ উঁচঅকি
মুড়েঁ হাঁথ বুলাই রাজাঁই কহেইক চনহা ঢারি
তঁই জে হেকিস বেটি রাজাকর দুলারি
বাছুর বাগাল করলে গটা মুলুকেকর লকে
ছি থু গাইর মদঅ করতা জে গউ মকে
মান ভরঅম সভে জাতি বহি গউ।।

বুড়হাক বেটা লেউরি ভালা পেটেকেরি দুখেঁ
বাছুর বাগাল সাজঅলাহে বাপেকর ছুচুকেঁ
দুখে ভাতে আহিস বেটি ফুলেকর নিআরঅ
আলঅ করি আরঅ ভালা হামঅর এহঅ ঘারঅ
বাছুর বাগাল তকে বেটি করে নিহি হেতঅউ
টাইড়েঁ টাইড়েঁ বুলি বুলি দেহি পিতাই জাতঅউ
খাইদাই খেলি বুলঅবে গউ।।

বাপেক কথা সুনি চনদাঁই আউড়াউএই কহনা
নিজেক কাম নিজে করঅম লাজেক আহেইক কিনা
নিজেক ঘড়াক ঘাঁস জদি নিজে রে কাটঅইএ
উটাঁই আরঅ মান ভরঅম কেসে কই হাটঅইএ
হামঅর গাই হামঅর বাছুর দুধা পিঅঁ হামে
তবে কাহে ছেঁকঅ ছেঁকঅ চরাপিআ কামে

উঠেই কাহে লাজ সরঅমেক কথা গউ।।

বেটিক কথা সুনি রাজাক দিসা গেলেইক উড়ি
কিনা জবাব দেতেইক ভালা সঁচেই রে মুড় ধরি
কতিখনঅ বাদে ভালা ডহঅরঅ নি পাইকে
কহি উঠঅল জাঁই বেটি কহবেসিক তর মাঁইকে
বাপেক কথা সুনি চনদা এহঅ রে চলঅলি
মনে মনে কহেই মকে করেই হেতি বাগালি

নিজে নিজে জিদঅ ধরঅলি হউ।।

ঘারেক কামে অবঅ-ববঅ গঁগাদরি রানি
একটা একটা নিপটাউএই এহঅ রে ঠানি ঠানি
চনদা বেটি পঁহচি গেলি মাঁইএকরঅ পাসেঁ
মনেক কথা কহে লাগলি একঅ রে নিকাসেঁ
লেউরিকে বাছুর গতনু নেহি রে দেউঅবঅ
কাইল লে হামরাক বাছুর মাঁই হামি চরাই লেউঅবঅ
বুড়হাক বেটা হেকে জে দমবাজ গউ।।

বেটিক কথা সুনি রানিঁই কহিকে উঠঅলঅ
আচঅক কেসে তর মনে খেপটংগ রে ফুটঅলঅ
রাজাকেরি বেটি তঁই আহিস সুখে ক হালৈ
কিআ লাইএ এসঅন কথা সুনাউএহিস বদতালৈ
কিনা তর হেলঅউ বেটি কেথিঁই খালঅউ দিসা
কাহে গউ জনমলঅ মনে বাছুর চরাউএক নিসা
তঁই মকে ফইরছাইকে কহঅবে গউ।।

চনদাঁই কহেইক লেউরিক দসেক নেখে ক মাঁই সিমা
বাছুর সভে মরি জাতা দেলে অকে জিমমা
বড়ি নিঠুর হেকেইক মাঁই গউ অকঅর জে মতি
অবঅলা বাছুরেক উপঅর দেখাউএই তেজারতি
আদাড়ি বাছুরা জখঅন বসৈ নেহি রে ঘুরঅইএ
রগদি নেজে ধরি তখন চাঁইপাক রে ঘুরাউএ

দেখলাহেঁই নিজেকরঅ আইখে গউ।।

বেটিক কথা সুনি ভালা গঁগাদরি রানি
মনেক কথা কহে লাগঅল এহঅ রে ঠানি ঠানি
তঁই জদি বাছুর বাগাল করবে গউ বেটি
রাজাঘারেক মান খাতির সভে হেতেইক মাটি
জৈঁই নিহি তেঁই ভালা কহতা ইটাউটা
লাজৈঁ সরঅমে তখন হামরাক ঘঁসাই জাতি মুটা

বাছুর বাগাল নিহি জে জাই দেবঅউ গউ।।

মাঁইহারিঁই জখন ভালা নেহি রে মানঅইএ
চনদাঁই তখন আরঅ ভালা বুইধ রে ঠানঅইএ
নিজেক ধনেক ভালঅ মদঅ নিজে গউ বুঝঅবঅ
কনে কিনা কহতা ভালা কাহে গউ সঁচঅবঅ
গঁগাদরি রানি ভালা বেটিক কথাঁই হারি
বেটিকে লেই রাজাক ঠিনে সভে দেলেইক ডারি
রাজা রানি সলহা করে লাগঅলঅ হউ।।

সলহা করি রানিঁই এবেইর কহঅইএ চনদাকে
বাগালি নি সাজতঅউ তর হামরাক বেটি হেইকে
জেসঅন ঘারেক ছউআ ভালা তেসনে রহে হেতঅউ
সেহঅ বুঝি করেঁ কাম জেটাই তকে সাজতঅউ
খাইদাই খেলি বুলেঁ সাঁগি জুড়িক সাঁগেঁ
কামপাইট এখঅন জে তর নেহি সহতঅউ অঁগেঁ
তঁই হামঅর কথাটা বুঝাঅবে গউ।।

পেনপেনাই লাগলি চনদা মাঁইএক কথা সুনি
অড়ি ধরি রহলি বসি সভে কিছু ধুনি
লেউরিকর হাঁথেঁ ভালা বাছুরেক জাতঅনঅ
দেখিকুনে চনদাক ভালা কাঁদঅইএ জিবঅনঅ
নিজেক বাছুর নিজাই চনদাই এহঅ রে চরাউতেইন
লেউরিকে গতি দেলে সভে রে হেঁরাউতেইন

বাছুরা চনদাক বড়ি জে আদঅরেক হউ।।
আপঅন বেটিক জিগিড় দেখি এহঅ রে রাজা রানি
চনদাকে কহে লাগঅল আদঅর চনহা সানি
ঠিকে আহেইক কাইল লে বেটি বাছুরা খলবেসিন
মনেক সুখেঁ টাঁড়িঁই টাঁড়িঁই এহঅ রে চরাউবেসিন
খাইএক গেঁঠিআই দেবঁ বেটি সাঁগে লেলে জাবে
জখঅন ভুখ লাগতঅউ ভালা এহঅ রে খাই লেবে
বিহানেই তকে খাইএক বনাই দেবঁ গউ।।

ঘুরিদিনঅ লেউরি ভালা হেউঅইতে বেসিআমঅ
বাগালি বাহারালাক আরঅ ধরি নিজঅ কামঅ
গটা গউরাক কুলহিঁই কুলহিঁই এহঅ রে রেগ ধরি
হাঁক পাড়েই খলি দিহা বাছুরা বাছুরি
হাঁকঅ সুনি আরঅ ভালা গউরা রে বাজারঅ
আপঅন আপঅন বাছুর খলি দেলা জেজাহারঅ
লেউরিকে মেসাইএ দেলখিক হউ।।

গটা গউরাক বাছুর ভালা এহঅ রে মেসঅলঅ
রাজাঘারেক বাছুর আরঅ নেহি রে খসঅলঅ
কুলহিক মুড়াই বাছুর টেকাই লেউরি রে রহঅইএ
রাজাক বাছুর ভালি ভালি সমঅইঅ বিতঅইএ
বাছুরা গনঅইএ ভালা এহঅ রে ঘুরিফেরি
গেলেইক দিনেক গনতি নেহি মিলেইক পুরাপুরি
রাজাক বাছুর বাদঅ রহি জাই হউ।।

ডাঁড়হাই ডাঁড়হাই লেউরিই আরঅ এহঅ রে ভালঅইএ
রাজাঘারেক বাছুর এখনঅ কাহে নেহি খলঅইএ
ঘারেক লকজন কিনা দসঅর কামে সঁসরি
বাছুর মেসাই দেউএক কথা গেলাহাত রে বিসরি
ভালি ভালি আরঅ লেউরিই সঁচেই আপঅন মনে
আচাক দেখেই বাছুর লেইএ আউএইস ভালা কনে
রাজাক বেটি চনদা লাগঅইএ হউ।।

বাছুরেকর পেছুই চনদা আউএই টহঅবরেঁ
আলঅক উপর আলঅ করেই কুলহিকর ডহঅরেঁ
দেহিনা হাঁথেঁ সাটিক নাচাই ছুআই বাছুর গাঠেঁ
ছাকনা ভরঅল খাইএক আরঅ ধরঅল নেগা হাঁথেঁ
কদমালাডু ছাঁছি এহঅ হাউআইচরকি আরঅ
রানিকর সাজঅল ভালা হরেক রে নিআরঅ
খুরেক ধুরা লাগেইক চনদাক গাঠেঁ হউ।।

ঠমঅকি ঠমঅকি চনদা চলেই আপন ঠাঠেঁ
রাগে জে গরগরাই লেউরি কুলহি মুড়া বাটেঁ
একে তঅ ডেরি করি বাছুরঅ খলঅইএ
তাকঅর উপর কতেক ঠাঠেঁ এহঅ রে চলঅইএ
বাছুরা মেসাউতে ভালা করলে এসঅন ডেরি
নেহি লেবেইন গতনু ভালা ঠানঅইএ লেউরি
ভালি ভালি আঁখি টাটাই গেইল হউ।।

লেউরিকর গঠে চনদাঁই নি মেসাই বাছুরঅ
আপঅনঅ বাছুরা ভালা করলেইন রে ধুরঅ
রাউ নিহি কাড়হেইক আরঅ এহঅ রে লেউরিকে
এক ধারিঁই রাখি বাছুর রহঅলি ফরকিকে
লেউরিকর মনে ভালা দুখঅ রে জনমঅলঅ
রাজাঘারেক বাছুর তবে এহঅ রে কমঅলঅ

চনদাঁই বাছুর নিজেই চরাউতেইন হউ।।

আপঅন বাছুরা চনদাঁই চরাউএইন টেকি টেকি
রাগেঁ দুখেঁ জরেই লেউরি এহঅ রে এসঅন দেখি
রাজাক বেটি এতি নিঠুর ভাত ভাঁগি দেলি
কতেক গতনু বাছুর হামঅর কমাই দেউঅলি
চনদাকে দেখি ভালা গাঁউএক আরঅ ছউআ
বাছুর বাগাল বাহারালে মর গঠ হেতি হাউআ

লেউরিঁই তঅ সঁচেই বসি বসি হউ।।

বুড়হাক বেটাঁই খেইআল বসেঁ বসঅলঅ জিদ ধরি
চনদাকে সাঁতাউএ হেতেইক মেনেক কেসঅন করি
সঁচেইতে সঁচেইতে মনে বুইধ রে জাগঅলঅ
একঅ পালহা ডহরা ভালা এহঅ রে ভাঁগঅলঅ
সেহঅ ডহরা লেইএ লেউরি করেই ইড়কা ইড়কি
চনদাকর বাছুর ভালা সভে গেলা ভিড়কি

উমকে লাগঅল জেজাহার হউ।।

বাছুরেকর পেছুঁই ভালা রাজাকর দুলাড়ি
লুবুক লুবুক ইঁড়কে লাগেই বাখান পাড়ি পাড়ি
ছাকনাকর খাইএক চনদাক গিরি গিরি জাইএ
বাছুর ঘুরাউএকর নিসাঁই বুঝি নিহি পাইএ
সেহঅ দেখি লেউরি আরঅ লভে রে কুদঅলাক
টুপটুপ কুড়হাই ভালা এহঅ রে খাই লাগলাক
কতেক আরঅ খঁইছাঁই ভরঅলঅ হউ।।

নেজ আলগাই কুদঅত বাছুর থিরালে নি থিরাত
চঅউকি চঅউকি আরঅ ভালা নাচাউএ লাগঅতঅ গাত
হেঁসরি হেঁসরি থকি গেলি গাত জাই রে চিড়কি
গরখিআ নিঅর রাজাক বেটি বুলেইসাহি ইড়কি
খাইএক কুড়হাই কুড়হাই লেউরিই রঁগঅ রে দেখঅইএ
খাই আরঅ ভালি ভালি এহঅ রে মাকুআইএ

চনদা তঅ নাখে কাঁদঅলি হউ।।

কুদেইতে কুদেইতে বাছুর উঠাই ঠেঁগঅ চারি
পঁহচি জে গেলা ভালা ঘিআলি পখঅইর ধারি
ঘিআলি পখঅইরেঁ আরঅ রজঅল ধবা বিরঅ
পাটিক উপঅর লুগা কাচেই কামে নাহু থিরঅ
কিনা খাতিরে আরঅ সবঅ রে ডাঁড়হাইএ
মলকলঅ বাছুরা ভালা দেখি রে পাউঅইএ

হামমা হামমা করঅত আর কুদঅত হউ।।

বাছুরা দেখিকে রজঅল আগাড়ে উঠঅলঅ
কাকরঅ বাছুরা ভালা এহঅ রে বিলটঅলঅ
ভালি ভুলি দেখেই রজঅল আরঅ রে নজঅরেঁ
রাজাক বেটি চনদাকে দেখঅল কতি ধুরেঁ
লেউরিকে দেখেই ভালা এহঅ রে আউঅইএ
কখনঅ আরঅ কুড়হাই কুড়হাই কিনা রে খাউঅইএ

তখন রজঅল লেউরিকে হাঁকাউএই হউ।।

রজঅলেকর হাঁকঅ সুনি লেউরি রে সাটালে
অকঅর পাসে পঁহচি গেলাক এহঅ রে কুদালে
কহে লাগঅল কিনা লাইএ ডাকঅলে তঁই মকে
সেহঅ কথা চাঁড়ে চপঅটে সুনাইএঁ একে একে
রজঅলে কহেইক বাছুরগিলা কাকঅরঅ লাগঅইএ
রাজাক বেটি চনদা কাহে বাছুরেক পেছু আউঅইএ

সেহঅ বানার মকে তঁই দেবে হউ।।

লেউরিই তখন কহেইক ভালা সুনେ রজঅল কানে
রাজাঘারেক বাছুর হেকথিক জুইতসিরে জানে
চনদা আরঅ বাছুর বাগাল এহঅ রে করঅইএ
ভিড়কলঅ বাছুর ভালা ঘুরাউএ নি পারঅইএ
ঘুরাউএকর খাতির আরঅ আউএই ইড়কি ইড়কি
ফারাক বাটে বাছুর ভালা ততেক জাতঅ ভিড়কি
আদাড়ে নি বাদাড মানঅইএ হউ।।

রজঅল ধবাই তখন আরঅ লেউরিকে কহঅইএ
তরঠিনে মর একটা কথা রে রহঅইএ
ভিড়কল বাছুর দিহিন ঘুরাই এহঅ রে টেকিটাকি
ইড়কি ইড়কি রাজাক বেটি গেলাহি জে থকি
অই নেহি পারতেইন ভালা বাছুরঅ ঘুরাউএলাই
গটাদিন ইড়কি মরি কাঁদতি জে বিকলাই বিকলাই
কাচাড খাইএ গিরি হেতি কখঅন হউ।।

রজঅলেকর কথাই ভালা লেউরিকর অনতরঅ
তুরুতে মন গলি গেলেইক পানিকর নিঅরঅ
চনদাকর কথা সাঁচি দরঅদঅ সাঁআগঅ
পঁছাইএ গেলেইক আরঅ খলঅ রে রাগঅ
উড়া মালঅইট দেইএ ভালা বাছুরা ঘুরাইএ
সভে বাছুরাকে টেকি একঠিন রে করঅইএ

তখন চনদা বাছুরেক পাস পঁহচলি হউ।।
টেকাইল বাছুরা দেখি চনদাকর জিবনঅ
মুহেঁ হাঁসি ফুটলেইক ভালা রিঝালেইক জে মনঅ
দম গাড়িকে আরঅ ছাঁকনা রে দেখঅইএ
ছাঁকনা ভরঅল খাইএক ভালা কাঁহাঁ রে ফেঁকাইএ
কাঁহাঁ গিরলি খাইএক হামঅর চনদা জে মেহনাইএ
রজঅল আর লেউরিকে এহঅ রে সুনাইএ
ভুখাউলে কিনা হামি খাম হউ।।

লেউরিঁই তখন খঁইছাটাকে লুকাউএই রে সতঅরৈ
বাছে বাঝি জাই ভালা চনদাকর নজঅরৈ
লেউরিকে দেখি ধবিঁই कहलेइक रे फइरछाई
चनदकर खाईएक भाला आहअउ जे तर खँइछाँई
कुड़हाई कुड़हाई खाईहेलिस देखअलाहँ हामे
सरअम लागअहअउ এখন अहे निअर कामे

खँइछा लुकाउएहिस अहे लाजै हउ॥

लेउरिके रजअलेँ तখন आरअ रे कहअईए
बेटी छउआक जुँठा खाईकुन सुगुमअ जैँई रहअईए
अकअर आरअ लाज सरअम एहअ रे नेहि मानाई
लुगा काचे ठेसलाक धवि एहे कथा सुनाई
लेउरिकर हाडेँ हाडेँ बिँधअलअ एहे कथा
फुटि कनअ कहलाक निहि रहलाक हेई थथा

धविक कथा चनदाँई बुझअलि हउ॥

बाछुरेक पेछुँई घुरि घुरि चनदा थकिथाकि
लेउरिके आरअ भाला एहअ रे कहेइक डाकि
तर गठैँ बाछुर हामे एहअ रे मेसाइके
एके सँगे बागाल करअव मिलि रे मेसिके
चनदक कथाँई बुड़हाक बेटाँई नि पाड़ि टकाइरअ
एके टुमे राजि हेलाक करअल हँ हँकाइरअ

राजाक बेटीँई बाछुरा मेसाउअल हउ॥

बुड़हाक बेटा राजाक बेटी भुलि रागारागि
बाछुर बागाल करे लागअल कामे भागाभागि
घिआलि पखअइर धारिँई चरअतअ बाछुरा
कचि कचि घाँस भाला देखाई हेरिहरा
एकटा मङ्गल गाछ भाला रहेइक अहअ ठिने
पुरअ छाँहिर मिलेइक आरअ रउदेकरअ दिने
डाइरैँ पालहाँई बाबाडअ बुबुडअ हउ॥

চন্দা আরঅ মল্ল তরৈঁ এহঅ রে ডাঁড়হাইএ
নিজেক মনে খেলেই আরঅ বাছুরি ঘুরাইএ
কখনঅ আরঅ বর কেনিআই খেইলঅ রে করঅইএ
একাই একাই আরঅ ভালা গিতঅ রে ধরঅইএ
কখনঅ আরঅ গুড়হা গুড়হা খেতি রে করিকে
ঘাঁস উপড়াই ধান রপেই নিজেক হিঁচছা সুখে
বাছুর তঅ চরতঅ নিফিকিরেঁ হউ।।

লেউরিঁই আরঅ পাখঅড় ভাঁগি গুজু গুজু করি
হার বেনাই বাহে লাগেই চাসাক দিসা ধরি
হিঁ ঘুর হিঁ ঘুর নিজেক তালে বকেই আপঅন মনে
হারেক পাকে থকি জাইস জে বেসিআম আনেই কনে
চেপটি পাখঅরেক ভালা কদাইরঅ করঅইএ
একেঠিনে বসি বসি ছাঁচঅ রে ঝাড়অইএ

দুই লক দুইঠিন খেইলে মাতঅলা হউ।।
রজঅল ধবি লুগা কাচি গোঁঠিআই একঅ মটেঁ
ডহরঅলঅ আরঅ ভালা আপঅন ঘারা বাটেঁ
ধবিকে দেখিকে লেউরিক মনে রে জাগঅইএ
বোটি ছউআক জুঁঠা খাউআ মকে রে কহঅইএ
একঅর বদলা লেবে করঅম ছাড়বেঁই নিহি অকে
নিহিতঅ রে এসঅন কথা কহতাক ঘুরি মকে
রাগেঁ তঅ গুমঅরি উঠঅইএ হউ।।

খেইল ছাড়ি লেউরি আরঅ গেলাক রে সঁসাটি
ঘিআলি পখঅরিঁই জাঁহাঁ লুগাকাচা পাটি
এহঅ পাটিক গরঅব ধবিঁই বড়ি রে করঅইএ
কমঅর মোটি দিঅ হাঁথে এহঅ রে ধরঅইএ
হিলাই হুলুই মাটি ছাড়া করি দেহিক জরেঁ
উঠাইএ জে লেলাক ভালা কমঅরেক উপঅরে
কঅইত লেখেঁ পাটি হলকাই দেলেইক হউ।।

আসি বিঘাক পখঅইর মাঝে পাটি জে গিরঅলঅ
গবাঁগ করি সাঁগি জরেঁ সবঅদ রে করঅলঅ
হেলঅকেকর পানি ভালা আইডেকর মাথানি
টাইডেঁ উঠি মাছ পকাক জিউ টানাটানি
পাটিটা লেবদিকে লেউরিই মনে রে সঁচঅইএ
ভিতরিআ রাগ ভালা গেলি রে পঁছাইএ

চনদাঁই তঅ সভে দেখঅলি হউ।।

বুড়হাক বেটা লেউরিকর এহঅ রে বল দেখি
রাজাক বেটি চনদাকর লাগঅলেইক হাইচকি
এতেক বড়অ পাটি ভালা আঁকড়াই রহেইক মাটি
অলঅটেই লেবদি দেলেইক জেসঅন ভাঁগঅল খপটি
কাঁহাঁ পাউলাক এতেক বল কিনা খাই এসঅনঅ
বুড়হাক ঘারেঁ তেসঅন ভালা নেখেইক কনঅ ধনঅ

মনঅ মাঝে লাগি গেলেইক টান হউ।।

পাটিটা লেবদাইএ লেউরিক থিরঅ হেলেইক মনঅ
মনেক রাগটাউ জুড়াই গেলেইক কিনা করেই এখনঅ
বাছুরা চরাউএ লাগঅল আগুর নিঅরে
চনদাক নজঅর ঠিকরি গিরেইক লেউরিকর উপঅরে
বুড়হাক বেটাক গুনেক কথা এহঅ রে মনে মনে
বাছুর চরাউএক সঁগে সঁগে জাগেইক খনে খনে

একঅর আরঅ আহেইক কতেক গুন হউ।।

একাই একাই দিঅ লক এহঅ রে খেলঅইএ
চনদাঁই আরঅ আড়ে আড়ে লেউরিকে ভালঅইএ
বাছুর সভে চরঅত ভালা কচি পুরঅ ঘাঁসেঁ
ঘিআলি পখঅইরেঁ পানি পিঅতঅ পিআসেঁ
চনদাঁই এবের লেউরিকে এহঅ রে হাঁকাইএ
অকঅর ঠিন আউএক খাতির আরঅ রে কহঅইএ

লেউরি চনদাক পাসেঁ আউঅলঅ হউ।।

পাসেঁ আইকে কহেইক লেউরিঁই এহঅ রে চনদাকে
কিআ লাগি তঁই ভালা হাঁকাউলে জে মকে
চনদাঁই কহেইক একাই একাই নেহি রে খেলঅবঅ
একে সঁগে খেলঅব আর বাছুরা ভালঅবঅ
বিহা বিহা খেলঅব এখন দেহঁ তকে সুনাই
পাতেকেরি বর করঅব আর পাতেকেরি কেনিআই
বসি বসি এহে মছল তরেঁ হউ।।

লেউরিঁই তখন কহেই ভালা ভেঁগচাই আপঅন মুটা
পাতেক বর পাতেক কেনিআই কেসঅন খেইল উটা
পার পার এসঅন খেইল খেলঅম নিহি হামে
সেহঅ খেইলেই খেলঅব ভালা লাগতি জেটা কামে
চনদাঁই এবের কহেইক তবে তঁহিঁ সাজেঁ বরঅ
কেনিআই সাজঅহঁ হামে সঁগে রে তহঅরঅ
দিঅ লক বড়ি জে মানাব হউ।।

চনদাক মুহেঁ এসঅন কথা সুনিকে লেউরিকর
ডর সামহাই গেলেইক ভালা ছতিআকর ভিতঅর
রিঝঅল ভিজঅল মন লেউরিক এহঅ রে গেলেইক সুখি
কনে জেসঅন গুতাই দেলেইক উঠলাক আচঅক কুঁখি
লেউরিকর ভাব দেখি চনদাঁই রে পুঁছঅইএ
তর আরঅ মনে ভালা কিনা রে নাচঅইএ

তঁই মকে ফুটি কহঅবে হউ।।
লেউরিঁই তখন চনদাকে কহেইক ভালা ফুটি
তঁই আরঅ হেকিস ভালা মহিরাজাক বেটি
মঁই হেঁক বাগাল খাটা বুড়হাকরঅ বেটা
গউরা বাজারেক লকেঁ সভে জানঅত উটা
তর সঁগে মর বিহা রাজাঁই জানেই জদি
সুনেইতে সুনেইতে ভালা মুড়অ দেতাক গেদি
মরাইকুনে ফেঁকি দেতাক গাডহাঁই হউ।।

চনদাঁই কহেইক সূনে লেউরি কথাটা মর সূনে
ভিড়কিকে পাৰাহিস কাহে নিহি রে বুঝিকুনে
লুকাই ছুপাই বিহা বিহা খেলঅব দিত লকে
কনে আহাত পাৰ্শে-ঘেঁশে দেখতা তকে মকে
মিছা মিছা বিহা খেলঅব এহঅ মছল তৰেঁ
তবে কাহে মরিস ভালা মর বাপেকর ডৰেঁ

সাঁচা বিহা নেহি কহঁই তকে হউ।।

লেউরিই এবৈইর মনেক কথা সুনাই আপঅন টর্গেঁ
এসঅন বিহা হামে নেহি খেলঅবঁ তর সঁর্গেঁ
সাঁচাবিহা মানি জদি তিন কিরা রে খাবে
তর সঁর্গে বিহা বিহা খেলঅম হামি তবে
কাইলে কনঅ রাজাক বেটা এহঅ রে আউঅতঅউ
কেনিআই সাজাই বিহা করি তকে লেলে জাতঅউ

মঁই তখন কিনা করঅম হউ।।

চনদাঁই কহেইক সূনে লেউরি মনে কাহে ধিঁধা
গটা জিনগানিক সঁর্গি হেতঅউ এহে চনদা
বারঅ বছঅর হামি ভালা নিঅমে রে রহঅম
তর সঁর্গেঁ বিহাক আর্শেঁ দিনা জে রে গনঅম
তাঁহঁ জদি তাঁই লেউরি নিহি রে মানঅবে
হামঅর কথা তাঁই তবে এহঅ রে ভুলঅবে

তখন হামে দসঅর বাট দেখঅম হউ।।

লেউরিই কহেইক সূনে চনদা হামঅর মনেক কথা
হামরাকর বিহা কেহু মানি নিহি রে লেতা
তাঁই তর মাঁই বাপেক হেকিস সনা ধনঅ
দুখ বিপঅর্দেঁ সানঅল ভালা হামঅরঅ জিবনঅ
তাউ জখন তাঁই ভালা সভে জানি সুনি
হামঅর সঁর্গে বিহা লেউএক ধরলাহিস ঠৈনি

হামি তবে সিঁকারঅ করঅলঁ হউ।।

লেউরিঁই আরঅ কহেই ভালা ঘেঁচা পানি জাইকে
পন করঅব হামরা ভালা তিন কিরা খাইকে
এসে এসেই আরঅ ভালা নি হেতেইক মানামানি
চনদাঁই কহেইক চালেঁ তবে জাঁহাঁ ঘেঁচা পানি
এহে কহি দুইলক চলঅলঅ এহঅ রে ধরাধরি
পঁহচি জে গেলা ভালা ঘিআলি পখঅরি

ঘেঁচাপানি নাভিএ গেলা হউ।।

উপঅর বাটে হাঁথ উঠাই চনদা লেউরি বিরা
চাঁদ সুরুজ সাকথি রাখি খাই তিনঅ কিরা
আসমান হাউআ মাটি পানি সভে সাকথি রহা
চনদাকে হামি ভালা করবেঁই জে বিহা
এহে কিরা জদি মঁই নি করঁ পালঅনঅ
গটা দেহিআ ভালা ফাটি জাই জেসঅনঅ

লেউরিঁই এসনে তিন কিরা খালাক হউ।।

তিন কিরা খাই লেউরিঁই চনদাকে কহঅইএ
তঁই এখনঅ কাহে ভালা সুগুমঅ রহঅইএ
মকে কিরা খাউআই জদি তঁই নি কিরা খাবে
গরুক সিঁঘেঁ পানি পিকে ফাটি মরি জাবে
লেউরিক কথা সুনি চনদাঁই অকঅর মুটা ভালি
কহে লাগঅল এখনঅ মকে সাঁচিস মনে জালি

একঅর বাদেঁ হেকি মর পালি হউ।।

উপঅর বাটেঁ হাঁথ উঠাই এহঅ রে রাজাক বোটি
কহে লাগঅল চাঁদ সুরুজ আসমান পানি মাটি
তহরাকে সাকথি রাখি খাই মঁই তিন কিরা
মর জিবন সাঁগি হেতা লেউরি রে বিরা
একে ছাড়া দসঅর সাঁগে বিহা নি করঅমঅ
এহে কথা মিছা হেলে ফাটি রে মরঅমঅ
ঘেঁচা পানিঁই করলঁ মঁই পন হউ।।

পানি লে উঠিকে দিঅ মছলতর জে গেলা
ধুরা বালি বটরি আরঅ ঘারা রে বেনাউলা
ঝুড়ি খাড়হি ভাঁগি ভুঁগি এহঅ রে আনঅলঅ
পালহা পাত দেইএ ভালা ঘারা রে ছাহঅলঅ
চনদা আরঅ সেহঅ ঘারেঁ এহঅ রে বসঅইএ
লেউরিঁই আরঅ ইঠিন উঠিন দাগঅ রে চিসঅইএ

ছামড়া বেনাউএক তড়ঝাড় হউ।।

কাখনাবাঁধা আরঅ ভালা আগুই রে করঅলঅ
লেউরি চনদাক অমলঅ খাউআ এহঅ রে হেউঅলঅ
বরিআত লেই বিহা করে এহঅ রে বাহরাইএ
বাছুরেকর নেজ়েঁ ভালা ডালঅ রে বাঁধঅইএ
কেনিআই ঘার আরঅ ভালা এহঅ রে পঁহচলা
বর আরঅ দুআইরেঁ এহঅরে ডাঁড়হালা

বাজনা বাজঅইএ রিঝেঁ রঁগেঁ হউ।।

কেনিআইএক মছলবিহা এহঅ রে হেউঅলঅ
বর কেনিআই ছামড়া তরেঁ আরঅ রে আউঅলঅ
বরেক আগুটাঁই কেনিআই মু টাঁপাই বসঅইএ
ধুরাক সিঁদুর করি বরেঁ এহঅ রে ঘঁসঅইএ
হরি বলঅ হরি তিন ধাঁউ এহঅ রে কহঅলঅ
কেনিআইকে ধরি বরেঁ নেগাবাটে বসাউঅলঅ

বিহা তঅ পাইরাইএ গেইল হউ।।

লেউরি আর চনদা ভালা বিহা বিহা খেলি
ঘারেকর কথা আরঅ গেলাহাত রে ভুলি
মহিচাঁদ রাজা আর গঁগাদরি রানি
আপঅনঅ বেটিআক তেঁহেঁ জড়অলা বিকলানি
কাঁহাঁ জে রহঅলি চনদা ঘুরেই নিহি ঘারঅ
সাঁঝবেরা বিতি আরঅ হেই মুহাইল আঁধারঅ
বাছে কনঅ ঘটঅলঅ বিপঅতি হউ।।

দুখঅ পিআসেঁ বাছুর হামমা হামমা করি
আদাবাদি ডাকে লাগঅল এহঅ রে রেগ ধরি
লেউরি চনদাক তখন ভালা খেইলঅ রে ভাঁগঅলঅ
ঘার ঘুরেক কথা ভালা মনে রে জাগঅলঅ
বেরা ডুবুডুবু খনে বাছুরঅ ডহরাউঅলা
আপঅন আপঅন ঘার ভালা এহঅ রে পঁহচঅলা
মাইবাপেক নিকাসঅ ঘুরঅলঅ হউ।।

খেইলেক ছলৈঁ লেউরি চনদাক হেইএ গেলেইন বিহা
মাহারাই কথা সভে মন দেইএ সুনিহা
মাহারাইএক গুনেক আলাঁই জগঅতঅ সিরজনঅ
অকঅর ধেইআনে ভালা রাখিহা রে মনঅ
জেহঅ লকৈঁ মাহারাইকে করঅইএ রে হেলা
অকঅর জিনগানিঁই নিছু মিলেইক দুখঅ জালা
মাহারাই বিনু দুনিআই আঁধার হউ।।

রজঅল বিবেক টেডহি ভাংগান

তাকঅর ঘুরিদিন লেউরিঁই হেউঅইতে বিহানঅ
বাছুরা বাগালিক তেঁহেঁ করঅইএ ঠানমানঅ
মাইহারিকে আরঅ ভালা খাইএক জে খজঅইএ
বুড়হিঁই তখন বাঁটিসারি এহঅ রে দেউঅইএ
পেট ভরি লেউরিঁই ভালা নুড়িকে আহাঅ
বেসিআম খনে হেলাক ঘারালে বাহারঅ

লতাই এবেইর কহেইক ডাকিকে হউ।।

হামঅর একটা কথা বেটা সুনৈ ভালঅ করি
বাছুরা তঅ লেলে জাবে সমঅটি বটঅরি
বাছুরঅ আঘালে ভালা ঘারা রে ঘুরঅবে
কালুক নিঅর ডেরি বাছা নেহি রে করঅবে
তর লাইএ কাইল হামঅর কতেক জে বিকঅলি
হাঁথেকর কাম কনঅ উসরে নেহি হেলি

রহিস নাহ বাছা ভুখৈঁ পিআসেঁ হউ।।

লেউরিঁই কহেইক হামঅর লাইএ সাঁচিস নাহ গউ কনঅ
চাঁড়েই ঘুরঅম হামি মাই গউ থির রাখেঁ মনঅ
মাইকে বুঝাইএ লেউরি এহঅ রে চলঅলঅ
কুলহিঁই কুলহিঁই আরঅ ভালা হাঁকঅ রে পাড়অলঅ
আপঅন আপঅন বাছুর সভে এহঅ রে দেলখিন মেসাই
ডহরাই লেগঅইএ ভালা চরাউএকর নেসাই

কুলহিক মুড়াই বাছুরা টেকাউলেইন হউ।।

রজঅল ধবাই আরঅ ভালা গউরা রে বাজারেঁ
কাচেক লুগা জড়অ করেই ঢুকি ঘারেঁ ঘারেঁ
জড়অ করঅল সভে লুগা গোঁঠিআই একে মটেঁ
কাচেক লাগি চলে লাগঅল পখঅরিকর বাটেঁ
বুড়হাক বেটাই আরঅ ভালা ধবিকে রে দেখি
মনে মনে কহেই ধবি ভাঁগতঅউ আইজ তর সৈখি

কাঁহাঁ তঁই কাচঅবে লুগাফাটা হউ।।

চনদা আরঅ বাছুর লেইএ এহঅ রে আউঅইএ
কুলহিক মুড়াই লেউরিক সঁগে দেখা রে হেউঅইএ
বাছুর লেইএ দিঅলক এহঅ রে ডহরঅলা
ঘিআলি পখঅইর টাঁড়ি পঁহচিএ রে গেলা
বাছুরা ছপঅলি চরঅত এহঅ রে হেরিহরৈ
লেউরি চনদা বসঅল আরঅ মল্ল গাছতরৈ

খেলে লাগঅল আপঅনঅ মনে হউ।।

গটা গউরাক লুগাফাটা এহঅ রে মটে করি
রজঅল ধবা পঁহচি গেলাক ঘিআলি পখঅরি
পখঅরি পঁহঅচিকে ধবিক দিসা গেলেইক ফাটি
ঘাটৈ নিহি দেখেই ভালা লুগা কাচেক পাটি
কিনা করঅতঅ ভালা সঁচি নি পাই মনে
হেসড়অ হেইকে বসি দেলেইক এহঅ রে অসানে
লেউরিই তঅ ধুর লে ভালঅইএ হউ।।

মাহাফেরে গিরি রজঅল বকেই নিজেক তালৈ
কিনা জে করঅম এখন হেলঁ হালেডালৈ
বারঅ হার কাড়া জড়ি জে পাটি আনঅলঁ
ঘিআলি পখঅরি ঘাটৈ এহঅ রে রাখঅলঁ
কাঁহাঁকেরি বির ভালা ডাব বাঁধি আউঅলা
লুগা কাচেক পাটি হামঅর এহঅ রে লেগঅলা

সেহঅ টউআ কেসে পাউঅম হউ।।

রজঅল ধবাক মনকে ভালা খুড়ুকেঁ রে ঘেরিআই
সাঁতাউএকর লাগি ভালা দেলা কাঁহঁ সেরিআই
হিঁদেহঁদে ছিটপিটাই ভালা তাড়াসেঁ বুলঅইএ
চিনহামুদা কনঅ ভালা নেহি রে মিলঅইএ
কনে করলা সাঁতাউএক কাম কহি দেতা কনে
ধড়ফড়াই মরেই ধবা আইগে ধাসঅল জেসঅনে
খজি খজি গেলাক জে থকি হউ।।

লেউরি চনদা মনেক সুখেঁ খেলঅত মল্ল তরেঁ
রজঅল ধবাই আরঅ ভালা দেখলেইন নজঅরেঁ
জানঅত জদি কনঅ বানার এহে সাঁচি মনে
সটসটাই গেলাক রজঅল অখরাকর ঠিনে
কহে লাগঅল এ ছউআরা জানিহা জদি ভালা
কহি দেঁ নঅ পাটিটা মর কনে কঁদে করি দেলা
হাইলকাহিল হেই গেলঁ হামি হউ।।

লেউরিই তখন রজঅলকে এহঅ রে দেলেইক কহি
তর পাটিকর বানার ভালা হামরা জানিঅ নেহি
এহে কহি দিঅ লক খেলে রে লাগঅলঅ
মনে মনে কহেই ধবিক টেড়হি রে ভাঁগঅলঅ
পাটিক গরঅব করি বুলেহেলাক এতি দিনঅ
আইজ বুঝেইস বাপেক বাপ আহে কনঅ ঠিনঅ
লুগাফাটা কাঁহা রে কাচঅবে হউ।।

কিনা করেই রজঅল এখন সাঁচি রে আধমরা
ছটপটাই মরেইক জিবন হেই গেলেইক ফেরা
জরজরাই গেলেইক দেহি ভাভনাকর ভারেঁ
কন বির আহাত এসঅন গউরা রে বাজারেঁ
এতেক বড়অ পাটি ভালা উভি সেরিআই দেতা
কাকঅর এসঅন আহেইন ভালা এহে লেখেন বুতা

খজি বুলঅইএ মনে মনে হউ।।
ঠানেইতে ঠানেইতে ধবাক আউএক রে সৈঁউরনে
লেউরিকর বলেক কথা জাগি গেলেইক মনে
একঅর অকঅর মুহেঁ সুনঅলাহে লেউরিক কথা
গড়েকর ভরেঁ ভালা ভাসি জাইক বসমতা
বেটি ছউআক জুঁঠা খাউআ কহঅলাহেঁই হামে
অহঅ কথাক বদঅল বধহই দেখাই দেলাক কামে
এহঅ কথা মনে জাগঅলেইক হউ।।

ভাভি গনি রজঅল ধবাই করলাক নেহি ডেরি
সঝঅ সঝঅ লেউরিক গড়েঁ দেলেইক এহঅ গিরি
কাঁদি মেমাই কহে লাগঅল করিকে নেহঅরঅ
তর ঠিনেই আহি হামঅর পাটিকর বানারঅ
কাইল তঁই হামঅর কখাঁই রাগালাহিস দমে
এহে খাঁউএক নিঅর ভালা ভুলটা হামঅর খেমে
করঅম নেহি পাটিকর গরঅব হউ।।

গাঁউ ঘারেক লুগা কাচি চলেই মর সঁগসারঅ
ছউআপুতা পসেক বিরিত নেখি আর দসঅরঅ
পাটিলুকা কামটা জানঁ তরে হেকঅউ ডাহাঁ
কহেঁ লেউরি পাটিটা মর রাখঅলাহিস কাঁহাঁ
কাচাখরা জদি নেহি করঁ লুগাফাটা
হামঅর বহু ছউআ রহতা ভুখেঁ নিঠাকাঠা
মর হাঁড়ি টাঁগাই জাতি গাছেঁ হউ।।

রজঅলকে দেখি লেউরিক দইআ রে জনমঅলঅ
ভিতরিআ রাগ ভালা এহঅ রে কমঅলঅ
দিঅ হাঁথেঁ ধরি উঠাই রজঅলকে কহঅইএ
আসি বিঘাক বাঁধেক মাঝেঁ পাটি রে রহঅইএ
তঁই আরঅ বাঁধেক মাঝঅ এহঅ রে ঢুকঅবে
পাটি উঠাই আরঅ ভালা বাঁধঘাটেঁ রাখঅবে

তাকঅর বাদেঁ করঅবে আপঅন কাম হউ।।
লেউরিকর কথা সুনি রজঅলেকর মনে
ধিঁধা জাগঅলেক ভালা কথাকর ধরঅনে
লেউরিকে কহেইক ভালা মনে করি দুখঅ
তর এহে কথা সুনি হেউএইস নি পততুকঅ
অতেক বড়অ পাটি ভালা মইধ বাঁধেক ভিতঅরঅ
কেসঅন করি গেলেইক উহাঁ ঘাঁটেই মর অনতরঅ
সাঁচা কথা সুনাউএঁ মকে হউ।।

চনদাঁই তখন জর ধরি কহেইক রে ধবাকে
লেউরিই তঅ সাঁচা কথা কহঅলাহঅউ তকে
মইধ বাঁধ সামহাই ভালা দেখবে জাঁই টমঅড়ি
গরঅবেক তর পাটিটাকে দেলাহঅউ জে ফেভঅড়ি
নিজেক আইখোঁ দেখঅলাই মিছা নিহি কহঁ
মই তখন বাছুরি লেই এহেঠিনেই রহঁ

বিড়ি-কসি দেখি লেবে জাঁই হউ।।

রজঅল এবেইর চলে লাগঅল আপঅনঅ রে বাটে
পঁহচি গেলাক আরঅ ভালা মেঘালি পখঅইর ঘাটে
পাটিকেরি নেসাঁই ভালা ছতিআই বিঁধঅইএ
কমঅরেকর লুগা আরঅ সাটি রে পিঁধঅইএ
পাটি বিনু কনঅ নেহি সঁচেই ধবিক মনঅ
হেলি দেলেইক মাছি রগদাইল কাড়া রে জেসঅনঅ

লেউরি চনদাঁই ভালঅইএ ধবিকে হউ।।

পানিক ভিতঅর চলেই রজঅল ডাবকা ফাড়ি ফাড়ি
পাটিকেরি টউআই ভালা দম গাড়ি গাড়ি
জাতে জাতে কতিধুরে গেলাক আরঅ থকি
ফুর ফার করে লাগঅল পানি ঢকি ঢকি
জিরাই জিরাই মইধ বাঁধ এহঅ রে পঁহচলঅ
দুখ জাতঅন হাড়েঁ হাড়েঁ সঁচে রে লাগঅলঅ

বুড়হাক বেটাঁই বেড়ে সাঁতাউলাক হউ।।

নিকাস ধরি আরঅ রজঅল ডুবঅ রে দেউঅইএ
টমড়ি টামড়ি পাটি ভালা হাঁথে রে পাউঅইএ
ছুই ছাই দেখেই ভালা বাঁধেকেরি কাদাঁই
এতেক বড়অ পাখনা পাটি আহেইক জে রে গাদাই
ডুব দেই সআঁগ খাটাই কসঅনি করঅইএ
পাটিকে তঅ লড়াউএলাই নেহি রে পারঅইএ

পানিই তঅ উফলাইএ দেইক হউ।।

কসঅনি করি করি ভালা থকি গেলাক ধবি
কিনা জে করঅতঅ এবের পাউএই নেহি ভাভি
হারুল হেইকে কসটঅ মসটঅই পানি ছাড়া হেলাক
টাইড়ে উঠি কাহিল হেইকুন এহঅ রে অথড়ি গেলাক
রজঅল ধবিক দসা দেখি ছাড়ি রে খেইল সালঅ
লেউরি চনদা আউলা পাসেঁ দেখেলাই অকঅর হালঅ
কাঁপেই ধবি জাড় ভেদঅল গাথেঁ হউ॥

ঘনে ঘনে ছিকেই ধবি খাঁখি অহঅ সঁগেঁ
পানি সরঅদ লাগি গেলেইক ধবিকেরি অঁগেঁ
লেউরিকে দেখি আরঅ কহেইক অহে হালে
এক টুইএক দসেঁ মকে বড়ি সাজা দেলে
হারুল হেই গেলঁ হামে দেহঁ তকে কহি
মইধ বাঁধ লে পাটি উঠা মর তাইএঁ নহি

জড়হাঁথ করঁ তঁহি উঠাই দেবে হউ॥
লেউরিই কহেইক জড়হাঁথ আর নিহি করে হেতঅউ
মইধ বাঁধলে পাটি তর এখনে উঠি জাতঅউ
এহে কহি লেউরিই আরঅ ধবাকে বধাইএ
কমঅরেকর লুগা ভালা সাটিকে পিঁধঅইএ
আসি জজঅন আরঅ ভালা উঁচকি রে উঠঅইএ
রজঅল ধবি চনদাকর আঁখি রে ফুটঅইএ

বুড়হাক বেটা হেকে বিরঅমান হউ॥
চিলহেক নিঅর আরঅ ভালা এহঅ রে ঘুরঅলঅ
পেইনডুবকি লেখেঁ আরঅ ডুবঅ রে মারঅলঅ
ধবি আর চনদাঁই ভালা ভালঅতঅ লেউরিকে
নেগাহাঁথে পাটিটা ধরি দেলেইক রে ফেভড়িকে
গাধাস করি পাটি আরঅ বসি গেলেইক ঘাটেঁ
ডাবকাফাড়ি বির ভালা টাইড়ে উঠঅলঅ ঠাঠেঁ
রজঅল ধবাক নিকাসঅ ঘুরঅল হউ॥

লেউরিকর বিরেক কাম দেখিকে নজঅরেঁ
ধবাক মুড়েঁ এক বুইধ আইলেক রে গচঅরেঁ
ধুরেঁ একঅ আমগাছ এহঅ রে দেখঅইএ
তুরুতে রজঅল গাছতর কুদি রে জাউঅইএ
আমডাইর ভাঁগি ভালা ঘুরি রে আউঅলঅ
আমপাত টুঁগি লেউরিক কানে গাঁজি দেউঅলঅ
লেউরিঁই তঅ বুঝে নি পারঅলাক হউ॥

আমপাত গাঁজি দেইকে লেউরিকর হাঁথেঁ
আমডাইর ধরাই দেলেইক ধবিঁই মনেক সুখেঁ
কহে লাগেই তর সঙ্গে পাতাউলঁ জে ফুলঅ
আইজ লে তহরা মকে ভাবিহা আপন ডুলঅ
আঁকাইড় লেইএ গড় লাগালাগি দিঅ লক হেলা
লেউরিঁই আপঅন আধা বল রজঅলকে দেই দেলা
চনদা রহঅলি জে সাকথি হউ॥

ফুল পাতাই রজঅল আপঅন কামে রে ঠেসঅলঅ
লেউরি আরঅ বাছুর বাগাল করে রে লাগঅলঅ
চনদা আরঅ লেউরিক পেছুঁই এহঅ রে চলঅইএ
লেউরিকর গড় লে মুড় আরঅ রে ভালঅইএ
ছপলঅলঅ বাছুর ভালা দিঅ লকে মিলি
ঘুরাই ঘুরাই একঠিন করলেথিন হাঁসিখেলি
মহল ফেড়েঁ বসি গালমারে লাগঅলা হউ॥

রজঅল ধবিঁই লুগা কাচাকাচি করঅল বাদেঁ
লেউরিকর ঠিনে গেলাক মুহেকর সউআদেঁ
কহে লাগঅল একটা কথা কহবঁ ফুল তকে
কথাটাকে ভাভবে নেহি ছউআখেইল লেখেঁ
তর নিঅর বিরেক আরঅ বাছুরা বাগালি
এসন কাম সাজঅহউ নিহি কহঁ হিআ খলি
সাজলনতঅ কাম তাঁহি করঅবে হউ॥

ফুলেক কথা সুনি লেউরিঁই কহেই ভাভি গনি
কিনা কামে সাজতি মকে সুনাইএঁ তহঅনি
ধবিঁই কহেইক সুনৈ ফুল ঠানঅলাইঁ হামে
তর নিঅর বিরকে ভালা সাজতঅউ জেহঅ কামে
বাছুর বাগাল ছাড়িকে তঁই পাইখ খেইল রে সিখঅবে
বিরেকেরি মাঝেঁ ভালা নাম জাগাই রাখঅবে .

অহঅ খেইলৈঁ নাফা জে হেতঅউ হউ॥
পাইখ খেইলেক নাম সুনি লেউরিক রিঝঅল মনঅ
চনদাকে বুড়হাক বেটাইঁ কহেইক রে তখঅনঅ
বাছুরা গুটিআইকে হামরা ঘারা রে ডহরঅবঅ
ফুলেক কথা মাই বাপকে আরঅ রে কহঅবঅ
মন নেহি বসেই আরঅ বাছুর বাগাল কামে
পাইখ খেইল এবের ভালা সিখঅম জে রে হামে
বাছুরা ডহরাউইহিন ঘারা জাতা হউ॥

ঘারেঁ ঘারেঁ আরঅ লেউরিঁই বাছুরা সমুঝাই
রিঝেঁ ভিজি নাচি নাচি আপঅন ঘার রে উজাই
মাইএকেরি ঠিনে ভালা ধরঅলঅ রে অড়ি
পাইখ খেইল সিখঅম হামে বাছুর বাগাল ছাড়ি
রজঅল ধবাক সঙ্গে পাতাউলাইঁ ভালা ফুলঅ
তেঁহি কহি দেলাক মকে এসনঅ রে ডুলঅ
তঁই মাই গউ মানা নি করঅবে হউ॥

বেটাক এসঅন অড়ি দেখি লতাইঁ রে কহঅইএ
পাইখ খেইল সিখেক মন জখন রে হেউঅইএ
মানা নেহি করঁ বেটা এহঅ রে সিখে জাবে
হামরাকর নাম ভালা আরঅ রে জাগাউবে
মাই বেটাক কথাক মাঝেঁ পিঠঅই চাঁদ আউঅলঅ
সুনিকুনে অহঁ ভালা ইঁ সিঁকার দেউঅলঅ
লেউরি রিঝেঁ চুড়পি উঠঅলাক হউ॥

বানঠাক টেড়হি সিরান

ফুল ফুল হাঁক পাড়ি এহঅ রে রজঅল ধবি
পঁহচঅলাক বুড়হাক ঘার আরঅ রে সাঁচি ভাভি
ফুল পাতাউলাহে লেউরিঁই বুড়হা বুড়হিঁই সুনি
আদঅর করেহেথিক ভালা বেটা নিঅর গনি
পাইখ খেইলেক কথা ধবিঁই এহঅ রে পাড়অলঅ
লেউরিকর গুনেক কথা আরঅ জে সঁজড়লঅ

সভেকাইএ মন দেইকে সুনঅলা হউ॥

পাইখ খেইল সিখে গেলে কিনা কিনা লাগেইক
লেউরিঁই আরঅ নেহঅর করি আপঅন ফুলকে পুঁছেইক
এহে কথা সুনি রজঅল কহেই তবে সুন
আরুআচার দুধ গুড় সিঁদুর আরঅ ধুনা
এহে সারভার লাগেইক পহিলঅ রে দিনে
নেগেক কথা সুনাই দেলেইন সভেকর ঠিনে

রজঅল আপঅন ঘারা চলি গেইল হউ॥

রাতি বিতি বিহান ভালা এহঅ রে হেউঅলঅ
লেউরি তঅ সাজি সুজি মাইএক ঠিন আউঅলঅ
বুড়হিঁই আরঅ খালা বঁহতা জতঅনে টিপি টাপি
সারভার সাজাই দেহেইক সভে নাপি নাপি
লেউরি আরঅ পাইখ খেলে জাইলাই রে সঁপড়অইএ
সেহঅ দেখি সাঁউরাঁই আরঅ আবাইড় রে করঅইএ

তখন দিঅ ভাইএ সঁপড়লা হউ॥

লেউরি সাঁউরা দিঅ ভাই এহঅ রে বাহারালা
পাইখ খেইল আখড়া আরঅ পঁহচিএ রে গেলা
বানঠামুচিঁই খেইল ভালা এহঅ রে দেখাইএ
সাতসঅ চেলাঁই দেখি দেখি এহঅ রে সিখঅইএ
লেউরি সাঁউরাঁই ভালে লাগঅত আখড়াকর ঘেসেঁ
এসন অজগইবি খেইল করঅত এরা কেসে

খেইল দেখি মন ভুলি জাই হউ॥

লেউরিঁই আরঅ পুজাক ভগ বানঠাকে দেউঅলঅ
দিঅ হাঁথোঁ ভগ ভালা এহঅ রে লেউঅলঅ
ভগ লেইএ বানঠামুচি উপরে দেলেইক উড়ি
বুড়হাক বেটা লেউরি তখন ভুঁইএ লটাগড়ি
বানঠাকর মনে তখন রাগঅ রে জনমঅলঅ
ই সালা বুড়হাক বেটোঁই ভেলকি রে করঅলঅ

লেউরিকে বানঠাই গহাইড় দেখাউঅলঅ হউ॥

বানঠাকর গহাইড় দেখি লেউরি গেলাক রাগাই
ফির ফির উড়া মালঅইট বাজি দেলেইক দেখাই
ছাগঅইর ছউআক উলফাবাজি আরঅ রে দেখাইএ
বানঠামুচিক সাতসঅ চেলাঁই ভালি রে রাখঅইএ
উলফা দেখাই লেউরি আরঅ সাঁউরাকর হাঁথ ধরি
রাগোঁমাগোঁ ঘার বাটে এহঅ রে দেলা ডহঅরি

বানঠাক ঠিনে খেইল নিহি সিখঅলঅ হউ॥

চলেইতে চলেইতে দিঅ কতিধুর আউঅলা
একঅ ঠিনে দুঅভাই এহঅ রে ডাঁড়হালা
লেউরিঁই এবোঁইর সাঁউরাকে আরঅ রে কহঅইএ
এখন হামঅর রাগোঁ ভালা লহু রে বরকঅইএ
বানঠাই আরঅ হামকে ভালা দেখাউএই গহাডি
একঅর বদঅল ঘুরাই দেবেঁই, দেবেঁই নিহি ছাড়ি

হামে তঅ এহে কিরা খাম হউ॥

রাগোঁ লেউরিক আইখ ভালা আইগেকর নিঅরঅ
তাতঅলঅ নিকাস আরঅ তাকঅরঅ উপঅরঅ
সাঁউরাকে কহে লাগঅল সূনে রে ভাই তহিঁ
বানঠা মুচিক লহুক টিকা লেবে করঅম মহিঁ
জতেক দিন নিহি হেতি ভালা কিরা রে পুরঅনঅ
ঘারঅ এখন সামহাম নেহি খাম নিহি কনঅ

একঠপা পানিহুঁ নি পিঅম হউ॥

রাগেঁ গরজইএ লেউরি দেখি রে তখঅনঅ
সাঁউরাই কহেইক এসঅন কিরা খাইস নাহ্ এখঅনঅ
সমঅই আউলে একঅর বদলা লেবে করঅব হামরা
তবে কাহে মিছাই মিছাই খাবে ফাঁকেই কিরা
চাল এখন ঘারেঁ বসি বুইধ ভরসা সঁচঅবঅ
কাকরঅ কঁড়অচে ভালা নেহি রে পচঅবঅ

সাঁউরাক কখাঁই লেউরিঁই সাই দেইল হউ॥
ডহঅর মাঝেঁ লেউরিঁই ভালা সাঁউরাকে কহঅইএ
সুনেঁ রে ভাই তরঠিন মর এক কথা জে রহঅইএ
মঁই এখন থেকে ঘার ভালা জাম নেহি আরঅ
এহে বাটেঁই জাহঁ হামে রজঅল ফুলেক ঘারঅ
সাঁউরা তখন একাই ভালা এহঅ রে উজালাক
লেউরিহঁ মু ঘুরাই সঁগে সঁগে ডহরঅলাক

পঁহচি গেলা রজঅলেকর ঘার হউ॥
ফুল ফুল ডাকেই লেউরিঁই থিরঅ নহেইক মতি
বানঠা মুচিকর রাগেঁ ভালা গুরগুরাহেইক ছতি
রজঅলিনিঁই তখন আরঅ দেলেইক ভালা সুনাই
তরাক খজেই তরাক ফুল গেলা জে মনমনাই
লেউরিঁই কহেই সুনে ফুলিন কহঁ ভালা তকে
খেইল সিখা জুটলি নিহি এহঅ রে হামরাক হকে

হেঁট মুড়েঁ ঘুরি জে আউলিঅ হউ॥
রজঅলিনিঁই জানে খজেই কিনা ভালা হেলঅহন
বানঠামুটিঁই তবে কিনা নেহি মেসাউলঅহন
লেউরিঁই তখন আখড়াক কথা সভে দেলেইক উলগি
ভিতরিআ রাগেক গুরগুরি উঠেইক জে রে সলগি
তাকর বাদেঁ কহে লাগঅল এহঅ রে সুনি লেবে
তিনপাই কড়ি ভালা এখঅনে মকে দেবে
মঁই জাম আঁগাইরা মুলুক হউ॥

রজঅলিনিই সুনি কহেই কিনা রে হুচুকেঁ
আচঅক জাই খজিহা ভালা আঁগাইরা মুলুকেঁ
সেহঅ কখাই কহেইক লেউরিই এহঅ রে তখনে
ফরি লাই জাম হামে ঠানঅলাই জে মনে
বানঠামুচিকে ভালা করবেই রে পাহুড়অ
নাহু হেলে থির নহি হামঅরিকা মুড়অ

দেখে হেতি কতেক বলিমান হউ॥

রজঅলিনিই কহেই তখন বুঝাউএকর আসেঁ
আঁগাইরা মুলুকঅ কিনা দেখঅলাইহা পাসেঁ
জাএইতকে লাগেই ভালা এহঅ রে বারঅ বছঅর
আউএইতকে অতনা দিন আহঅন নঅ নি গচঅর
আনাগনা করেইতকে জে উমঅইর জাতঅহন বিতাই
সাধেক জিনগানি ভালা ডহঅরেই জাতঅহন থিআই

কখঅন আরঅ খেলা সিখবেহে হউ॥

লেউরিই কহেই তিন পাই কড়ি এহঅ রে দেউঅবে
হামঅর লেইএ দসঅর আরঅ নেহি রে সাঁচঅবে
এহে কহি লেউরিই তখন গামছি দেলেইক আড়ি
গনি গনি রজঅলিনিই দেলেইক তিন পাই কড়ি
সেহঅ কড়ি গোঁঠিআই লেউরিই ফুলঘার রে ছাড়ি
আঁগাইরা মুলুক ডহরঅল এহঅ রে গাতঅ ঝাড়ি

পিঠবাটেঁ করি কড়িকর গাঁইঠ হউ॥

গাঁউএক কুলহি মুড়াই ভালা ডাঁড়হাইকুনে লেউরি
গড় লাগেই বুড়হাবাপকে জড় হাঁথেঁ সেঁউরি
উড়াপবন বিরকে আরঅ সেঁউরনঅ করঅলঅ
আসি জজঅন উঁচকি উঠি চিল জেসে ঘুরঅলঅ
হাউআকেরি বেগেঁ লেউরি এহঅ রে উড়অইএ
আঁগাইরা মুলুকঅ আরঅ পঁহচি রে জাউঅইএ
সিবা কামারেক দুআইরেঁ নাভঅলঅ হউ॥

সিবা সিবা কহি আরঅ এহঅ রে হাঁকঅইএ
সিবা তখন পিঁড়হাঁই বসি চিউড়া রে ফাঁকঅইএ
লেউরিকর হাঁক সুনি বাহারাইকে দুআরি
কহে লাগঅল কিনা কহিস এহঅ রে বাহারি
বারঅ বছঅর নাম ধরি কেহু ডাকঅত নেহি
কন দেসেক রাজা তঁই দেঁ নঅ মকে কহি

ভিতঅর ভিতঅর রাগেঁ গরগরাই হউ॥

লেউরিঁই কহেই সুনেঁ সিবা এহঅ খজ পুঁছারঅ
গউরা বাজারেঁ ভালা লাগেই হামঅর ঘারঅ
লেউরি নাম হেকি ভালা নহঁ কনঅ রাজা
হামঅর মাঁইএক বাপ হেকে এহঅ রে পাহু রাজা
আড়হাই রলাক ঘারেঁ রহঁ বাগাল খাটাক বেটা
মালুম করেঁ ভেসভুসাঁই দেখি আরঅ চেঠা

মাঁই মর হেকি রাজাক বেটি হউ॥

আনার বানার লেইএ সিবাঁই কহে লাগঅল তবে
কিনা কামে হামঅর দুআইর এহঅ রে সুনাউবে
হাহাঁগকাইরা জুআন দেখেই গাছেকর নিঅরঅ
কথাক মাঝেঁ ভালেই আরঅ হেঁট লে উপঅরঅ
বির তঅ হেকবে করেই সঁচেই সিবাঁই মনে
বারঅ বছঅরেকর ডহঅর আউলাক রে কেসঅনে

জেসে লক নহে বাহারিআ হউ॥

লেউরিঁই কহেই সুনেঁ সিবা কহঁ হামে তকে
আসি মন লহাক ফরি দেবে এখঅন মকে
সঅ মন লহাক ঢাল বেনাই সুঘঅড় টংগে
দুইটি সইলঅ ধামা বান লেবঁ অহে সঁগে
সিবাঁই তখন কহেই ভালা লেউরিক কথাক চাঁইড়ে
সাতসঅ ফরি ডিঁগাল আহেইক অহে বাঁধেক আইড়ে
জাঁই বাছি লেবে জেটা মনে লাগতঅউ হউ॥

বাঁধেক আইড পঁহচি লেউরিঁই এহঅ রে ফরি দেখি
একটা একটা ধরিকুনে হির হার দেলেইক ফেঁকি
সিবা কামারেকর ঠিন এহঅ রে গেলাক ঘুরি
কহে লাগঅল পসঁদ নেহি বাঁধেক আইডেক ফরি
-আসিমন লহাক ফরি গড়হবে রে এহে খনে

সঅ মন লহাক ঢাল লেবঁ রে তঅউলনে

সঁগে দিঅ সইলঅ ধামা বান হউ॥

এহে কহি লেউরিঁই আরঅ আপঅন পসঁদ মতেঁ
তিনপাই কড়ি সিবাকে দেলেইক বাইনা নেতেঁ
বাইনা হাঁথোঁ সিবাক মন রিঝোঁ ভরা ভরি
গটা গাঁউএক কামারকে তুরুত দেলেইন জড়অ করি
আসিমন লহাকে ভালা আইগোঁ রে পড়াইএ
আসি হাঁথেক সাঁড়াসিঁই এহঅ রে ধরঅইএ

সাতসঅ কামারে ছেঁছে জে লাগঅল হউ॥

উলঅট পালঅট করি লহা পিটে লাগঅল ঘানাঁই
পিটানিকর চটেঁ আরঅ বাড়হেইক টানাই টানাই
দেখেইতে দেখেইতে ভালা ফরি রে গড়হঅলঅ
ঘাঁসি মাজি ঝকঝকাই টেঁড়রাইএ দেউঅলঅ
আদাবাদি লহাপিটি এহঅ রে থকাথকি

কাম তঅ নিপটাইএ দেল নি রহলেইক বাকি

সভে কামার ঘামি সরঅসপঅ হেইল হউ॥

ফরি দেখি লেউরিঁই আরঅ এহঅ রে কহঅইএ
তরাক ঠিনে হামঅর একটা কথা রে রহঅইএ
বেনাউঅলঅ এহে ফরি বিড়ি দেখঅম হামে
লাগতি নঅ লাগতি নিহি এহঅ রে হামঅর কামে
এহে ফরিঁই মুঁ জদি ঘুরাইএ এহেখনঅ
মর কথা সুনি লিহা থির করি মনঅ

এক কড়িঅ দাম নি দেউঅবঅ হউ॥

লেউরিকর কথা সুনি সিবাঁই কহঅল নাদি
মর বেনাউঅল ফরিঁই আরঅ মু ঘুরাউএই জদি
এক কড়িঅ দাম ভালা লেবঁ হামে নেহি
ছাতি থাপড়াই কিরা খাইএ দেলঁ আরঅ কহি
তখন লেউরিঁই কমঅরেক লুগা এহঅ রে সাটিকে
ডেগেঁ ডেগেঁ জাইএ ফরি ধরলাক আঁটিকে

বুড়হাবাপেক করঅলঅ সৈঁউরন হউ॥

আসি জজঅন উপঅর লেউরি উচুকি উঠঅলঅ
মুড়েক উপঅর ফরি ভালা সাঁই সাঁই ঘুরাউঅলঅ
ঘুরাই ঘুরাই আরঅ বিরা এহঅ রে নাভঅইএ
নেহালেকর উপঅরেঁ আরঅ চটঅ মারঅইএ
চটঅ মারঅলঅ জেসে নেহালেকর গাঠেঁ
নেহাল আরঅ তিন খাঁড়া হেলেইকঅ তুরুতেঁ

জতেক কামার হাইটাটকা হেলা হউ॥

আপঅন জখেঁ ফরি ভালা লেউরিঁই রে পাউঅলঅ
সেহঅ দেখি সিবাক আরঅ ফুরতি রে হেউঅলঅ
সাতসঅ কামারেক সঁগে এহঅ রে তখনঅ
ঢাল গড়হে ঠেসাই দেলা সআঁগ রে পাখঅনঅ
দুইটি সইলঅ ধামা বান আরঅ রে গড়হিকে
একে একে দেই দেলেইক এহঅ রে লেউরিকে

জেসঅন কহা হেলেইক তেসঅন কাম হউ॥

সেহঅ খনেঁ সভে কামার একঠিনে বসঅলা
খাটালিকর বেরহন লাগি করে লাগঅল সলা
কেহু কহেই কড়ি লেবেইক কেহু দসঅর ধনঅ
জাকঅর জেসঅন মনেক ভাব ফদড়অইএ উখনঅ
এক কামারেঁ কহেই ভালা আপনঅ বিচারেঁ
গটা গাঁউএঁ হারেক বরঅদ নেখি কাকরঅ ঘারেঁ
এক হার করি বরঅদ জে লেবেইক হউ॥

বরঅদেকর কথা সুনি এহঅ রে সভে কামার
এক কথাই বুঝি সুঝি হেলা রে হঁ সিঁকার
লেউরিকে কহে লাগঅল বেরহনেকর বাতঅ
কথা সুনি লেউরি বিরাই লাড়ি দেলেইক হাঁথঅ
বাগাল খাটাক বেটা হেঁকঁ নেথি হামঅর ধনঅ
দেউএ নিহি পারঅবঅ হামে খাটালিক বেরহনঅ
তিনপাই কড়িএ রহেহেলি মর হউ॥

লেউরিকর কথা সুনি সভে রে কামারঅ
রাগাই তাতি ভুত ভালা আইগেকর নিআরঅ
সিবা এবেইর ফরি লেইএ এহঅ রে খেপঅলঅ
লেউরিই তখঅন সভে কামারকে বগঅলে চিপঅলঅ
চৈচাই লাগঅত সভেজনা দুখানি জলঅনে
ছাড়ি দেঁ ছাড়ি দেঁ কহি বিকলাত রে উখঅনে

কুলহিক মুড়াই দেলেইন সভেকে ফৈঁকি হউ॥
উড়াপবন বিরাকে ভালা করিকে সৈঁউরনঅ
উচুকি উঠঅল লেউরি আসি রে জজঅনঅ
ঘুরি ঘুরি আরঅ ভালা এহঅ রে চলঅলঅ
সাতসঅ কামারে অকে ভালিকে রহঅলঅ
দেখেইতে দেখেইতে লেউরি গেলা রে মিলাইএ
কামার সভেকাই ভালা গেলা জে চকাইএ
নিরাসেঁ ঘার চলি গেলা হউ॥

আঁগাইরা মুলুকঅ ছাড়ি গউরা রে বাজারেঁ
পঁহচিএ গেলা লেউরি আপঅনঅ রে ঘারেঁ
আড়হাই রলাক ঘারেঁ ভালা ঢাল বান ফরি
টেঁড়রাইএ দেলা আরঅ এহঅ রে ধিরি ধিরি
রাখেইতে রাখেইতে ঘারা উঠঅলঅ চড়চড়াই
সেহঅ সবদে সাঁউরা বাহারাই রে হড়বড়াই
দাদাকে দেখি আঁকড়াই ধরঅলঅ হউ॥

লেউরীই এবের কহেইক ভালা ভাই সাঁউরাকে
সুনে ভাই একঅ কথা কহঁ হামে তকে
এখন হামরা খেইলেক আখড়াই এহঅ রে জাব চালে
মনে হামঅর ছটপটানি লড়হাইএকর তালে
বানঠা মুচিকে ভালা এহঅ রে মারঅবঅ
অকঅর রকঅতেকর টিকা আরঅ রে লেউঅবঅ

হেলে গানি হামরা পানি পিঅব হউ॥

দিঅভাই সলহা করি ঘার লে রে বাহারালা
বাটেক মাঝে বড়অ বড়অ গাছ রে দেখঅলা
লেউরীই তখন সঙ্গে সঙ্গে কমঅরঅ রে আঁটি
ছেক ছেক সভে গাছকে এহঅ দেলেইক কাটি
সাঁউরাকে কহে লাগঅল বাটে দেবেইক টেকা
পারালে রে বানঠামুচি জেসে গিরেই ছেঁকা

আখড়া পঁহচি গেলা দিঅ ভাই হউ॥

ভাঁই ভাঁই করেইক আখড়া দেখাত নেহি কেছ
সেহঅ দেখি লেউরিকর রাগেঁ বরকেইক লছ
কাঁহাঁ রে আইজ বানঠা মুচি কাঁহাঁ অকঅর চেলা
এসঅন দিনে কনে আরঅ কাঁহাঁ রহি গেলা
সাঁউরাই কহেই সুনে দাদা হামরাই দিঅ ভাইএ
খেলঅব এখন নিজেক মনে এহে রে আখড়াইএ
বানঠা নাছ আউআ তড়িক হউ॥

লেউরীই আরঅ সাঁই সাঁই ফরি রে ঘুরাইএ
সাঁউরাই সইলঅ ধামা বানে মারে নি পারঅইএ
উড়ামালঅইট উলফাবাজি চলেইক ঘনে ঘনত
দিঅ ভাইএঅ রিঝেঁ ভালা ভরঅল পুরঅল মনঅ
কতেক খন খেইলু আরঅ চলে রে লাগঅলঅ
আখড়াই এক হাঁঠু ধুরা এহঅ রে হেউঅলঅ
উড়অল ধুরাই ধাইরপাস নি দেখাইক হউ॥

সেহঅ খনে বানঠা মুচি এহঅ রে ডহঅরৈ
খেলেলাই আউএইস ভালা বড়ি টহবঅরৈ
পগড়ি বাঁধঅলঅ মুড়ৈ পলগাকর সাজানঅ
সঁগে আরঅ সাতসঅ চেলা এঁকাএঁকি বলিআনঅ
চলেইতে চলেইতে আরঅ আউঅলঅ রে দেখি
বড়অ বড়অ গিরঅল গাছেঁ বাট দেলাহেইক টেকি
বানঠাক মনে মনে রাগঅ জনমঅলঅ হউ॥

রাগেঁমাগেঁ কহে লাগঅল এহঅ রে কন সালাঁই
গাছ কাটি বাটঅ মাঝেঁ দেলাহেইক রে ফেলাই
তখন আরঅ ফরি লেইএ গাছঅ রে কাটঅইএ
সাতসঅ চেলাঁই গহলাই গহলাই এহঅ রে হাটাইএ
ডহর সাফা করি আরঅ চলে রে লাগঅলঅ
সাতসঅ চেলাক হহাইরৈ তঅ আসপাস রে জাগঅলঅ

আখড়া পঁহচাপঁহচি হেইএ গেলা হউ॥

সেহঅ দেখি সাঁউরাঁই আরঅ কহঅইএ লেউরিকে
বানঠা মুচি আউএইস দাদা বালকাই রে ফরিকে
লেউরিঁই তখন এঁড়ি বাজড়াই কুঁআ রে কড়অইএ
দিঅ ভাই সেহঅ কুঁআই অলতাই রে রহঅইএ
বানঠামুচি চেলা সঁগে পঁহচলঅ আখঅড়া
দেহি মচড়াই বাঁহি মলকাই নাচাউএই পঁখঅড়া

চেলারা তঅ দেত জে কুলকুলি হউ॥

আখড়াঁই একহাঁঠু ধুরা দেখিকে বলিআনঅ
হাঁগকার মারি সেহঅ খনে পাড়অইএ বাখানঅ
কন সালাক এতেক টেড়হি আখঅড়া হামঅরি
খেলিখালি আরঅ ভালা ধুরা দেলেইক করি
লেউরি সাঁউরা দিঅ ভাই এহঅ রে কুঁআঁলে
উঁচুক মারি উঠি গেলা রাগেঁ রে ঝাঁকালে
বানঠাক সঁগে হেলেইন ভেঁটাভেঁটি হউ॥

দিঅ ভাইকে দেখি বানঠা এহঅ রে রাগে জরি
কহে লাগঅল মরেক তেঁহেঁ আউলাইহা রে ঘুরি
তরাই ধুরা ফুটাউলাইহা ভালা হামঅরঅ আখড়া
আইজে হামে দেখবহন কেসঅন তরাক জাঁগড়া
ফরি নাচাউএ লাগঅল ভালা করি মেঘেকর গরজনি
সাতসঅ চেলা ডাঁড়হাই গেলা জেসঅন আরঅ গজনি

বানঠাক আইখ জেসঅন মাতুকাড়া হউ॥

বানঠা মুচি উঁচুক মারি উপঅরে উড়অইএ
সেহঅ দেখি লেউরি তাকঅর উপঅরে ঘুরঅইএ
উড়ি উড়ি দিঅ বির লড়হে রে লাগঅলঅ
ফরিকর বজঅড়েঁ ভালা আইগ রে লাগঅলঅ
জতেক নিঅর সিখঅন ভালা বানঠাক হেলেইক মাটি
লেউরিঁই তঅ একে একে সভে দেলেইক কাটি

বানঠা বিরা হেলাক দিসাহেঁরা হউ॥

লড়হাই দেখি সাতসঅ চেলা ডরে রে থরথরাই
জিউ লেইএ জেজাহার সভে গেলা পারাই
বানঠা মুচিক টেড়হি ভালা হেলেইক ভুঁই মেসা
লড়হাই ছাড়ি পারাই লাগঅল খেঁখিকেরি দসা
লেউরি সাঁউরাঁই পেছুঁই পেছুঁই এহঅ রে রগদঅইএ
জিউমুড় জাঁকি কুদেই তখন আরঅ রে হঁফরঅইএ

ফিনফিন ডেগেই ঝুঁড় কাঁটা হউ॥

বাঁচেক লাগি পারাই বানঠা আগুপেছু ভালি
বিরেকর ফুটানি আইজ গড়েক ধুরাবালি
লেউরিঁই কহেই জাঁহাঁ জাবে ছাড়বঁ নিহি তকে
তর রকঅতেক টিকা ভালা লেউএ হেতি মকে
গমুইহা হুঁড়কঅইএ বানঠা আজাড়ে গাজাড়ে
পঁহচিএ গেলাক আরঅ নদিকর কিনারে

অহঅঠিনে লুকাইএ রহঅলঅ হউ॥

দিঅভাই রগদি রগদি এহঅ রে জাউঅতঅ
নদিকর কিনারে ভালা পঁহচি রে দেখঅতঅ
বানঠা মুচিকে আরঅ দেখি নাহ পাউঅইএ
সঁচে লাগঅল কনঅ ঠিনে লুকাইএ রহঅইএ
নজঅরঅ ঘুরাউএই ভালা এহঅ রে হিঁদেহুঁদেঁ
বেইমান বানঠামুচি দবকঅলাক ভালা কঁদেঁ

লেউরিঁই ঝুঁড় বন কাটে জে লাগঅল হউ॥
সেহঅ খনেঁ সাঁউরাঁই আরঅ লেউরিকে কহঅইএ
বানঠামুচি হামরাক ভালা পাহুড় রে হেউঅইএ
মরাউলেই পাহুড় হেউঅত সঁচিস নাহ মনে
পারালঅউ পাহুড় গনাই সুনে কথা কানে
সাঁউরাকর কখাঁই লেউরি এহঅ রে বুঝঅলঅ
দিঅভাই তখন আরঅ ঘার উজাই লাগঅলঅ

লেউরিক রাগ টুইএক হুলকা হেইল হউ॥
বানঠামুচি বাহারালাক বিতাই কই পহরঅ
ভালি দেখেই চারিঅবাট আগুপেছু ডহরঅ
লেউরিক ঠিনে হারি গেলাক এহঅ রে মনঅ দুখেঁ
নদিআ কিনারে বসি ভালা সঁচে লাগেই দিখেঁ
ঘার ঘুরি গেলে লেউরিঁই নেহি রে ছাড়অতঅ
দেখা পাউলেই আরঅ ভালা জিউএ জে বধঅতঅ
কনঅ বাট খজি নাহ পাউএই হউ॥

সঁচেইতে সঁচেইতে বানঠাক জাগঅলেইক রে মনে
নদিআ কিনারে ভালা বসঅতাক সাধঅনে
একঅ চড়কা খুখড়া আরঅ তুরুতে সিরজঅলঅ
সেহঅ খুখড়াক মুড়ি ভালা এহঅ রে মচড়অলঅ
তখন আরঅ নদিআক পানিঁই করিকে নাহানঅ
তপেঁ বসি গেলাক বানঠা হেজাই বিরেক মানঅ
আহারপানি ছাড়ি নিঠাকাঠা হউ॥

লেউরি সাঁউরাক ধরঅম পূজা

লেউরি সাঁউরা আপঅন ঘার এহঅ রে ঘুরঅলঅ
খাউআ পিআ দিঅ ভাইএঁ আরঅ রে করঅলঅ
টুইএক বাদে কহেই লেউরিই সুনৈঁ ভাই সাঁউরা
ফুলঘার জাব চালে জানাউএলাই বেউরা
দিঅভাই ডহরঅলা ভালা হাঁথৈঁ ধরাধরি
তুরুতে পঁহচি গেলা আরঅ রজঅলেক ডেহঅরি
ফুল ফুল কহি ডাকে লাগঅল হউ॥
রাউ পাছনাই রজঅল ধবিঁই সাড়া রে দেউঅলঅ
বসেক আসঅন বিছাই আরঅ সভেকাই বসঅলঅ
সাঁউরাঁই আরঅ কহে লাগঅল লড়হাইএকর কথা
বানঠা পারাই পাহড় হেলাক হেঁরাই সতা গতা
বেইমান বিরা হারঅলাহে এহঅ কথা সুনি
রিবোঁ চুড়পে লাগঅল ভালা রজঅল রজঅলিনি
ফুলেক জিতৈঁ ফুল-ফুলিনেক জিত হউ॥
ফুলঘারেঁ দিঅ ফুল খেলে লাগঅল পাসা
এহে লেখৈঁ বিতিএ জাইক পহঅর দিনা মাসা
একঅদিন রজঅলিনি ধরঅলঅ রে অড়ি
ফুলেঁ ফুলেঁ পাসা খেলাক হেলাইহা তঅ জড়ি
ফুলকে ফুলিন ভালা করি জে দেউঅবঅ
হামরাউ দিঅ ফুলিন ভালা পাসা রে খেলঅবঅ
কেনিআইএক করে হেতঅন টউআ হউ॥
কথাক মাঝেঁ রজঅলেঁ কহেইক রে লেউরিকে
একঅ কথা সুনৈ ফুল কহঁ ভালা তহঅরিকে
তঁই ফুল বিহা ভালা এহঅ রে করঅবে
হামঅর এহে কথা আরঅ কানে রে ধরঅবে
দিঅ ফুলিন মিলিমিসি রহতা মনেক সখে
সেহঅ খাতির মনেক কথা খলি কহঁ তকে
রজঅল তিরিআই সাই জে দেইল হউ॥

ফুলেক কথা সুনি লেউরিঁই মুড় দেলেইক লাড়ি
হামরাক ঘারেঁ নেখি ভালা একটি ফাটঅল কড়ি
বিহা করে ছাঁদাম হামি কন রে বিচারেঁ
আড়হাই রলাক ঘারেঁ রহঁ গঅউরা রে বাজারেঁ
বাগাল খাটাক বেটা হামি নহঁ ধনিমানি
সুধা ঘারেঁ পানি মাড়েঁ বিতঅইএ জিনগানি
টানিটুনি চলেইক সঁগসার হউ॥

লেউরিকর কথা ভালা ঝাপাটে রে লুটি
রজঅলিনিঁই এবের তবে কহেই রে মু ফুটি
ধন কড়ি জতেক ভালা এহঅ রে লাগতঅহন
সভেটা জে হামরা আরঅ তরাকে দেবঅহন
তরা আরঅ কেনিআই ভালা দেখে রে জাবেহে
হামঅরিকা কথাই আরঅ পততুকঅ রাখবেহে
বিহা তরাকে করেই হেতঅহন হউ॥

ফুল ফুলিনে লেউরিকে জাঁকি রে ধরঅইএ
লারিপারি করি তখন হঁ হুকাইর করঅইএ
মেনেক আরঅ মনেক কথা দেলেইন ভালা কহি
কেনিআই দেখেলাই হামি জাম আরঅ নেহি
বাপ রহেইতে ভালা কেসে রে.সিরছাঁটি
কেনিআই দেখেলাই জাম হামি মনটাকে রে আঁটি
গাঁউএক লকেঁ ভালঅ নি কহঅতা হউ॥

লেউরিকর কথা সুনি রজঅলেঁ কহঅলঅ
তর কথাটা জে হামঅর মনে রে লাগঅলঅ
এখনে হামি জাহঁ ভালা ফুলবাপেকর ঠাঁই
বিহাকরঅ কথা হামে দেবেইনঅ জে সুনাই
রজঅল তিরিআই আরঅ রাঁধারাঁধি রে করঅইএ
লেউরি সাঁউরা দিই ভাইএঁ গালঅ রে মারঅইএ
বেরা ঘুরি গেলেইক কখনে হউ॥

বাগাল করি পিঠাইচাঁদ ঘুরি আউএই ঘারঅ
বুড়হিক সঁগে গালমারি করঅইএ আহাঅ
লেউরি সাঁউরাক কথা ভালা এহঅ রে পাড়অইএ
কাঁহাঁ রহঅল দিঅ ভাই ঘারা নি ঘুরঅইএ
সেহঅ খনে রজঅল আরঅ আগদুআইরে ডাঁড়হাই
ফুলবাপ ফুলবাপ কহি কহি আরঅ জে রে হাঁকাই
হাঁক সুনি রাউ মালুমঅ করঅলা হউ॥

খাউআ ছাড়ি পিঠাই চাঁদ ঘারা লে বাহারাইএ
রজঅলকে আরঅ ভালা এহঅ রে ডাকঅইএ
বুড়হিঁই আরঅ রজঅলকে পুঁছেক রে বানারঅ
লেউরি সাঁউরা কাঁহা আহাত আউলা নেহি ঘারঅ
ফুলমাঁইএক কথা সুনি রজঅলেঁ কহঅইএ
অরা দিঅভাই হামঅর ঘারেঁ রে রহঅইএ

বুড়হিক মন থির হেলেইক হউ॥

রজঅল ধবিঁই কথা ভালা উচরাউএই আপঅন মনে
জেহঅ খাতির আউলঁ ফুলবাপ সেহঅ কথা সুনে
ফুলকে বিহা দেউএ হেতেইক ঠানঅলাইঁ হামে
ফুলমাঁইএক সাউতা হেতেইক সঁগসারেকর কামে
তঁই আরঅ কেনিআই ভালা দেখেলাই জে জাবে
ভালঅমদঅ বিচার করি পুতঅহু বাছঅবে

এহে মাসেই হেতেইক বিহাঘার হউ॥

রজঅলেকর কথা সুনি বুড়হাঁই ভাভিগনি
কহে লাগঅল সুনে বাছা কহঁ রে এখঅনি
জিনগানি ভর হামি ভালা গরু চরাউলিঅন
কাকঅউ কবঅউ নেহি জে ভালা রাউ কাড়অলিঅন
কাকঅর সঁগে কেসঅন কথা কহে রে হেউঅইএ
তেসঅন কথা হামে ভালা নেহি রে সিখঅইএ
কেনিআই দেখে মঁই নেহি জাম হউ॥

কথাক মাঝে বুড়হুই আরঅ কহি রে উঠঅইএ
লেউরি সাঁউরাক ধরঅম পুজা নেহি রে হেউঅইএ
আগু ছুউআক ধরঅম পুজা এহঅ রে করঅবঅ
তাকঅর পেছু বিহাক কথা আরঅ রে সঁচঅবঅ
বিহাক আগু ধরঅম পুজা আহেইক নেগাচারেঁ
কেসে চলঅব আপঅন জিধেঁ নেতিকর বাহারেঁ
ধরঅম পুজাক করা আড়াপাটা হউ॥

বুড়হুই কহেই ধরঅম পুজা করঅব লাহালাহি
সেহঅ কথা হামঅর মনে জানঅলঅ রে আহি
রজঅলকে আরঅ ভালা কহঅলেক পিঠ থাপড়াই
হামর সিঁকার আহি তরাক পসঁদ করঅল কেনিআই
ধরঅম পুজাক সারভার আরঅ জতেক কিছু
সভে ছাড়ি এহে কামে করঅম কইদিন নিছু
জগাড সগাড়ে ভুল নি রাখঅবঅ হউ॥

রজঅল আপঅন ঘার ভালা এহঅ রে গেলা চলি
লেউরি সাঁউরাক ঠিনে কথা কহে লাগঅল খলি
পিঠঅইচাঁদেক সভে কথা দেলেইক আরঅ কহি
কেনিআই দেখেলাই বাপু হরগিজ জাতাক নেহি
হামরাক দেখাই অকঅর দেখা নেখেইক মনে গসা
ঘুরি ঘুরি এহে কথা সুনাই দেলাক খাসা

কিনা করবেহে বুঝিসুঝি দেখা হউ॥
রজঅল তিরিআই কহেই ভালা তবে কাহে ডেরি
কেনিআইএক টউআ তরা করাহান এবেরি
ফুলিনেকর কথা থামহাই লেউরিঁই রে কহঅইএ
হামঅরিকা কেনিআই ভালা এহে গাঁউএই রহঅইএ
মহিচাঁদঅ রাজাক বেটি চনদা কেনিআই হেকি
এহে কথা সুনি সভেকর লাগঅলঅ হাইচকি
মু ভালাভালি হেউঅহত সভেকাই হউ॥

সভেকাকর মুহঅ ভালি লেউরিঁই কহেই ঘুরি
হামঅর কথা সুনি কিনা লাগলঅহন ঘেরঘেরি
বিহা জদি করে হেউএক করবেঁই রে চনদাকে
মনেক কথা সাঁচা করি কহেইহন তহরাকে
এহে খাতির বাপে জাতাক কেনিআই রে দেখেলাই
হামরা গেলে বাঁউবেড় পারবেঁই নি বুঝাউএলাই

ধুর ধুর করি খেদি দেউএ পারঅত হউ॥

এসঅন কথা সুনি রজঅল কহেইক রে লেউরিকে
চাঁদ ধরে জাইস না ফুল টুনা জিউ হেইকে
লকেক পারসেঁ কহলে এসঅন খেপা রে কহবথু
রাজাক বেটিক সঁগে বিহা হাঁসি জে রে দেবথু
জেসঅন জিউ তেসঅন ঘারেঁ দেখে হেতঅউ কেনিআই
বাড়হা বাড়তি ঠানেঁ জাইস নাহু দেহঁ তকে সুনাই

চনদাক আসা করিস না মিছাই হউ॥

কতেক নিঅর করি রজঅল লেউরিকে বুঝাইএ
আপঅন জিদলে বুড়হাক বেটা নেহি রে পেছুআইএ
ফুলেকেরি জিদ দেখি এহঅ রে রজঅল তিরিআনি
জানেই খজেই ভিতরিআ অড় লেউরিকর ঠিনি
কিআ আসে চনদাক টানে আহিআ জিগিড় ধরি
সেহঅ কথা সুনাইবেহে কহঁ নেহঅর করি

সুনিকুনে উপাইঅ ঠানঅবঅ হউ॥

লেউরিঁই কহেইক মনেক কথা সুনাই তবে তরা
চনদাকর টানেঁ কাহে এসঅন জিগিড় ধরা
অকঅর সঁগে চিমটিবিহা হেলাহি হামঅরঅ
অকে ছাড়ি মঁই বিহা নেহি করঅম দসঅরঅ
রজঅল তিরিআই কথা সুনি ধরি সঁইআক হাঁথঅ
কহে লাগঅল ফুল সসুরকে সুনাইআ এহে বাতঅ
রজঅল তখন ঘুরি ডহরঅলঅ হউ॥

পিঠাইচাঁদ আর লতা ভালা বসি আপঅন ঘারেঁ
ধরঅম পুজাক সলহা করঅত মনেকর বিচারেঁ
সেহঅ খনে রজঅল ভালা এহঅ রে পঁহচঅলা
ফুলবাপ ফুলমাই কহি হাঁকঅ রে পাড়অলা
রাউ দেইএ বুড়হা বুড়হি ভালা হরখঅলঅ মনে
রজঅলকে ডাকি পারসেঁ বসাই আদঅরঅ জতঅনে

ফুলবেটাকে পুঁছে লাগঅইএ বানার হউ॥

লেউরি সাঁউরা দিঅ ভাই কাঁহাঁ রে রহঅলা
এখনঅ জে অরা ভালা ঘারা নি আউঅলা
বুড়হিক মুহেঁ এহঅ খঁচ সুনিকে রজঅলেঁ
কহে লাগঅল হামঅর ঘারেঁ আহাত গউ সুনিলেঁ
একঅ বানার লেইএ হামে আউলাইঁ ঘুরি
সেহঅ কথা সুনা তরা কহঁ জে নেহঅরি

কেনিআইএক টউআ পাউলাইঁ হউ॥

বুড়হাঁই কহেইক কন গাঁউ লাগেইক কাকঅর বেটি
কেনিআইএক নাম কিনা কহেঁ বেটা ফুটি
রজঅলেঁ কহেইক ভালা মন দেইএ সুনেঁ
এহে গাঁউএই আহি কেনিআই খাসা রুপেগুনেঁ
মহিচাঁদঅ রাজাক বেটি চনদা রে কুঁঅরি
অকেই কেনিআই বাছলাহেইক ফুলেঁ জে হামঅরি

চনদাকে ছাড়া বিহা নিহি করতাক গউ॥

রজঅলেকর কথা সুনি পিঠাইচাঁদ রে বুড়হা
মুঁড়টাকে গাদি দেলেইক থির জেসঅন মুড়হা
কিনা কহঅম কিনা নেহি কথা নি সরঅইএ
কনঅ ভুত আইকে জেসঅন দেহিঁই রে ভরঅইএ
বুড়হিঅ তঅ দেলেইক ভালা হেসড়অ হেইকে বসি
গাতেক সআঁগ ভিজঅল পাঁচির লেখেঁ গেলেক ধসি
রজঅলেক মুচুন হেই গেলেইক হউ॥

টুইএক খন বাদে বুড়হাঁই কহেইক করি চেঠা
কিনা কথা হামঅর কানে সুনাইলে ফুলবেটা
মহিচাঁদেক বেটিকে তরা বাছঅলাইহা কেনিআই
বাউলা নিঅর সেহঅ কথা মকে দেহিস সুনাই
কাঁহাঁ রাজা মহিচাঁদ আসমানেকর বেরা
আর কাঁহাঁ হামি গরু বাগাল ঢুঢুকুইড়া ডেরা

টুনা হেইএ চাঁদ ধরেক আস হউ॥

তাকঅর উপঅর আরঅ একঅ সুনৈঁ ভালা কথা
মহিচাঁদেক সঁগে হামঅর আহি আর এক নাতা
পসুআবেটা করি মকে পাললাহে আপঅন ঘারেঁ
সেহঅ কথা ভুলঅম হামে ডুবি কন আঁধারেঁ
বিহাক কথা লেইএ হামে এহঅ রে কন মুহেঁ
অতেক বড়অ রাজাক পাসেঁ ডাঁড়হাম কেসে কহেঁ
হামঅর তঅ বিবেকে বিঁধঅইএ গউ॥

রজঅলে কহেই তবে কিনা কহঅম আরঅ
তহঅর কথাটাঁই ফুলবাপ হঁ আহি হামঅরঅ
কতেক কহি ফুলকে হামি এহঅ রে বুঝাউলেই
তাছঁ জিগিড়লে অকে সেরিআউএ নিহি পারলেই
অকঅর জিধেঁ হারুল হেইকে আউলাইঁ তরঠিনে
জানঁ এহঅ আস ফুলেক পুরতেইক নি কনঅদিনে
বিছনা বুঝি গড় মেলাইঁ ভালঅ হউ॥

বুড়হাঁই কহেই সুনৈ রজঅল কহবেসিক লেউরিকে
চাঁদ ধরা আসা জেসঅন নাছ করেই হুঁড়রিকে
আরঅ একঅ কথা বেটা সুনৈ রে এখঅনঅ
বিহা করেক খাতির জখন নাচেইক অকর মনঅ
তাকঅর আগু ধরঅম পুজা করে হেতি ঘারেঁ
খুম দাহাক বিহাক কথা সঁচে হেতেইক পরেঁ
পুজাক বাদে বিহাক কথা কহঅব হউ॥

এহে কথা সুনি রজঅল ঘারা রে ডহরঅলঅ
ঘারা পঁহচি লেউরিকে সভে রে সুনাইঅলঅ
আগু হেতেইক ধরঅম পুজা বাদে কেনিআই দেখা
বিহাক কথা এখঅন ভালা পড়ি গেলেইক টেকা
তরা এখন আপঅন ঘার এহঅ রে জাউঅবে
ফুলবাপ আর ফুলমাইএক মনকে জআউবে
রজঅল তিরিআই কথাই দেলেইক সাই হউ॥

লেউরি সাঁউরা দিঅ ভাই জাত আপঅন ঘারঅ
লেউরিই মনে মনে ভালা কিনা সঁচেই আরঅ
সাঁউরাই তখন লেউরিকে পুঁছেই এহঅ দেখি
আপঅন জিগিড়টাকে কিনা রাখে পারবেসিক টেকি
মাহারাই সুনাই সভে একঅ রে ধেইআনে
জিবনটাকে ডহরাউআ নেগাচারি সানে

জগাই রাখা সমাজঅ ধরঅম হউ॥

বেটারাকর ধরঅম পুজা করেকেরি তেঁহেঁ
পিঠঅইচাঁদ আর লতা ভালা সলহা করঅত দঁহেঁ
পুজাক দিন খন ভালা ধারিজ রে করঅলঅ
কাকে কনটা লেউএ হেতেইক উটাউ রে ধরঅলঅ
লেউরি সাঁউরা দিঅ ভাই বসি বসি সুনঅত
ভজেক কথা সুনি অরা দিনটা রে গনঅত

আঁগুরেকর দাগ ধরি ধরি হউ॥

ভাই ভেইআদ কহেইতে বুড়হাক নেইখেথিক কেহ
আপঅন কহেইতে দুই বেটা আর নিজেবর বহ
সসুর ঘারেক সঁগে ভালা নেইখেক কনঅ নাতা
বিহাক খনেই বিগড়অলাহেইক সভে আঁতাপাঁতা
একাই পিঠঅই ধরঅম পুজাক নেউতা রে বুলাইএ
পুজাক সারভার চার পাত সভে রে মুহাইএ
পুজাক দিন তঅ চলি আউঅলঅ হউ॥

ভাঁগাবারেঁ বার পিঠঅই এহঅ রে করঅলঅ
সাঁঝে আরঅ জাগঅর ভালা একমনে জরঅলঅ
জাগঅরঅ জরঅলঅ ভালা গটা রে রাতিআ
মাহারাই সেঁউরনে আরঅ ভিজঅলঅ ছতিআ
অনগুতে নাহাইনুহুই সভেকাই আউঅলঅ
তুলসিপিঁড়হাঁই পুজাঁই ভালা আরঅ রে বসঅলঅ
বেরাবারে পুজা করঅলঅ হউ॥

বেরা উগেক আগুই পুজা এহঅ রে হেউঅলঅ
পাঁঠা পাহুড় আরঅ ভালা বলি রে দেউঅলঅ
লেউরি সাঁউরাক মুড়েক চুইল দেলেইন রে কামাইএ
লাপিতেকর কাম উটা ভালা সভেকাই জানঅইএ
নেউতল লকজন ভালা বাচিকঅ রে খনেঁ
আইকুনে ভজ খালা হরখঅলঅ মনেঁ

ধরঅম পুজা পাইরাইএ গেইল হউ॥
অইন দিনেক নিঅর পিঠঅই এহঅ রে বিহানে
গতনু গরু লেই চলঅল চরাটঅ বাথানে
লেউরিঁই তঅ বাছুর বাগাল দেলাহেইক রে ছাড়ি
সাঁউরাক সঁগে জাঁহাঁ মন করেইক আড়হান গাড়ি
মনেক ভিতঅর গাহেই নিছু চনদাকর নামঅ
বিহা করেক নেসাঁই মাতঅল বিসরি দসঅর কামঅ
সাঁঝ বিহান সুড়ুরেকর টানে হউ॥

চনদাছঁ বাছুর বাগাল নেহি রে জাউঅইএ
লেউরিকর নিঅর ভালা ছাড়ি রে দেউঅইএ
গটা গউরাক বাছুরেক লেখেঁ মহিচাঁদেক বাছুর
ঘারেই খুঁটঅল রহঅত ভালা কনে রে লেগতেইন ধুর
আপঅন ঘারেই রহেই চনদা মাঁইএক আড়হান বাড়হানে
কখনঅ কখনঅ সাউতা করেইক কামেক আউসানে
মাঁই বেটিক দিনা বিতেহেইন সুখেঁ হউ॥

একদিন বিহানে লেউরি সাঁউরাকে সঁগ করি
চলি গেলাক রজঅল টিঁড়হা মনে আস ধরি
থামখুম বিহাক কথা উঠাউলাক ফুলেক ঠিনে
জেটা ডাবাইল রয়েহেলেইক এহঅ রে এতিদিনে
রজঅলকে কহেইক লেউরিই সুনে মরঅ বেথা
বাপেক ঠিন ঘুরিকুনে উঠাউএঁ বিহাক কথা

চনদাকে কেনিআই দেখে জাতাক হউ॥

ফুলেক কথা সুনি রজঅল ফুলেকর উবগারেঁ
তখনে চলি গেলাক ভালা লেউরিরাকর ঘারেঁ
আড়হাই রলাক ঘার ভালা এহঅ রে পঁহচলঅ
আগদুআইরে আরঅ রজঅল হাঁকঅ রে পাড়অলঅ
ফুলবাপ ফুলবাপ কহি ভালা ডাকে জে লাগঅইএ
রজঅলেকর হাঁকে বুড়হাক থকিতঅ ভাঁগঅইএ

কহলেইক আউ বেটা বসেঁ ঘারেঁ হউ॥

টুইএক আগুই পিঠঅই চাঁদ বাগালি রে করি
ঘারা ঘুরঅলঅ আপঅন ভুখ পিআসে জরি
রজঅলকে পাসেঁ বসাই কহেইক রে আদঅরে
কহেঁ বেটা বানার কিনা পুঁছঅ রে তহঅরে
বিসিটি পাঁচিরে ঠেঘাই উজা হেইএ বসি
নেগা দাহিন দিঅ বাটে পিঠটা লেলাক ঘাঁসি

কাম ছাড়ি লতা পাসেঁ আউলি হউ॥

রজঅলে কহেইক ভালা কিনা কহঅম আরঅ
গুতগুতাই মারেইস ফুলেঁ জাইকে হামঅর ঘারঅ
চনদাকে কেনিআই দেখে জাইএ তকে হেতঅউ
দসঅর কথা ফুলেঁ ভালা নেহি রে সুনঅতউ
এহে কথা সুনি বুড়হাক আগুকর নিঅরঅ
দিসাটা উড়ি গেলেইক কাঁপেইক রে ভিতঅরঅ
ধুঁধুর দেখি পাউএই নজঅরে হউ॥

রজঅলকে এবের বড়হাঁই কহঅইএ নেহঅরে
ই কথাটা আর বেটা সুনাইস নাহ হামঅরে
লেউরিক লাগি চনদাকে কেনিআই রে দেখেলাই
জিবঅনে নি জাই পারঅম সাঁহাসে নি কুলাই
আগুই তঅ সভে কথা সুনাইলাই তকে
জানিবুঝি তবে কাহে ফেইর কহিস মকে

পারবেহে তঅ তরাই চলি জা গউ॥

এহে কথা সুনি রজঅল মুড় খুজিআই খুজিআই
আপঅনঅ ঘারা বাটে এহঅ রে দেলেইক উজাই
লেউরিকে সুনঅল কথা সভে দেলেইক কহি
সুনি লরুআই গেলেইক লেউরিক হ্বেকর গহগহি
এবের কিনা করে হেতেইক সঁচেই মনে মনে
চনদাকে কেনিআই দেখে জাতা তবে কনে

তেসঅন লক পাউআতা কাঁহাঁ হউ॥

বহুত ভাভিগনি লেউরিঁই রজঅলকে কহঅইএ
কনঅ লকেক কথা হামঅর মনে নি আউঅইএ
সুনে ফুল হামঅর কথা কহঁ জে তহঅরে
কেনিআই দেখা কামটা ভালা দেলঁ তর উপঅরে
মহিচাঁদ রাজাক ঘার তকেই জে পহিলে
চনদাকে কেনিআই দেখে জাই হেতঅউ সুনিলে

তঁই বিনু নেখঅত আর তেসঅন হউ॥

ফুলেক কথা সুনি রজঅল উঠঅলঅ চমঅকি
কিনা কহঅম কহে জাইকে গেলা রে ঠমঅকি
টুইএক ঠানিকুনে ভালা কহেই রে মুড় গাদি
ই কামটাঁই হামঅর মন আহি জে দরমাদি
তর লাগি চনদাকে কেনিআই কহে গেলে
কথা পাড়েইতে মাহান রাজাঁই রে সাটাকলে
ঘার লে বাহারাই দেতা জে হাপচাইএ হউ॥

দিঅ ফুলেক গালসাল এহঅ রে সুনি সুনি
মু খলঅলি ভালা এবেইর রজঅলিনি
রজঅলকে কহে লাগেই সুনী দেইএ মনঅ
ফুলেঁ জখন এতেক করি কহঅহন তখঅনঅ
মহিচাঁদেক পাসেঁ জাইকে পাড়া হউ কথাটা
কিনা কহতঅহন ভালা সুনি আউআ উটা

সাঁহাস করি জা নঅ একধাঁউ হউ॥

সাঁউরাই কহেই ফুলদাদা দঢ়অ করি মনা
জাঁই দেখিহিঁ নঅ অরা কহতা ভালা কিনা
তর কথা সুনি রাজাঁই কনঅ তঅ কহঅতঅউ
অহে কথা সুনেক খাতির তকেই জাইএ হেতঅউ
তকেই হামরা পাঠাউএইহঅ এহঅ রে রাজাঘার
নিহি পারঅম ই কথাটা সুনীউইস নাহু আর

তর তাইএ হেতঅউ এহে কাম হউ॥

লেউরি সাঁউরা ফুল ঘারেই রহি গেলা রাতি
রজঅল তিরিআই আরঅ ভালা খাউআউলেইন রাঁধিবাঁটি
ঘুরিদিন বিহান ভালা হেলেক রে জখঅনঅ
রাজাঘার জাইএক তেঁহেঁ ধবিক কাঁপেক মনঅ
সভেকাকর কথাক জালাঁই এহঅ রে ডহরঅএ
কতিখনে রাজাক আগদুআইর রে পঁহচঅএ

ডরেঁ ডরেঁ ডাঁড়হাইকে হাঁকাউএই হউ॥

হাঁক পাড়ি আগুড় ভালা রজঅলে ঠেলঅইএ
ঠেলেইতে ঠেলেইতে আগুড় আরঅ এহঅ রে খলাইএ
সেহঅ খনে চনদা ভালা ইড়কিকে রে বাহারাংই
চনদাকে দেখি রজঅল গিরঅলঅ উঝুটখাই
দেখেইতে সুঁদঅরি বড়ি রাজাকেরি বোটি
রুপেগুনে অরাসরা ফুলেক নিঅর খাঁটি

লেউরিকে কন দুখেঁ দেতেইক হউ॥

মনে মনে সঁচেই রজঅল আউলাইঁ জখঅনঅ
সাঁহাঁস ধরি রাজাক ঠিনে ফদড়ঁমে তখনঅ
মর কথা সুনি জদি গাইর বাখান করেই
জিউমুড় জাঁকি পারাম ভালা মনে খুঁট ধরেই
রাজা আপঅন চঁউরিমেলাইঁ বসি রহে হেলা
ডরৈঁ ডরৈঁ রজঅল ধবি রাজাক পাসকে গেলা
রাজাকে গড়অ লাগঅলঅ হউ॥

মহিচাঁদ রাজা ভালা হুঁকা টানি টানি
আনার বানার পুঁছে লাগেই এহঅ রে ঠানি ঠানি
গালসাল করে লাগঅল রাজা আরঅ ধবি
কেসঅন করি উঠাউএই কথা রজঅলেঁ দেখেই ভাভি
গালমারাক মাঝেঁ ভালা অড়অ রে খজঅইএ
আসঅল কথা কহেক বতঅর মনে রে গজাইএ
কহঅম কহঅম করেইতে বেরা জাই হউ॥

তবে কতিখনে রজঅল টানি আনি অড়অ
কহে লাগঅল সুনেঁ রাজা চনদা হেলি বড়অ
বিহাঘার করেক কথা আহঅউ কিনা মনে
সেহঅ বানার জানেক খাতির আউলাইঁ তর ঠিনে
ধবিক কথা সুনি রাজাঁই মনেক কথা লেহেরাই
কহি দেলেইক লাগলে বর বিহাঘার দেবেই পাইরাই
এহে আস তঅ আহি মর মনে হউ॥

রজঅল তখন ভিতঅর ভিতঅর মনে রে বল ধরি
কহে লাগঅল বরেক টউআ আহি জে হামঅরি
এহঅ কথা সুনি রাজাঁই কহেইক রে ধবিকে
কন দেসেক রাজাক বেটা সুনাই দে তঁই মকে
কিনা নাম লাগেইক ভালা দেখেইতে কেসঅনঅ
একে একে সভে কথা সুনাইএঁ এখঅনঅ
গঁইধা হেইএ আউলাহিস জখঅন হউ॥

কহঅম নঅ নি কহঅম কহি করিকে রজঅলঅ
আঁপ ঢকি মনে টুইএক এহঅ রে ধরি বলঅ
কহে লাগঅল সুনেঁ রাজা বরেকর বানারঅ
গউরাবাজারেই লাগেইক বরেকেরি ঘারঅ
বাগাল খাটা বুড়হাক বেটা লেউরি রে বিরঅ
বলে তাখঅড়ে এহঅ মুলুকেকর মিরঅ

অহিঁ তঅ বরঅ হেউঅইএ হউ॥

এহঅ কথা সুনি রাজাক মাথা গেলেইক ঘুরি
মনেকর ভিতঅরে হদকঅল রাগেকর গুরগুরি
গড় তরেক রকঅত জেসঅন মুড়েঁ রে উঠঅইএ
দাঁতে দাঁত আরঅ ভালা এহঅ রে কুটঅইএ
মনে ভাভেই ধবিক মুড়েঁ মারঁ সারঅই ডাঁগঅ
মেনেক কিনা বুঝি ভালা সামহাল করি রাগঅ

টুইএক খনঅ রহলা সুগুম হউ॥

রাজাকে সুগুমঅ দেখি ধবিকেরি মনঅ
ডরেঁ উসুক পুসুক ভালা করেই কিনা এখঅনঅ
হাবভাবে বুঝেই রজঅল, রাজাক চইখ মু দেখি
একঅর বাদে ঢাড়হাউতা বধহই চাইরঅ বাটে টেকি
পালহাক নিঅর কাঁপেই ধবি ভিতঅরঅ ভিতঅরঅ
ইড়কি পারাইএক ভালা খজেই রে বতঅরঅ

মু কান তঅ গেলাহেইক সুখাই হউ॥

মহিচাঁদ রাজাঁই ভালা কথা না বাড়হাইকে
রজঅলকে ডাকি আরঅ এহঅ রে আগবাড়হাইকে
সঁগে লেইএ সাতঝাইল কপাটঅ খলঅইএ
সাতঅ দুআইরঅ ভালা পাইরাই রে চলঅইএ
রানিকর মহঅলঅ আরঅ পঁহঅচি রে গেলা
রানি রানি ডাকি ভালা পাসেঁ রে ডাঁড়হালা

রানি তখন খঁপা বাঁধঅইএ হউ॥

রানিই কহেই কিনা বানার এতেক হাঁকাহাঁকি
রজঅল ধবিকে আরঅ আনঅলাইহা ডাকি
রাজাঁই কহেইক সুনৈ রানি কথাটা মন দেইএ
ধবি আউলাহে চনদাক বরেক টউআ লেইএ
এহে গউরা বাজারেই হেকেইক অকঅর ঘারঅ
বাগাল খাটা বুড়হাক বেটা সুনৈ রে বানারঅ

লেউরি বিরা বরেকেরি নাম হউ॥

লেউরিক নাম সুনি রানিক ফুলি গেলেইক টাঁটি
কনে জেসঅন তাতঅল পানি গাতে দেলেইক ছিঁটি
মু মচড়াই এঁড়ি থসড়াই রাগে রে জলঅনে
কহে লাগেই ধবি রে তকে পাঠাউলাহঅউ কনে
হামঅর বেটিক লাগি রে তঁই বাগালেক বেটাকে
বর ঠানি আউলাহিস ভালা কহেলাই হামরাকে

তকে কিনা মতিছিননিই ধরঅলাহঅউ হউ॥

বাখানঅ পাড়অইএ রানিই বাঘিন লেখেঁ হুঁকি
সেহঅ সুনি রজঅল ধবিক লহু জাই রে সুখি
খই ফুটেইক রানিক মুহেঁ কহেইক ভাঁড়িসিটি
ছেঁক ছেঁক লাগেইক ধবিক জেসঅন রে লুআঠি
চনদাক লাগি লেউরি বর দাঁজি কন বিচারেঁ
গঁইধা সাজি ছঁদছঁদাই আউলাহিস মর ঘারেঁ

লাজ খাই বুইধ ভাঁউ হেরাই হউ॥

রানিক মুহেঁ বাখানেকর অড় নেহি রে টুঁটেই
খেইআল করি করি ভালা এহঅ রে দাঁত কুটেই
বাগাল খাটা বুড়হাক ঘারেঁ কিনা আহেইক ধনঅ
আবু খালে কাইল নেহি এসনে হাই চনচনঅ
হামঅর কেনি আঁগুরেক সমান নহে ভালা জেঁই
করে খজেইস কেসে ভালা ঘরঅনা জে তেঁই

বলিহারি অকঅর মনেকর বাইড় হউ॥

চাঁদেক নিঅর চনদা হামঅর রুপেঁ অরাসরা
দুধেভাটেঁ পসেহেঁই ভালা মঁই রুপু কে নিঅরা
ধেধরা ছেঁছড়া বুড়হাক বেটা কদাইর জখেঁ দাঁতঅ
কাড়া কাঁধেক লেখেঁ আরঅ খেইরঠা অকঅর গাতঅ
লহতা লেখেঁ পেটঅ ভালা পাকঅল ডুমঅইর আঁখি
আলতি পাতেক নিঅর কান মুটা ভাঁগঅল টাঁকি

ঘার দুআইর দেখাই ভদঅরভঁগ হউ॥

রাজাকে ভালিকে রানিঁই কহেইক সুড়ুর ধরি
বাগালেক সঁগ নাতা জড়অম সঁচলাক কেসে করি
উদ খাতে খুদ নাঁই এহঅ রে জাকঅর ঘারেঁ
হামঅর বেটিকে কেনিআই আরঅ ঠানেই কন বিচারেঁ
কন হুচুকেঁ হুচকি ভালা নেহি রে ভাভি গনি
দুধেঁ ভাটেঁ আদঅর করি পসরইহউক সুগনি

আইজ হামঅর গহাইলেক গরু তাকেই হউ॥

রাজাঁই এবেইর ধবিকে ভালা কহে লাগঅল ডাঁটি
তর কথা সুনি হামঅর কাঁপেইস গড়েক মাটি
বিনা বুঝি পর হুচুকেঁ এসঅন বানার লেইএ
আউইস নাহ্ হামঅর ঘার সুনেঁ মন দেইএ
নিহিতঅ তর জিউটা ভালা লেবঁ হামি ঝাঁকি
মিনা করি দেলঁ আইজ মানটা দেলঁ রাখি

রজঅল ডরেঁ ডরেঁ পারাইল হউ॥

রানিকেরি রাগ ভালা নেহি রে থুমাইএ
গাইর বাখানে বুড়হাক সাত গুসটিকে উটকাইএ
তখন আরঅ রাজাঁই ভালা থিরেঁ বুঝাই সুঝাই
রানিক রাগঅল মনটাকে দেলেইক আরঅ নিঝাই
আপঅন সঁগসারেক কামে এহঅ রে ঠেসঅলঅ
তাকঅরঅ বাদেঁ ভালা দিঅ পারানি বসঅলঅ

চনদা আইকুন ভাতঅ খজঅইএ হউ॥

গাইর বাখান খাইকে রজঅল এহঅ রে পেট ভরাই
ইড়কি পঁহচঅল আপঅন ডেরা রাজাঘারলে বাহারাই
আপঅন ঘার পঁহচি রজঅল নিকাস রে গাড়অইএ
ডরেকেরি ভুতৈ ভালা নেহি রে ছাড়অইএ
পিঁড়হাঁই বসি হেঁসরে লাগেই ঘামি গেলাক সিনাই
মুহেঁ কথা উসরেইক নিহি কিনা দেতঅউ সুনাই
রজঅলিনিই পানিআ পিআউলেইক হউ॥
লেউরি সাঁউরা দিঅভাই সঁগেঁ রজঅলিনি
রজঅলকে পুঁছে লাগঅত কেথিকর হেঁসরানি
সান ঘুরলে ধবিঁই ভালা কহেই পাঁতাধরি
রাজাঘারেক সভে ঘটঅন এক এক করি
জতেক নিঅর গাইর বাখান ভাঁড়িসিটি কথা
ধবিক মুহেঁ সুনিকুনে লাগলেইন মনে বেথা
বহত খন সভেকাই সুগুমঅ রহঅলা হউ॥
লেউরিকে কহেইক রজঅল নি করা জিগঅডি
দসঅর কাহুঁ করেঁ বিহা চনদাক আসা ছাড়ি
বাগাল খাটাক বেটা হেইকুন রাজাক বেটিক আসা
কবঅউ নিহি পাউবে জে ফুল জানি রাখেঁ খাসা
জেসঅন জিউ তেসঅন ঘারেক কেনিআই একটি দেখি
বিহা করি সঁগসার করেঁ মরিস না রৌকি রৌকি
ফুলবাপেক কথাটা মানি চলৈঁ হউ॥
লেউরিই কনঅ কথা ভালা নেহি রে কহঅলঅ
সাঁউরাকর সঁগেঁ আপঅন ঘারবাটে ডহরঅলঅ
দিঅ ভাই আপঅন ঘারা পঁহচিএ রে গেলা
মনেক ভিতর হদকঅইএ বদলা লেউএক জালা
বুড়হা বুড়হি গালমারঅত বসি চুলহা সালৈঁ
সঁগসারেক ভালঅ মদঅ জে আউএক খেইআলৈঁ
দিঅ ভাইএক মুহেঁ নেহি কথা হউ॥

বেটারাকে দেখি লতাই এহঅ রে ঝোঁইখাইএ
কাঁহাঁ রহেহেলিহা তরা कहলেইন ধমকাইএ
কখন ঘারলে বাহারলাইহা আউএইহা এখঅনে
ভুখ পিআস নাইখন কিনা তরাকর জিবনে
দিঅভাই হেঁটমুড়াই ভালা মনে দস গনি
মলিন মুহেঁ রহঅল ডাঁড়হাই বাখান সুনি সুনি
কনঅ জবাব মুহেঁ নি বাহারাই হউ॥

বেটারাকর মু সুখঅল দেখিকে নজঅরেঁ
পুঁছে লাগেই বুড়হাঁই আরঅ আদঅরঅ গচঅরেঁ
ঝটকঅল দেখাইহা বাছা খাইএক কথা বিসরি
টঁড়হাঁই তঅ দেউএ হেতঅন এহঅ রে সমঅই করি
খাইএক সমঅই খেইআল করি খাই লিহা তরা
জুঁগুড় জুঁগুড় না বুলিহা হেইকে পেটমরা
কথাটা রাখিহা মনে ধরি গউ॥

বুড়হাঁই আরঅ খাইএক ভালা এহঅ রে বাঁটঅলঅ
তিন বাপবেটা একে সঙ্গে খাইলাই রে বসঅলঅ
দিঅ ভাই লেউরি সাঁউরা মনগুমনে রহঅইএ
টুমটাম কনঅ কথা নেহি রে कहঅইএ
বুড়হাঁই সঁচেই বুড়হিক কথাই আহাত এরা রাগাই
বেটারাকর রাগটা তঅ দেউএ হেতি ভাঁগাই
উচরাউলাক বিহাকেরি কথা হউ॥

তিরিআকে কহেইক পিঠঅই রিঝঅল রে অনতরেঁ
কেনিআই দেখে জাম হামে আইজ কালুক ভিতঅরেঁ
গাঁউ গাঁউ ঘুরি বুলঅম কুটুম টউআই টউআই
বেটাক বিহা দেবে করবেই নিহি রাখঅম পেছুআই
রুপেগুনেঁ অরাসরা বাছবেই রে পুতঅহ
জড়িমাছা হেউঅত জেসঅন দুসে লারঅত কেহ
বিহা তঅ আর নহেইক ছউআ খেইল হউ॥

মুড়গাড়ি দিঅ ভাইএঁ আহাৰ রে নুড়অইএ
 বাপেক কথাই হুঁ হাঁ কনঅই নি করঅইএ
 হাবভাব দেখি বুড়হাঁই সাঁউরাকে বাচিক করি
 কহে লাগঅল কাহে তরা আহিআ সুগুম মারি
 হুঁ হাঁ কনঅই ভালা করেইহা জে নিহি
 কেসে করি বুঝঅম হামে গলঅত নঅ সহি
 মনেক কথা ফুটিকুনে কহা গউ॥
 বাপেক কথা সুনি সাঁউরাঁই কহেই টুমে টুমে
 জাকঅর লাগি এতেক কথা তেঁহি তঅ সুগুমে
 বুড়হাঁই কহেই সুনে বেটা কাহে লুকাছাপা
 লেউরিক মু জে তঁহি হেকিস আহি হামর নাপা
 মনে তরাক কিনা আহঅন এহঅ রে ফইচছাই কহা
 মনে মনেই গুড় চিউড়া খাইকে নাছ রহা
 লেউরি সাঁউরা হেঅউত ভালাভালি হউ॥
 নুড়াঝিকা করি সভে নিচিতে সুতঅলা
 বিহান হেউএইতে মাহান এহঅ রে উঠঅলা
 বুড়হা আপঅন সাইত করি গেলা রে বাগালি
 ঘারেক কামে লতা আরঅ এহঅ রে বাঝালি
 সাঁউরাঁই আরঅ ঘারেক লক কাকঅউ নিহি কহি
 গটা গউরাক কুলহাঁই কুলহাঁই মারে লাগেই হহি
 সভেকাইকে খলে কহেইন ছাগঅরি হউ॥
 গাঁউএক সভে লকেঁ আরঅ সুনি সাঁউরাক বলি
 আপঅন আপঅন ছাগঅইর ছেড়ি এহঅ রে দেলখিন খলি
 ছাগঅইর ডহরাই লেগি সাঁউরাঁই আরঅ দেলেইন ছাড়ি
 মহিচাঁদ রাজাক জাঁহাঁ সাজাউঅল ফুলবাড়ি
 লুকাইএ রহঅলাক ভালা ধুরেঁ একঅ ধুঁধেঁ
 মুড় উঁচকাই কখনঅ আরঅ ভালেই হিঁদেহুঁদেঁ
 নিচিতে চরে লাগঅল ছাগঅরি হউ॥

ঘারেকর পেছুআইড়েঁ চনদা এহঅ রে আউঅইএ
ফুলবাড়িই ছাগঅইর মেমাত সুনি রে পাউঅইএ
সাধেকর ফুলবাড়িই কনে ছাগঅইর দেলখিন ছাড়ি
ইড়কি ইড়কি আউএই চনদা রাজাকর দুলাড়ি
গাইর বাখান পাড়ে লাগেই বাগাল নেহি দেখি
খেদে লাগেইন একাই ভালা এহঅ রে টেকি টেকি
সাঁউরাই তঅ লুকাই লুকাই ভালেই হউ॥

জখন চনদা মইধবাড়ি এহঅ রে পঁহচলি
ছাগঅইর গঠ ছপলঅল দেখি দিসা রে হেজাউলি
উঁচুক মারি সাঁউরা আরঅ ঝুঁড়তরলে রে উঠি
ঝাপ করি ধরলেক চনদাক চুইলেকেরি ঝুঁটি
ঠাই ঠাই তিন থাপঅড় এহঅ রে মারঅলেইক
তিনটি আঁগুরেক সাঁড়রা তুরুতে উঠি গেলেইক
চনদাক মু কান ভুঁভুঁআই গেলেইক হউ॥

কাঁদি কাঁদি চনদা ভালা রাজাকর দুলাড়ি
ছিটপিটাই ঘার আউঅলি ফুলবাড়ি রে ছাড়ি
কাঁদনা সুনিকে রানি বাহারাইকে দেখঅইএ
আপঅন সাধেক বেটি চনদা এহঅ রে কাঁদঅইএ
চাঁড়েমাড়েঁ পাসেঁ আইকে পুঁছঅইএ চনদাকে
কিআ লাগি কাঁদিস বেটি সুনাইএঁ তঁই মকে
সাঁড়রা দেখি সিহিরি উঠঅলঅ হউ॥

চনদাক দসা দেখি ভালা গঁগাদরি রানি
গরজি উঠঅলি জেসে নাগিনিক ফুঁফুঁআনি
কাকঅর জাইএক গড়া হেলেইক মারলঅউ তকে বেটি
অকর মুঁহেঁ জিঁঅতে মঁই দেবেঁই রে লুআঠি
কহেঁ বেটি কন কানাক হেলেইক মতিছননি
তর গাত্তে হাঁথ দেলঅউ কিনা ভাভি গনি
তঁই মকে ফইরছাইকুন কহেঁ গউ॥

মাইএকর পুঁছঅনে চনদাঁই কহেই হিটকি হিটকি
আইগ লেখেঁ মুহেক কথা বাহারাই ছিটকি ছিটকি
বাগাল খাটা বুড়হাক বেটা মনখলি রে সাঁউরাঁই
বিন দসেই মারলাক মাই গউ ঝুঁটিঁই ধরি চাঁউরাই
গালৈঁ গালৈঁ থাপড়াই দেলাক সঁড়া গেলি উঠি
অহঅ সঁগেঁ গাইর বাখান দাঁত কুটি কুটি

কাঁদি কাঁদি দেলেইক জে সুনাই গউ॥

বেটিক কথা সুনি রানি রাগেঁ রে জলঅনে
চউকি চউকি বাখান পাড়েই জেটাই আউএক মনে
কতেক বড়অ বির হেলাহে বাগাল খাটাক বেটা
আইজে অকঅর কড়াই গনডাই চুকাই দেবেই লেঠা
দুধেঁ ভাতেঁ আদঅর চনহাঁই পালঁ ফুলেক নিআর
সেহঅ ধনে মারি দেলাক ধেধরামুঁইড়া গঁআর

অকঅর তঅ জিউটাই ঝাঁকি লেবেই হউ॥

রানিঁই আরঅ পুঁছেই ভালা চনদাকেরি পাসেঁ
কাহে তকে মারলঅউ বেটি কহেঁ কিনা দসেঁ
চনদাঁই এবের কহেই কথা মাইএকর পুঁছঅনে
কনঅ দস নেখি হামঅর কহঁ গউ তর ঠিনে
একটা ছাগঅইর ডাব হামরাকর ফুলবাড়িঁই চুকাই
সাঁউরা আরঅ কন ঝুড়েঁ রহেহেলাক লুকাই

ছাগইরেঁ বাড়ি উজাড় করি দেলা গউ॥

সেহঅ দেখি হামে মাই গউ ঘুরাউএলাই গেলঁ
কাকঅর ছাগঅইর হেকথুন ভালা কহে রে লাগঅলঁ
কাকরঅ সাড়া নি পাইকুনে ঢুকলঁ জে ফুলবাড়ি
ছাগঅইর গিলা বাহারাউএহেলিঅন রগদি তাড়ি তাড়ি
তখনে মাই গউ সাঁউরা ভালা কনদিগেলে আউলাক
চুইলেক ঝুঁটি ধরি মকে আচক মারে লাগলাক

মাইরেক কারঅন কনঅই বুঝলঁ নেহি গউ॥

নেহি জে হেলাহি ভালা কথা কাটাকাটি
আচঅক আইকে মকে মারে লাগঅল সাটাসাটি
বেটিক মুহেঁ জতেক কথা সুনেই রানিঁই কানে
ভিতর হিআ বরকেক নিছু বদলা ঘুরাক টানে
হামঅর বাড়িঁই ছাগঅইর ছাড়ি মর বেটিকেই মারা
পিঠঅইএকর বেটাক ধরঅলাহেইক জাইএক গড়া
অকে মঁই মরাইকে খেধিআউবেঁই হউ॥

রানিকেরি রাগেক তাইত বাখান রে সুনি
রাজা আইকুন পুঁছে লাগেই কিনা হেলঅউ রানি
রানিঁই তখঅন অড় লে ফেড় সভে দেলেইক সুনাই
সভে সুনি রাজা আরঅ রাগে রে গরগরাই
দেখি লেবেঁই সাঁউরাকে কেসঅন হেকে বিরঅ
কিনা করঅম কিনা নেহি মনঅ নহেক থিরঅ
গরজি উঠঅলঅ বাঘা লেখেন হউ॥

হাঁথোঁ ঠেঁগা ধরি ভালা কাকঅউ কনঅ নি কহি
ফুলবাড়িক ডহঅর ধরি উজালাক রাজা মহি
ছাগঅইর ছাড়ি সাঁউরা ভালা পারালাহে কখঅনোঁ
লুকাইএ রহঅলঅ ভালা কুলহি মুড়াক বনোঁ
সাধেকর ফুলবাড়ি রাজাক এহঅ রে ছাগঅইরোঁ
খাড়রা ফুটাই দেলাহেথিক ভালা দেখঅই রে নজঅইরোঁ
রাগেক ঘারেঁ ভিতঅর ভিতঅর ফুঁফুআই হউ॥

টুইএক বাদে কিনা সাঁচি রাজা ঘারা রে ঘুরঅলঅ
টহলুকে আরঅ ভালা ডাকি রে পাঠাউঅলঅ
রাজাকর হুকুমে টহলু চাঁড়েমাড়েঁ আউলাক
টহলুকে দেখি রাজাঁই রাগাইকে কহে লাগলাক
সুনে সুনে টহলু এবেরইর হামঅরি বচঅনঅ
পিঠঅই চাঁদেক ঘার তঁই জাবে জে এখঅনঅ
টহলুঁই পুঁছলেইক কেথিক লাইএ ডাকা হউ॥

রাজাঁই কহেইক সেহঅ কথা সুনৈ মনঅ দেইএ
এখন হামি বাঝঅলাই রাগেঁ দুখেক খেইএঁ
পিঠঅই চাঁদকে কহবেসিক এহে রে বানারঅ
সাঁউরাকে লেইএ জেসঅন আউএই হামর ঘারঅ
নেহি আউএক কথা ভালা সুনাইঅউ তকে জদি
গউরাবাজার লে আরঅ দেবেই অকে খেদি

তেসঅন হেলে সঁগে লেইএ আউবে হউ॥

রাজাক কথা সুনি টহলুই কহেই আপঅন মনে
বুড়হা এখন গরুবাগাল গেলাহে জে বনে
কিনা এসঅন কাম রাজা এহঅ রে গিরঅলঅ
তুরতা-তুরতি ডাকি আনা মনে তর ধরঅলঅ
রাজাঁই কহেইক সেহঅ কথা বাদেঁ রে জানঅবে
হামঅর হুকুম তুরত অকে ডাকি লেইএ আনঅবে

ধমঅক খাই টহলু সুটসুট চলি গেইল হউ॥

টহলু এহঅ চলেই মহিরাজাকর আডহানৈ
লুবুক লুবুক ইড়কে লাগেই আবগাস নি জিরানৈ
পঁহচিএ গেলা ভালা কারি পিপঅড় বনঅ
পিঠঅই চাঁদ পিঠঅই চাঁদ কহি পাড়অইএ হাঁকঅনঅ
বনেকর ভিতঅর লে বুড়হাঁই সাড়া রে দেউঅলঅ
টহলুকর রাউ পাছনাই পাসেঁ রে আউঅলঅ

পুঁছে লাগঅল হাঁকঅনেক কারঅন হউ॥

টহলুই কহেইক সুনৈ পিঠঅই নি জানঁ কারঅনঅ
রাজাঁই ডাকি পাঠাউলাহঅউ জাই হেতঅউ এখনঅ
জদি তঁই রাজাক হুকুম নেহি রে সুনঅবে
হেলে তঅ গাঁউ ছাড়া সাঁচা রে জানঅবে
এতনাটাই জানঁ মঁই দেলঁ তকে কহি
তঁই এবেইর বুঝি দেখেঁ জাবে নঅ রে নেহি
সাঁউরাকে সঁগেঁ লেলে জাবে হউ॥

টহলুক কথা সুনি বুড়হাক ধুকুর-পুকুর মতি
লেউরি সাঁউরাঁই বাছে রাজাক করলেখিক কনঅ খতি
কথা নাহু বাড়হাইএ বুড়হাঁই গাইগরু সমটিকে
গাঁউ বাটেঁ ডহরাই দেলেইন হুকুম সুনিকে
টহলুকর সঁগেঁ বুড়হাঁই ছাড়ি চরাট বনঅ
গরুক পেছুঁই পেছুঁই আউএই পুলুক-পুচুক মনঅ
পঁহচি গেলা গাঁউএকেরি মুড়া হউ।।

ঘারেঁ ঘারেঁ গরু ভালা সমুঝাই আপঅনঅ
ঘারা চলঅলঅ বুড়হা খুঁটুর-খুঁটুর মনঅ
আঁগনাঁই ডাঁড়হাইকে আরঅ বুড়হিকে কহঅইএ
লেউরি সাঁউরা দিঅ পুতা কাঁহাঁ রে রহঅইএ
ডাঁঠঅ টটা সুনেই বুড়হাঁই এহঅ রে বুড়হাকর
ডর জে জনমঅলেইক ভালা মনেকেরি ভিতঅর
কহে লাগঅল কিনা হেলঅহন হউ।।

তিরিআকে তখঅন বুড়হাঁই কহেইক একে একে
মহিচাঁদ রাজাঁই ডাকি পাঠাউলাহে জে মকে
সঁগে আরঅ সাঁউরাকে এহঅ রে লেগে হেতি
রাজাক হুকুম নি মানলে এবের জাব চেতি।
রাজাকর টহলুঁই মকে ডাকে গেরঅহে বনঅ
টহলুকে দেখি দঅইসত লাগঅলাহি তখঅনঅ
নেহি গেলে গাঁউলে খেদি দেতা হউ।।

বুড়হাঁই কহেই হাই রে বিধি কেসঅন মর ছউআ
কখন কিনা করঅহত ভালা কনে রাখেই টউআ
দিঅভাই খাইদাই বাহারাত রজে বিহানেই
কাঁহাঁ জাহাত কিনা করঅত এহঅ রে কনে জানেই
গাঁউখেদা ধমকি জখন দেলাহন হউ রাজাঁই
ডাগঅর কনঅ দস ভালা বিঁধেইস হিআ মাঝাঁই
সাঁউরা কাঁহাঁ আহে টউআ লাগাউআ হউ।।

বুড়হা তখন সাঁউরাকে খজেলাই বাহাৰালাক
খজি তঅ পাউলেইক নেহি থকি কাহিল হেলাক
একে একে সুধিআই ভালা খজি নিহি পাইকে
একাই ডহরঅলাক রাজাঘাৰ জিগিড়জিটা হেইকে
রাজাকর দুআইৰেঁ বুড়হা এহঅ রে পঁহচঅলঅ
রাজা রাজা কহি ভালা হাঁকঅ রে পাড়অলঅ

হাঁক সুনি ঘাৰলে রাজা বাহাৰালাক হউ॥
পিঠঅইচাঁদকে একা দেখি পাড়ি রে গহাৰি
রাজাঁই কহেইক একাি আউলে কাহাঁ তর বেটাহাৰি
রাজাকর মহড়া দেখি বুড়হাঁই জড়হাঁথ করি
কহে লাগঅল সুনেঁ রাজা বচঅনঅ হামঅরি
গটা গাঁউ ঘুরি ঘুরি পাউলেই নি সাঁউরাকে
কিনা লাইএ অকঅর খজ সুনাউএঁ ভালা মকে

তর গড়েঁ করঅহঁ নেহঅর হউ॥
রাজাঁই কহেই তর বেটাঁই ছাগঅইরেক ডাব ছাড়ি
আজাড় করি দেলাহে মর সাধেক রে ফুলবাড়ি
আরঅ ভালা কতেক সৈঁখি হেলাহেইক জে অকঅর
চনদাকে মারঅলাহেইক দেখাই রে গাতেক জর
এহঅ কথা সুনি বুড়হা দুখেঁ ডরেঁ অঝঅ বঝঅ
রাজাকেরি গড়েঁ গিৰি দেলেইক সবঅ সবঅ
কহেইক দস মিনহা করি দিহা হউ॥

অবুঝা ছউআই ভালা করঅলাহে ভুলঅ
আর কবঅউ হেতেইক নি এহঅ রে এসঅন ডুলঅ
এহেবারেক নিঅর রাজা অবুঝা ছউআ মানি
দসটা নাহু ধরসিক ভালা আপঅন ছউআ জানি
ঘাৰ জাইকুন হামি অকে কহবেই বুঝাই সুঝাই
এসঅন ভুলেঁ কবঅউ জেসঅন নিহি জাই অঝবঝাই
বুড়হা তঅ কাঁদে লাগঅলঅ হউ॥

পিঠাই চাঁদকে দেখি রাজাক দইআ রে জনমঅলঅ
হাঁথৈ ধরি আরঅ ভালা এহঅ রে উঠাউঅলঅ
তর ছউআক দস হামি করি দেলঁ মিনা
এসঅন কাম জেসঅন আর নিহি করেই কনঅ দিনা
বুড়হা তখঅন লর পাঁছি ঘারা রে ডহরঅলা
পেছুবাটে ঘুরিকে একখাঁউঅ নি দেখঅলা
সটসটাই পঁহটি গেলা নিজেকর ঘার হউ॥

গসুআইল মু বুড়হাক দেখিকে নজঅরৈ
বুড়হাঁই কহেইক বেউরা কিনা সুনাইআ হামঅরৈ
তখন বুড়হাঁই ধিরৈ ধিরৈ পাড়অলঅ রে কথা
কাম ছাড়ি একমনে সুনৈ তিরিআ লতা
সেহঅ খনৈ লেউরি সাঁউরা এহঅ রে দিঅ ভাই
একে একে ঘার সামহালা এহঅ রে ডরাই ডরাই
বুড়হাঁই দেখি পাসৈ ডাকঅলঅ হউ॥

সাঁউরাকে বুড়হাঁই ভালা করে লাগঅল জারি
রাজাক বেটি চনদাকে কাহে দেলসিক মারি
চিমটি হেইকুন আইগেক সঁগৈ লড়েলাই গেলাহিস
জিউটা রহতঅউ কিনা রিচিকঅ সঁচঅলাহিস
বুড়হাঁই সুনি হাইটাকা এসঅন ভালা বেউরাই
চনদাকে মারি আউলাহে হামঅর বেটা সাঁউরাই
সুনি বুড়হিক দিসা উড়ি গেইল হউ॥

বুড়হাঁই কহেইক সাঁউরাকে এহঅ রে কিনা দসৈ
চনদাক গাতে উঠাউলে হাঁথ কন রাগেক বসৈ
লেউরি সাঁউরা দিঅ ভাই মুহৈ কনঅ নিহি কহি
ধমকানি খাত ভালা এহঅ রে রহি রহি
খিজলাই লাগেই বুড়হি ছউআকর করঅমে
বেটিছউআকে পিটা তরাক নি সাজঅন ধরঅমে
এহে কথাটা মেহেনাই ঘনে ঘনে হউ॥

কতিখনঅ বাদেঁ বুড়হাঁই এহঅ রে সাঁউরাকে
কহে লাগঅল সুনৈঁ বেটা কহঅহঁ জে তকে
তর এসঅন কামে দস লাদালি হামঅর মুড়েঁ
মিনা মাগি গিরে হেলি রাজাকেরি গড়েঁ
সেহঅ খাতির কহঁ বেটা রাখে বাপেক নামঅ
ভুলিঅ নাহু করে জাইস নিবুঝি ভুল কামঅ
কথাটা মনৈঁ গাঁথি রাখেঁ গউ॥

মুহৈঁ নিহি কহি কথা নিকাস জে গাড়িকে
হুঁকাইর দেলেইক সাঁউরাঁই মুড়অ রে লাড়িকে
সভেকাই খাইএক খাতির এহঅ রে বসঅলঅ
বুড়হাঁই আরঅ বাঁটিসারি মুহাইএ দেউঅলঅ
মাহারাই রসেঁ জাকঅর ভিজঅইএ জিনগানি
তৈঁহি তঅ ভাইগমান আর বড়ি গুনি মানি
সুখেঁ জিউএঁ রহঅত বসমতাঁই হউ॥

মহিচাঁদ রাজা ভালা আঁগঅনাঁই রে বসি
হুঁকা ধরি সুখটান মারঅইএ জে কসি
গঁগাদরি রানি ভালা রাজাকেরি পাসেঁ
আইকুনে আউড়াই কথা মনেকেরি আসেঁ
সুনা রাজা একঅ কথা নাহু ধুনিহা তরা
চনদাকর বিহাক কথা মনে টুইএক ধরা
ই বছঅরেই করঅব বিহাঘার হউ॥

রানিক কথা সুনি রাজাঁই হুঁকা টানি টানি
কহে লাগঅল তর কথা লেলঁ হামি মানি
এহে বছঅরেই ফাগুন মাসেঁ ভালঅ বর দেখি
চনদা বেটিক বিহা দেবেইক দইসঅত কনঅ নেথি
এহে ঠানি টহলুকে ডাকি রে পাঠাইএ
রাজাক হাঁকে টহলু ভালা তুরুতে আউঅইএ
কহেইক রাজা কিনা হুকুমঅ হউ॥

টহলুকে মহিচাঁদেঁ কহেইক রিঝঅল হিআই
টিঁড়অরা পিটঅইআকে তঁই ডাকি রে আনিহিঁ জাঁই
টহলু তখঅন চলি গেলাক রাজাক হুকুম সুনি
কুলহিঁই কুলহিঁই টুরুক টুরুক গিতেকর গুনগুনি
টিঁড়অউরা পিটঅইআক ঘার পঁহচিকে হাঁকাইএ
হাঁক সুনি টিঁড়অউরিআ গেলাক রে চকাইএ

কনে মকে ডাকঅইএ এখন হউ।।

রাজাকর টহলুকে দেখি টিঁড়অউরিআক মনঅ
হরঅখি উঠঅলঅ নাচি ছউআকর লেখেনঅ
টহলুকে কহেইক ভালা সুনাইএ বানারঅ
কতেক কামে আই পঁহঅচঅলে তঁই হামঅর ঘারঅ
রাজাক কিনা কাম ভালা এহঅ রে গিরঅলঅ
বহুত দিন বাদেঁ হামঅর ডাকঅ রে পড়অলঅ

ফইরছাই সুনাইএ তঁই মকে হউ।।

টহলুই কহেইক কনঅ ভালা কহেই নিহি মকে
রাজাঘার জাই হেতঅউ হামঅর সঁগ তকে
কিনা বেউরা কেথিক ডাক জানঁ নিহি কনঅ
বাড়তি কিছু জানঁ নি চালেঁ তঁই এখঅনঅ
উখনে তঅ টিঁড়অউরিআ ডেরি নেহি করি
রাজাঘারেক টানেঁ চলঅল টহলুক সঁগঅ ধরি

পঁহচি গেলা রাজাকর দুআইর হউ।।

টহলু আর টিঁড়অউরিআ রাজাঘার সামহালা
মহিচাঁদেক মুহামুহি দুঅলকে জে ডাঁড়হালা
টিঁড়অউরিআই পুঁছে লাগেইক জড়ি দিঅ হাঁখঅ
কিআ কামে হামঅর রাজা পড়অলি জে হাঁকঅ
সেহঅ কথা তঁই আরঅ সুনাইবে এবেইরি
এখনে ঠেসঅম সেহঅ কামে নেহি হেতি ডেরি
মনেক কথা কহেঁ রাজা ফুটি হউ।।

রাজাঁই কহেই টিঁড়অরিআ কথাটা মর সুনেঁ
চনদাকর বিহা দেবেইক এহে রে ফাগুনেঁ
দেসেঁ দেসেঁ গাঁউএঁ গাঁউএঁ পিটিকে টিঁড়অরা
সভে লককে জানাই দিহিন এহে সগুন বেউরা
আউঅত বর দেখি জাত পসঁদ হেতি জাকে
অকঅর হাঁথেই দান দেবেই মর বেটি চনদাকে
তঁই এখঅন জাঁই সেহঅ কামে হউ॥

মহিরাজাক হুকুম মানি টিঁড়অউরিআ চলঅলঅ
দেসেঁ দেসেঁ টিঁড়অউরা পিটে রে লাগঅলঅ
গউরাবাজারেক রাজাঁই বেটিক দেতেক বিহা
অকঅর জড়িদার হেলে ভালা কেনিআই দেখি লিহা
মহি রাজাক নাম সুনি বজকঅত কেহু কেহু
অকঅর নিঅর রাজা আরঅ নেখঅত ভালা কাহঁ
জঁই তেঁই জাই পারতা নেহি হউ॥

চাকুআ দেসেকর রাজা পরিকথিতঅ নামঅ
আপঅন ঘারেঁ বসি ভালা এহঅ রে করেই কামঅ
জাইত কুড়মি গুনেঁ মাহান রাজা কহি মানঅত
দেসেক সভে লকজনে দসঅর নেহি জানঅত
অকরে গুনেক বেটা ভালা সহদেবা বিরা
জেসনে গাতেকর গড়হন তেসনে মনঅ থিরা
হেলাহেইক বিহাকেরি উমঅইর হউ॥

টিঁড়অউআ সুনিকে ভালা রাজা পরিকথিতঅ
আপঅন মনে একাই বসি সঁচঅইএ নিচিতঅ
হামঅর বেটা সহঅদেবা হেলাহে ডাগঅরঅ
বিহাটা দেলে ভালা নি হেতেইক বগঅড়অ
কেনিআইএক টউআ জখন আনি দেলা ঘারেঁ
সগুন দিনা দাঁজিকে জাম গউরা রে বাজারেঁ
মহিচাঁদ রাজাক বেটিকে দেখেলাই হউ॥

পরিকথিত রাজাঁই ভালা সাধেক বেটাধনে
হাঁক দেইএ কহেইক বাছা আউএঁ নঅ রে সুনে
ডাক সুনি আরঅ ভালা সহদেবা রে বিরঅ
ঝটঅ বেগে বাপেক ঠিনে হেলাক রে হাজিরঅ
বেটাকে তখঅনঅ রাজাঁই কহেইক রে আদঅরেঁ
তর কেনিআই দেখেলাই জাম গউরা রে বাজারেঁ
এহে মধুমাসেই করঅব বিহাঘার গউ॥

তাকঅর ঘুরিদিন ভালা রাজা পরিকথিতঅ
কেনিআই দেখে সঁপড়অলা মানি সমাজ রিতঅ
দুইলক গতিআ সঁগে এহঅ রে ডহরঅলঅ
কতি খনঅ বাদে ভালা গউরাবাজার রে পঁহচঅলঅ
সুধিআই সুধিআই পঁহচি গেলা মহিকর ঠহঅরঅ
তখঅন আরঅ ভালা ভরখরি রে দুপঅহরঅ

আগদুআইরে হাঁকঅ পাড়অইএ হউ॥

মহিচাঁদ রাজাঁই তখন হুঁকা টানে হেলা
হাঁক সুনি আগদুআইরে এহঅ রে আউঅলা
কেউআড় খলি দেখেই ভালা আপঅনঅ নজঅরেঁ
অচিনহা কুটুম আরঅ ডাঁড়হালা দুআইরেঁ
মহিচাঁদ রাজাঁই ভালা মান আদঅর করি
লেই গেলেইন গতিআকে ঘারা রে ভিতঅরি

সভেকাই চঁউরি মেলাঁই বসঅলা হউ॥

কন গাঁউএক লক তরা পুঁছঅইএ বানারঅ
কিআ লাইএ আউলেহে হামঅরঅ জে ঘারঅ
পরিকথিত রাজাঁই কহেই পঁছি মুহেক ঘামঅ
চাকুআকর রাজা মঁই পরিকথিত মর নামঅ
তহর দেল টিঁড়অউরা ভালা সুনিকুনে হামে
আউলাইহঅ গতিআ সঁগ কেনিআই দেখা কামে
তহঅর বেটিকে দেখাই দিহা হউ॥

মহিরাজাঁই তখনে ভালা হাঁকঅ রে পাড়অলঅ
চনদাকে কুটুমেক পাসেঁ আনেলাই কহঅলঅ
সাজিগুজি চনদা তখঅন এহঅ রে আউঅইএ
সভেকাইকে হাঁঠুমাড়ি গড়অ জে লাগঅইএ
কেনিআই দেখি সভেকাকর ভরি গেলেইন মন
রুপেগুনেঁ অরাসরা ভালা চাঁদ জেসে গড়হন

কেনিআই তঅ পসঁদঅ হেউঅলঅ হউ॥

নাম ঠেকান মামাঘার পুঁছেই রে চনদাকে
রুপু নিঅর টুমে টুমে সুনাইএই একে একে
কেনিআই দেখা হেই গেলেইক চনদা গেলি চলি
মহিচাঁদেঁ ঘার দুআইর দেখাউএইন খলি খলি
গতিআরা ফুসফাস করঅত কানে কানে
এতেক বড়অ রাজা ভালা মানি ধনে মানে

বেটিটি কিনা দেতা হামরাকে হউ॥

মহিচাঁদকে কহেইক ভালা রাজা পরিকথিতেঁ
কেনিআই হামরাক পসঁদ আহি জানিহা নিচিতেঁ
পরসুই হামঅর সহদেবা আউতাক জে দেখে লাই
বরটাকে তরাউ ভালা দেখিহা নজঅর মিলাই
চরচি চারচি পসঁদ হেলে জাইহা হামঅর ঘারা
এহেটাই তবে হেলি কথা উঠিঅ এবাইইর হামরা

মহিচাঁদে বিদাই জানাউঅল হউ॥

দেখেইতে দেখেইতে দিন এহঅ রে আউঅলঅ
কহঅল দিনে সহদেবা বিরা রে পঁহচঅলঅ
টঁউরিমেলাঁই মহিরাজা বসি রে রহঅইএ
সহঅদেবা বিরা ভালা উহাঁই রে জাউঅইএ
আড়ে রে অলঅতে ভালা হুলকথিক ঘারেক লকে
এক নজঅইর দেখে খজথিক এহঅ রে বরকে
গতিআ সঙ্গে বসঅল আহে সহদেবা হউ॥

কেনিআই দেখেবর ভালা হেউঅলঅ তড়ঝাড়অ
চনদা আইকুন সভেকাইকে করেইন আরঅ গড়অ
কেনিআই দেখিকে ভালা সহদেবা বিরঅ
আচকাই হেলেইক অকর আঁখিআ জে থিরঅ
মনে সঁচেই বিহা জদি করেই হেউএই মকে
আর কাঁছ জাম নেহি করবেই হামি একে
গতিআরাকে ফুটি কহি দেইল হউ॥

গতিআরাকরঅ পসঁদ ভালা চনদাকে দেখি
চাইল চলঅন টংগ ধচঅর দুসেক কনঅ নেখি
মনেক কথা ফুটি কহঅল মহিরাজাক ঠিনঅ
হামরাকে জে দেবে রাজা বর দেখাক দিনঅ
মহিরাজাঁই কহেইক তবে হামঅর কথা সূনা
ভেইআদ গতিআরাকে বুঝি দেবঅহন জে দিনা

এসঅন কাম তঅ একাই করেক নহেইক হউ॥

রাজাক কথা সূনি গতিআ মনে ভাভঅল সাঁচা
সমাজ লেইএ ঘারকননা সমাজ লেইএ বাঁচা
ঠিকে আহেইক সলহা করি দিন জানাই দিহা
চরচেক রহলে একঅর মাঝেই কুটুম চরচি লিহা
এহে কথা কহি কুটুম ঘারা রে ডহরঅলা
মহিচাঁদেঁ সভেকাইকে সগুন বিদাই রে জানাউলা
বর তরঅপেক দেখাসূনা চুপি গেইল হউ॥

কেনিআই দেখি সহদেবা গতিআকর সঁগেঁ
ঘারা চলঅইএ ভালা এহঅ রে রিঝে রঁগেঁ
চনদাকর কথা আরঅ গাহেই ঘুরাই ফেরাই
গতিআরা হঁ হুঁকাইর করঅত লেহেরাই লেহেরাই
চনদাকর বননিমা করঅত ঠানি ঠানি
দুসেক তঅ নেখেইক কনঅ রাজাউ হেকে মানি
এসঅন কেনিআই দসঅর নেখঅত আর হউ॥

গতিআ সঁগেঁ সহদেবা চলঅইএ লহঅরেঁ
লতাক সঁগেঁ ভেঁটাভেঁটি হেলা রে ডহঅরেঁ
সহদেবাকে দেখি বুড়হিক হরখঅলঅ চেঠা
কহে লাগঅল তঁই হামঅর লাগিস বহিন বেটা
হামি জে তর মসি হেঁকঁ চিনহে পারলে নঅ নিহি
কতেক ছুটুই দেখঅলাইঁ কিনা দেবঁ কহি

কহেঁ বেটা ঘারেক আনার বানার গউ॥

সহদেবাক সঁগে বুড়হিঁই গাল মারি মারি
কহে লাগঅল আপন কথা লর ঢারি ঢারি
নইহর ছাড়া কুটুম ছাড়া পাখরঅ জিনগানি
গাহে লাগঅল কাঁদি কাঁদি মনেকর দুখানি
বিহা দেইএ বাপ মাঁইএঁ ঘুরি নি ভালঅলা
কাকঅউ দেইএ আনার বানার সেটাউ নি লেউঅলা

কন দসেঁ এসঅন হেলি সাঁতানি গউ॥

কতিখনঅ বাদেঁ বুড়হিঁই কহেইক রে আদঅরে
কাঁহাঁ গেলেরহিস বেটা সুনাতএঁ হামঅরে
সহদেবাঁই কহেই মসি কিনা কহঅম আরঅ
কেনিআই দেখে গেরঅইহঅ মহিরাজাক ঘারঅ
দেখাসুনা করি হামরাক হেলাহি পসঁদঅ
একঅর বাদেঁ এরাক ঠিনে আহেইক ভালঅ মদঅ

কহি রাখি সহদেবা ঘারা ডহরঅলাক হউ॥

ঘারা ঘুরঅলি বুড়হি মনেকর দুখানি বাঁটি
আরঅ কতেক পুননা কথা এহঅ রে ঘাঁটি ঘাঁটি
লেউরি সাঁউরা দিঅ ভাই বসি একে সঁগেঁ
কতেক কিনা বজকঅহত এহঅ রে আপঅন টঁগেঁ
বুড়হি আইকুন অরাক সঁগে আরঅ রে জড়ালি
নিজেক মনেই বেটারাক ঠিন কথা রে আউড়াউলি
দিঅ ভাইএঁ রাখঅলা ধেইআন হউ॥

বুড়িহঁই কহেই কিনা কহঅম বহুত বহুঅর বাদেঁ
বহিন বেটাক সঁগে দেখা হেলি কতেক সাধেঁ
সহদেবা আউরহে গউরা রে বাজারঅ
চনদাকে কেনিআই দেখে মহিচাঁদেক ঘারঅ
সহঅদেবাক পসঁদ আহেইক সুনলঁ জেটা কানেঁ
বিহাটা হেবে করতেইক বুঝলঁ হামি মনেঁ
মহিচাঁদেঁ কেজান অকেই বেটি দেতেইক হউ॥

মাইএক কথা সুনি লেউরিক লাগলেইক গুমাইরঅ
ফুটি কনঅ কহে লারেই মুড় ঠঁকেই ঝাইরঅ
ছুটুভাই সাঁউরাঁই আরঅ ভালেই আড়েঁ আড়েঁ
বুঝেইসাহে লেউরিকে ভালা বিঁধেহেইক কন কাঁড়েঁ
কথাটাকে ঘুরাই সাঁউরাঁই ঘারেক কথা আনি
কহেইস মাই লাগেইস পিআস দেঁ নঅ টুইএক পানি

বুড়ি পানি আনে সামহালি ঘার হউ॥
লেউরিক পিঠেঁ হাঁথ রাখি কহেইক রে ভাই সাঁউরাঁই
চনদাক লাগি দুখেঁ ডুবি মনকে নাহু চাঁউরাঁই
চনদা হেলি রাজাক বেটি হামরা দুখিক ছউআ
মেজুরেক সঁগ জড় নিহি হেউঅত বাঁধ কউআ
মাহারাই গিত ভালা সামহাতেইক জাকঅর কানেঁ
মন অকঅর রহেইক জাগি আপঅন সমাজ টানেঁ
সুখেঁ জিউএঁ কাটেইক জিনগানি হউ॥

জানকু রাজাক সঁসাবেক কথা

সিলঅই নগঅরেকর রাজা জানকু মাহাজনঅ
বুনিআদি কুড়মিকর বেটা গুনঅমান রে তেসঅনঅ
পাঁচবেটি লেইএ ভালা রাজা আর রানি
সুখে জিউএঁ অরা ভালা বিতাউঅত জিনগানি
দিনেক দিন বিতি জাইক পহঅরোঁ পহঅরোঁ
বেটিরা তঅ মানসল হেউঅত মাইবাপেক আদঅরোঁ
বিহাক লাইগ হেউএ লাগঅত হউ॥

রাজাক বড়অ বেটি সিমুক লাগি গেলেইক বরঅ
দেখাসুনাঁই পেঁড়ু বিরেক হেলেইক রে মনজুরঅ
অকঅর সঁগেই জানকু রাজাক এহঅ রে বড়অ বেটিক
বিহাদান পাইরাই গেলেইক দিনখন রে করি ঠিক
আরঅ চাইর বেটি ভালা অরাউ রে সুঁদঅরি
গুনেমানে অরাসরা মাইবাপেক আদঅরি

দিনে দিনে হেউঅত বিহাক লাইগ হউ॥
চাইরঅ বেটি একে সঁগে রহঅত রিঝোঁ রঁগে
জানকু রাজাঁই সলহা করেই আপঅন রানিক সঁগে
চাইরঅ বেটি তাহাতাহি হেউঅত বিহাক লাইগঅ
কন ঘারেঁ জাতা কনে কাকঅর কেসঅন ভাইগঅ
আউঅত জাত কুটুম বাটুম ফদড়অত বিহাক কথা
রাজাঁই কহেইন আনিহাক বর জানি কুটুম নাতা

মানুসমান বেটি নেহি মানাই ঘারেঁ হউ॥
পেঁড়ু বিরোঁ গুড়চিউড়া খাই রে মনে মনে
ভিতরিআ কথা একদিন ফুটেই সসুর ঠিনে
চাইর বেটিক বর আর দেখে হেতঅন নিহি
মঁইএঁ সভেকে বিহা করবেইন দেলেইক ফুটি কহি
জামাইএক কথা জানকু রাজাঁই নেহি রে মানঅইএ
কামটা ভালঅ হেতেইক নিহি দেলেইক রে জানাইএ
পেঁড়ু তঅ সুনি রাগোঁ গুরগুরাই হউ॥

গিরগিরাই পেঁড়ু বিরা এহঅ রে চলি গেলা
একদিন আরঅ সাজি গজি সসুর ঘাৰ আউঅলা
জবঅরি চাইরঅ সালিকে বিহা রে করি
লেই গেলেইন আপঅন ঘাৰা হাঁথে ধরি ধরি
জানকু রাজাই বুঝাই সুঝাই অটকাউএ নি পারলা
আপঅন জামাইএকর ঠিনে হাইর মানি গেলা

রাজা ভালঅল ভাললে রহঅলা হউ॥
দিনে দিনে দিন ভালা এহঅ রে বিতি গেলা
জানকু ঘাৰেঁ দুইটি বেটি আরঅ রে জনমঅলা
দাউনি আর সাউনি নাম দেলা আদঅর করি
কাকঅউ নেহি জানাউলা এহঅ রে ডরেঁ মরি
নিজে নিজেই সলহা করঅত রাজা রে রানি
বেটি জনঅমেক কথা ভালা হেলে জানাজানি

পেঁড়ু জামাইএ পাছে এৰাকঅউ লেগবেথিন হউ॥
দিনে দিনে দাউনি সাউনি হেউএ লাগঅল বড়অ
কেহ নেহি জানঅত ভালা অরাকর বানারঅ
বিহাক লাইগ হেলা বেটিরা তখঅন জানকু রাজাই
মানে মানে সসুরঘাৰেঁ দেলেইন ভালা জানাই
চাঁড়েমাড়েঁ বর দেখি দেবেইন বিহাদানঅ
কনঅতেই নি জানঅত জেসে পেঁড়ু বিরেঁ কনঅ
সতঅরে বতঅরে করেই কাম হউ॥

গাঁউএই হেকেইক জানকু রাজাক এহঅ রে সসুর ঘাৰঅ
সালাকে ডাকাই আনি সুনাইএইক বানারঅ
দাউনি সাউনি ভেগনি তর হেলা জে মানুসমানঅ
একঅর বাদেঁ দেউএ হেতেইক অরাক বিহাদানঅ
বতঅর বুঝি সতঅর হেইএ খজে হেতঅউ বরঅ
পাঁড়ু বিরেক কানে জেসে জাইক নি ই বানারঅ
দিঅ বেটিক বিহা দেবেইন একে সঁগে হউ॥

দিদি বহনঅইএকর কথা সুনিকে জতঅনে
আপঅন মনেক কথা ভালা কহে লাগঅল পাসঅনে
এখনে হামি চলি জাম করেলাই বরেক টউআ
খজি খজি বাহারাউবেইন কুটুম নাতাক ছউআ
আপঅন দিদিকে আরঅ কহেইক মনেক সাধেঁ
তঁই হামকে গুড় চিউড়া এহঅ রে গোঁঠিআই দেঁ
রানিঁই গুড় চিউড়া দেলেইক মুহাই হউ॥

গুড় চিউড়া লেইএ পাসঅন এহঅ রে বাহাৱালা
জাইএক খনেঁ দিদি বহনঅই দিঅকে কহঅলা
বরেক টউআ করি হামি তবে রে ঘুরঅবঅ
তৱাকেরি মনেক আস এহঅ রে পুরঅবঅ
দইসত নাহু রাখিহা মনে কথাটা রাখিহা সুনি
গুনিমানি বর পাউবেথিন ভেগনি দাউনি সাঁউনি
হামঅর কথা মিছা নেহি হেতি হউ॥

দাউনি সাউনিক মামা পাসঅন চলে রে লাগঅলঅ
গাঁউ ডেগি দসঅর মুলুক এহঅ রে পঁহচলঅ
জাতে জাতে একঅ নদি এহঅ রে পাউঅইএ
মনে মনে কহে লাগঅল দমে রে ভুখাইএ
এহেঠিনে গুড় চিউড়া ভিজাই সানি খাইকে
ডহরে হেতি বরেক খজ্জেঁ রিচিক রে জিৱাইকে
হাঁথ মু ধইকে খাইএ বসঅল হউ॥

পেটভরি গুড় চিউড়া এহঅ রে খাউঅলঅ
চিউড়াকেরি গদেঁ ভালা আলিস রে লাগঅলঅ
বড়গাছ তৱেঁ ভালা ঘাঁসাড হেৱিহরঅ
কাঁধেক গামছা বিছাই দেলেইক তাকঅর উপঅরঅ
ঘলটিকে জিৱাম কহি নিদাইএ রে গেলা
সাঁৱ বেরি পাসঅনেকর নিদঅ রে ভাঁগঅলা
উঠি দেখেইস বোৱা ডুবু ডুবু হউ॥

কিনা এখন করেই ভালা এহঅ রে পাসঅনে
আজুক দিনটা বিতি গেলি মিছাই রে এসঅনে
বেরাটিকে ভালি পাসঅন গাঁউএক ডহর ধরি
সুটুং সুটুং চলে লাগঅল হেঁটমুড় রে করি
পঁহচিকুনে জানকু টিঁড়া ডাকেই বহনঅই কহি
কহে লাগঅল বরেক টউআ আইজ হেলেইক নেহি
কাইল বিহানেই ঘুরি বাহারাই হেতি হউ॥

জানকু রাজাঁই কহেই তবে সুনৈ বড়অ কুটুম
ঘার নেহি জাইএ হেতঅউ এহঅ রে ঠাঠাম ঠুঠুম
হামর ইহাঁই রাইত রহি উঠিকে বিহানে
সাজিগজি চলি জাবে বরেকর ধেইআনে
রাজাক কথাই সাই দেলেইক রানি কলাবতি
মুড় লাড়ি পাসঅনে কহেই অহঅটাই করে হেতি
রাতিঁই খাইদাই সভেকাই নিদালা হউ॥

ঘুরিদিন বিহানে পাসঅনে হাঁকাউএই দিদি দিদি
রানিঁই তখন গুড় চিউড়া গাঁইঠেঁ দেলেইক বাঁধি
গুড় চিউড়া লেইএ পাসঅন এহঅ রে ডহরঅলা
হাঁথে ছাতা কাঁধে গামছা আরঅ লেইএ লেলা
জেহঅ নদিক কিনারেঁ ভালা এহঅ রে আগুদিন
গুড় চিউড়া সানি খারঅহে পঁহচি গেলা উঠিন
বড়তরৈঁ খাইএক রাখি মু হাঁথ ধউঅল হউ॥

মু হাঁথ ধইকে পাসঅনে গুড় চিউড়া রে সানি
থিরাই থিরাই খাই লেলাক আরঅ পিলাক পানি
নদিআ কিনারেঁ ভালা সেহঅ রে বড়তরৈঁ
গামছি বিছাই জিরাই আরঅ ঘাঁসাডেক উপঅরৈঁ
সিঁথলি হাউআই সাঁথান সুখেঁ আলিসেঁ ঢুলিকে
থকিতেঁ নিদালাক পাসঅন বর খজা ভুলিকে
সাঁঝবেরি নিদঅ ভাঁগলেইক হউ॥

আইজঅ তঅ বর খজা এহঅ রে হেলি নেহি
ঘারা ডহরঅলা পাসঅন নিজেই কহি কহি
জানকু রাজাকে ভালা কহে লাগঅল কথা
আবুকরঅ দিন বহনঅই চলি গেলি বিথা
কাইল ঘুরি বাহারাই হেতি বরেকেরি টউআই
এহে কহি আপঅন ঘার দেলেইক পাসঅন উজাই

রাজা রানি সঁচে লাগঅলা হউ॥

তাকঅর ঘুরিদিন পাসঅন উঠিকেই ভিনসারেঁ
সাজি গজি পঁহচলা জে আপঅন দিদিঘারেঁ
গুড় চিউড়া বাঁধি দেলেইক রানি কলাবতিঁই
সেহঅ লেইএ ডহঅরল পাসঅন রিঝাইল রে মতিঁই
চলেইতে চলেইতে ভালা নদিআ কিনারে
পঁহচিকে মু হাঁথ ধউএই আগুদিন নিআরে

গুড় চিউড়া ভিজাই সানি খাইল হউ॥

গুড়চিউড়া খাইএ পাসঅন অসঅড়ি মসঅড়ি
সঁচে লাগেই সাঁথান মারি ডহরঅম চাঁড়াচাঁড়ি
মেনেক আরঅ আলিস ভালা এহঅ রে লাগঅলঅ
ঢুলেইতে ঢুলেইতে কখন নিদাই রে জাউঅলঅ
নিফিকিরে রহি গেলা এহঅ রে আইখ নুবাই
অহঅ দিনঅ নিদ ভাঁগলেইক এহ রে বেরাডুবাই

উঠিপাঠি ঘার বাটে ডহরঅলা হউ॥

আরঅ কতেক দিন পাসঅন এসনে করে লাগলা
জানকু রাজা কলাবতিঁই টের নি কনঅ পাউলা
কাঁহাঁ জাই কিনা করেই এহঅ রে পাসঅনে
সেহঅ সঁচি দাউনিকর খুড়ুক জাগেইক মনে
একদিন দাউনি ভালা বিহানে নিদাই উঠি
মামাক পেছুঁই অলঅতে চলেই ধান খাঁটি খাঁটি
ঘারেক লকেঁ জানঅত নিহি কনঅ হউ॥

চলেইতে চলেইতে দেখেই পাসেঁ একঅ নদি
কানে সুনি পাউলি ভালা পানিকর হদহদি
নদিআ কিনারে পঁহচি এহঅ রে বড়তরেঁ
মট রাখেইতে মামাকে দাউনিই দেখলেইক নজঅরেঁ
মু হাঁত ধইকুনে পাসঅন এহঅ রে আফঅর মাড়ি
গুড় চিউড়া সানিসুনি দেলেইক ভালা নুড়ি
মনেক সুখেঁ সুতঅলা বড়তরেঁ হউ।

মামাকে সুতঅলঅ দেখি দাউনিই সঁচেই মনে
একঅর মিছলা চাইল ভালা ধরালেইক এতেক দিনে
বর খজাক নাম করি আইকুনে রে ইহাঁ
গুড় চিউড়া খাই সঁড়গি রহেই মিছলাক মিছলা ডাহাঁ
মর মাইবাপকে ভালা পেঁদলা কখাঁই ভুলাই
চাইল খেলেই নিতি নিতি ছতিটাকে ফুলাই

মামাকর কেলবি সুনাবুবেইন মাই বাপকে হউ।
ঘারবাটেঁ দাউনি এবুইর উমকি রে আউঅলি
কতিখনঅ বাদেঁ আরঅ ঘারা পঁহচি গেলি
রানি কলাবতি ভালা বেটিকর ভাভঅনাই
নিঝুম বসি রহেহেলি এহঅ রে আঁগঅনাঁই
দাউনিকে দেখিকুনে পুঁছেইক জে তখঅনঅ
কাঁহাঁ রহেহেলিস বেটি তঁই এতেক খনঅ

দুখেঁ দাউনি কাঁদেঁ জে লাগঅলি হউ।
হিটকি হিটকি কাঁদেই দাউনি কথা নি কহইএ
রানিই তখঅন তাতঅল দুধ আনি রে দেউঅইএ
দুধ পিঅলি বেটিই মাইএকর নেহরঅনে
রানিই আরঅ আদর করি পুঁছঅইএ তখঅনে
দাউনিকে পাসেঁ বসাই কহেইক রানি মাইএঁ
কেসে এসঅন হেলঅউ বেটি কথাটা ফইরছাউএঁ
বিহানেক গেইল ঘুরেহিস এখঅন গউ।

গাঁউ বুলি জানকু রাজা এহঅ রে আউঅলঅ
রানিক মুহেঁ দাউনিক কথা আরঅ রে সুনঅলঅ
সভে কথা সুনি রাজাক মনে রে হড়বড়ি
চাঁড়েঁ বিহা নিহি দেলে হেতেইক জে গড়বড়ি
রানিকে কহেইক রাজাঁই এতেইক সমঅই হেলি
পাসঅন এখনঅ ঘুরলাক নিহি কতিধুর গেলাহে চলি
বেরাডুবি মাছি এঁধরিআ হেলেইক হউ॥

পাসঅন আইজ রাজাক সঁগেঁ দেখা নাহু করি
মানে মানে আপঅন ঘার গেলাহে ডহঅরি
ডেরি দেখি জানকু রাজাঁই রানিকে কহঅলঅ
পাসঅন বধহই কনঅ গাঁউএ টেকাইএ রহঅলঅ
দাউনিঁই আপঅন মাঁই বাপকে মামাকেরি করঅম
জানিকুনঅ সুগুম রহি রাখি দেলেইক ভরঅম
রাজা রানিঁই সঁচঅত করঅব কিনা হউ॥

আরঅ কতেক খন ভালি নি পাই সালাক বানারঅ
রাজাঁই কহেইক জাঁই নঅ রানি টুইএক তর নইহরঅ
হামরাক ইহাঁ নি আইকে গেলাহে জদি ঘারঅ
জানিসুনি আউবে তঁই ভালঅ মদঅ বানারঅ
তেসঅন হেলে পাসঅনকে তঁই আনবেসিক ডাকি
আবুক বানার জানঅব হামরা পাসেঁ বসাই রাখি
জাঁই রানি ডেরি নাহু করেঁ হউ॥

রানি কলাবতি ভালা নইহর রে ডহরঅলি
বেটিক বিহাক ভাভনাঁই মন আকঅলি বিকঅলি
নইহরঅ পঁহচি রানিঁই ভালা দেখেইক পাসঅন ভাইকে
বিছনাক উপর সুতি আহে এহঅ রে খাই দাইকে
পাসঅন পাসঅন কহি রানিঁই উঠাউলেইক ডাকি
সুনেঁ খজঅল বরেক বানার মনে আসা রাখি
কাঁহাঁ কাঁহাঁ ঘুরঅলে আইজ হউ॥

পাসঅনে কহেই তবে কিনা কহঅম দিদি
বর খজি খজি হামঅর দেহি রে দরমাদি
আইজঅ নেহি করে পারল বরেকেরি টউআ
কাহঁ নেহি দেখি পাউলিঅন ভেগনিরাক জঁখোঁ ছউআ
থকি থাকি আউল আইজ কতেক দেস বুলি
মেনেক মঁই নহঁ হারুল কহঁ খলাখলি

ভেগনিরাক বিহা দেবে করঅব হউ॥

ভাইএক কথা সুনি রানিঁই কহেই নিজেক তালোঁ
তর বহনঅইএঁ জাই কহলঅউ এখনে রে তঁই চালোঁ
পাসঅনে কহেই তবে নানঅ অতেক আকতঁই
ভিনসারেই জাম হামে এখন দেঁ নঅ সাঁথাই
রানিঁই জিগিড় ধরি বসঅল এখনে জাইএ হেতঅউ
তঁই নি গেলে তর বহনঅইএঁ মনে দুখ রে পাউতঅউ

দিঅ ভাই বহিন ডহরঅলা তখঅনে হউ॥

বেটিক ভাভনাঁই জানকু রাজাক লাগেইক রে ছটপটি
বিহা নাহু দেলে নেহি জাতেইক রে উটপুটি
পাসঅন আর কলাবতি দিঅ রে ভাই বহিন
পঁহচিকুনে চলি গেলা রাজা রহঅল জেঠিন
পাসঅনকে কহেইক রাজাঁই কাপাড় হঁসতি হঁসতি
তুরতা তুরতি খজিহিন বর কহহঁ তকে গসতি

বেটিক ভাভনাঁই ঘুম নেহি হেউএই হউ॥

পাসঅনে কহেই সুনেঁ বহনঅই মঁইঅ থিরা নহঁ
বিহানে ঘার লে বাহারাই সাঁঝোঁ ঘার সামাই
বরেক টউআই টাইমাল টুইমুল কতেক ঘুরাঘুরি
লকেক সঁগে বজকি বজকি চউহাটা জাই ধরি
ঠানঅলাহঁ কাইল বিহানে উজাম পুরুব বাটেঁ
গুড় চিউড়া চেইর করি গাঁইঠাই দিহা মটেঁ

পাসঅন দিদি ঘারেই নিদালাক হউ॥

দাউনিই আরঅ লুকাই লুকাই সভে সুন হেলি
আপঅন মাইকে ডাকি ভালা কহঅই আগুড় ঠেলি
তঁই তঅ বাঝাই আহিস ঘারেক আপঅন কামে
মামাক লাগি গুড় চিউড়া গাঁইঠাই দেহঁ হামে
বিহানে উঠি জেসে নেহি হেউএক ডেরি
সেহঅ খাতির এখনে মঁই দেহেঁই মুহাই মটরি
রানিই কহেইক জাঁই তবে করেঁ গউ॥

ঠুঠকু বাড়হিন লেইএ দাউনা গেলি রে টেকসালৈ
পাটরা কুঁড়হা বাড়হে লাগেই এহঅ রে নিজেক তালৈ
বাড়ি দিগেলে গাঁইঠা ভালা কুড়হাইএ আনঅলি
পাটরা কুঁড়হা ভুঁসাক সঁগে গাঁইঠা রে বাঁধঅলি
বাঁধি বুঁধি রাখি দেলেইক বাচনিক ঠানিতে
খাইদাইএ নিদালি দাউনি এহঅ রে নিচিতে

কাকঅউ কনঅ নেহি কহলেইন হউ॥
খুখড়া ডাকঅলঅ ভালা ভিনসারঅ হেউঅলঅ
পাসঅনেকর নিদ আরঅ এহঅ রে ভাঁগঅলঅ
আপঅনঅ দিদিবে ভালা উঠাউলেইক রে ডাকি
পুঁছে লাগেই চিউড়াক গাঁইঠ কাঁহাঁ দেলাহিস রাখি
বাচিক ঠানিতে রানি ভালা উজালে জাইকে
মট আনি ধরাই দেলেইক এহঅ রে পিঠেক ভাইকে
কহিকাহি পাসঅন ডহরঅলঅ হউ॥

চলেইতে চলেইতে পাসঅন এহঅ রে পঁহচঅইএ
আগুদিনে জেহঅ নদিই মু হাঁথ রে ধউঅইএ
নদিকর ধাইরেঁ ডাঁড়হাই দেখেই ভাভি গনি
গুড় চিউড়া খাই লেঁউ ইহাঁই সানিসুনি
এহে ঠিনেই খাই খুই লেম রে সাঁথানঅ
বেরাডুবাঁই ঘার জাম দসঅর নি ধেইআনঅ
মট রাখি মুঁ হাঁথ ধউঅইএ হউ॥

মুঁ হাঁথ ধইকে পাসঅন বড় তরৈঁ বসি
মটেকেরি গাঁইট ভালা করেই খসা খসি
মটটাকে তউলি দেখেই লাগেইক রে দমালঅ
খাইএকটা আইজ সাঁগি আহেইক করেই রে আটকালঅ
খলিকুনে পাসঅনেকর উড়েইক ভালা দিসা
মট ভরঅল গাঁইঠা আরঅ পাটরা কুঁড়হা ভুঁসা
সেহঅ দেখি রাগেঁ কাচাড খাই হউ॥

পাসঅনেকর গটা দেহি রাগে রে গুরগুরাই
মটটাকে ফেঁকি দেলেইক চাঁইপাক চাঁইপাক ঘুরাই
গাইর বাখান পাড়ে লাগঅল দ্বিদি রে বহনঅইকে
পাউবেহে পাইর নিহি তরা সাঁতাইকুনে মকে
একঅর বদলা লেবে করবেই ছাড়বেই নেহি হামে
ধিরাই আর কিরা খাই কহেই দেখাই দেবঁ কামে
নিজেক দস পাউএই নেহি থানাই হউ॥

দাউনিক মামাক গজগজানি সুনতা ইঠিন কনে
ছিটপিটাই চলেই ভালা রাগেঁ আর জলঅনে
জাতে জাতে সামহাল ভালা ধুরপা গাঁউ ভিতঅরৈঁ
একটা আরঅ লেড়হা ছউআ ভেঁঠঅলঅ নজঅরৈঁ
মগঅল রাজাক বেটা ভালা খড়হা দুবরাজ নামঅ
চলেবুলে পারেই নেহি অকঅর বসি রহাই কামঅ
একেই দাউনিক বরঅ ঠানঅলঅ হউ॥

দুবরাজেকর ঠিনে পাসঅন জাইএ ডেগে ডেগে
কথা আউড়াউলাক ভালা কতেক নিঅর রেগে
নাম চিনহাপ খুঁটিনাটি জানিকে সগঅরঅ
কহে লাগঅল সূনে তবে রাজাকর কুঁঅরঅ
মর ভেগনিক লাগি তকে বর ঠানলঁ মনেঁ
সাজিগজি চলি জাবে বাচিক দিনেখনেঁ
দিনখন সভে কহি দেইল হউ॥

দুবরাজকে কহি রাখি চলেই রে পাসঅনঅ.
পাটরা কুঁড়হা গঁইঠাক কথা জাগেইক ঘনে ঘনঅ
কতি ধুরেঁ জাইএ ভালা নজঅরঅ ঘুরাইএ
সাঁউরু ধাঁউরুকে দেখেইন আরঅ ছাগঅরি চরাউএ
মনেকেরি সুখেঁ ভালা এহঅ রে দিঅভাই
পালহা খাউআউএখিন আরঅ বড়অ গাছ রে নউআই
পাসঅন অরাক ঠিনে পঁহচলাক হউ॥

পঁহচিকুনে আউড়াই কথা এহঅ রে আপঅন মনে
বড়ি আসা লেইএ আইলঁ তরাকেরি ঠিনে
নাম ঠেকান লেলেইন আরঅ সভে আতাপাতা
তাকঅর বাদেঁ সুনাই দেলেইন মনেকেরি কথা
হামঅর দিঅ ভেগনিক লাগি হেবেহে তরা বরঅ
সাঁউরু ধাঁউরুই সুনি কথা রিঝেঁ রে বিভঅরঅ
একে কথাই হঁ জে করঅলা হউ॥

সাঁউরু ধাঁউরু দিঅ ভাইকে দিনখেন সভে কহি
চলে লাগঅল পাসঅন আরঅ মলকাইকে দেহি
পিঠঅইচাঁদ বুড়হাক ঘার এহঅ রে পঁহচলঅ
লেউরি আর সাঁউরাকে ভালা ডাকিকে কহঅলঅ
আউলঁ মঁই তরাক ঠিনে বড়ি আসা লেইএ
মর কথা সূনা তরা এহঅ রে মন দেইএ
মুড় লাড়ি ধুনি নাছ দিহা হউ॥

মর আরঅ ভেগনি সূনা আহাত জে রে দুইটি
সিলঅই দেসেক রাজা ভালা জানকুকর বেটি
দাউনি সাউনি নাম লাগঅত গুনে অরাসরা
অরাক লাগি বর হেবেহে দিঅ ভাই রে তরা
এহঅ কথা সুনি সাঁউরা রিঝেঁ রে মুচুকে
হঁ সিঁকার হেই গেলা বিহাকর হুচুকে
পাসঅনেক তঅ মনে হেলেইক বল হউ॥

দিনখন কহি রাখি চলে লাগঅল পাসঅন
মনে সঁচেই করে হেতি জেসঅনেক তেসঅন
দিদি বহনঅইকে ভালা কাঁদাউবেইন রে নাথৈ
এবেইর অরা হাড়ে হাড়ে চিনহি জাতা মকে
মনেক ভিতঅর বরকেইক রাগ গুড়েকর নিআরঅ
রাজা রানিই বুঝতা ভালা কতেক ধানে কতেক চারঅ
চলেই পাসঅন দসঅর এক দেস হউ॥

একঅ নদিআ কিনার পাসঅন রে পঁহচঅইএ
কানহু বিরাকে আরঅ নজঅরে দেখঅইএ
সাতসঅ গাড়িক কাঠ ভালা এহঅ রে বাঁধিহাঁদি
চিহঅড় লতেক দড়িই টানেই একাই নাদি নাদি
কানহুকে দেখি পাসঅন গেলাক অকঅর পাসেঁ
কহে লাগঅল তরঠিন আউল বড়ি আসেঁ

তঁই হামঅর কথাটা রাখঅবে হউ॥
কানহুই কহেইক কনে লাগিস কাঁহাঁ তহঅর ঘারঅ
কিনা লাইএ আউলে তঁই সুনাইএ বানারঅ
পাসঅনে সুনাইলেইক ভালা আপঅন নাম ঠেকানঅ
কানহুক চিনহাপ লেলেইক আরঅ অনাই দিঅ কানঅ
ভেগনিরাক বিহাক কথা উচরাই অকঅর ঠিনেঁ
বর হেইকুন জাই কহেইক এহঅ রে বাচিক দিনেঁ
কানহু বিরাউ রাজি হেউঅলঅ হউ॥

হুই বরকে ঠিক করি পাসঅন রে উজালাক
আরঅ একটা বাকি আহে মনে রে সঁচলাক
পেঁড়ু বিরেক ঘার ভালা তুরুতে পঁহচলা
ভেগিন জামাই কহি আরঅ ডাকে রে লাগঅলা
মামাসসুরকে দেখি পেঁড়ুই মানঅ রে খাতিরেঁ
বসেলাই দেলেইক ভালা ঘারা রে ভিতঅরেঁ
পুঁছে লাগঅল আনারঅ বানার হউ॥

পেঁড়ু বিরেক গাতেক বরঅন এহঅ রে দেখিকে
পেঁড়রি বানাই ডাকঅত অকে গাঁউএকেরি লকেঁ
মামাসসুর ভেগিনজামাই বহুত দিনেক বাদেঁ
একে সঙ্গে বসি বজকঅত মনেকেরি সাধেঁ
খাইএক চলি আইলেক জখন ভুখেকেরি চটেঁ
গবগবাই খাই পাসঅন আধা মুহেঁ আধা ঠঠে
খাইকুনে থির হেলেইক মন হউ॥

দুই তিন ধাঁউ ঢেকরি ভালা এহঅ রে পাসঅনে
কহে লাগঅল আসঅল কথা সঁচেই জেটা মনে
ভেগিন জামাই সুন্য তরা আউতি ভুড়কাবারেঁ
হাঁথেক কাম ছাড়ি একধাঁউ জাইহা সসুরঘারেঁ
তরাক দিঅ সালিক ভালা হেতেইক বিহাক কথা
বহনঅইএক কামটা তরা বিনু কনে করঅতা

ছই সাড়হুকে দেখিকে আউবেহে হউ॥
পাসঅনেকর কথা সুনি সঁচেই পেঁড়রি বিরাই
মামাসসুরেঁ কিনা বকঅত এহঅ রে থিরাই থিরাই
দুই সালি ছউ সাড়হু কাঁহাঁ লে ফড়কঅলা
এরাক মাথা ঠিক নাইখেন কেথিই রে ভড়কলা
কহে লাগঅল মামা সসুর কিনা জে ফদড়েইহা
কনঅই বুঝো পারহঁ নিহি কনবাটে বজড়েইহা
ফইরছঅ করি মকে সুনাই দিহা হউ॥

পাসঅন কহেই ভেগিন জামাই সুনিহা জে কান খলি
কথাটা সুনিকে তরাক গাত উঠতঅন জলি
জানকু রাজাক দুই বেটি আহথিক আরঅ ঘারেঁ
লুকাই ছুপাই মানসল করঅল তরাকেরি ডরেঁ
ছইটা বর পাউলাইহন এহঅ রে খজি খজি
ভুড়কাবারেঁ আউতা অরা সঁপড়ি সাজি গজি
পসঁদ বরেঁ দাউনি সাউনিক হেতেইন বিহা গউ॥

মামা সসুরেক মুহেঁ ভালা সুনি এসঅন কথা
পেঁড়রি বিরেক চইখ লাল রাগেঁ ঘুরেইক মাথা
কহে লাগঅল মই রহেইতে আহাত এসঅন কনে
বিহা করি লেই জাবখিন হামঅর সালি ধনে
মনে মনে হাঁসেই পাসঅন কহেইক ধিরি ধিরি
ঠিকে আহেইক চলল হামে জাইহা মনে করি
আপঅন ঘার বাটেঁ ডহরঅলা হউ॥

জানকু রাজা আর ভালা কলাবতি রানি
বর বর করি অরাক গাতেক রকঅত পানি
দাউনিক মামা পঁহচি গেলা ডাকেই দিদি কহি
মু ভরঅল হাঁসি আর ছতিঁই রিঝেক বহি
পাসঅনেকর হাবভাব দেখিকে কলাবতিঁই
কহে লাগঅল হুব আইজ দেখঅহঁ তর মতিঁই
বুঝঅহঁ মই আনলে সগুন বানার গউ॥

রাজাঁই কহেইক কহেঁ পাসঅন আবুকর বানারঅ
কাঁহাঁ কাঁহাঁ ঘুরলে আইজ খজঅহিতে জে বরঅ
পাসঅনে কহেইক ঘুরাক কথা নেহি সুনে হেতঅউ
অহঅ কথাটাই সুনে এখন মনটা জেটাঁই ভরতঅউ
আউএহেক ভুড়কাবারেঁ হেলমারা নিআরে
সাত সাতটা বর ভালা আউবথু তর ঘারেঁ
দাউনি সাউনিক বর লেবসিন দাঁজি হউ॥

ভাইএক কথা সুনি রানিক মাথা গেলেইক ঘুরি
দুই বোটিক সাত বর হেতা কেসঅন করি
আগু তঅ দেখাসুনা বাদেঁ বিহাক কথা
পরঅব দেখা করি দেলে লকেঁ কিনা কহতা
পাসঅনে কহেইক তখন বুঝি দেখি মনে
বর বাছি দান দেবসিন করাক বোট ধনে
এহে কহি ঘারা চলি গেলা হউ॥

রাজা রানিক মুড়েঁ ভালা এহঅ রে ভুত ঢুকাই
পাসঅন তঅ চলি গেলা দেহিআ রে মলকাই
ধুকুর পুকুর করেইক ভালা দিঅকর জিবনঅ
মান খাতির বহাই জাতি করেই হেতি কনঅ
রানিই কহেইক সুন্য রাজা না সাঁচিহা তরা
বাঁচেক ডহঅর টুঁড়হম হামি মনে ধিরঅজ ধরা
হামঅর উপর ভরসা রাখিহা হউ॥

বিহাক কথা সুনি সাঁউরাক বড়ি রে অকবকি
কবে আউতেইক ভুড়কা বার বুয়েই রৌকি রৌকি
লেউরিকে কহেইক ভালা এহঅ রে হরঅখে
সুনে জে সুনেঁ দাদা কহঁ হামি তকে
হামরাকর ঘার তেসঅন নেহি রে রহঅইএ
ঘার দুআইর বঁনাউএ হেতেইক বুঝাইএ কহঅইএ
লেউরিই সেহঅ কখাঁই দেলেক সাই হউ॥

লেউরিই কহেই কাঠ আনেলাই চাল তবে বনঅ
হাঁথোঁ টাঁগা লেইএ দুইভাই বাহরালা তখঅনঅ
বনেকব ডহঅরঅ ধরি চলে রে লাগঅইএ
কতিখনঅ বাদেঁ আরঅ বনঅ রে পঁহচঅইএ
বাছি বাছি গাছ লেউরিই কাটেই ভালা বনেঁ
সাঁউরাই আরঅ জড়অ করেই পাঁগিকে জতঅনেঁ
ছলাছাঁছা করেই কামেক জঁখেঁ হউ॥

জঁখি জঁখি কাঠ ভালা এহঅ রে কাটঅইএ
পাইড় মুখঅইন পেলা আরঅ সাঁউরাই রে ছাঁছঅইএ
জখন আরঅ গাছ কাটঅল এহঅ রে হেউঅলঅ
দিঅ ভাইএঁ বাঁটি ভালা কাটে রে লাগঅলঅ
বাঁটি কাটি পাহাড় ডিঁগ করঅলা তাকঅর বাদেঁ
বনখেড় কাটে লাগঅল মনেকেরি সাধেঁ

সাতটা ঘারেক সাজ জগাড়অ করঅল হউ॥

জাইতালঅ জাইতালঅ লতা আরঅ কাটি দিঅ ভাইএ
কাঠ কাঁটি বনখেড় এহঅ রে বাঁধঅইএ
জখন আরঅ বাঁধা ভালা এহঅ রে হেউঅলঅ
সাতটা ঘারেক সাজ লেইএ ঘারা রে ডহরঅলঅ
কাঁধেঁ মুড়েঁ কতেক লেলা কতেক রে গহঅলাইকে
ডহঅর টাপি আনে লাগঅল বুইধ ভরসা খাটাইকে
ডহঅর তঅ ধুরাই নি দেখাই হউ॥

লেউরি সাঁউরা দিঅ ভাই চলে রে লাগঅলা
গউরাকর কুলহিক মুড়া পঁহচি রে গেলা
কাঁধেক মুড়েক বঝ ভালা রাখিকে জতঅনেঁ
ঘার বেনাউএক আড়াপাটা ঠানঅত মনে মনেঁ
ঠানিঠুনি দিঅভাই ঠেসি গেলা কামেঁ
নুন ফুটি জাইক ভালা গাতেকেরি ঘামেঁ
সাতটা ঘার হেইএ মুহাইল হউ॥

জখন বেরা ডুবু ডুবু এহঅ রে হেউঅলঅ
বুড়হাঁই আরঅ গরু ভালা ঘুরাই রে আনঅলঅ
গটা গাঁউএঁ আপঅন আপঅন গাই গরু খহড়াইএ
বুড়হা রসেঁ রসেঁ আপঅন ঘারা রে ডহঅরইএ
কতিধুর লে আরঅ বুড়হাঁই দেখঅলঅ রে ভালি
চমঅকি উঠঅলঅ ভালা কিনা ডাহানডালি
কনে বেনাউলা এতেইক ঘার হউ॥

মনে সাঁচেই কন রাজা আউলাক পাঁখাবাড়ি
দখলাইএ লেলাক ভালা হামঅর ঘার বাড়ি
মকে নি জানাইএ কনঅ মর বাড়িক উপরঅ
কতেক বড়অ ঘার করেই দেখাই রে গাতেক জরঅ
এহে নিআর ভাভি মনে সটসটাই চলঅইএ
মনেকর ভিতরেঁ এখন ভাভনা রে খেলঅইএ
গাতেক জরেঁ মকে দেতা কিনা খেদি হউ॥

জাতে জাতে আপঅনঅ ঘার পঁহচিএ গেলা
লেউরি সাঁউরা ঘারেক ছাইনে বসি রহেহেলা
আপঅন বাপুকে দেখি সাঁউরাঁই কহেইক একঅ হাঁকে
• চাঁড়চপঅট আউএঁ বাপু আপঅন ঘারা দেখেঁ
বনলে কাঠ ঝাঁটি লতা কাটি আনি খেড় পঁআরি
দিঅভাইএঁ বেনাউলিঅ নিজেক নিঅর করি

আউএ বাপু সাতঅ ঘারেক বিহা দিহিঁ গউ॥

জেহঅ ডর জনমঅরহেইক পিঠঅইচাঁদেক মনেঁ
ছউআক হাঁকেঁ পঁছাই গেলেইক গাতেক ধুরা জেসঅনেঁ
আমডাইর গাঁজি দেলেইক সুথঅর সাফা মনেঁ
গুড় চিউড়া সানি আরঅ ভগঅ রে করি উখনেঁ
বুড়হাবাপ মাহামাঁই বসমতা সেঁউরঅইএ
দেউআ ভুতা সেঁউরি আরঅ সিঁদুরঅ ঝাঁকঅইএ

নেগাচার মানি ঘারবিহা দেলেইক হউ॥

সাতটা ঘারেক বিহা ভালা এহঅ রে দেউঅলঅ
গটা কুলহি ভগ আরঅ নিজে বিহলাউঅলঅ
সাঁউরাঁই এবৈইর কহে লাগঅল মাঁইঅ রে বাপুকে
বিহা হামরাক নেইজকাই গেলি কহেইহন তরাকে
কিনা করে হেতি ভালা তরা বুঝি কহা
বিহাকর সারভার করে হেতি মুহা জুহাঁ

নেউতে হেতি কুটুমঅ বাটুম হউ॥

বুড়হাঁই কহেইক সঁচে হেতি করে হেতেইক কিনা
হামরাকর তঅ বিতেই ভালা টানিটুনি দিনা
গাঁউএক লকেক ঠিনে রিন-বরন রে করঅবঅ
কাম নিপটঅল বাদেঁ হামরা সধি রে দেউঅবঅ
সাঁউরাঁই কহেই মামাঘার ডাম ভালা হামে
কবে ডাঁড়হাতা অরা জদি নি ডাঁড়হাত এহে কামে

মামা-মামি কে ধনঅ খজঅবঅ হউ॥

বিহাক হুবে সাঁউরাকর মন নেহি মানেই আর
বিহানেই উঠি চলি গেলাক আপঅন মামাঘার
এতনা দিনেউ মামাঘার নেহি রে দেখঅইএ
মাইবাপেঁ কবঅউ নিহি এহঅ রে দেখাইএ
নিজেকর জিধেঁ সাঁউরা চলি গেলাক ভালা একাই
মানেকর রুসানিঁই আইজ নি রাখেক টেকাই
পঁহচি গেলা মামা ঘারেক দুআইর হউ॥

মামা মামা কহি সাঁউরাঁই হাঁকঅ রে পাড়অইএ
হাঁকেকর সবঅদেঁ গটা ঘারা রে হিলঅইএ
সাঁউরাক মামি ভালা ঘারালে বাহারালি
ভেইগনাকে চিনহে নি পারেই হেঁট উপর ভালি
কহে লাগঅল কাঁহাক লাগিহা কাকে গউ খজেইহা
কনে তরাক মামা লাগঅন ফুটি কহি দিহা

আগু কবঅউ নিহি দেখিঅন তরাকে গউ॥

সাঁউরাঁই তখন দেউএ লাগঅল এহঅ রে আপঅন চিনহাপ
মাই মর লতা লাগেই পিঠঅইচাঁদ মর বাপ
সাঁউরা লাগেই নাম হামঅর ঘার গউরা বাজারঅ
এহে ঘারটাঁই মামাঘার মর কতেক কহঅম আরঅ
সাঁউরাক মামিঁই চিনহিকুনে এহঅ রে তখঅনঅ
ঘার ডাকি বিছাই দেলেইক বসেকর আসঅনঅ

পুঁছে লাগঅল ঘারেক আনার বানার হউ॥

সাঁউরাঁই আপঅন মামাঘারেঁ পহিল দাঁপ দেউঅলঅ
মামিক হাঁথেঁ জতঅন আদঅর এহঅ রে পাউঅলঅ
মামাক বানার পুঁছে লাগঅল আপঅন মামিক ঠিনেঁ
মামাক মু দেখঁ নিহি এহঅ রে এতিদিনেঁ
মামিঁই কহেইক মামা তরাক নেইখত জে ঘারেঁ
গেলাহাত নইহরঅ মর আজু রে ভিনসারেঁ
আইজ তঅ নেহি জে আউঅতা হউ॥

সাঁউরাঁই তবে কহে লাগঅল সুনামামি কথা
তরাক ঘার আউলাই মঁই লেইকে বিহাক নেউতা
লেউরি দাদা আর মঁই এহঅ রে দিঅভাই
একেদিনে বিহা করঅব একে ঘারেক কেনিআই
আউএহেক ভুড়কাবারেঁ ধরাইল বিহাক দিনঅ
নেউতা বুলাউএইহঅ ভালা কুটুমেকর ঠিনঅ
লেহু মামি হাঁড়ি গুআ গউ॥

গুআ দেইএ সাঁউরাঁই আরঅ আপঅন রে মামিকে
কহঅম নঅ নি কহঅম ভালা দেখেই রে ঠানিকে
সাঁহাঁস ধরি কহেই কথা মনে রে হড়বড়ি
সুনামামি দেউএ হেতঅন পাই তিনেক রে কড়ি
বিহা পাইরাইল বাদেঁ ভালা দেবঅন জে ঘুরাই
বড়ি আসেঁ পাড়লঁ কথা তরাকর দুআরাঁই
সুধা হাঁথেঁ ঘুরাই নাহু দিহা গউ॥

সাঁউরাক কথা সুনি ভালা সাঁউরাকর মামি
কহে লাগঅল কথাটা ভেইগনা কহঅলাইহা দামি
কিনা কহম দুখেক কথা নেখি হামরাক কড়ি
নেহি দেউএ পারবন জতেক করা গউ ঘনদড়ি
মনে সঁচেই কড়ি দেলে ঘুরাই নেহি দেতা
গরিবেকর পুতা ভালা কাঁহাঁ কড়ি পাউতা
নিহি নেখি করে লাগঅলঅ হউ॥

সাঁউরাঁই কহেইক সুনামামি নি খজই মঁই ধারঅ
ধেনু গাই আনি দেবঅন ভালা চুকলেই বিহাঘারঅ
সাঁউরাকর মামিই ভালা কহে লাগঅল তখঅনঅ
ধেনু গাইএক কথা তরা কহেইহা জখঅনঅ
গাই আনি দেখাউআ ভালা তাতকে জে গউ হামে
জগাড় করঅহঁ কড়ি আরঅ তরাকেরি কামে
এখনে তরা গাই আনি দেখাউআ হউ॥

মামিক মন বুঝি সাঁউরাঁই সঁচেই চাঁড়াচাঁড়ি
গাই নি দেখঅলে মামিঁই নেহি দেতা কড়ি
চিপসি হেকঅত এহঅ মামি বুঝিকে অনতঅরৈ
মামাঘার লে দনদনাই আউলাক আপঅন ঘারেঁ
গাঁউএক লকেক তিনটি গাই এহঅ রে তলগিকে
মামাঘারেক আনগাঁই ভালা দেলেইন রে লেগিকে
সাঁউরাক মামিঁই গহাইলে খহড়াউলেইন হউ॥

ধলি রাঁগি কুইলি ভালা সুঁদঅরি তিনঅ গাই
তাকর দরুন কড়ি মামিঁই দেলেক রে তিনঅ পাই
তিনপাই কড়ি লেইএ সাঁউরা ডহরঅল ঘারঅ
মামাঘারেক কুলহিক মুড়াঁই ঠহরিকে রে আরঅ
ধলি রাঁগি কুইলি গাই এহঅ রে হাঁকাইএ
তরাক আরঅ ছউআ ভালা গহাইলে কাঁদঅইএ
সিঁঘে কেউআড় তাড়ি পারাই আউআ হউ॥

সাঁউরাকর হাঁক পঁহচি গেলেইন গেইআ কানে
আগুড় তাড়ি বাহারালা ছউআকেরি টানে
সাঁউরাকর মামিঁই ভালা জানে নি পাউঅলঅ
তিনঅ গাই নেজ আলগাই এহঅ রে উমকঅলঅ
সাঁউরা আরঅ কড়ি লেইএ ঘারা রে পঁহচি
লেউরিক সঁগে বসি ভালা করঅত সঁচাসঁচি

তিনপাই কড়িই কিনা করে হেতেক হউ॥
লেউরিঁই কহেইক সুনে রে ভাই সঁচ জেটা মনে
সলা করে হেতি ভালা মাঁই বাপেকর ঠিনে
ভাই ভেইআদ নেখঅত জখঅন আড়পড়সিকে ডাকি
বুঝামতা করিকুনে কামে আগুআব হাঁকি
একাই নহেইক বিহাক কাম নহেইক রে হড়বড়ি
ডাকে হেতঅউ পাঁচ কুটুম নি হেলে গড়বড়ি
সমাজ নিতি মানি চলে হেতঅউ হউ॥

সাঁউরাই কহেই ডমডাহাল ডাকে জে রে হেতঅউ
অহঅ কামগিলা কিনা কুটুমে করি দেতঅউ
সেহঅ খনে রজঅল ভালা এহঅ রে আউঅলঅ
তরাক বিহাঁই নটুআ সাজঅম রিঝেঁ রে কহঅলঅ
সাঁউরাই কহেইক সভে হেতেইক চললঁ এখন ডমঘার
তরা সভে মনতননি করা কিনা কিনা দরকার

মুহা জুহা আগুলেই করে হেতি হউ॥

সাঁউরা চলঅল ডমঘার লেউরি আর রজঅলঅ
বসিকুনে গালমারঅত বিহাক দিন নেইজকাউঅলঅ
লেউরি সাঁউরাই নেহি জানঅত দাউনি সাঁউনিক মামাঁই
ভেগনিরাক খাতির সাতটা বরকে রাখঅলাহেইন জানাই
মাহারাই গিতেঁ আহেইক ভালা দমগর রে মরঅমঅ
খল কুট পঁছাই রহেইন হড়েকর ভরঅমঅ

সভেকাইএ সুনিহা মন লাগাইএ হউ॥



চনদাক বিহা

হুঁদে মহিচাঁদেক ঘারেঁ কুটুমেকর আনাগনা
চনদাকর বিহাক লাগি চলেইক দেখাসুনা
পরিকথিত রাজাক বেটা সহদেবা বিরঅ
দেখিসুনি চনদাক বর হেই গেলাক থিরঅ
বিহাক দিনখন ভালা ধারিজ রে হেউঅলঅ
চনদাকর বিহা হেতেইক সভেকাই জানঅলঅ
রাজাঘারেক বিহা কহি কথা হউ॥

চনদাঁই আরঅ লেউরিকে ভুলে নেহি পারঅই
রাইতেনে দিনে লেউরিক কথা এহঅ রে সঁচঅই
মাই বাপেক মুহেক উপর কহে নি পারেই কথা
নিজেক মনেই ভিতঅর ভিতঅর সহি হিআক বেথা
পরিকথিত রাজা ভালা বড়ি ধনিমানঅ
মহিচাঁদেক সঁগে গনাই সমানঅ সমানঅ

চনদাকর ধনেক কবঅউ হেতেইক নি টান হউ॥
লেউরিহুঁ নেহি ভুলেই চনদাক সঁগে নাতা
দাইএ গিরি ছুপাই রাখঅল মনেকেরি কথা
ধনি গরিব বাছবিচার মিলঅনেকর কাঁটা
এসঅন দুখ কনে কাকে দেলে লেতঅউ বাঁটা
নিজেক ঘারেক হাল দেখি কানে লেইকে ঠুলি
চনদাক সঁগ বিহাক কথা এহঅ রে গেলাহে ভুলি
মনে গঁথঅল রানিক কাঁড়েক বলি হউ॥

দিনেক বাদে দিন ভালা এহঅ রে আউঅইএ
লেউরি সাঁউরাক বিহাক দিন নেইজকাই রে জাউঅইএ
জেহঅ দিনে দিঅ ভাই বিহা করে জাতা
সেহঅ দিনেই চনদাক বিহা বিহলাউঅল নেউতা
গউরাবাজারেঁ ভালা ভজেক উপর ভজঅ
কাকঅর ঘারেঁ কেসঅন হেতেক লকে রাখঅত খজঅ
বিহাক হবে নাচেইক গটা গাঁউ হউ॥

চনদাক আরঅ রেবাইর ভালা এহঅরে হেউঅইএ
কুটুম বাটুম গটা গাঁউ ভজঅ রে খাউঅইএ
দিনেক দিনে আরঅ ভালা ধরালেইক লগঅনঅ
বিহা গিতেক গহঅগহিঁই রিঝঅল সভেক মনঅ
জেহঅদিনে রাজাঘারেঁ এহঅ রে সারুআ মুড়হি
গাঁউএক বহু বোটি আউলা আরঅ জতেক বুড়হি
রাজাঘার তঅ ভরঅলেক লকেঁ হউ॥

মহিচাঁদেক ঘারেঁ সারুআ মুড়হিকর গহঅগহি
পিঠঅই চাঁদেক ঘারেউ ভালা বাদ রহলেক নিহি
দিঅ ঘারেঁ সারুআ মুড়হি চলে রে লাগঅলঅ
রাজাঘারেঁ লেইএ সভে বুড়হাক ঘার ডহরঅলঅ
গটা রাইত রিঝেঁ গিতেঁ মাতঅলা রে সভে
দুই দুইটা বিহাক ভজ খাইএকেরি লভেঁ

কুলহি ডাঁড়িঁই ধুরা উড়ি গেইল হউ॥

চনদাক বিহাক দিনে ভালা মহিচাঁদেক ঘারেঁ
কুটুম বাটুম আউএ লাগঅল হুজাকে হুজারেঁ
বিহানলেই বিহাঘারেক নেগিজগিক কামঅ
চলে লাগঅল ডেগেঁ ডেগেঁ নেহি রহেইক থুমঅ
জাকঅর জেঁ কাম ভালা লেলা বাঁটি সারি
করে লাগঅল নিজেক নিঅর আপঅন কাম ধরি

চনদাকে থুভড়া ভাত সভেকাই দেলখিক হউ॥

ছামড়াবাঁধা বড়িপাড়া মাড়ুআ পুজা আরঅ
নেগেঁ নেগেঁ বিহাগিতেঁ গহগহাই রে ঘারঅ
বনঅমালাঁই গটা কুলহি সাজঅলঅ রে ভারি
বিহাকর বাজনাই হুব আনেইক টারি টারি
মহিচাঁদ রাজা ভালা গঁগাদরি রানি
বোটিক বিহাই কামে বিভঅর মনে নি দুখানি

সভে কামেক তালাধাককা করঅত হউ॥

সাধেক বেটিক বিহা ভালা সাধেক বেটাক সঁগেঁ
রাজাঘার ভরি গেলেইক হুবে রিঝে রুঁগেঁ
হরঅইদ তেল মাখঅল চনদা দেখাইএ পিঅরি
সঁগিজড়িই সভে মিলি রাখঅলাথিক ঘেরি
লেউরিকর কথা আরঅ সঁচেই মনে মনেঁ
দিঅ লকেক কিরা খাউআ নি রহলি বাঁধঅনেঁ
ধুরাক বিহা ধুরাই হেঁরাই জাই হউ॥

বাজ বাজনা বরিআত লেই বড়ি রে গুরজালে
বর সাজি সহঅদেবা আউএই রে রিঝালে
গউরাবাজার আরঅ ভালা এহঅ রে পঁহচলা
কুলহিক মুড়াই নেগি জগি আরঅ রে করঅলা
বসমতা গাঁউ মাই আরঅ রে সেঁউরঅলঅ
মাহামাইকে সেউরি ভালা মুড় নউআঅলঅ

তিন ঠপা সিঁদুর বসমতাই গিরাউঅল হউ॥
পিঠঅই চাঁদেক ঘারেঁ খেলেই হুবেকেরি লহঅর
গহঅগহঅ বিহাগিতেঁ সভেকাইএ বিভঅর
বিহাঘারেক নেগি জগি নিপটেইক খেপে খেপে
সুঘড় সুখঅর হেউএইক ভালা নেহি খেরেখেপে
বর বাহারাইএক খন আরঅ এহঅ রে হেউঅলঅ
লেউরি সাঁউরা দিঅ ভাই সঁচে রে লাগঅলঅ
ডম ডাহাল এখনঅ নি আউলা হউ॥

বাজ বাজনা বিনু বিহা নেহি জে রে মানাই
রিঝা রুঁগ হুব ভালা এহঅ রে আনলা গনাই
লেউরি সাঁউরা দিঅ ভাইএঁ সঁচে লাগঅল মনে
নেউতা করঅল ডম ডাহাল আউতা কতেক খনে
সাঁউরাই কহেইক সুনো দাদা একটা কথা কহঁ
ডম ডাহালরাকে হামি ডাকেলাই রে জাই
নিতঅ হামরাক বাহারাতে হেতি ডেরি হউ।

বুঝি সুঝি লেউরিঁই তখন কহেইক রে সাঁউরাকে
জাঁই তবে ডাকিডুকি আনিহিন অখরাকে
ডম ঘার জাঁই সাঁউরা এহঅ রে কুদালে
ডমরাকে রাগ বাসি নিজেকেরি তালে
পঁহচিকুনে আরঅ সাঁউরাক উড়লেইক রে দিসা
কনঅ ডম ঘারেঁ নেখঅত কিনা পাউলা নিসা

সভেকাকর ঘারা দেখেই লাগাউঅল হউ॥

কাঁহাঁ গেলা ডম সভে দেখাহাত নেহি কেহ
রাগেঁ জলঅনে সাঁউরাক ডবকে লাগঅই লহ
নেউতা ধরি ডম ভালা পুচু দেলা কঁদে
কাকে সুধিআউএ হেতেইক আরঅ ভালেই হিঁদেহঁদে
কুলহিক একটা বুড়হাক ঠিনে পাউলাক বানারঅ
সভে ডম ডমিন হ্চকি গেলাহাত রাজাঘারঅ

সাঁউরা ইড়কঅলে রাজাঘার জাঁই হউ॥

রাজাঘার পঁহচি সাঁউরা ডমরাকে ডাকি
কহে লাগেইন রাগেক চটেঁ এহঅ রে কথা জাঁকি
নেউতা লেইএ তহরা হামঅর ঘারা নি পঁহচঅইএ
তরাক লাইএ বর বাহারা নেহি রে হেউঅইএ
এহে কহি সভে ডমকে সমটি রে ধরঅলঅ
কাঁখ বগঅলে আরঅ ভালা এহঅ রে চিপঅলঅ

ডরেঁ ডমরা করঅত নি টুঁইটাঁই হউ॥

সাঁউরাঁই আরঅ কনঅ কথা নেহি রে সুনঅইএ
আপঅন মনে নেউতা দেউঅল ডম রে গনঅইএ
রাজাঘারেঁ একটা ডম রাখিকে রে দেলা
বাকি সভে ডমকে লেইএ ঘারা জে ডহরলা
ডম লেইএ পঁহচলা এহঅ রে আপঅন ঘারা
বরিআতরাকে কহে লাগঅল এহঅ রে সাইত করা
লেউরি সাঁউরা সাজে লাগঅলঅ হউ॥

খুভড়াভাত খালাহাত এহঅ রে দিঅ ভাইএ
বর সঁপড়া ভাত খালা লকেঁ বুড়হাক ঘার আইএ
অমলঅ খাইএক সমঅই ভালা এহঅ রে হেউঅলঅ
দিঅভাইকে বরেক মাইনে আরঅ সঁপড়াউঅলঅ
আমতর চলি গেলা বাজবাজনা গুরজালে
কুলহি ডাঁড়িক বহু বেটি চলঅত গহগহালে
আমতরেন বসঅলা দিঅ ভাই হউ॥

কাখনা বাঁধা অমলঅ খাউআ এহঅ রে হেউঅলঅ
বিহা করে দিঅভাই আরঅ রে ডহরঅলঅ
রজঅল ধবি নাটুআ সাজি নাচেই রে হরঅখেন
ফুলেক বিহাই সাজঅলাহে নিজেকেরি জঁখেন
মেহেরারুরা ঘার গেলা নিপটাই আপঅন কামে
বর বরিআত বাজ বাজনাই ডহরঅলা গহঅদমে
কুলহিক মাঝেঁ নাচঅনঅ কুদঅন হউ॥

লেউরি সাঁউরা দিঅভাই গরাম মাইকে সেঁউরি
চলে লাগঅল বর সাজেঁ হবেকর লহঅরি
বিহাক হবেন সাঁউরাক মন উছুলঅ ডুবুলঅ
উদাস দেখাই লেউরিক মন নিহি রে রিঝালঅ
মনে ভাসেইক চনদাক কথা চিমটি বিহাক নাতা
দিঅলকেক তিন সততি কিরা খাউআ কাথা
বাদি হেলেইক ধনি গরিব দসা হউ॥

বর বরিআত জাহাত ভালা সঁগে সারভারঅ
বাজনাক টাসিলেঁ আরঅ নাচঅই গউরা বাজরঅ
বাজনা সুনি চনদাকর ফুঁফুআই উঠেইক মনঅ
কাকঅউ নেহি কহে পারেইন ভিতরিআ বেদঅনঅ
গটা গাঁউ রিঝঅত জখন এহঅ রে বাজঅনে
চনদা তখন বসি বসি খিজলাই আপঅন মনে
মনেক আস জে মনেই রহি গেইল হউ॥

এক ধেইআনে চনদা তখন গরাম মাইকে সৈঁউরি
জড়হাঁথে কহে লাগঅল নেহঅরি নেহঅরি
লেউরিক সঁগেঁ ঘাৱ করা হেলি নেহি মরঅ
সেহঅ দুখ ভুলেক মাই গউ দেখাউএঁ ডহঅরঅ
মনেক আস রহি গেলি নেহি জে পুরঅলি
এসঅন বেদঅন কহেঁ মাই গউ কেসে রহঅম ভুলি
লেউরি বিনু রহেই নি জিবনঅ হউ॥

গরাম মাই চনদাক মনে এহঅ রে বসঅলি
নিজঅ গুনে আৱঅ ভালা কহে রে লাগঅলি
সাতসঅ গাডি কাঁটা ভালা দিহিঁ আগদুআইরেঁ
টেকাই রাখি দিহিঁ আৱঅ আপন লেউরি বরেঁ
গরাম মাইএক ভরেঁ চনদাই করেই সেহঅ কামঅ
মনে মনে সঁচেই ভালা লেউরিকর নামঅ

জানেই নেহি কিনা হেতেইক পেছু হউ॥
লেউরি সাঁউরা দিঅভাই আউঅত ৱিঝে ৱঁগেঁ
মহিচাঁদেক কুলহি ধরি বরিআতেক সঁগেঁ
সাতসঅ গাডি কাঁটা ভালা দেখিকে নজঅরেঁ
ঠমকি গেলা সভেকাই অঝঅরে বঝঅরেঁ
কিআ লাগি কাঁটা ভালা ফেঁকঅলা রে কনে
সঁচে লাগঅত কাঁটা ডেগি জাব রে কেসঅনে
মনে তঅ দইসঅত বহি গেইল হউ॥

লেউরিঁই আপঅন মনে ভালা গরাম মাই সৈঁউরঅলঅ
গরাম মাই অকঅর মনে ভরঅ রে করঅলঅ
তঁই আৱঅ হামঅর কথা এহঅ রে সুনঅবে
তিনঠপা সিঁদুর ভালা ফরিঁই রে দেউঅবে
সেহঅ ফরি লেবদি দেবে কাঁটাকর উপঅরঅ
কাঁটা সভে উড়ি জাতেইক পালহাকর নিঅরঅ
সেহঅ সিঁদুর চনদাক মুড়েঁ গিরতেইক হউ॥

গরাম মাইএক ভরৈ লেউরিই তেসঅনে করঅইএ
তিনঠপা সিঁদুর ভালা ফরিই রে দেউঅইএ
ফরিটাকে হাঁথে ধরি দেলেইক রে লেবঅদি
কাঁটা সভে উড়ি গেলেইক নি দেখাইক নিমুদি
চনদাক মুড়ে সিঁদুর ভালা এহঅ রে গিরঅলা
লেউরিক ঘেঁচাক আকঁদ মালা ছিটকিএ রে গেলা

ছিটকিকুন চনদাক ঘেঁচাঁই পিঁধাই গেইল হউ॥

রাজাক বেটি চনদাঁই মুড়ে সিঁদুর রে পাউঅলি
লেউরিক হাঁথে মালা সিঁদুর পাইএ হরখিএ রে গেলি
জড় হাঁথৈ গরাম মাইকে সৈঁউরনঅ করঅইএ
দুখৈ বেড়হঅল মন ভালা আসাঁই রে ভরঅইএ
দিঅ আইখৈ বহে লাগঅল হুবেকেরি লরঅ
জানেই নিহি আগু কেসঅন হেতেইক জে ডহরঅ

আঁচঅরৈ পঁছঅইএ আঁখি লর হউ॥

কাঁটা কাটি বর বরিআত গেলা জে রে চলি
গউরা বাজার পাইরাই গেলা এহঅ রে নাচি খেলি
লেউরিকর মন ভালা বদলিএ রে গেলা
চনদাকর কথা আরঅ সঁচে রে লাগঅলা
ফুটি নিহি কহে পারেই কাকরঅ রে ঠিনে
মনে নেহি ফুরতি লাগঅই আবুক এসঅন দিনে
সভেকর সঁগৈ চলেই আপঅন তালে হউ॥

লেউরি সাঁউরা বরিআত ভালা গউরা রে ডেগঅলা
কুলহিক ধুরাঁই আরঅ ভালা গটাগাঁউ টাপঅলা
দসঅর বাটেঁ সহদেবা গউরাক কুলহিক মুড়ে
বরিআত লেইএ হাজির আহাত হুবেকর সুড়ুরৈ
কুলহিক মুড়াই আঠিকুঠি এহঅ রে করঅইএ
গাঁউ গরাম বসমতা মাই এক মনে সৈঁউরঅইএ
বরিআত তঅ গনঅলে নি সিরাই হউ॥

গউরাকর কুলহি মুড়াই করি আঠি কুঠি
বর বরিআত চলি আউঅত বাজনাই আনেইক কুটি
মহিচাঁদ রাজাক ঘারেঁ চলেইক আড়াপাটা
সভে লক মিলি কামপাইট করলাহাত বাঁটা
কুলহিই বর বরিআত আউঅত এহ রে টহঅবরে
বাজনাকর টাসিলেঁ জানি গেলা গউরা রে বাজারেঁ
ঘার লে বাহারাই সভেকাই দেখঅত হউ॥

মহিচাঁদেক দুআইরেঁ বর এহঅ রে ডাঁড়হাইএ
মসালেকর আলঅ ভালা সভা রে করঅইএ
পানিক ঘটি পাউলা ভালা সভে রে বরিআতি
কুটুম বাটুম বরিআতেঁ ঘার আনগা ভরতি
চনদাকেরি ভউজি নাতাঁই এহঅ রে ছামড়া তরেঁ
চউক পুরঅইএ ভালা হুবেকর লহঅরেঁ

বিহাগিতেঁ গহগহাইক মহিচাঁদেক ঘার হউ॥

ছামড়া তরেঁ বসি গেলা বরিআতি রে সভে
গাঁউএক বহুবেটি আরঅ জহড়অল ডাভে ডাভে
বিহাকেরি সারভার সঙ্গে সাজনি ডালা
বরিআতে ছামড়াতরেঁ আনি রে রাখঅলা
ডুভা ভাজঅনেকর হাঁক এহঅ রে পাড়অলঅ
বর আর কেনিআইএক কাকা পাসঅ রে হেউঅলঅ
মুড়েক পগড়ি করেইক ঝকঅ মকঅ হউ॥

কেনিআইএক কাকা বসঅলঅ ভালা পুরুবঅ রে মুহেঁ
বরেক কাকা পছিম বাটে ভালাভালি দহেঁ
মাঝেঁ মাঝেঁ ডুভা রাখি এহঅ রে ইসারাই
ডুভা ভাজঅন করে লাগঅল রিঝঅল দিআরাই
নেগে নেগে গিত গাহঅত এহঅ রে বেটি ছউআই
একে সঙ্গে মিলিমেসি রেগেঁ রে রেগ মিলাই
ডুভা ভাজঅন কামঅ নিপঅলেইক হউ॥

জখন আরঅ ডুভাভাজন এহঅ রে নিপটঅলঅ
দিঅ বেহাইএঁ বেহাই আঁকাইড় আরঅ রে লেউঅলঅ
গড় লাগালাগি হেলা দিঅ রে বেহাইএঁ
হুবেকর লহঅরেঁ ভালা এহঅ রে নাহাইএ
চনদা কেনিআইএক আরঅ মুহেঁ নি ফুরঅতি
নিদঅইআ নিঠুরা সঁচেই আবুকেরি রাতি
আঁখিক লরেঁ বাইগ নি মানেই হউ॥

চনদাকে করাই লেইএ মেহেরারুঁকর ডাবঅ
মহ্ল তর চলি গেলা হুবেক নি অভাবঅ
মহ্ল বিহা চুকাই ভালা সভেকাই ঘুরঅলা
ছামড়া তরেঁ বর কেনিআই ভেঁটাভেঁটি হেলা
মালাবদঅল সিঁদরাদান আরঅ জতেক নেগি
একে একে হেউএ লাগঅল মুল কিনা চৌগি

কুলা টাঁগি চনদাক বিহা গেলেক চুকি হউ॥
জখন আরঅ বিহাক কাম এহঅ রে নিপটঅলঅ
বরিআত কুটুম বাটুম আরঅ খাউঅনে বসঅলঅ
সিঁদরাদানেক ভাত ভালা পেট ভরাভরি
মনেক সুখেঁ খালা সভে নিকাস ধরি ধরি
গটা গউরা বাজার ভালা বিহাকর নেউতনে
হউআ বুড়হা সভে আউলা বাচিক এহে খনে
বর বরিআত মরজাইত রহঅলা হউ॥

মরজাইতকে ভজ দেলেইন সঁগে এহে গাঁউএকেরি
আমভা পুরঅন হেলেইন ভালা দহঅরি তেহঅরি
বর কেনিআই বিদাই হেতা করঅত সাজাসাজি
লগদিন সঁপড়অলি এহঅ রে চনদাক আজি
বর কেনিআই বিদাই হেলা নেগিজগি মানি
ঘারেক কুনেঁ কাঁদেই ভালা গঁগাদরি রানি
সাধেক বেটিক বিদাই হেইল হউ॥

দাউনি সাউনিক বিহা

সিলঅই নগঅরোঁ ভালা জানকু রাজাক ঘারা
বাজ বাজনা টহঅবরোঁ উড়েইক বাটেক ধুরা
মন নি রহলঅউ কুটুম মাঝোঁ বিহা তঅ হেউঅলঅ
সহদেবা জে চনদাক সঁইআ এহঅ রে বনঅলঅ
কাঁদি কাঁদি লরোঁ ভাসি ছাড়ি রে নেইহরঅ
চলি গেলি সঁইআ সঁগে জাঁহাঁ রে ঠহঅরঅ

পেছুবাটে রহঅলা সঁগিজড়ি হউ॥

চনদা তঅ চলি গেলি সহঅদেবাক ঘারঅ
দাউনি সাউনিক বিহাক এবোঁইর জানঅব রে বানারঅ
দুই কেনিআই সাত বর এহঅ রে কেসঅন বিহা
জানকু রাজাক ঘারেক বেউরা এবোঁইর সুনি লিহা
কিনা কিনা হেলেইক ভালা আগ লে ফেড় ধরি
টুমে টুমে ফদড়অব এখন সুন্য ভালঅ করি

কিনা ঘটেহেইক সিলঅই নগঅরোঁ হউ।

ভুড়কা বারোঁ মাড়ুআ দিনে জানকু রাজাক ঘারোঁ
সভে সাইত করঅত রাজা রানিঁই ডরোঁ ডরোঁ
বিহান লে রাজারানি লকজন রে ডাকাইএ
আড়াপাটা করে লাগঅত মন রে লাগাইএ

মগঅল রাজাক বেটা ভালা খড়হু রে দুবরাজঅ
সভেকাকর আগু পঁহচঅল নজঅর জুড়া সাজঅ

খড়হুকে দেখি রানিক মন উদাস হউ॥

বর দেখি সভেকাকর মাথা গেলেইন ঘুরি
দাউনিক মামাঁই এসঅন বর বাছলেইক কেসে করি
চাঁদেক নিঅর বেটি ভালা রূপোঁ করেইক আলঅ
হুঁছেক লতাক নিঅর বর কেহু নিহি কহথিক ভালঅ
কানাকানি করে লাগঅত জাকঅর মন জেসঅনঅ
ইরখা করঅত কানাক কান্য গনাই রে পাসঅনঅ
রাজাক রাগ ভিতরিআ পঘলঅইএ হউ॥

খড়হু দুবরাজেঁ কহেইক এহঅ রে সুনিহা
বিহাক নেগিজগিক কাম চাঁড়চপঅট করিহা
রাজাক বড়অ বেটি দাউনি কেনিআই হেতি মরঅ
নিহি দেখলঅউ রাজি আই লেলাই বানারঅ
এতেক কহি খড়হু দুবরাজ বসলাক রে আসঅনে
সেহঅ দেখি জানকু রাজা সঁচে লাগঅত মনে
এখঅন কিনা করঅবঅ উপাই হউ॥

তাতকে আরঅ কানহু বিরা এহঅ রে পঁহচলা
বরিআত নেতেঁ হুজাহুজা লকজন সঁগেঁ আউঅলা
রাজাক কানে সেহঅ বানার তুরুত গেলেইক চলি
কানহুক নাম সুনি জানকুক গাত উঠলেইক রে জলি
কিনা করঅম কহে লাগঅত পাসঅনেকর দসেঁ
বেটিরাকর বিহাক ভাভনাই মরেই হেতি সেসেঁ

ফুটি কথা কাকঅউ কহে নি পারঅইএ হউ॥
কানহু বিরেঁ বানার ভেজঅল করতাক নেহি ডেরি
এখনে অঁই বিহা করি ঘার জাতাক রে ঘুরি
বিহাক আড়াপাটা করা নাহু করি হেঁকাতি
তাতলে তাতঅল নি করলে হুবটাই হেতি মাটি
অহঅ খনেঁ সাঁউরু ধাঁউরু দিঅ ভাই পঁহচলা
বিহা করেক জিগিড় ধরি সঁগ জড়ি বসঅলা
কহঅত দাউনি সাউনিকে হামরাই বিহা করঅবেইন হউ॥
বেটিরাকর জখেঁ একটাউ নিহি জড়িমাছা বর
ঘেরঘেরি লাগি গেলেইক এহঅ রে রাজাকর
কহেই মর জড়িদার কেহু নহঅত রে এরা
পাসঅন সালাক খাতিরেঁ মঁই হেলঁ জে আধমরা
কন আইখে বর বাছি করি আউঅল নেউতা
এখন হামি করঅম কিনা বুঝে নিহি পারঁ ফেউটা
বড়অ ছটঅ কহলঅউ হেতি জালা হউ॥

ই উ ইঠিন উঠিন বজকঅত ইটা উটা
কনঅ ঠিনেঁ ভালঅ মদঅ কাহঁ পচরাকুটা
দুই বেটিক চাইর বর এহঅ রে হাজির হেলা
কিনা করম কিনা নিহি রাজা ঘাবড়াই গেলা
কাকঅর হাঁথেঁ করবেইন ভালা দাউনি সাঁউনি দান
চাইরঅ বরেই বিহা করে করঅত রে ঠানমান

রাজা রানিক বর নি পসাহেথিন হউ॥

বর গিলাকে হ্চকাই পাসঅন ধুরে ধুরে রহি
রঁগ দেখেই ডাঁড়হাই ডাঁড়হাই রাগ তঅ কমেইক নেহি
কিনা জে হেতেইক ভালা কেহু নি দাঁজে পারঅত
কাকঅর ভাইগেঁ কনেঁ ভালা কেহু নিহি জানঅত
এসঅন সমঅইএঁ ভালা উড়াই বাটেক ধুরা
হাঁগকার মারিকে আউলা পেঁড়রি রে বিরা

রাজা রানি ডরেঁ কাঁপে লাগঅলা হউ॥

এহে মাঝেঁ সান দেখাই পেঁড়রি রে পঁহচঅইএ
মড় পিঁধি বর সাজেঁ ভালা আনগা সৈঁধিআইএ
সিলঅই নগঅরেঁ ভালা বাজনা রে বাজঅইএ
লেউরি সাঁউরা দিঅ বর টহঅবরে আউঅইএ
নাটুআ জে নাচেই ভালা ঢল নাগড়াক তালেঁ
সেহঅ দেখি রাজা রানি মরঅত দুখেক ঝালেঁ

গাঁউএক লক হেই গেলা জড়অ হউ॥

সাত বর সাত ঠিন কুঁড়চঅত মনে মনে
হামঅর আগু বিহা করতাক আহে এসঅন কনে
রানিক ঠিনে জানকু রাজা খিজলাই খিজলাই মরেই
মান খাতির বাঁচতেইক কেসে মুড়েঁ বুইধ নি ধরেই
রানিঁই তখন বহুত খন সাঁচিকে কহঅইএ
এরাকে ভিড়কাউএক গিআন হামঅর জে রহঅইএ
জেটা করেক মকেই করে দিহা হউ॥

নি পসঁদেক সাত বরকে খেদেকর বুইধ ঠানি
কমর মেটি আড়াপাটা করেই এবের রানি
বর গিলাকে ডাকি আরঅ ডাকি লকজনঅ
কহেই কনঅ বরে ভালা নইহা মর দুসমনঅ
দুই বেটিক সাত বর কেসে হেতেইক রে বিহা
কাকে দেবেই বেটি দান অহে কথা সুনিহা

পন করঅল আহি জে হামঅর হউ॥

দাউনিক মাইএঁ মনেক কথা এহঅ রে কহেই খলি
সভে বরেন্ বাড়িবাটেঁ দেখা জে তরা ভালি
একঅ পিঁপঅড় গাছ ভালা এহঅ রে ডাঁড়হাই
অহঅ গাছকে জেহঅ বরেন্ ধরিকে রে উপড়াই
ঘুরাই ঘুরাই ডুঁগরি ধাইর এহঅ রে ফেঁকঅবে
হামঅর বেটি দাউনিক বর অঁই রে হেউঅবে

অকেই হামি বাছবেই বড়অ জামাই হউ॥

রানিক কথা সুনি ভালা আউঅল জতেক বরঅ
ইড়কিএ জে গেলা সভে পিঁপঅড়েকা তরঅ
এঁই কহেই মঁই আগুআম অঁই কহেই হামে
কথা কাটাকাটি ভালা চলে লাগঅল দমে
খড়হু দুবরাজেঁ কহেই মঁই আউলাইঁ আগু
আগুক আগু আউআক নেতেঁ নিতি হেতেইক লাগু

সভেকাই কথাটা মানি লেলা হউ॥

খড়হু দুবরাজেঁ ভালা পহিল পাউলাক পাইড়অ
মসিআনি দেখাই গেলাক গাছেকেরি ধাইরঅ
গাছাকে ধরিকে ভালা হেঁচকা রে মারঅইএ
উঁচুক মারেইতে জাই ছিটকি রে গিরঅইএ
দেখি সুনি লকজন হাঁসে রে লাগঅলঅ
ফুটানি মসিআনি ভালা এহঅ রে ভাঁগঅলঅ
পেছুআই বসঅল হেসড়অ হেইএ হউ॥

দুবরাজ হারি গেলা দেখি কানহু বিরা
উলফা দেইএ আগুআলা দেখাউএ বলে মির
বাঁহি মলকাই পঁহচি গেলা জাঁহাঁ পিঁপঅড় ফেড়অ
নেগা দেহিনাঁই গাতটাকে মারঅলঅ মচঅড়অ
কসনি করি করি সআঁগঅ ভাঁগঅইএ
গাছঅ উপড়াউএ ভালা নেহি রে পারঅইএ

হারুল হেইএ পেছুআই ঘুরঅলঅ হউ॥

কানহু বিরকে লকজনে ইরখা রে করঅলা
সাঁড়েক নিঅর আগুআলে আর খেঁখি লেখেঁ ঘুরঅলা
কাঁহাঁ গেলঅউ উড়া মালঅইট বাঁহি রে মলকানি
লাজ সরঅমে কানহুক দিলা হেলেইক পানি ঝানি
ঘামি ঘুমি সরঅসপঅ ফারাকে রে বসি
নিজেক মনে ছিসছাস করে লাগেই কসি

হেঁটমুড় উপঅরঅ নি করঅই হউ॥

একঅর বাদে সাঁউরু ধাঁউরু মনে করি আসঅ
দিঅভাই পঁহচি গেলা পিঁপঅড় গাছেক পাসঅ
সাঁউরুঁ ঠেসঅলাক আগু বড়অ ভাইএক নেতে
গাছেক ফেড় সকতাইকে ধরলেইক দিঅহাঁখেঁ
গাছা উপড়াউএইতে বিরা গেলা রে লেসপেসাই
ধাঁউরুঁঅ নিহি পারলাক ফুরালেইক রে আসাই

দিঅ ভাই হারুলঅ হেউঅলঅ হউ॥

সাঁউরু ধাঁউরু পেছুআই গেলা এহঅ রে সেহঅ দেখি
পেঁড়ু বিরা আগুআই গেলা দেখাই বিরেক সোঁখি
লেউরি সাঁউরাকর রে ভালা আগুআই রে গেলা
আইভটি দেখি জানকু রাজা থথঅমথঅ হেলা
মসিআনি দেখাই ভালা গেলা রে আগুআই
হারুল হেইকে লেসেফেসে ঘুরঅলা রে পেছুআই
ফুটানি করাই হেলেইক সার হউ॥

রাজা রানিই সঁচঅত মনে আউঅত নঅ জতেক তিড়খি
এসঅন বুইধেক ঠিনেঁ ভালা সভে পারাতা ভিড়কি
এরা সভে চলি গেলে পসঁদ বর দেখি
বেটিরাকর বিহা দেবেইন হেতি মনঅ সুখি
লেউরি সাঁউরাক পালি আউলেক সভেকাকর সৈঁসেঁ
বাগালেকর বেটা হেকঅত আহাত বরঅ ভেসেঁ
লকেঁ কহঅত এরা করতা কিনা হউ॥

সাঁউরাঁই কহেইক লেউরিকে সুনে বচঅনঅ
হামরাকে দেখি দেখি হাঁসঅত লকজনঅ
লেউরিঁই কহেই মঁই নিহি জাবে জে রে তঁহি
পন করঅল পিঁপঅড় গাছ উপড়াইএ দিঁহি
দাদাক কথা সুনি সাঁউরাঁই এহঅ রে ভকতি ভরি
মাহারাই সৈঁউরঅইএ ভালা হাঁথ জড়অ করি

নিহি পারলে মরঅনঅ সমান হউ॥

দাদাক ইসারাই সাঁউরা পিঁপঅড় গাছ রে ভালি
কসকসাইএ চলেই আরঅ উড়অই ধুরা বালি
গাছফেড়েঁ পঁহচি ভালা হাঁথ জড়অ করি
বুড়হাবাপ মাহামাঁই মাহারাইকে সৈঁউঅরি
হাঁথঅজড়ি পিঁপঅড় গাছ একমনে বেড়হঅলঅ
গাছফেড় ছুই আরঅ নমঅ রে করঅলঅ

আঁকড়াই ধরঅলঅ পিঁপঅড় গাছ হউ॥

সভে লকেঁ সাঁউরাকে ভালিএ রহঅলঅ
জাকঅর জেসঅন মু ভালা তেসঅন রে কহঅলঅ
উঁচুক মারি সাঁউরাঁই আরঅ পিঁপঅড় গাছ আঁকড়াইএ
হুস করি একনিকাসেঁ এহ রে উপড়াইএ
একঅ মটা ডাইর ধরি ঘুরাউএ লাগঅলঅ
চাঁইপাক চাঁইপাক ঘুরাই আরঅ ডুঁগরি ধাইর ফেঁকঅলঅ
সভেকাই জে চকাইএ গেলা হউ॥

রাজারানি বাঝাই গেলা রাখি এসঅন পনঅ
দাউনিকে সাঁউরাক হাঁথোঁ দেউএ হেতেইক দানঅ
বাগাল খাটা ঘারেঁ বোটি কেসে রে মানাতি
সঁচে লাগঅই ভাগাউএকর নাঁগসা করে হেতি
দুধেঁ ভাতেঁ বাড়হঅল বোটি ফুলেকর নিঅরঅ
সাঁউরাকর হাঁথোঁ দেউএইতে কাঁদঅই রে অনতরঅ
রানিঁই আরঅ দসঅর বুইধ ঠানঅল হউ॥

জতেক লকেঁ কহে লাগঅল রাজারে রানিকে
সাঁউরাক হাঁথে বোটি দান করাহাক আনিকে
রানিঁই কহেই আরঅ পন আহি জে হামঅরঅ
কান অনাই সুনি লিহা জতেক আহিআ বরঅ
জড়অ হেলা সভে বর থুম দেইএ বজকঅনি
রানিক পন সুনেক খাতির হেলা এক ধেইআনি
কেহু কনঅ সাড়া নি করঅত হউ॥

রানিঁই কহেই আনগাঁই হামরাক এক কুঁআ রে রহঅইএ
সাইঠ হাঁথেক কুঁআঁ ভালা পানি নি দেখাইএ
দাউনি বোটি ভালা জেদিন এহঅ রে জনমঅলি
মসলা বাঁটা পাটি উদিন কুঁআটাই গিরঅলি
জেহঅ বরেঁ অহঅ পাটি এহঅ রে উঠাই দেবে
সেহঅ লক হামঅর বোটি দাউনিকর বর হেবে
অহে পাটিঁই হামি হরঅদি বাঁটঅম হউ॥

কুঁআকেরি পাসে সভে জড়অ রে হেউঅলা
আপঅন আপঅন আইথে ভালা নিখরি রে দেখঅলা
মগঅল রাজাক বোটা ভালা খড়হু দুবরাজঅ
হাঁগকার দেইএ কহি উঠলাক সভেকাকর মাঝঅ
মঁই আগু ঠেসঅম ভালা হামঅর পাইড় আউঅলি
বাকিরা সভে আউবেহে আরঅ জখন জাকঅর পালি
মসিআনি দেই গেলাক কুঁআক পাস হউ॥

সান দেখাইকে দুবরাজ ভালা সাঁচি ছুটআ খেলা
পাস জাইএ আরঅ জখন এহঅ রে হুলকঅলা
কুঁআঁ দেখি খড়হু আরঅ পেছুআই রে ঘুরঅইএ
হামঅর তাইএ হেতি নেহি ডরৈঁ রে মরঅইএ
বাঘা লেখেঁ গরজি ভালা আগুআই রে দুবরাজঅ
খোঁখি লেখেঁ মচড়াই ঘুরেই জুটলেইক রে লকলাজঅ
ইধাঁউ খড়হু হারুলঅ হেউঅলঅ হউ॥

কানহু বিরা কুঁড়চে হেলা ভিতঅরঅ ভিতঅরঅ
পাইড় পাইএ আগুআলা ফুলাই রে গতঅরঅ
কুঁআটাকে হুলকি ভালা দিঅ রে নজঅরৈঁ
পেছুআই ঘুরঅল বিরা মরঅনেকর ডরৈঁ
সাঁউরু ধাঁউরু পেঁড়রি বিরাউ আগুআই একাএকি
পেছুআই ঘুরঅলা ভালা মরঅন কুঁআঁ দেখি

আউলেইক এবের লেউরি সাঁউরাক পাইড় হউ॥
সভেকাকঅর নজঅইর এবের লেউরি সাঁউরাক বাটেঁ
দুই ভাই গালমারঅত নিচিত এইরে বসি ঠাঁঠেঁ
কমঅরেক পিঁধঅন সাঁউরাঁই সাটি বাঁধঅল আঁটি
কুঁআসাল চলি গেলা উঠাউএলাই পাটি
কুঁআসালৈঁ পঁহচি লেউরাক এক ধেইআনে মনঅ
বুড়হাবাপ মাহামাঁইকে করঅইএ সৈঁউরঅনঅ

ঘুরঅলঅ কুঁআক চাইরঅ ধাইর হউ॥
কুঁআটাকে হুলকি সাঁউরাক রিঝঅল রে অনতঅরঅ
গাঝলাঁগ করি ঝাঁপুর মারেই কুআঁকর ভিতঅরঅ
নেগা হাঁথে পাটি ভালা এহঅ রে ধরঅইএ
হিল করি আরঅ ভালা পাটি রে মিরাইএ
দুম সবঅদেঁ পাটি আরঅ আনগাঁই গেলেইক গিরি
সেহঅ দেখি রাজারানি উঠলা রে সিহঅরি
সলগিকুন সাঁউরা কুঁআঁলে উঠঅলঅ হউ॥

কুঁআঁলে উঠলেইক রে পাটি রানিকর ঘেরঘেরি
একঅর বাদে করতি কিনা লাগি গেইল গুমঅরি
টুইএক বাদেঁ রানিঁই কহেই আরঅ জে পন আহি
সিরাই নিহি এখন হামঅর পনেকেরি পাহি
সভেকাইএ সূনা ভালা এহঅ রে পন করা
সুনিকুনে মনে মনে সাঁচি দেখবেহে তরা

সেহঅ পন নহেইক হুলকা ফুলকা হউ॥
রানিঁই কহেই কুলহিঁই গাডঅল আহেইক এক খামখুঁটা
খেইড়কা করে হেতঅন ভালা ভাঁগিকে রে উটা
অহঅ খেইড়কাঁই হামে আরঅ মুড়হি রে ভুজঅবঅ
তেল হরঅইদ মুড়হি ভালা সভেকে দেউঅবঅ
জেঁই পারতাক খামখুঁটা ভাঁগি খেইড়কা করে
অকেই করঅব বেটি দান সূনা সভে বরেন্

রানিক কথা সভেকাই সুনঅলা হউ॥
মগঅল রাজাক বেটা ভালা এহঅ রে উঠঅইএ
কুড়হাইর লেইএ খামখুঁটা আরঅ চটাউঅইএ
চটাই চটাই ঘামাঘরা গেলা জে রে থকি
এক চইলাউ ছড়াউএ লারঅল কুড়হাইর দেলেইক ফেঁকি
কানল বিরা সাঁউরু ধাঁউরু পেঁড়রি বিরা আরঅ
একে একে ঠেসি ভালা হারুল জে জাহারঅ

রাজারানিঁই মনে পাউলা বল হউ॥
পাইড় পাইকে সাঁউরা ভালা উঠলাক রে মনমনাই
পারতাক নঅ নিহি ভালা দেখঅত জে সভেকাই
আসি মন লহাক ফরি ধরিকুনে সাঁউরাঁই
খামখুঁটাক উপর ভালা দেলেইক হুমচি বাজড়াই
দরদরাই খামখুঁটা গেলি রে ফাটি চিরাই
খেইড়কা হেই গেলি ভালা ফাটি চিড়চিড়াই
একমুঠা খেইড়কা মাইঝাঘার ফেভড়অল হউ॥

খেইড়কা দেখি রাজারানি গেলা থথমথাই
সঁচঅত মনে হারি জাইহঅ এহঅ রে সভে কথাই
ভাগাউএকর উপাই কনঅ আরঅ টুঁড়হে হেতি
নিহিতঅ জে দাউনি ভালা দুখেঁ ডুবি জাতি
রিচিক সঁচি রানিই কহেই আহি আরঅ পনঅ
সেহঅ পন ভাঁগবেহে জেঁই তেঁহি রে মাহানঅ
অকেই দাউনি করঅব হামে দান হউ॥

হামঅর একঅ আরঅ ভালা আহি রে পখঅরি
সমবছঅর পানি আর পদদে রহেইক ভরি
সেহঅ পখঅরি ভালা ঝাঁটি জেঁই সুখাউতাক
হামঅর দুলারি দাউনিক বর অঁইএঁ রে গনাতাক
রানিই আরঅ হাঁগকার মারি এহঅ রে কহেই
এক বুঁদাউ পানি জেসে পখঅরিই নাহু রহেই

সেহঅ কথা সভেকাই সুনি রহা হউ॥

রানিক কথা সুনি সভে পখঅরি ডহরঅলা
মগঅল রাজাক বেটাই ভালা আগু রে পাইড় লেলা
কুলহিক মুড়াই খাপরা ডিঁগ এহঅ রে রহঅইএ
সভে বরিআতিকে ভালা আনে জে কহঅইএ
সভেকাকর সঁগেঁ খড়হুঁই খাপরা ধরি হাঁথেঁ
ঝাঁটিঝাঁটি থকঅল ভালা বল সিরালেইক গাতেঁ
হারিকুন হেসড়অ হেইএ গেলা হউ॥

পালি আইলেক কানহু বিরেক অকরঅ অহে দসা
সাঁউরু ধাঁউরু পেঁড়রি বিরা সভেকাই হাইভরসা
আধা করে লারঅল পানি সুখা তঅ ধুরেক কথা
তাগঅড় তাগঅড় সআঁগ জেসঅন হেলেইন জে লতা
ঘামিঘুমি সরঅ সপঅ মু কান গেলেইন সুখি
লাজ সরমে অরাক ভালা চইখ গেলেইন ঢুকি
পেছুআই ডাঁড়হালা সভে বিরা হউ॥

সাঁউরাকর পাইড ভালা এহঅ রে আউঅলঅ
লেউরিঁই তখন সাঁউরাকে সলহা রে দেউঅলঅ
পদদঅ পাতেঁ পাতেঁ ভালা পানি ভরি ভরি
গেঁঠিআই গেঁঠিআইএ দেবে জতঅনঅ রে করি
সাঁউরাঁই তখন পখঅইর ঢুকি অহঅটাই করঅইএ
পদদঅ পাতেঁ পানি ভালা এহঅ রে ভরঅইএ

পখঅরি তঅ সুখাইএ গেইল হউ॥

পখঅরি তঅ সুখি গেইল একঠপাউ নি পানি
একঅর বাদেঁ কিনা বুইধ করতি জে রে রানি
কহে লাগঅল পদদঅ পখঅইর ভরে হেতেইক ঘুরি
তবে তঅ দান দেবঅউ এহঅ দাউনি রে কুঁঅরি
তখন সাঁউরাই কইটা উঁড়রা ফাভড়াইএ আরঅ দেলেইক
গটা কুলহিঁই একহাঁঠু পানি বহে রে লাগঅলেইক

পদদঅ গাঁইট খলি পখঅরি ভরাই দেইল হউ॥

সভেকাই দেখঅলঅ ভালা থিথাইকে নজঅরেঁ
পদদক পানিঁই ভরঅল পখঅইর আগুর নিঅরেঁ
অহঅ খনে কলাবতিঁই আরঅ কহলেইক হাঁকি
আরঅ একঅ পন হামঅর আহি জে রে বাকি
জদি ভালা বাঘেক দুধ আনে রে পারঅবে
তবে হামঅর দাউনিকে এহঅ রে পাউঅবে

বাঘেক দুধেঁ গুআটিকা করঅব হউ॥

পাঁচ বরেঁ কথা সুনি এহঅ রে চলঅলঅ
বনঝাড় গাড়হা টঁড়হাঁই টুঁড়হি রে বুলঅলঅ
বাঘ তঅ ধুরেক কথা সিআর লাকড়া খেঁখি
কনঅ কিছুক সঁগে নেহি হেলেইক দেখা দেখি
টুইমুল টাইমুল হেইএ সভে ঘুরঅল নিরাস মনে
হারুল হেলা পাঁচ বিরা রানিক পন পুরঅনে

সভেকর মু কান সুখি গেইল হউ॥

লেউরি সাঁউরা দুই ভাই গালমারঅত বসি
সভে বরেক মনেক বাইড় গেলাহেইন রে ধসি
সাঁউরাই কহেইক জাই দাদা বাঘেক দুধ রে আনে
বাপেঁ জাই চরাউএইন গরু কারি পিঁপঅড় বনে
বাপেক সঙ্গে বাঘমামাক আহেইক বেড়ে ভাবঅ
অহিঁ পুরঅন করি দেতাক সেহঅ রে অভাবঅ

বাঘেক দুধ মঁই আনেলাই চলঅলঁ হউ॥

বাউ বেগেঁ কুদঅইএ এহ সাঁউরা রে বিরঅ
বাঘেক দুধ আনেই হেতি মনে করেই থিরঅ
কারি পিঁপঅড় বন ভালা পঁহচিএ রে গেলা
বাঘমামা কহি আরঅ হাঁকঅ রে পাড়অলা
সাঁউরাকর হাঁকে বাঘা ডরেঁ গেলাক সুখি
নেজ গুটিআই সুঁইখে ভালা এহঅ রে দেলেইক ঢুকি
সঁচেই মনে আউলাহে কন বির হউ॥

কতেক ধাঁউ ডাকঅইএ সাঁউরাই বাঘা নি আউঅইএ
তখন আরঅ সুঁইখে পাস এহঅ রে জাউঅইএ
বাঘমামা বাঘমামা ডাকেই ভালা জতেক
ডরেঁ বাঘা সুঁইখে ভিতঅর সামহাই লাগেই ততেক
সাড়া নাহ পাইকে সাঁউরা এহঅ রে সঁচঅইএ
মামা বধহই সুঁইখে ভালা নেহি রে রহঅইএ
কিনা করঅত বুঝি নি পাউঅই হউ॥

সুঁইখে আরঅ উপঅর বাটেক এহঅ রে ভুলুকে
মুড় বাহারাই বাঘা এবের দেখঅইএ হুলকিকে
বাঘাকেরি মুড় সাঁউরাক ভেঁটঅলঅ নজঅরেঁ
বুরো পারঅল আহাত মামা সুঁইখেকর ভিতঅরেঁ
তখন আরঅ সাঁউরাই ভালা ডেরি নাহ করি
ঘঁসড়াই বাহারাউঅল বাঘকে টানি নেজে ধরি
দুখানিই বাঘাই করেই অবাপ মঁই হউ॥

বাঘাঁই তখন সাঁউরাকে কহঅইএ বচঅনঅ
কিআ দসেঁ তরা মকে দেইহা রে সাসঅনঅ
সাঁউরাঁই কহেইক ডাকি ডাকি হেলঁ থকাথকি
হামঅর হাঁক সুনি আরঅ সুঁইধে দেইহাক ঢুকি
বাঘাঁই কহেই মাইরি ভেইগনা গুটিআই রহঁ ডরেঁ
বাছে কনঅ দস ভালা দেখঅলাইহা হামঅরেঁ

কহা ভেইগনা কিনালাই আউলেহে হউ॥

সাঁউরাঁই কহেইক বাঘেক দুধেক দরকার জে হামঅরি
সেহঅ খাতির আউলাই ভালা পাস জে তহঅরি
সভে কহি দেলেইক ভালা আনারঅ বানারঅ
জেহঅ লাইএ আউলাহে ভালা বাঘমামাক ঘারঅ
ভেইগনাক কথা সুনি বাঘা এহঅ রে গরজঅলঅ
সাত সঅ বাঘ বাঘিন তুরুত জড়অ রে হেউঅলঅ

সাঁউরাকে ভালি সভেকাই রহঅলঅ হউ॥

বাঁড়িআ বাঘেঁ তখন ভালা সুনাউএইন সভেকে
এরা মর ভেইগনা হেকঅত ভালিহাক না এরাকে
বাঘেক দুধ খজঅলাহেইক এহঅ রে এরাক সাসেঁ
সেহঅ খাতির ভেইগনা ভালা আউলা হামঅর পাসেঁ
বাঘেক দুধ নি লেগঅলে বোটি দেতেইক নেহি
সেহঅ কথা সভেকাইকে দেইহন হামে কহি

চালা সভে জাব সিলঅই নগঅর হউ॥

সাতসঅ বাঘ বাঘিন ভালা রাজি রে হেউঅলা
সাঁউরা বিরেঁ মনে মনে বলঅ রে পাউঅলা
বাঁড়িআ বাঘেঁ কহেইক ভালা এহঅ রে সাঁউরাকে
হামঅর পিঠেঁ চঘা ভেইগনা কহেইহন তরাকে
সাঁউরা তখন বাঘমামাক পিঠেঁ রে চঘঅলঅ
সভেকাই সিলঅই নগঅর এহঅ রে ডহরঅলঅ

ডহঅরেঁ তঅ ধুরা উড়ি জাই হউ॥

বাঘ বাঘিন সিলঅই নগঅর এহঅ রে পঁহচঅলা
সেহঅ দেখি গাঁউএক লক চমকি রে উঠঅলা
ডরোঁ অভড়া অভড়ি ভালা পারাত জেজাহারঅ
আগুড় লাগাই হুঁড়কা দেইএ সামহাত আপঅন ঘারঅ
ডরোঁ থরঅ মরঅ ভালা নিকাস নেহি রাগোঁ
সিলঅই নগঅর ভরি গেইল এহঅ রে বনেক বাঘোঁ

সেহঅ দেখি লেউরিঁই ডাকলেইক সাঁউরাকে হউ॥
বাঘেকেরি গঠ লেইএ সাঁউরা রে পঁহচঅইএ
রানি কলাবতিঁই ভালা দেখি রে সঁচঅইএ
এতেক এতেক বাঘ সাঁউরাঁই আনঅলঅ রে ডাকি
জেসে লক নহে ই জে বুঝেইতে নি বাকি
সাঁউরাকেই বেটি দেবেঁই করঅবঅ রে জামাই
রাজাক কানোঁ মনেক কথা দেলেইক আরঅ সুনাই

জানকু রাজাউ রাজি হেউঅলঅ হউ॥
রাজা রানিঁই তখন ভালা ডাকিকে সাঁউরাকে
কহে লাগঅল দাউনি দান করঅব জে তরাকে
হামরাক বিড়অনিঁই তরা হেলাইহা জে মিরঅ
গরিব হেলঅউ হেকিহা ভালা বিরেকেরি বিরঅ
বাঘগিলাকে পাঠাই দাহান জাত অরা বনঅ
অরাক ডরোঁ ঘার ভিতঅরোঁ লুকالا লকজনঅ
বাহারে তঅ কেহু নি দেখাত হউ॥

লেউরি সাঁউরা দিঅভাইএ করে লাগঅল সলহা
ভজ খাইএক আসোঁ বাঘ বাঘিন সভে জে আউলা
বিনা খাউআই পাঠাই দেউআ নহেইক উচিত কামঅ
হামরাকর সঁগে তরাকরঅ হেতঅহন বদনামঅ
দিঅ ভাইএঁ ফদড়ে লাগঅল রাজা রানিক ঠিনোঁ
বিনা খাউআই বাঘা বাঘিন পাঠাই দেলে বনোঁ
গরবিচার হেতেইক দেখা সঁচি গউ॥

রানিই কহেই কথাটা তঅ কহঅলাইহা খাঁটি
কহা তবে এরাকে ভালা কিনা দেবেইন বাঁটি
সাঁউরাই কহেই ভজ খাইলাই আউলাহাত এখরা
কিনা খাই দেবাহান উটা বুঝি দেখা তরা
রাজাঁই কহেই খঁধড়ি ভরঅল আহাত রে ছাগঅরি
ছাগঅইর মাসেঁ দেহান ভালা টঁড়া ভরাভরি

তাকঅর বাদেঁ পাঠাই দিহান বন হউ॥

জানকু রাজাক হুকুম পাইকে এহঅ রে সাঁউরা বিরেঁ
ছাগঅইর খঁধড়িক আগুড় খলি ডাঁড়াই অসঅসিরেঁ
একটি একটি ছাগঅইর ধরি বিহলাউএ লাগঅলঅ
বাঘ বাঘিনে টঁড়া ভরি ছাগঅইর মাস খাউঅলঅ
বাঁড়িআ বাঘাঁই কহেইক এবেইর এহঅ রে সাঁউরাকে
হামরা তবে বন জাইহ বিদাই দেঁ হামরাকে

সাঁউরাই তঅ বিদাই জানাউঅল হউ॥

সভে বাঘ বাঘিন চলি গেলা এহঅ রে বনবাটেঁ
লেউরি সাঁউরা দিঅভাই বসলা বেজাঁই ঠাঠেঁ
গাঁউএকর লকজন ভালা বাহারাত আগুড় খলি
গালমারঅত ডরেঁ ডরেঁ কুলহি ডাঁড়ি ভালি
রাজা রানিই বিহাক ভালা করঅত রে তড়ঝড়অ
রাজাঘারেঁ গাঁউএক লক হেই গেলা রে জড়অ

দাউনি সাঁউনিক বিহা দেখেলাই হউ॥

রানি কলাবতিঁই আরঅ দাউনি আর সাঁউনিকে
বিহাক নেগ উচরাউলি তেল হরঅইদ মাখাইকে
তাকঅর বাদেঁ চাইরঅ লককে বর কেনিআই সাঙেঁ
পাসেঁ পাসেঁ বসাউলেখিন সভেকাকর মাঝেঁ
দাউনিক সঁগ লেউরি আর সাঁউরাক সঁগে সাঁউনি
মালা বদঅল হেই গেলেইক বিহাক নেগ রে মানি
রিঝেঁ রঁগেঁ বিহা নিপটঅলেইক হউ॥

বাঘেক ডৰেঁ পেঁড়রি বিরা রহেহেলাক লুকাই
আইকুনেঁ দেখেইস বিহা দেলাহেথিক রে চুকাই
রাগেঁ গরগরাই আরঅ দাঁতঅ রে চিভঅইএ
লেউরি সাঁউরাই বিহা করি মকে রে ভাঁড়অইএ
এহে সালারাকে হামে এহঅ রে মারঅবঅ
কাকরঅ কথাই ভালা নেহি রে ছাড়অবঅ

মুহেঁক মাস লুটি লেলা মর হউ॥

মহল ভিতর রহি গেলা বরঅ রে কেনিআই
দিঅ বেটিক বিহাঁই রাজা রানি গেলা রিঝাই
বাপ মাইকে জানাউএ হেতেইক হ্বেকর বানারঅ
লেউরি সাঁউরাক অকবকি ভালা কখন জাতা ঘারঅ
বিরেক তাখঅড় দেখাই আরঅ পিঠঅইএকর দুলাড়
গনাতা রাজাকর জামাই গুনেমানে রে পাহাড়

দিঅ ভাইএক ভাইগ বদলি গেইল হউ॥

পেঁড়রি বিরেক রাগেঁ ভালা জরেইক গটা দেহি
দাউনি সাউনিকর বিহা মানে পারেইস নেহি
সঁচেই মনে রাতিঁই হামে সাতসঅ ফউদ আনঅবঅ
লেউরি সাঁউরাকে আরঅ এহঅ রে মারঅবঅ
জেসন সঁচা তেসঅন কাম রাতিকর ভিতঅরঅ
সাতসঅ ফউদ লেই আউঅল সিলঅই নগঅরঅ

হাঁগকার মারঅইএ ঘনে ঘনে হউ॥

কাকরঅ হাঁথেঁ চিহঅড় পাটঅইন কাকরঅ হাঁথেঁ ফরি
চখঅ চখঅ হাঁইথার নাচাই দেখাত বিরঅমবিরি
রাজাঘার কনঅ ফউদ সামহাই নেহি পারঅলা
তখন আরঅ পেঁড়রি বিরেঁ বুইধ রে ঠানঅলা
গটা গাঁউএক গরু ভালা খলি রে লেগঅলঅ
আপনঅ মনে আরঅ সঁচি রে দেখঅলঅ
লেউরি সাঁউরাকে চরা কহবেথিন লকেঁ হউ॥

লেউরি সাঁউরাকে তখন গাঁউএকেরি লকৈ
মারাপিটা করবেখিন ভালা গাছেঁ রে বাঁধিকে
তখন হামে দাউনি সাঁউনি লেইএ রে জাউঅবঅ
সাতঅ তিরিআক ভালা সঁইআ রে হেউঅবঅ
সিলঅই নগঅর হেতি ভালা হামঅরঅ অধিনেঁ
ধনে মাইনে গনাম সভে দেসেক রাজাক ঠিনেঁ

মাহাবির নামে বিতাউঅম জিনগানি হউ॥

সাত সঅ ফঅউদেঁ ফাঁকা করি দেলখিন রে গহাইলঅ
হেঁচঅক মারি খলি খলি আগুডেকর ঝাইলঅ
গটা নগঅরেক গাই গরু ডহরাইএ রে দেলা
কুলহিক মুড়া সভে ফউদ পঁহচিএ রে গেলা
কুলহি মুড়াই রহেই আরঅ একঅ তাঁতি বুড়হি
লুগা বুনঅইএ ভালা টানি সুঁতাক নুড়ি

অকঅর দুইটি গাই জে রহঅথিক হউ॥

ফউদ আরঅ তাঁতি বুড়হিক গহাইল সামহাইকে
দিঅ গাই লেই জাখিন এহঅ রে খলিকে
বসি বসি কাঁদেই বুড়হি করতি কিনা একা
হানতা দেলে বাছেঁ অরা করতা আউড়ি ফেঁকা
জিউএকর ডরেঁ ভালা রহলি রে গুটিআই
ফউদেক হাঁথোঁ চলি গেলা এহঅ রে দিঅ গাই

দিঅ গাই বুড়হিক রহঅত ঘারেক ধন হউ॥

মহঅলেক ভিতঅরেঁ লেউরি নিচিতে নিদাই
সুখেকর বিছঅনাঁই ভালা এহঅ রে নিধিঁধাঁই
মাঝ রাইতেঁ গরাম মাঁইএঁ দেলেইক রে ঘুম ভাঁগাইএ
ভাব রূপেঁ কহে লাগঅল জতঅনে রে জাগাইএ
সুনে বাছা পেঁড়রি বিরেঁ সাত সঅ লক রে ডাকি
গটা গাঁউএক গাই গরু লেই জাহেইন টেকি

বিহানে চরা কহবখুন তরাকে হউ॥

তখন আরঅ লেউরি ভালা এহঅ রে উঠঅলঅ
গরাম মাইকে হাঁথজড়ি নমঅ রে করঅলঅ
বুড়হাবাপ মাহামাইএঁ সৈঁউরি এক ধৈইআনে
মহল ছাড়ি বাহারালাক সভেকর অজানে
কুলহিক মুড়াই পঁহচি ভালা এহঅ রে দেখঅইএ
বসি বসি তাঁতি বুড়হি আঁড়রাই রে কাঁদঅইএ
লেউরিকে বুড়হিই সভে কহি দেইল হউ॥

বুড়হিক ঠিনে টেঁপ লেইএ লেউরি রে তখঅনঅ
বাউবেগে কুদে লাগঅল বাঘা রে জেসঅনঅ
পেঁড়িরিকে জাইএ ভালা এহঅ রে টেকঅইএ
বাঘা লেখৈ আরঅ ভালা রাগৈ রে হাঁকঅইএ
আগু তরা মকে এখঅন লড়হিকে হারাউবে
তাকঅর বাদেঁ গাঁউএক গরু লেইএ রে জাউঅবে
হাঁগকার দেইএ কহঅলঅ অরাকে হউ॥

সেহঅ খনে পেঁড়রিই ভালা হুকুম করি দেলা
সাত সঅ ফউদ লেউরিক সঁগে লড়হে রে ঠেসঅলা
চখঅ চখঅ পাটঅইন ভালা ছাড়ে রে লাগঅলঅ
লেউরিই তখন ঢাল টেকা এহঅ রে দেউঅলঅ
সভে পাটঅইন ঢালে টেকাই গেলা খাঁড়াই খাঁড়াই
লেউরি বিরা ঢাল ধরি রহলা রে ডাঁড়হাই

কনঅ পাটঅইন গাতে নেহি লাগঅই হউ॥
ফউদরাকর কাঁড় ভালা সভে সিরাই গেলা
কাকরঅ হাঁথৈ একটিঅ আরঅ বাঁচি নি রহঅলা
কিনা লেইএ লড়তা এবৈইর এহঅ রে লেউরিক সঁগৈ
জেসে তেসে বির নহে উটা বুঝালা রঁগৈ টংগৈ
হাল বুঝি সভে ফউদ এহঅ রে জিউ লেইএ
জেজাহার পারালা ভালা খেই হৈঁরা হেইএ
পেঁড়রিক হাঁকেঁ কেউ নি ডাঁড়হালা হউ॥

লেউরিঁই এবের পৈঁড়রিকে কহেইক হাঁগকার ছাড়ি
আর কতেক হাঁইথার আহঅউ দেখাউএঁ চাঁড়াচাঁড়ি
তঁই এখন হামকে ভালা এহঅ রে মারঅবে
তাকঅর বাদেঁ হামঅর খেইল নজঅরেঁ দেখঅবে
পৈঁড়রিকর আরঅ ভালা খুড়ুক জাগঅল মনে
সাতসঅ ফউদ হারুল হেলা এহঅ রে জাকঅর ঠিনে
লেউরিকে ভাগা নহেইক অলঅঠ কাম হউ॥

আগুপেছু সাঁচি পৈঁড়রি ডরেঁ রে পারাইএ
জানিবুঝি কাহে আরঅ জিউটা হেঁরাইএ
পেছুঁই পেছুঁই লেউরিঁই তখন রগদেইক রে পৈঁড়রিকে
গাই গরু সেহঅ দেখি পারাত রে ভিড়কিকে
লেউরিঁই এবের গাই গরুকে আড়হাইআ সাঁপ দেলেইন
আড়হাই দিন বাদেঁ ভালা উঠেক কথা কহলেইন

আড়হাই দিন কুলহিক মুড়াঁই বসি রহবেহে হউ॥
মুড় ঘুরাই পৈঁড়রি বির পারাই জিউমুড় জাঁকি
রগদি রাখেই লেউরি বিরাঁই রাগাইকুন জে হাঁকি
রগদা রগদি হেইএ দিঅ পৈঁড়রিক গাঁউ পঁহচঅইএ
ধম ধম সবঅদেঁ ভালা মাটি রে কাঁপঅইএ
পৈঁড়রিঁই আপঅন ঘারেক আগুড় ঠেলেইক রে ধাড়াসেঁ
হেঁসরনি আর কাঁপঅনি ভালা জিউ বাঁচাউএক আসেঁ
হড়বড়াই আপঅন ঘার সামহালা হউ॥

পৈঁড়রি বিরেক পাঁচ বহুঁই দেখঅত রে নজঅরেঁ
কাকঅর ডরেঁ সঁইআ ভালা পারাই আউঅল ঘারেঁ
হামরাকর বহিনকে সঁইআই গেরঅহত আনে
জর ধরি বিহা করি জামাইএকর মানে
সেহঅ লকটা কাকঅর ডরেঁ পারাই রে আউঅলা
চুটিআক লেখেঁ ঘার ভিতঅরেঁ এহঅ রে মুদ লেলা
কেথিক লাইএ সঁইআক দসা এসঅন হউ॥

সেহঅ খনে লেউরি ভালা পঁহচিকে দুআইরেঁ
হাঁগকার মারে লাগঅল আরঅ বাঘাকে নিআরেঁ
কাঁহাঁ লুকাই আহিস পেঁড়রি ঘার ছাড়ি বাহারাঁই
কতেক বড়অ হেকিস বির দেঁ মকে এখন হারাই
তকে আইজ মারবে করঅবঁ নেহি রে ছাড়অবঁ
কিরা খাই আউলাইঁ হামে তর লছক টিকা লেবঁ

তবে হামে পানি পিঅম হউ॥

পেঁড়ু রাজাক পাঁচ বহঁই লেউরিকে রে দেখি
ডরেন্ ডরেন্ পুঁছে লাগঅই আগদুআরা টেকি
কনে হেকিহা কাঁহাঁক হেকিহা কথা হামরাক পাসেঁ
সঁইআকে মারেলাই খজিহাক এহঅ রে কিনা দসেঁ
লেউরিঁই কহেই সেহঅ কথা নাহু পুঁছি মকে
পুঁছিলিহাক জা তরা আপঅন রে সঁইআকে

হামঅর কথাই নি হেতঅন পততুক হউ॥

পেঁড়রিকর পাঁচ বহঁই তখন কহঅল কাঁদি কাঁদি
তরাক কথাই পেতিআব হামরা নেখেইক কনঅ ধাঁধি
লেউরিঁই এবের একে একে কহেই ঘটঅল কথা
পাঁচ সতিন সুনি সুনি পাউলা বড়ি বেথা
মেনেক তখন কহে লাগঅল এহঅ রে নিকাস গাড়ি
সঁইআঁ মরাই দেলে হামরা সভে হেউঅব রাঁড়ি

এসঅন দুখা সহঅব কেসঅনে হউ॥

লেউরিঁই কহেই কিরা হামে খালাইঁ জখঅন
পেঁড়রিকর রকঅতেক টিকা লেবে করঅম এখঅন
পাঁচ সতিন দুআইর ছেঁকি এহঅ রে ডাঁড়হালা
লেউরিঁই কহেই কনঅ হানতা মানঅম নিহি ভালা
পেঁড়রিঁই তখঅন থিড়কিঁই আঁগুর বাহারাই জে রে দেলেইক
সঁগেঁ সঁগেঁ লেউরিঁই সেহঅ আঁগুর কাটি লেলেইক
কাটঅল আঁগুর গেঁঠিআই লেউরি ডহরঅলঅ হউ॥

জানকু রাজাক মহল লেউরি এহঅ রে আউঅইএ
বাচনিক ডেরাঁই ভালা আরঅ এহ রে সামহাইএ
বাহারাতে নি দেখলা কেহ সামহাইতকেউ নেহি
সুগুম রহি গেলা বির কাকঅউ নি কনঅ কহি
জখন আরঅ বিহান ভালা এহঅ রে হেউঅলঅ
গটা গাঁউএক লকজন সভেকাই জাগঅলঅ

দেখলা কাকরঅ গহাইলে একঅ গরু নেখঅত হউ॥
গটা গাঁউএক গহাইল ভালা হেই গেলাহেইক ফাঁকা
চঁচাচঁচি খজাখজি করঅত ডাকাহাঁকা
সভেকাকর মুহেঁ মুহেঁ একেটা রে বলি
কনে হামরাক গাই গরু লেইএ গেলা খলি
কাঁহাঁলে জে আউলাক ভালা চরা রে এসঅনঅ
মুড় ধরি ভাভে লাগঅত গাঁউএক লকজনঅ

একে রাইতেঁ গাঁউএক গহাইল সুধা হউ॥
হরেক নিঅর ফদড়ে লাগঅল এহঅ রে সভেকাই
গরু চরিক দুখ ভালা সহঅলে রে নাহ জাই
কেহ কেহ কহে লাগঅল চালা রাজাঘারঅ
জাইকুনে জানাই দেউএ হেতেইক জে বানারঅ
তখন গটা গাঁউএক লক এহঅ রে ডহরঅলা
রাজাঘারেক দুআইরেঁ ভালা সভেকাই জহড়অলা
রাজাকে তঅ ডাকে জে লাগঅলা হউ॥

গাঁউএক লকেক হাঁক সুনি জানকু মাহামানি
মহঅল লে বাহারালা ভালা ঘারেক কেবাড় টানি
পুঁছে লাগঅল কিনা বানার এহঅ রে বিহানে
গাঁউভাঁগি আউলাইহা হামঅরি ধেইআনে
গাঁউএক লকেঁ কহে লাগঅল ঝরঅঝরঅ লরেঁ
গটা গাঁউএক গরু ভালা লেই গেলথিন জে চরেঁ
সভে গহাইলেক আগুড় তাড়িকে হউ॥

এহঅ কথা সুনি রাজা আসমান লে গিরঅলা
গাঁউএক লকেঁ কিআ আরঅ কথা রে পাড়অলা
হামঅর নগঅরোঁ কেহু কাকরঅ কুঁটা নিহি ছুঅত
গাই গরু চরি হেলা এহঅ রে কিনা বকঅত
কনঅ দিনেঁ কনঅ কালে হামঅর এহে দেসেঁ
জেহঅ ঘটঅন ঘটেইক নিহি ঘটলেইক আজু কেসে
রাগেঁ দুখেঁ রাজা মরি জাত হউ॥

তখন আরঅ গাঁউএক লকেঁ কহলেথিক রাজাকে
কন দেসেক ভুখলা জামাই আনলেসিন জে ঘারকে
তহর জামাইরা গরু ভালা করলাহেথিন চরি
রাগেঁ আর রুসেঁ রাজা কহেইহঅ জর ধরি
আপঅন বিচারেঁ রাজা সাঁচি দেখেঁ মনে
এসন ঘিসঅট কাম ভালা করতা আর কনে

তঁই এবোঁইর মানেঁ আর নাহু মানেঁ হউ॥
সেহঅ খনেঁ লেউরি সাঁউরা মহঅল লে বাহারালা
গাঁউএক লকেক ভিড়েঁ ভালা এহঅ রে ডাঁড়হালা
লেউরিই কহেই কহা নঅ তরা কিনা বুঝিসুঝি
চরেক বদনাম হামরাক মুড়েঁ কাহে দেইহা গাঁজি
কিনা নিসান সবুদ আহঅন সুনাইআ হামরাকে
নি হেলে পেচটা ফুটাই দেবঅহন তহরাকে
একঅ লকেক বাঁচাই নি রাখবহন হউ॥

লেউরিকর কথাই সভে ডরেঁ গেলা সুখি
কন বাটেঁ হেঁরাই গেলেইক জতেক হুঁকাহুঁকি
জাখরা আরঅ ফুড়ুর ফাড়ার এহঅ রে করেহেলা
লেউরিক কথা সুনি আরঅ চুপসু হেইএ গেলা
কাকরঅ নেহি উঠেইন চউহা রহলা হেঁঠঅ মুড়েঁ
রগদানি খাই দলখুখড়ি লুকাত জেসঅন ঝুঁড়েঁ
এই অকঅর মু করঅত ভালাভালি হউ॥

সাঁউরাঁই আরঅ কহে লাগঅল সভেকে সুরুখুরু
কনে কহলঅহন হামরাই চরি করলাইহন তরাক গরু
অকঅর নাম সুনাইবেহে সভেকাকঅর পাসেঁ
তাকঅর বাদেঁ বিচার হেতেইক জেটা আহঅন আসেঁ
সাঁউরাক কথা সুনি সভে গাঁউএকেরি লকজনঅ
খেইটকা খেইটকি ফুসুর ফুসুর করঅত তখনঅ
কাকরঅ মুহেঁ কথা নি ফুটেইন হউ॥

সুগুম হেই গেলা সভে কাকরঅ নেহি সাড়া
হেঁরাই গেইল মটা বলি আরঅ রে হা ফাড়া
লেউরিঁই তখন কহে লাগঅল সুনাই বে বচঅনঅ
আগু রাইতেক গরু চরিক এহঅ রে ঘটঅনঅ
গটা গাঁউএক গরু জখঅন হেউঅত ভালা চরি
মইএঁ ছাড়াউলাহিঅন ভালা এহঅ রে চর ধরি

সেহঅ কথা সুনাই সভেকাই হউ॥

পেঁড়রি বিরাঁই জখন ভালা দাউনিকে নেহি পাউঅলা
রাতিঁই সাত সভ ফউদ লেইএ হরঅইদ বাজার আউঅলা
রাজাক মহল আরঅ জখন ঢুকে নিহি পারঅই
তখন অকর মুড়েঁ আরঅ কুবুইধ রে ধরঅই
ফউদ লাগাই গটা গাঁউএক গরু রে খলাইএ
হামরাকর মুড়েঁ জেসে দসটা রে লাদাইএ

এহেটাই হেকেইক সাঁচা কথা হউ॥

লেউরিঁই আরঅ সভেকাইকে দেলেইন ভালা কহি
মুহেক কখাঁই কেহু তরা পেতিআবেহে নেহি
সেহঅ খাতির পেঁড়রি বিরাক আঁগুরঅ রে কাটি
গেঁঠিআই রাখলাই হামে এহঅ রে আঁটি সাটি
এহে কহি খলি দেখাই গাঁইঠেকর বাঁধঅনঅ
মনেক গলঅদ ভাঁগি সভেক হেলেইন রে চেতঅনঅ
সভেকাই লেউরিকে সাবাইস করঅল হউ॥

জানকু রাজাঁই লেউরিকে পুঁছেইক রে এবেইরি
গরু চরি হেউএক কথা জানলেহে কেসে করি
মহঅল ভিতঅর রহেহেলিহা তহরা জে সুতি
কনে বানার দেলঅহন ভালা কথা তুরতা তুরতি
মহঅলেকর চাইরঅবাট লাগাউঅল রহঅইএ
কেসে করি মহঅল বাহার এহঅ রে হেউঅইএ

সেহঅ কথা সুনঅব তহরাক ঠিনে হউ॥

লেউরিঁই কহেইক মহঅল মাহান নিচিতে নিদাইএ
কাকঅর ডাকৈঁ জানঁ নিহি নিদঅ নি রে হেউঅইএ
কহে লাগঅল গটে গাঁউএক গরু হেউঅত চরি
তাকঅর মুলে আহে ভালা কাঁইচেলা রে পেঁড়অরি
জাঁই বাছা তুরুতে তঁই দেবসিন রে হানতা
তঁই ছাড়া অকঅর সঁগে কেহু নেহি পারতা

তরাকে চর সাজাউএক ইটা চাইল হউ॥

গাঁউএক লকেক ঠিনে লেউরি এহঅ রে তখনঅ
ফদড়ে লাগঅল একে একে গরু চরিক ঘটঅনঅ
ঘটঅনঅ সুনিকে সভে হাইটাটকা রে হেলা
পেঁড়ু বিরেক নামে ভালা ছি থু করে লাগঅলা
লেউরিঁই পেঁড়ুক কাটঅল আঁগুর কিনা মনে করি
লকেক বাটেঁ বিগি দেলেইক মনে রে বল ধরি

দেখিসুনি লেউরিকে সাবাইস করঅলা হউ॥

গাঁউএক লকেঁ কহে লাগঅল কহেঁ লেউরি বিরঅ
কাঁহাঁ হামরাক গাই গরু সুনাইএঁ সুসথিরঅ
লেউরিঁই কহেইন বুঝাইকুনে গাঁউএক লকেক কথাঁই
কুলহিক মুড়াঁই সভে গরু এহঅ রে আহাত গঠাই
আড়হাইআ সাঁপ দেইএ হামে রাখঅলাহিঅন বসাই
আড়হাই দিন উঠতা নেহি সাঁপানতঅক দসাঁই
চালা সভে দেখি সুনি লিহা হউ॥

লেউরিক কথা সুনি ভালা ছউআ লে রে বুড়হা
তুরুতে ইড়কি গেলা আরঅ এহঅ রে কুলহিক মুড়া
গরুক গঠ দেখি সভে রিঝাঅলা অনতরৈ
লেউরিকে সাবাইস করথিক গুনেকর আদঅরৈ
গনিগাঁথি দেখে লাগঅল গাইগরু আপঅনঅ
বিনতিরিজ হেউঅত নিহি আহাত জেসঅনেক তেসঅনঅ
লেউরিক গুনেঁ জানকু রাজাউ রিঝালা হউ॥

লেউরিকর সঁগে রাজা মহঅলে ঘুরঅলা
রানিকে আরঅ সভে কথা রে জানাউঅলা
লেউরি সাঁউরাক গুন রানিক মনে রে ধরঅইএ
গুনেকেরি জামাই দেখি মনঅ রে ভরঅইএ
আদঅরে জতঅনে ভালা করে লাগঅল মানঅ
কনঅটাই খামতি আরঅ নিহি রে এক ধানঅ
রাজা রানিক হরখঅলঅ মন হউ॥

জানকু রাজাই কহেই কথা সুনেঁ কলাবতি
একঅর বাদেঁ বেটি জামাই বিদাই করে হেতি
রানিই কহেই এসে এসেই দেবেইন কেসে বিদাই
রাজাঘারেক মান খাতির জাতেক সভে মিলাই
ঢল পিটি জানাই দিহান গটা রে নগঅরঅ
রাজাঘারেঁ ভজ হেতেইক বড়ি রে ডাগঅরঅ
গটা নগঅর নেউতি দিঅন হামরা হউ॥

রানিক কথা সুনি রাজাক মনে রে ধরঅলঅ
বেইস বেইস করি ভালা মুঁড়অ জে লাড়অলঅ
ভজেকর আড়াপাটা করঅলঅ জতঅনে
নেউতা আরঅ ভেজলা ভালা সভে লগেক ঠিনে
ছউআ বুড়হা আদি করি আউলা রে গড়সাপটা
মাসভাত ভজ খালা এহঅ রে লুলহআ চাটা
রাজা ঘারেক ভজ কহি কথা হউ॥

ভজ খাইকুন গাঁউএক লগ সভেকাই ঘাৰ গেলা
রাজারানি বসি আরঅ গালমারে লাগঅলা
রানিই কহেই সুনী রাজা কহেইহন তরাকে
নিফিকির হেলিঅ হামরা বেটিক বিহা দেইকে
লেউরি সাঁউরাক হাঁথৈঁ বেটি দেলিঅন দানঅ
গুনেমানে দিঅভাই আহাত অমানঅ সমানঅ

দিঅবেটি রহতা একেটা সঁগসারে হউ॥

রাজাই কহেইক ঠিকে কথা कहলে তঁই রানি
একে সঁগে রহতা ভালা দিঅ রে বহিনি
রানিই ঠানেই দিঅ জামাইকে ঘাৰ জামাই জে রাখঅব
জামাইরাকর ঠিনেঁ ভালা এহে কথাটা ফদড়অব
লেউরি সাঁউরাক ঠিনে জখন এহঅ রে कहঅলঅ
দিঅ ভাইএঁ মুড় হিলাই নিহি রে মানঅলঅ

অখরা তঅ নিহি রহতা ঘাৰজামাই হউ॥

রাজাকেরি বেটি ভালা জাতা সসুরঘাৰঅ
গাঁউএক লক আউলা সভে পাইকুন রে বানারঅ
রাজাকে কহে লাগঅল এহঅ রে গাঁউএক লকেঁ
তহঅর জামাইকে হামরা ভালা মনেকেরি সখেঁ
বাহাননঅ হাজার গাইগরু দেবেইক জে চুমানঅ
এহে দেইএ রাখঅব ভালা বেটি জামাইএক মানঅ

সেহঅ দেইএ বিদাই করিহিন হউ॥

গঠ গরু দান পাউঅল এহঅ রে লেউরি সাঁউরাঁই
আরঅ এক পন করঅল নেগ খির ছুআঁই
কহে লাগঅল এতেক পন ভাঁগলিঅ তরাকরঅ
একটা পন আহি ভালা এহঅ রে হামরাকরঅ
সেহঅ পন পুরুন বিনু খির নেহি ছুঅবঅ
হেরিহর ঘড়া ভালা দুই ভাইএঁ লেউঅবঅ
সুনী সাসু সুনী সসুরা হউ॥

লেউরি সাঁউরাক কথা সুনি রানি কলাবতি
সঁচে লাগঅল এখঅন ভালা কিনা করে হেতি
হেরিহর ঘড়া এখন কাঁহাঁ রে পাউঅবঅ
কাকঅর ঠিনলে আনি ভালা জামাইকে দেউঅবঅ
হেরিহর ঘড়া ভালা নেখি হামরাক ঠিনেঁ
এসঅন ঘড়াক নাম নেহি সুন এতিদিনেঁ

রাজাকে কহঅল মনেক কথা হউ॥

রাজা রানি বসি বসি গালমারে লাগঅইএ
কেসে করি রাজমাইন এহঅ হে রহঅইএ
দিঅ লকেঁ গরাম মাইকে করঅইএ সেঁউরনঅ
গরাম মাইএঁ আসিস ভালা দেলেইন জে দানঅ
দিসা জাগাই কহি দেলেইন সাতসঅ ঘড়া মাঝেঁ
হেরিহর ঘড়া আহে ভালা বড়ি সুঁদর সাজেঁ

বাছিকে করিহান জামাই দান হউ॥

রানি কলাবতি তখন আসিস দিসা দেখি
কহে লাগঅল জামাইরাকে আদঅর করি ডাকি
হামরাক সাতসঅ ঘড়া আহাত এহঅ রে ঘড়াসালে
হেরিহর ঘড়া আহে জামাই বাছি লেহাক ডাবলে
খির ছুইকে জাইহা ভালা কহেইহন তরাকে
আর নতঅই রুসিহা জামাই লাজ দেইএ হামরাকে

লেউরি সাঁউরাঁই খির ছুলা হউ॥

লেউরি সাঁউরা দিঅ ভাই রানিক কথা সুনি
কিনা করে হেতি ভালা দেখঅত ভাভি গনি
সাঁউরাকে ভালি লেউরিঁই এহঅ রে মুড় হিলাই
জাই কহলেইক আরঅ ভালা ঘড়া রে বাছেলাই
সাতসঅ ঘড়াক মাঝেঁ সাঁউরা এহঅ রে সামহাইএ
হেরিহর ঘড়া আরঅ বাছে রে লাগঅইএ

ঘড়া চিনহে নিহি পারঅই হউ॥

সাউনিই আরঅ পালান লাগাম লেগি রে দেউঅইএ
ঘড়া ডাভ মাহান সাঁউরাই বুঝি নিহি পাউঅইএ
কেসে করি হেরিহর ঘড়া এহঅ রে চিনহঅবঅ
কাকঅউ পুঁছে গেলে আরঅ লাজেঁ রে মরঅবঅ
হাঁথজড়অ করি এবের গরাম মাইকে সোঁউঅরি
কহে লাগঅল মনে মনে এহঅ রে নেহঅরি

দেঁ মাই হেরিহর ঘড়া চিনহাই গউ॥

গরাম মাই তখন ভালা সাঁউরাক মনে বসি
হেরিহরঅ ঘড়া দেখাই দেলেইক খড়হি চিসি
জেহঅ ঘড়াক মুড় চাঁদা এহঅ রে দেখঅবে
হেরিহর ঘড়া কহি অকেই রে জানঅবে
লাগাম লেইএ ঘুরেই সাঁউরা সাতসঅ ঘড়াক মাঝেঁ
মুড় চাঁদা বাছে লাগেই বাঁচে কথাক লাজেঁ

চিনহিকুন লাগাম বাঁধঅলঅ হউ॥

হেরিহর ঘড়াক মুড়েঁ লাগামঅ রে বাঁধি
চউকি চঘলাক ভালা বিরা জেসে নাদি
ঘড়াক পিঠেঁ চঘি সাঁউরা রাজাঘার আউঅইএ
দেখিকুনে সভেকাইএ সাবাইস রে দেউঅইএ
রাজারানিক মান ভালা এহঅ রে বাঁচঅলঅ
সাঁউরাকে দেখি লেউরিক মনঅ রে নাচঅলঅ

ভাইএক গুনেঁ গরঅবঅ জনমলঅ হউ॥

সসুর ঘার জাইএক খাতির দাউনি রে সাঁউনি
সাইথ করে লাগঅল ভালা দিঅ জে বহিনি
বাহাননঅ হাজার গরু আর লাখ মন ধন দেইএ
বেটি জামাই বিদাই করি রাজারানি হরথঅইএ
গুরুজনকে গড় লাগি ডহরঅলা বর কেনিআই
সঁগে চলঅত বরিআত সভে এহঅ রে বাজ বাজনাই
বিদাই হেলা ছাড়ি সিলঅই নগঅর হউ॥

চলেইতে চলেইতে ভালা আলহাইনা মুলুকে
পঁহচলা সভেকাই আরঅ মন নাচেইন লহঅকে
কচি কচি ঘাঁসেক বন হেরিহরেক আলঅ
বাহাননঅ হাজার গাই গরু চরে রে লাগঅলঅ
এসঅন মুলুক দেখি সাঁউরাঁই লেউরিকে জানাইএ
সাজলনতঅ হেরিহর ভুঁই ভালা বেজাঁই রে মানাইএ

হামি তঅ হিঁআই ঘার বাঁধঅম হউ॥

সাঁউরাক কথা সুনি লেউরিঁই কহেইক ভাভি গনি
ঠিকে কহঅলাহিস ভাই সাবাইস তর ঠানঅনি
এহে মুলুকেই রহেঁ তঁই এহঅ রে ঘার বাঁধি
সুখেই জে রহঅবে হিঁআঁ নেখেইক কনঅ ধাঁধি
হামে তবে চলঅলঁ ভাই এহঅ রে গউরা বাজার
মাঁই বাপকে জানাই দেবেইন সভে আনার বানার
লেউরি বরিআত লেই চলে লাগঅল হউ॥

উ বাটে সহদেবা বাজ বাজনাক সঁগে
আপঅন ঘারবাটে চলেই এহঅ রে রিঝেঁ রঁগে
কতিধুরঅ জাইএ ভালা দেখঅইএ নজঅরেঁ
কন বর বিহা করি ঘুরেই টহঅবরেঁ
জখন আরঅ মুহামুহি এহঅ রে হেউঅলঅ
পাস আই লেউরিকে ভালা দেখিকে চিনহঅলঅ
মসিক বেটা ভাইএঁ ভাইএঁ দেখাদেখি হেইল হউ॥

লেউরি আর দাউনিকে ভালা দেখি সহদেবাঁই
মনে মনে সঁচে লাগঅই এহঅ রে বেইস মানাই
টুএক বাদেঁ কহে লাগঅল এহঅ রে লেউরিকে
বিহা করে একে দিনে গেলিঅ বর সাজিকে
ডহঅরে তঅ দেখাদেখি এহঅ রে হেউঅলঅ
বরেঁ বরেঁ মালা বদঅল এহঅ রে করঅলঅ
সমাজেক রিতেঁ হাঁথবদঅল হেইল হউ॥

সহঅদেবা আর লেউরি ছাড়াছাড়ি রে হেউঅলঅ
আপঅন আপঅন ঘারবার্টেঁ এহঅ রে ডহরঅলঅ
চনদাকে দেখি লেউরিই মুড় রে দেলেইক ঘুরাই
মনেকর ভিতঅরেক দুখ ঘুরেইক চাঁউরাই চাঁউরাই
চনদাহঁ মু ভালা লুকাউলি আঁচঅরেঁ
গুমঅরি গুমঅরি কাঁদি চলঅইএ ডহঅরেঁ

মরঅমেক দুখ মরঅমে বিঁধঅইএ হউ॥

লেউরি তঅ গউরা বাজার এহঅ রে চলি গেলা
সাঁউনিকর সঁগে সাঁউরা আলহাইনাঁই রহঅলা
আলহাইনা মুলুকেঁ ঘার বাঁধঅল মনেক সুখেঁ
দসঅর কনঅ বসঅত ভালা দেখাইক নি মুলুকেঁ
চুমানেঁ পাউঅল গরুগঠ আর লাখ মন ধনঅ
এহে লেইএ সাঁউরা সাঁউনিক সঁগসারঅ জিবঅনঅ

গনালা আলহাইনাক বসগতিআ হউ॥

লেউরি আরঅ বাজবাজনাঁই আউঅল আপঅন ঘারঅ
রজঅলেকর নটুআ নাচেঁ মাতঅল গউরা বাজারঅ
গাঁউ সামহাল লেউরি ভালা রাজাক বোটি লেইএ
গরাম থান আর সভে থানে মুড়অ রে ঠেঘাইএ
বাজনা সুনি বুড়হা বুড়হিঁই মুহাউলা সারভারঅ
পুতঅহকে চুমাই বুড়হিঁই লেগঅই ছামড়া তরঅ
পিঠঅই লতাঁই বোটা পুতঅহ লেই নাচে লাগলা হউ॥

বিহাক নেগি বুড়হা বুড়হিঁই করে রে লাগঅলঅ
গাঁউএক আড় পড়াসি সভে আউএ রে লাগঅলঅ
কেনিআই দেখি সভেকাই হেলা জে হাইটাটকা
রাজাকর বোটিএ হেকি দেখাইক জে গড়হঅনটা
মাহারাই সুনেঁই জেঁই একঅ রে ধেইআনেঁ
দুখ নিহি আউএইক ভালা অকঅরঅ জিবঅনে
সুখেঁ দুখে ভাতে বিতঅইএ কাল হউ॥

চনদাকর ঘুরফেইর এহঅ রে হেউঅলঅ
আপঅন নইহঅরঅ ভালা ঘুরি রে আউঅলঅ
সাঁগিজুড়িই বেড়হি রাখঅল পুঁছঅত আনার বানার
কেসঅন সাস সসুর আরঅ কেসঅন রে সসুর ঘার
গাত ভততি গহনা চনদাক রুপেঁ আলঅ করি
ঘুরি বুলেই ঘার দুআইরেঁ নজঅইর করেই চরি
বনঁ মাঝেঁ জেসঅন ফুটঅল ফুল হউ॥

চনদাকে নাহ পাউএক দুখ ছতিআই গাঁথি
টাইমাল টুইমুল হেই বুলেই লেউরিকর মতি
গাঁউএকর বাহারে ভালা বুলেই একঅ দিনঅ
ভুখঅল সুখঅল রুপ আরঅ মুহঅ রে মলিনঅ
একঅ পেঁপঅড় তরেঁ ভালা এহঅ রে ডাঁড়হাইএ
আধ রউদা ছাঁহির ভালা আরঅ রে মেড়িআইএ
লেউরিক মন হেলাহেইক উদাস হউ॥

সহদেবা বিরা ভালা আউএই সেহঅ বাটেঁ
চনদাকে লেগেলাই আরঅ বড়ি জে রে ঠাঠেঁ
ডহঅর মাঝেঁ লেউরি সঁগ দেখা রে হেউঅলঅ
ভালঅ মঁদঅ খজপুছার হেউএ রে লাগঅলঅ
সহঅদেবাঁই কহেইক তবে জাইঁ সসুর ঘারঅ
তকে সঁগে করি হামে লেইএ জাবঁ আরঅ

আপঅনঅ তিরিআ আনেলাই হউ॥

এহঅ কথা সুনি লেউরিক হিআই রে বিঁধঅলঅ
কিনা কহঅম কিনা নেহি বুঝি নি পাউঅলঅ
নিহি নিহি করে লাগঅল এহঅ রে নিজেক বসেঁ
মনে সঁচেই চনদারাক ঘার জাম হামে কেসে
সহদেবাঁই কনঅ কথা সুনেই নিহি কানে
অকে তঅ লেগতেইকে ভালা এহঅ রে বহু আনে
জিগিড় ধরি রহঅলঅ খুঁটাক নিঅর হউ॥

লেউরিকে হাঁথোঁ ধরি সহঅদেবা বিরঅ
লেউরিরাক ঘার পঁহচি মন করেই থিরঅ
বহিন বেটাকে দেখি বুড়হিঁই এহঅ রে আদঅরোঁ
বসেলাই দেলেইক ভালা ঘারা রে ভিতঅরোঁ
কতেক দিন বাদেঁ বহিনবেটা আউলাক মসি ঘারঅ
পাসেঁ বসি পুঁছে লাগঅল আনারঅ বানারঅ

লেউরিঁই তঅ সুনেই ঠড়হুআই হউ॥

খাউঅন দাউঅনেকর বুড়হিঁই করেই আড়াপাটা
সহঅদেবাঁই সুনাই দেলেইক মনেকর কথাটা
সুনেঁ মসি এখঅন নিহি করঅম আহাৱ পানি
সসুরঘাৱ জাম হামে এহঅ রে এখঅনি
লেউরিকে সাঁগে আৱঅ লেলে রে জাউঅবঅ
সসুর ঘারেঁই দিঅ ভাইএ আহাৱঅ করঅবঅ

তঁই হামৱাকে বিদাই এখঅন দেবে গউ॥

সহদেবাক কথা সুনি লেউরিঁই রে নেহঅরে
কহে লাগঅল জাম নিহি সাঁগে জে তহঅরে
তর সসুর ঘাৱ ভালা তঁহিঁ একাই জাবে
বহনঅই সাঁগে আহঅউ ফাঁকেই মকে রে লেগঅবে
সহঅদেবাঁই জিগিড় ধরি কহেইক রে লেউরিকে
মর সসুর ঘাৱ আইজ লেগবে করবঁ জে তকে

মর সাঁগে জাই তকে হেতঅউএ হউ॥

সহদেবাক জিগিড় দেখি বুড়হিঁই পাড়েই কথা
লেউরিকর মনে দুখ ভালা নতঅই দিহিঁ বেটা
চনদাকে ঠানৱইহঅউক ভালা লেউরিকর কেনিআই
কহলা নেহি দেবেইক বেটি বাগালখাটাক বেটাঁই
সেহঅ দুখোঁ অহঅ ঘাৱ জাইএ নিহি খজেইস
মনেকর দুখানিঁই ভালা আইজঅ ই জে জৱেইস
হেলাহে জে খেপাকে নিঅৱা হউ॥

আপঅন মসিক মুহেঁ ভালা এহঅ কথা সুনি
সহঅদেবাঁই কহেই এবেইর এহঅ রে ভাভি গনি
সুনে মসি একঅ কথা কহঁ হামে তকে
মহিচাঁদেঁ জামাই আরঅ করঅলাহে মকে
হামে আরঅ লাগঁ ভালা তহঅর বহিন বেটা
চনদা তর পুতঅহুই হেলঅউ মানবে নঅ নাতাটা
কাঁহাঁ রহলেক মহিচাঁদেক ফুটানি গউ॥

বুড়িহঁই কহেই সুনে বেটা সভেটা বুঝঅহঁ
গঁগাদরি রানিক সঁগেঁ জড়িদার রে নহঁ
লেউরিকে সঁগে লেইএ গেলে বহু আনে
তর সাস সসুরে বাছা ভাভতা কিনা মনে
আগু পেছু তঁই একধাঁউ বুঝিসুঝি দেখেঁ
তাকঅর বাদে বহু আনে জাবে মনেক সুখেঁ
লেউরিকে তঁই কাহে লেগঅবে গউ॥

সহঅদেবাঁই কহেইক তবে দেখলাহঁ বুঝি সুঝি
তঁই কহেঁ মর কথাঁই হেলে নঅ নিহি রাজি
বুড়িহঁই কহেইক হামঅর বাছা কনঅ কহেক নেখি
সলঅ আনা রাজি আই নি রাখবঁ রে টেকি
লেউরিকে বুঝাই তঁই জাঁই রে বহু আনে
আসিস দেহঁ হিআভরি মানে রে গুমানে
সুখেক সঁগসারেঁ রহেঁ দুধেভাতেঁ গউ॥

সহঅদেবাঁই লেউরিকে কহেইক রে জর ধরি
চাঁড় চপঅট সাইত করেঁ হেই জাহেইক রে ডেরি
মসিক বেটা দাদাক কথা ধুনেঁ নি পারিকে
হঁ সিঁকার হেলাক লেউরি লারি রে পারিকে
সাইত করেই ভাভি ভাভি এধাঁউ কিনা হেতি
চনদাঁই দেখিকে আরঅ কিনা জে করঅতি
বাছে কনঅ পেঁচ উঠি জাইক হউ॥

লেউরিকর মাঁইএঁ এবের কহেইক রে লেউরিকে
সুনেঁ রে সুনেঁ বাছা কহঁ জে রে তকে
হামঅরি কহঅলঅ কথা লেবে বেটা মানি
চনদাকর হাঁথେঁ তঁই নিহি লেবসিক পানি
কনঅ খাইএক খাবে নিহি মহিচাঁদেক ঘারেঁ
সহঅদেবাকে পঁহচাই রাখি আউবে চাঁড়েমাড়েঁ

কনঅ গিরিপতানি নি সুনঅবে গউ॥

লেউরিঁই কহেইক ঠিকে আহেইক রাখঅম তর কথা
কথা কাটি তর মনে ভালা দেবঁ নিহি বেথা
দিঅ লকেঁ লতাকে আরঅ গড়অ রে করঅলঅ
মহিচাঁদেক ঘার বাটেক ডহঅর রে ধরঅলঅ
দিঅভাই চলে লাগঅল গালসালঅ রে করি
সহঅদেবাক মন আরঅ রিবেঁ রে ভরাভরি

পঁহচি গেলা সসুর ঘারেক দুআইর হউ॥

সহঅদেবা আগুঁই আগুঁই এহঅ রে সামহাইএ
তাকঅর পেছুঁই লেউরিঁই আরঅ গড়অ বাড়হাইএ
সামহাই গেলা সসুরঘারেক মাঝঅ রে আঁগঅনা
নউআ জামাই দেখে সভে করঅত আনাগনা
বইঠঅকিঁই আরঅ ভালা বসেলাই দেউঅলঅ
মসিক বেটা দিঅ ভাই এহঅ রে বসঅলঅ

লেউরিক তঅ লাগেইক ছেঁকঅ ছেঁকঅ হউ॥

সাস সসুরকে সহদেবাঁই গড়অ রে লাগঅলঅ
গুড়পিঠাক খালা ভালা ধরাইএ দেউঅলঅ
পানিক ঘটি লেইএ চনদা আউএই ধিরি ধিরি
লেউরিকে দেখি হাঁথেক ঘটি গেলেইক গিরি
কিনা করেই কিনা নিহি লাজেঁ মরি গেলি
গিরঅল ঘটি কুড়হাই চাঁড়ে এহঅ রে সেরিআলি
বাঘলাজা হেলি রাজাক বেটি হউ॥

সেহঅ দেখি লেউরিঁই আরঅ মুড় দেলেইক গাড়ি
গিরঅল ঘাটীই লুকাইল দুখ দেলেইক এসঅন লাড়ি
সহঅদেবাঁই চনদাকে ভালি সঁচেই আপঅন মনে
গিরাউলি পানিকর ঘাটী এহঅ রে কেসঅনে
ভালঅ নঅ মদঅ ভালা এসঅন ধচঅরঅ
বুঝে তঅ পারেই নিহি কেসঅন মন অকঅরঅ

লেউরিকে পুঁছঅই এহে কথা হউ॥

খনেক বাদেঁ চনদাঁই আরঅ পানি রে আনঅইএ
সহঅদেবাকে ভালা এহঅ রে দেউঅইএ
জখন আরঅ লেউরিকে দেইক পানিক ঘাটী
লেউরিঁই মুড় ঘুরাই ভালা পাঁচিরে দেলেইক সটি
সহঅদেবাঁই তখঅন আরঅ চনদাকে দেলেইক কহি
লেউরিঁই তঅ পানিক ঘাটী লেতঅউ জে নেহি
এই গড় নেহি জে ধউঅতাক হউ॥

সহঅদেবাঁই ঘাটী ধরি গড় মু ধউঅলঅ
লেউরি তঅ বসি ভালা এহঅ রে রহঅলঅ
টুএক বাদেঁ লেউরিঁই আরঅ কহেইক সহঅদেবাকে
একঅর বাদেঁ জাম ঘার কহঁঅ হামি তকে
সহঅদেবাঁই কহেই তবে ঠিকে আহেইক জাঁই ঘার
মসিক কথা রাখেক খাতির জিগিড় নি করবঁ আর
লেউরি আপঅন ঘারা ডহরঅল হউ॥

সসুরঘারেঁ সহঅদেবাঁই পাউএই আদঅর জতঅন
ভালঅ মদঅ চিকঅন চাকঅন খাউঅনঅ রে দাউঅন
অরাসরা সেবা সুঁসার কনঅটাই নিহি কমতি
সাস সসুরেক সাধেক জামাই চনহা হিআ ভততি
আড়পড়সি আউঅত সভে জামাই রে দেখেলাই
চঅউলিআরা লেইলকাউথিক এহঅ রে মুড় হিলাই
গালসাল করঅত মনেক সুখেঁ হউ॥

নউআ নউআ সসুরঘারা সহঅদেবাক মনঅ
রিবোঁ সলগঅইএ ভালা সঅল মাছ জেসঅনঅ
একদিন বিতঅলঅ ভালা দুইদিন বিতঅলেইক
তিনদিনে ঘার ঘুরেক কথা রে জাগঅলেইক
সাস সসুরকে সহঅদেবাই মাগেই রে বিদাইঅ
গঁগাদরি রানি এবের গিরঅলি ধিঁধাইঅ

বেটি বিদাই করঅম নঅ নিহি হউ॥

বেটি বিদাই হেলে ভালা ঘারা হেতি ফাঁকা
কেসে মঁই রহম ভালা এহঅ রে একা একা
চনদা হামঅর ছুটু ছুটুআ ফুলেক নিঅর দেহি
সসুর ঘারেক মরঅম এখঅন কনঅ জানেই নেহি
এহে কথা ভাভি গনি গঁগাদরি রানি

আপঅন জামাইকে সুনাই মনেকর ঠানঅনি

সুনা জামাই হামরাক বঁগসেক রিত হউ॥

লউতঅনে বেটি বিদাই করিঅ নেহি জে হামরা
পহিল আউআই একাই ঘুরি জাবেহে জামাই তরা
ঘুরি আউবেহে তখন বেটি বিদাই করঅম
পিড়হিক পিড়হি আউএহেক চলি গুসটিক এহঅ ধরঅম
সাসেক কথা সুনি ভালা সহঅদেবা বিরঅ
বহু বিনু জাম কেসে হেউএ লারেই থিরঅ

মঁই বাপেঁ কহতা কিনা মকে হউ॥

ভাভিগনি সহঅদেবাই কহেইক রে সাসুকে
একা হামেঁ জাম নিহি কহেইহন তহঅরাকে
চনদাকে বিদাই জদি নাহু দিহা তহঅরা
ঝাঁপটিকে লেলে জাবেই চিলহঅ রে নিঅরা
কেহু নিহি পারবেহে টেকাই রে রাখেলাই
গউরাবাজারেক মাটি দেবেই ভালা হিলাই
কথাটা সুনি লিহা কানেঁ হউ॥

মহিচাঁদেক মাঁই আরঅ বসি রহেহেলি
নাতি জামাইএকর সভে কথা রে সুনঅলি
আপঅন পুতঅহু ভালা গঁগাদরি রানিকে
কহে লাগঅল মনেক কথা ডাকি রে আনিকে
বেটি জামাইকে তরঅ বিদাই রে দেউঅবে
মহিচাঁদেক মান ভরঅম বুঝি জে লেউঅবে
নিহিতঅ হেতেইক লক হাঁসি হউ॥

সাসেক কথা সুনি আরঅ গঁগাদরি রানি
বেটি বিদাই করেক কথা লেলেইক জে রে মানি
আপঅনঅ জামাইএক পাসেঁ জাইকুনে কহঅইএ
আইজ আরঅ ভালঅ দিন নেহি রে হেউঅইএ
কাইল বিদাই দেবঅহন সুনা জামাই তরা
রাগিরুসি নাহু রহা নি হেইহা মনমরা

আঝুক দিনটা রহা হরে হরে হউ॥
সাসেক কথাঁই সহঅদেবাক ভরঅলঅ রে মনঅ
মনেক রাগ উড়ি গেলেইক কাপাস রুআ জেসঅনঅ
দিন বিতি রাইত ভালা এহঅ রে হেউঅলঅ
খাই দাই সাধেক জামাই সুখেঁ নিদাউঅলঅ
ভিনসারেঁ পাইখ পাখুড় চেরবেরাত ভারি
সহঅদেবাক ভাঁগেইক ঘুম উঠেই বিছনা ছাড়ি
ঘার খলি হেলাক জে বাহার হউ॥

মহিচাঁদ রাজাক আরঅ ঘুমঅ রে ভাঁগঅলঅ
একে একে ঘারাক সভে এহঅ রে জাগঅলঅ
পাসেক ঘারেক সালা নাতাক একলক রে আউঅইএ
সহঅদেবাকে সঁগে লেই মু ধউএলাই জাউঅইএ
গঁগাদরি রানিঁই ভালা মড়অলিক কাম সারি
রাঁধাঘার সামহালি এহঅ রে চাঁড়াচাঁড়ি
চনদাকে আরঅ উঠাইকে নিদলে হউ॥

মুখউএলাই জাই ভালা সহঅদেবা বিরঅ
সালা নাতাক লকটাক সঁগে বজকি ধিরঅ ধিরঅ
গাঁউএক কুলহিক মুড়াই একঅ চাটানঅ রহঅইএ
গটা গাঁউএক লকেঁ আরঅ ধানঅ রে ঘাঁটঅইএ
সুরুজেকর আলই ভালা অহঅ রে চাটানঅ
ঝকঅমকঅ করঅইএ আরঅ হিরাকর সমান

তিনঅ লক চাটান পাস পঁহচঅলা হউ॥

চাটানেক উপঅরেঁ ভালা ঘুরাঘুরি করি
মুখউএলাই সালা-বহনঅই গেলা রে পখঅরি
মুখই ঘুরেক খনেঁ ডাঁড়হাই চাটান উপঅর
সহঅদেবাঁই পাড়েই কথা ধরি মনেকর জর
সুনে সালা একঅ কথা কই হামে তকে
এহে চাটানেক তাখঅড় ভালা বিড়ে হেতি মকে

কেহু তঅ কনঅ নেহি কহতা হউ॥

সালাঁই কহেইক কেথিক বিড়অন বুঝে পারঁ নেহি
কিনা কহে খজেহিস তঁই ফইরছাই দেবে কহি
সহঅদেবাঁই কড়অচ লে একটি গুআ বাহার করি
চাটানেক উপঅরেঁ ভালা রাখঅলঅ রে বিচারি
হাঁঠুমাড়ি বসি আরঅ মুকা রে মারঅলঅ
গটা রে গুআ ভালা ছিটকি রে জাউঅলঅ

চাটান ফাটি হেই গেলেইক চেড়া হউ॥

ফাটঅল চাটান দেখি ভালা সালাকর হাইচকি
কতেক খনেঁ নিকাস গাড়ি কহেই রে আঁপ ঢকি
চইখেন্ দেখি তকে বহনঅই বুঝা নিহি তেসঅন
তাখঅড় বির হেকিস জে তঁই বুঝে পারলঁ এখঅন
সহঅদেবাঁই সুনি কথা কহেই ছাতি ফুলাই
ইটা নিছু বিরেক নিমুদ মনটা দেলঁ ভুলাই
তাখঅড় বির হেকঁ জে মঁই হউ॥

সালা বহনঅই বজকি বজকি এহঅ রে ডহরঅলঅ
সহঅদেবা আপঅন সসুর টিঁড়া রে পঁহচঅলঅ
বিহানেকর খাইএক ভালা খালা রে পেটভরি
আপঅনঅ সাসুঁই জামাইমানে দেলেইক জতঅন করি
চনদাঁই আরঅ সাইত করেই নিজেকর নিঅরঅ
সাঁগিজড়িঁই ঘার ভালা এহঅ রে ভরঅ ভরঅ

সঁপড়অলি জাই সসুরঘার হউ॥

সাইত সুইত করি চনদাঁই মাই বাপ রে আপঅনে
হাঁঠুমাড়ি গড় লাগেই আরঅ সভে গুরু জনে
ফুলপিঁড়হাঁই সভেকর আগু গড়অ রে করঅলঅ
সুরুজ মাহারাইকে আরঅ এহঅ রে সেঁউরলঅ
সহঅদেবাঁ ভালা আপঅন সাস সসুরকে
গড়অ লাগঅইএ আরঅ জতেক গুরুজনকে

একঅর বাদেঁ ডহঅর চলেক পালি হউ॥

এহঅ খনে রানিঁই কহেইক আপঅন রে জামাইকে
একঅ কথা হামে ভালা রাখেইহন সুনাইকে
বারঅ বছর মর বেটিক মুঁ নিহি দেখবেহে
হামঅরঅ এহঅ কথা ভালা খেইআলে রাখবেহে
জদি মর কথা তরা না করিহা অবধানঅ
ফুটিকে কহি দেইহন ভালা সুন্য দেইএ কানঅ

তরা হামঅর রকঅত জে খাবেহে হউ॥

সাসেকর কিরা ভালা তিতকি রে জেইসঅনে
ছেঁক করি লাগি গেলেইক সহঅদেবাক মনে
কথা না বাড়হাইকে ভালা মুঁড়অ রে ঘুরাইকে
চনদাকর আগুঁই আগুঁই চলেই রে উজাইকে
বেরাডুবু ডুবুঁই আপঅন ঘারা রে পঁহচলঅ
বহু দেখেক খাতির ঘারেঁ ভিড়অ রে জমঅলঅ
চনদাঁই সাস সসুরকে গড়অ লাগঅলঅ হউ॥

সহদেবাই আপঅন মাইকে এহঅ রে পাসেঁ ডাকি
কহে লাগঅল একটা কথা লেবে মাই তঁই মাখি
চনদাক মু হামি নেহি দেখঅম বারঅ বছঅর
সাসেঁ মকে দেলা কিরা ছেঁকিকে রে ডহঅর
অতনা দিন রহঅম হামে চাকুআ রে বাইদেঁ
উহাই চাস আবাদ করঅম মনেকেরি সাধেঁ

চাকুআ বাইদেঁ সাতসঅ হারেক চাস হউ॥

সহদেবা চাকুআ বাইদেঁ এহঅ রে গেলা চলি
সাস সসুরেক সঁগে চনদা সসুরাই রহঅলি
চাকুআ বাইদেঁ সহদেবাই চাস আবাদ করি
একা একা দিন বিতাই সঁগসার ধরঅম বিসরি
ঘুমাইল রাইতেঁ দেখা করেই মাই বাপেকর সঁগেঁ
খাইদাই চলি জাই এহঅ রে আপঅন টঁগে
বিতি জাইক দিন মাস বছঅর হউ॥

সইআকে দেখেইক লাগি চনদাক ঠানমান

একদিন চনদাক ভালা হেলেইক রে গচঅরঅ
গনি দেখেই বিতঅলাহেইক বারঅ রে বছঅরঅ
আপঅনঅ সাসুক ঠিনেঁ কহঅইএ নেহঅরেঁ
সুনা সাসু একঅ কথা কহেইহন তহঅরেঁ
বারঅ বছঅর বিহা হেউআ এহঅ রে বিতঅলি
সইআক সঙ্গে দেখা কেরেক লাগঅইএ বিকঅলি

মই জাম সইআকর ঠহঅর হউ॥

পুতঅহকর কথা সুনি সহঅদেবাক মাঁইএঁ
কহে লাগঅল ধিরঅজ ধরেঁ নাহ তঁই আকতাইএ
আইজ তঁই রাঁধাৰাঁধি এহঅ রে করঅবে
রাতিঁই আরঅ রাঁধাঘারেঁ বসি রে রহঅবে
ঘুমাইল রাইতেঁ সহদেবা খাইলাই জে আউঅতঅ
অহে খনেঁ অকর সঙ্গে দেখা রে হেউঅতঅ

নিদাইস নাহ রহঅবে তঁই জাগি গউ॥

সাসেক কথাঁই চনদাঁই আরঅ কেরেই রে রাঁধঅনঅ
কতেক নিঅর ভালঅ মদঅ জেটা হেলেইক মনঅ
রাঁধিবাটি আরঅ ভালা বসি রে রহঅলি

ভালি ভালি কখন আরঅ নিদাই রে গেলি
সহদেবা আইকুনে রাঁধাঘার রে ঢুকঅলঅ
আনবাটে ভালি খাইকুনে চাকুআ বাইদ চলঅলঅ

চনদাঁই তঅ জানি নি পাউঅলি হউ॥

কতেক খনঅ বাদেঁ চনদাক ঘুমঅ রে ভাঁগঅলঅ
খুখড়াকর ডাক ভালা সুনে রে পাউঅলঅ
পাইখ পাখুড় চেরবেরাত হেলেইক রে ভিনসরা
সইআকে নি দেখি চনদা এহঅ রে মনমরা
কতেক সাধেঁ ভাত তিঅন করলি রে রাঁধঅনঅ
সভে খাটালি বেকার হেলেইক কিনা কেরেই এখঅন

বাসি মানেই কুকুরেকর পেট হউ॥

চনদাঁই এবেইর হাঁড়ি তেলাই এহঅ রে হুলকঅইএ
ভাত তিঅন টুইএক ভালা নেহি রে দেখঅইএ
কিনা হেলেইক ভাত তিঅন খাই গেলা কনে
টাঁপা চরা থারি ডুভি জেসঅনেক তেসঅনে
চনদাকর মনে ভালা ধিঁধা রে জনমলি
এসঅন কাম আরঅ ভালা কেসঅন করি হেলি
আসঅল কারন জানেলাই হেতি গউ॥

ঘুরিদিন চনদাঁই আরঅ রাঁধনা রে করঅল
মাইঝাঘারেঁ বসিকুনে জাগি রে রহঅলঅ
মাঁই মাঁই কহি রাতিঁই সহদেবা রে আউঅইএ
ধিরেঁ ধিরেঁ ঘারেক আগুড় এহঅ রে খলঅইএ
দেখেই কনে বসি আহি ভালা করিকে আটকালঅ
পেছুআইকে ঘুরলাক ভালা নেহি রে সামহালঅ
কতেক খনঅ বাহারেই রহঅলা হউ॥

বসি বসি চনদা আরঅ ঢুলে রে লাগঅলি
মাইঝা ঘারেই কখন আরঅ নিদাইএ রে গেলি
অহঅ বতঅরেঁ সহঅদেবা সামহাইকে জে ঘারঅ
হঁছি পাঁছি খাইকুনে হেলা রে বাহারঅ
জেসঅন গুঁছিআইল রহেহেলেইক তেসঅন টাঁপাচরা
তেসনে করি রাখি দেলেইক নি খাই জেসে ধরা
চনদাঁই তঅ কনঅ নিহি জানঅলঅ হউ॥

সহঅদেবা চলি গেলা চনদাক ভাঁগেক নিদঅ
উঠিকুনে বসঅলি জেসঅন জিঁঅত রে সিধঅ
রাইত জাগি বসি রহলি হেলেইক রে বিহানঅ
নি পাউলি সঁইআক দেখা গুমরঅইএ পরানঅ
রাতিকেরি রাঁধাবাঁটা হেলেক রে বেরবাদঅ
মাটি হেলেইক খাটালি নাহ পুরলেইক মনেক সাধঅ
বসি বসি কাঁদে জে লাগঅলি হউ॥

কাঁদি কাঁদি চনদাঁই আরঅ করঅইএ বিকঅলি
কিআ দসেঁ এসঅন দুখেঁ মকে রে ছেঁকঅলি
রাঁধি বাঁটি বসি রহলঁ সইআঁ নাল্ আউঅলা
নিজে তঅ উপাসঅ রহি মকঅউ উপাসে রাখঅলা
হাঁড়ি তেলাই ধউএ হেতি এহ সঁচিকে উঠঅলি
কালুক নিঅর ছঁছাপঁছা দেখি দিসা জে টুঁটঅলি

কনে আরঅ করঅইএ এসঅন হউ॥

বিহানেঁ তঅ চনদা ভালা কুলহিকেরি মুড়াঁই
হঁফঅরি হঁফঅরি কাঁদেই দুখেকেরি হুড়াঁই
কুলহিক মুড়াঁই রহেই আরঅ এহঅ রে মইলান মসি
তামুক খাইহেলি আপঅন ঘারেক পিঁড়হাঁই বসি
চনদাকর রদঅন সুনি সটপটাই রে আউঅলি
কিনা হেলঅউ কহেঁ বাছা পুঁছে রে লাগঅলি

কিআ দুখেঁ জড়অলে রদঅনা হউ॥

মইলান মসিকে চনদাঁই সুনাই মনেক বেথা
সসুর ঘারেঁ বারঅ বছঅরেকর দুখেক কথা
সইআক সঁগে দেখা নাল্ বারঅ রে বছঅরঅ
সাস সসুর মুহেক সঁগি ভিতঅরি গুমাইরঅ
সাসেক কথাঁই দুই রাইত করলঁ রাঁধা বাঁটা
কন ভুলুকেঁ কনে আইকুন খাই গেইল তেলাই চাটা

সইআক সঁগে দেখা নিহি হেইল হউ॥

মইলান মসিই সভে সুনি পছঅড়ি নিখঅরি
কহে লাগঅল বুইধ দেই সুনেঁ ভালঅ করি
ঘারেঁ জাইকে তর সাসকে কহবেসিক নেহঅরেঁ
বেসিআম লেইকে তঁই জাবে সইআকর ঠহঅরেঁ
বারঅ বছঅর পুরঅন জখন এহঅ রে হেলাহঅউ
তর মাঁইএক কিরাক কথা বিতি জে গেলাহঅউ
বেসিআম লেইএ জাবে চাকুআ বাইদ গউ॥

ঘাৱা ঘূৰি চনদা আৱত আপতন ৰে সাসুকে
নেহঅৰেঁ কহে লাগঅল এহঅ ৰে সুঁসকিকে
সুনা সাসু এখঅন হামে বেসিআম ৰাঁধঅবঅ
বেসিআম লেইকে সঁইআক ঠহঅর এহঅ ৰে জাউঅবঅ
পুতঅহুৱক কথা সুনি এহঅ ৰে সাসহাৰি
ঠিকে আহেইক মানি লেলঁ তহঅরি বিচাৰি

তঁই হামঅর আউসান কই দেলে হউ॥
সাসেক হঁ সিঁকাৰে চনদাক মনঅ ৰে ভৱঅলি
নাহানেকর তড়ঝঅড় এহ কৰে ৰে লাগঅলি
হরঅইদ মুহাইকে ভালা এহঅ ৰে বাঁটঅলঅ
মাখনা জে খইর চনদাঁই আৱত লেউঅলঅ
গাডুই আৱত তেল লেলি আৱত ৰে পিঁধঅনঅ
নাহানে ডহরঅলি ভালা হরখলঅ মনঅ

চলি গেলি বাঁধেকেৰি ঘাট হউ॥
বাঁধেক ঘাটেঁ জখন চনদা এহঅ ৰে পঁহচলি
নিজেক মনে আৱত ভালা সঁচে ৰে লাগঅলি
বাৱত বছঅর নখ ভালা নেহি জে কাটঅলঁ
এতেক দিনে আলতা ৰুঁগ নেহি ৰে পিঁধঅলঁ
এসঅন টংগে আইজ ভালা নেহি নাহাম আৱত
এখনে হামে জাম ভালা লাপিতেকর ঘাৱত

চনদা ডহরলি লাপিতেক ঘাৱ হউ॥
লাপিতেক দুআইৰেঁ চনদা এহঅ হিবড়অইএ
নাউআইন নাউআইন কহি আৱত হাঁকঅ ৰে পাড়অইএ
চনদাকর হাঁকে নাউআইন ঘাৱ লে বাহাৱালি
ৰাজাক পুতঅহুকে দেখি ৰামকি ৰে গিৱঅলি
কতেক খনঅ বাদে ভালা এহঅ ৰে হুঁইস পাইকে
চনদাকে ভালেক ভালা এহঅ ৰে থিৱাইকে
মুহেঁ তঅ কথা নি উসৱঅইএ হউ॥

চনদাঁই এবেইর লাপতাইনকে এহঅ রে কহঅইএ
তর কিনা বেজার ভালা এহঅ রে হেউঅইএ
লাপতাইনে সাঁচা কথা লুকাই রাখিকে
মিছা কথাই বুঝাই কহেইক টংগ রে মাথিকে
খইদদার ঘার হামে ভালা গেরঅহঁ রে কাইলটি
এক দনা মদ পিকে রহেহেলঁ ঘলটি

আচক উঠাই বামকি গিরঅলঁ হউ॥
নাউআইনে কহেই এবেইর কিনা মনে করি
রাজাকেরি পুতঅহু আইজ দুআইরোঁ হামঅরি
চনদাঁই কহেইক তবে ভালা সুনেঁ গউ নাউআনি
নখ কাটি দেবে হামঅর এখঅন জে তহরানি
রঁগ পিঁধাই দেনঅ মর এহঅ রে দিঅ গড়েঁ
কহেইতে কহেইতে নাউআইন ঠেসেই চাঁড়ে মাড়ে

রাজাক পুতঅহু কহি কথা হউ॥
নখ কাটি দেলেইক চনদাক বসাইকে আসঅনঅ
রঁগ পিঁধাউলেইক দিঅ গড়েঁ বড়ি রে জতঅনঅ
দিঅ গড়েঁ আঁখি দেলেইক কতেক সুঁদঅর ফুলঅ
সেহঅ দেখি চনদা ভালা রিঝোঁ বেইআকুলঅ
কতিদিনা বাদেঁ ভালা নখঅ রে কাটঅইএ
কতিদিনা বাদেঁ গড়েঁ রঁগ রে পিঁধঅইএ

ঘুরাই ফেরাই হুলুকে লাগঅল গড় হউ॥
লাপিতঘার লে চনদা আরঅ এহঅ রে ডহরঅইএ
কুলহি মাঝোঁ কাদা ভালা নজঅরোঁ ভেঁঠঅইএ
মনে সঁচেই কাদাক উপঅর চলি পাইরাঁউ জদি
গড়েঁ রঁগ পিঁধা হামঅর হেতি রে বেরবাদি
তখন আরঅ হাঁথ জড়ি থিরঅ রাখি মনঅ
বুড়হাবাপ মাহামাঁইএক করঅইএ সেঁউরনঅ
কহে লাগঅল বিপঅতিকর কথা হউ॥

কুলহিকর ধারিঁই ধারিঁই এহঅ রে তখঅনঅ
বাঘা মাড়ুআ ঘাঁসেক ভালা হেলা রে সিরজনঅ
চনদা চলে লাগঅল সুখেঁ ঘাঁসেকর উপঅরঅ
নি ধউআলেক রঁগ ভালা নি ভিজলেক গড়অ
ঘাঁসকে দেখিকে চনদাঁই কহে রে লাগঅলি
তরাকর খাতিরেঁ গড়েক রঁগ নি ধউআলি

কুলহিক ধারিঁই ধারিঁই রহিআ বাঁচি হউ॥
বাঁধেক ঘাট পঁহচি চনদাঁই করঅইএ নাহানঅ
বাঁধেকর পানি ভালা আড়সি রে সমানঅ
মাখনা খঅইর জতঅন করি মাখেই গটা গাত্তে
খঅইর আরঅ ঘাঁসেই ভালা এহঅ রে দিঅ হাঁথে
চনদা আরঅ পানিঁই ভালা এহঅ রে নাভঅইএ
ডাবকা ফাড়ি মইধ বাঁধ আরঅ রে জাউঅইএ

বাঁধেক পানি হেলকি উঠঅলঅ হউ॥
বাঁধে ভালা জতেক মাছ এহঅ রে রহঅইএ
পানিকর উপরে সভে আরঅ রে ভাসঅইএ
কাতলা মাছ হাপা হাপা করে রে লাগঅলঅ
ডেঁইড়কা মাছেঁ ডাঁইড় ভালা এহঅ রে ধরঅলঅ
পঁঠিমাছ পানিক উপঅর উফলঅইএ রে সভে
ইঁচলি মাছ ধারিঁই ধারিঁই চুড়পত ডাভেঁ ডাভেঁ
ভাভে লাগঅল কিনা জে হেউঅলঅ হউ॥

বাঁধেক ঘাটে বড়অ গাছ একটা রে রহঅইএ
বড়ি রে পুননা সেহঅ সভেকাই কহঅইএ
সেহঅ গাছেঁ রহেই আরঅ বসঅল রে বঁকঅলি
বাঁধেক উফলঅল মছঅরি দেখি এহঅ রে হরখলি
বারঅ বছর জেহঅ বাঁধেঁ মাছ তঅ ধুরেক কথা
বেঁগ পহনাউ নজঅরেঁ হাই দেখাত নেহি একটা
বারঅ বছঅর আহি জে উপাসে হউ॥

গাছ লে নাভি কসবঁকলি বারঅ বছঅর বাদেঁ
টুপ টুপ মাছ কুড়হাই খাইন মনেক সাধেঁ
জখন আরঅ আমভা পুরঅন খাইল রে হেউঅলঅ
বাঁধেকেরি পানি ভালা এহঅ রে পিঅলঅ
মন থির করি আরঅ কহে লাগঅলঅ ফুটি
ভাইগমানি হেকিস চনদা তঁই রাজাক বেটি

সভেঠিনে হেতঅউ তহঅর জিত হউ॥

তেল হরঅইদ মাখি চনদা পানিঁই রে হেলি দেলেইক
ডাবকা ফাড়অনেঁ বাঁধেক পানি কাদা হেলেইক
তখন চনদাঁই এঁড়ি বজড়াই কুঁআ রে খনঅইএ
সেহঅ কুঁআক পানিঁই আরঅ ঘেইলাই রে ভরঅইএ
ঘারা ডহরঅলি এবের বাঁধেক ঘাটঅ ছাড়ি
টসঅকি টসঅকি চলেই হাঁথঅ লাড়ি লাড়ি

পঁহচি গেলি সসুরেকা টিঁড়া হউ॥

হাঁড়ি বিনু বেসিআম ভালা রাঁধঅবঅ কেসঅনে
কিনা করেহেতি চনদাঁই সঁচেই মনে মনে
নউআ হাঁড়িঁই হামে আরঅ বেসিআম রে বাঁধঅবঅ
তবে ভালা এবে হামে কিনা রে করঅবঅ
হাঁড়ি আনেক খাতির আরঅ কুমহার ঘার ডহরঅলি
কুমহারেক কুলহিক দুআইর পঁহচিঅ রে গেলি

কুমহারিন কহি হাঁকঅ পাড়অইএ হউ॥

কুমহারিনে তখন ভালা রাঁধাবাঁটা করে হেলি
চনদাকর হাঁক সুনি তুরুতে রে বাহারালি
রাজাকর পুতঅছ ভালা হামঅরি দুআরি
দেখিকে কুমহারিনেক মাথা গেলেইক জে ঘুরি
চনদাকর ঝলঅকে ভালা গিরলি রে ঝমঅকি
দেখিকুনে চনদাক আরঅ লাগলি রে হাইচকি

কুমহারিন কে ধরলেইক জে আঁকড়াই হউ॥

খনেক বাদেঁ কুমহারিনেক চেঠা রে হেউঅলঅ
চনদাকে আরঅ ভালা বানারঅ পুঁছঅলঅ
চনদাঁই কহেইক তঁই একটি হাঁড়ি দেবে মকে
দসঅর কথা আর কনঅ কহেক নেখি তকে
নউআ হাঁড়িই আইজ মঁই বেসিআম রে রাঁধঅবঅ
সেহঅ বেসিআম লেইএ ভালা সঁইআঠিন জাউবঅ
চাঁড়েমাড়ে দেঁ একটি হাঁড়ি হউ॥

কুমহারিনেঁ তখন ভালা এহঅ রে চাঁড়াচাঁড়ি
বাছিকুনে চনদাকে দেলেইক একটি হাঁড়ি
হাঁড়ি লেইএ চনদা আরঅ ঘারা রে আউঅলি
হেঁইডসারে হাঁড়ি ভালা জতঅনে রাখঅলি
আচঅক আরঅ চনদাকর জাগঅলেক রে মনে
রাঁধঅলঅ বেসিআম ভালা লেগঅব রে কেসঅনে

একটা তঅ ডালাকর দরকার হউ॥

ডালা লাইএ চনদা আরঅ উজালি ডম ঘারঅ
তুরুতে পঁহচিএ গেলি ডমেকর দুআরঅ
ডম ডম কহি ভালা হাঁকঅ রে দেউঅইএ
হাঁক সুনি ডম ডমিন হড়বড়াই বাহরাইএ
ডম ডমিনে দেখঅল আরঅ আপঅনঅ নজঅরেঁ
রাজাকর পুতঅছ ভালা হামঅরি দুআইরেঁ

সঁচঅত মনে সপুন দেখেইহ নঅ কিনা হউ॥

ডম ডমিন হাঁথ জড়ি কহঅতঅ নেহঅরেঁ
কিআ আসে রাজ পুতঅছ হামরাকর ঠহঅরেঁ
কিনা ভাইগ করলাহিঅ সঁচিঅ নেহি জেটা
তহঅর গড় ডমেক দুআইরেঁ পততুক নহেক ইটা
মনেকেরি কথা তঁই খলি জে কহঅবে
সুনেক আসেঁ নেহঅর করিঅ সুগুম নি রহঅবে

কিনা কাম করে হেতি ফইরছাউএঁ হউ॥

চনদাঁই কহেই ডম-ডমিন সূনা কথা হামঅরঅ
ডালা বেনাই দে তরা চাঁড়েমাড়ে এবৈইরঅ
আসি মন চারেক ভাত জেইসঅনঅ ধরঅইএ
লেকের পেঁকের আরঅ জেসে নেহি রে করঅইএ
ডালা লেইএ জাম হামি সূনা ভালঅ করি
এখনে বুনেলাই ঠেসা করিহা না জে ডেরি
এহে কহি বসঅলি পিঁড়হাঁই হউ॥

তখনে ডম ডমিন ভালা হাঁকঅ পাড়ি বড়অ
গটা গাঁউএক ডম ডমিন করলেথিন জড়অ
কহে লাগঅল সূনা সভে একটা রে বাতঅ
রাজাক পুতঅহুই দেলা ডালাকর বরাতঅ
এখনে একটা ডালা ভালা বুনেলাই রে হেতি
আসিমন চারেক ভাত জেসঅন উটাঁই ধরতি
সভেকাই ঠেসি জা কামে হউ॥

রাজাকর পুতঅহু চনদা ভালা পাসে রহলি বসি
ঝানগাঝানগি ডম ডমিন কামে গেলা ঠেসি
কেহু ছলঅত বাঁস ভালা কেহু তঅ বুনঅইএ
কেহু আরঅ সামান পাতি লাড়অইএ চাড়অইএ
সেহঅ খনে চনদাঁই আরঅ এহ রে কহঅইএ
তিনপুইরা ঘুঁঘুর জেসে বাঁধঅলঅ রহঅইএ
এহে ডালাঁই বেসিআম লেগঅম হউ॥

ঘুঁঘুরেকর কথা সূনি ডমঅ রে ডমিনে
হাঁথ জড়ি নেহঅরৈঁ কহঅ চনদাক ঠিনে
ঘুঁঘুর বনাউঅত ভালা এহঅ রে মালহারৈঁ
ডালা টাঁকি বুনঅত ভালা আরঅ রে ডম ঘারৈঁ
মালহারেক ঠিন লে ঘুঁঘুর ভালা আনেলাই হেতঅউ
দসঅর কনঅ জাইতেক ঘারৈঁ নেহি জে পাউআতঅউ
তঁই মাঁই ঘুঁঘুর আনি লিহিন গউ॥

ডম ঘারলে সিধা চনদা মালহার ঘার ডহরঅলি
মনেকর কাঁহিচে ভালা চলে জে লাগঅলি
মালহার ঘার পঁহচি আরঅ ডাঁড়হাইকে দুআইরৈ
মালহারিন মালহারিন কহি ডাকেই এক সুড়ুরৈ
চনদাক সুড়ুরিআ হাঁকঅ এহঅ ভালা সুনি
ঝাটঅ করি ঘার লে বাহারালি মালহারিনি

চনদাকে দেখি হাইচকে গিরঅলি হউ॥

চনদাকে পুঁছে লাগেই এহঅ রে মালহারিনেঁ
কিআলাই রাজাক পুতঅহু আউঅল মরঅ ঠিনে
ফুঁদেকর চাঁদ ভালা ভুঁইএঁ জে নাভঅলি
তকে দেখি মন হামঅর এহঅ রে হরখঅলি
কিনা কাম করে হেতি কহেঁ গউ মু ফুটি
মালহারিনেক গটা অঁগে কাঁহিচ গেলেইক উঠি

ভালি রহঅল চনদাকর মু হউ॥

চনদাঁই কহেইক মালহারিনঅ কহঁ ভালা তকে
এখনে তঁই ঘুঁঘুর ভালা গড়হি দেবে মকে
সেহঅ ঘুঁঘুর হামে ভালা ডালাঁই রে বাঁধঅবঅ
ঘুঁঘুর বাঁধঅল ডালাঁই সঁইআক বেসিআম রে লেগঅবঅ
ডম ঘারেঁ বুনাহেইক ডালা ঠেসঅলাহাত সভে
হামঅর আড়হান কামে ভালা তঁই জে ঠেসঅবে

বসলঁ মঁই তহঅরি দুআইরৈ হউ॥

মালহারিনেঁ কহেইক তবে আপঅনঅ বিচারেঁ
রাজাক পুতঅহু মানাই নিহি হামঅরি দুআইরৈ
তঁই আপঅন ঘার জাঁই কহঁ জে নেহঅরি
অগরি কাহে রহবে ভালা হামঅরি ডেহরি
ঘুঁঘুরা গড়হিকে হামে তহঅর মনেক জঁখে
ডম ঘার পঁহচাই দেবেই কহঁ ভালা তকে
সুনেঁ মঁই গউ হামঅরঅ কথা হউ॥

মালহারিনেক কথাঁই চনদা ঘারা ডহরঅলি
উড়অনতি পাইখ জেসে ডেনকা রে মেলি
মালহারিন ঠেসি গেলি আরঅ ঘুঁঘুরঅ গড়হেলাই
রাজাঘারেক কামেক আড়হান পারেই নি ছাড়েলাই
খাউআ পিআ নি করি ঠেসি রহলি কামে
গটা গাত সরঅবরঅ এহঅ রে ভিজঅল ঘামে
ঘুঁঘুর গড়হঅল তঅ হেইল হউ॥

ঘুঁঘুরা গড়হিকে মালহারিন ডহরঅলি ডমঘারঅ
ডমেকর দুআইরৈ পঁহচি মারঅলঅ হাঁগকারঅ
ঘুঁঘুর গড়হি দেলঁ আনি এহঅ রে ডমিনি
সাজাউআ সাধেকর ডালা রাজমান ভাভি গনি
ঘুঁঘুর দেই গেলি মালহারিন আপঅনঅ রে ঠহঅরঅ
হরখলঅ মন ভালা হরখলঅ জে অনতঅরঅ
ডম ডমিনেঁ ডালা জে সাজাউলা হউ॥

ডালাক কাম সাইত করি ডমঅ রে ডমিনি
ডালা লেইএ ডহরঅলা জাঁহাঁ চনদামনি
পাহাড় নিঅর ডালা লেইএ রাজাঘার পঁহচঅলা
রাজাকর দুআইরৈ ভালা এহঅ রে ডাঁড়হালা
রানিমাঁই রানিমাঁই কহি হাঁকঅ র পাড়অইএ
ডম ডমিনিক হাঁকে আরঅ চনদা রে বাহারাইএ
ডালা দেখি মন ভরি গেইল হউ॥

ডম ডমিনকে কহেইন চনদাঁই এহঅ রে ঠক মারি
তরা আরঅ আউলেহে ভালা দমে ডেরি করি
বেসিআম রাঁধেইতে হামঅর বিতি জাই খনঅ
তহরাকে ভালি ভালি আটুপাটু মনঅ
ডম ডমিন সুনি সুনি এহঅ রে হাঁসঅলা
চনদাকর কথাঁই ভালা রাগ নিহি বাসঅলা
আইজ অকঅর কামেকর হড়বড়ি হউ॥

ডম ডমিনকে বসাই চনদা সাসেকেরি পাসেঁ
সাসহারিকে কহে লাগঅল মনেকেরি আসেঁ
ডম ডমিনেঁ ডালা ভালা আনি জে গউ দেলা
কতেক সখেক বুনঅলাহাত দেখবেহে চালা
ডালা দেখি রানি মাঁইএঁ সাবাইস করেইক কামঅ
ডম ডমিনকে কহে লাগঅল কতেক লাগতেইক দামঅ
ডমিনেঁ কহেই দিহা সাঁচি আপঅন মনে গউ॥

সহঅদেবাক মাঁইএঁ তখন নিজেকর ইমানে
আসিমন নাপি দেলেইক এহঅ রে চারে ধানে
ডমেঁ তখন সভে ডমকে ডাকি রে আনঅলঅ
চার ধান বাঁটি ভালা সভেকাই লেউঅলঅ
মালহারিন আউলি ভালা কুমহারিনঅ অহঅ সাঁগে
সভেকাই খাটালি লেইকে এহঅ রে রিঝে রুঁগে

ডহরঅলা আপঅন আপঅন ঘার হউ॥

ডম ডমিন ঘার জাইকুন এহঅ রে দেখঅইএ
আপঅনঅ ছঅউআ ভালা মরি রে জাউঅইএ
তখন আরঅ কাঁদি কাঁদি সভে ডমকে ডাকি
গতি করঅলঅ ভালা সগ দুখ মাখি
ডম ডমিনকে বধঅ দেহেখিন আরঅ রে সভে ডমে
মরঅন ধরঅন বিধিক লেখা ঠেকাইক কাকঅর দমে
হড়েকর নেখেইক অহে জাঁগড়া হউ॥

আপঅনঅ খেইআলে চনদাঁই জেগলা খজেহেলি
আড়হানে বাড়হানে ভালা সভে রে পাউঅলি
মাহারাই গিঠেঁ কখাঁই জাকরঅ রহেইক ধেইআনঅ
তঁহি তঅ জানেই বুঝেই জিনগানিকর মানঅ
খল ছল পঁছাই ভালা হেউএক সুঘঅড় মতি
সুখে জে বিতাইএ দিন আইখে গিআন জতি
নিহি রহেইক দুখ জাতঅনা হউ॥

সইআকর খেইআলৈ চনদাঁই মনঅ রে বাঁধঅলি
আসি মন চারেক ভাত এহঅ রে রাঁধঅলি
নঅ খনডি বিরহিক দাইল সিঝাউলি জতঅনে
গনডা গনডা কাঠাহি ভরঅল আরঅ রে তিঅনে
কুড়ি কাঠ দুধ ভালা করলি রে তাতঅলঅ
একপুর সর দুধেঁ ছপলিএ রহঅলঅ

রাঁধারাঁধি তঅ সাইত হেলেইক হউ॥

বেসিআম সাজাই সুজুই চনদা নিজে রে সাইত হেইকে
কুলহিকর দুআইরেঁ ভালা ডাঁড়হালি রে আইকে
গাঁউএক লককে আরঅ ভালা ডাকে রে লাগঅলঅ
রাজাক পুতঅল্হকর ডাকৈঁ সভেকাই আউঅলঅ
আইকুনে পুঁছে লাগঅল এহঅ রে চনদাকে
কিআ কামে তঁই এখন ডাকলে জে হামরাকে

সেহঅ কথা দেহু সভেকর কানৈঁ হউ॥

চনদাঁই তখন সভেকাইকে আনগাঁই ডাকি সামহাই
কহে লাগঅল একটা কাম পারঅহঁ নি একাই
সইআক লাগি সাজাউলাই ডালাই রে বেসিআমঅ
মর মুড়েঁ উঠাই দিহা এহে তরাক কামঅ
সভেকাইএ ধরি তখন ডালা রে তলগঅইএ
জিউ মুড় জাঁকি বল দেইএ আরঅ রে সলগাইএ

ডালা ভুঁই ছাড়া করে নিহি পারলা হউ॥

সভে লকৈঁ ঠানরহঅত অলঅঠেই হেতেইক কামঅ
হারুল হেই গেলা ভালা গিরাই গাতেক ঘামঅ
গাঁউএক লক হারুল হেলা ভাঁগঅল চনদাক মনঅ
কিনা জে করেই ভালা সঁচেই রে তখঅনঅ
এক মনে এক ধেইআনে হাঁথ জড়অ করি
বুড়হাবাপ মাহামাঁইকে এহঅ রে সৈঁউঅরি
কহে লাগঅল মনেকেরি কথা হউ॥

বুড়হাবাপ মাহামাই এহঅ রে সৈঁউরনে
কিনা জাগি গেলেইক ভালা চনদাকর মনে
গটা গাঠেঁ তুরুতে আরঅ সিহরানি রে উচরঅলঅ
পাহাড় নিঅর বল জেসে দেহিআই ভরঅলঅ
গাঁউএক লককে কহে লাগঅল সেরিআ ভালা তরা
বল তরাক দেখলিঅন জেসে পচঅল দড়া

বেসিআম ডালা হিলাউএ নি পারলেহে হউ॥

চনদাকর কথা সুনি লাজে রে সরঅমে
সভে লকেক মু ভালা সুখঅল বেভরঅমে
লুগাক পাকাউঅল বিঁড়ি চনদাঁই মুড়েঁ রে লেউঅলঅ
দিঅ হাঁথোঁ ডালা আরঅ এহঅ রে ধরঅলঅ
একঅ হেঁচকনে ডালা ভালা হাঁঠু রে উঠাউঅলি
দিঅ হেঁচকনে আরঅ কমঅরে পঁহচাউলি

তিন হেঁচকনে মুঁড়ে লাদাই লেইল হউ॥

গাঁউএক লক সভে ভালা হাইটাটকা হেই গেলা
কেসে উঠাউএ পারলি চনদাঁই এতেক ভারি ডালা
কহাকহি করে লাগঅত কাকরঅ রে বরোঁ
এসঅন তাখঅড় ধরঅলি ভালা সাত হাঁথি নিঅরোঁ
নেগা হাঁথোঁ ডাইল তিঅন লেইএ আপঅন মনে
বেসিআম লেই চলঅলি চনদা সঁইআকর ঠিনে

লকজনঅ গেলা আপঅন ঘার হউ॥

সহদেবা বিরেক বহিন দুলাড়ি রে লুড়কি
চনদাকর পেছুঁই পেছুঁই জাই লাগঅল রে ইড়কি
ভউজি ভউজি হাঁক ছাড়ি চলেই রে সটপটাই
কুলহিক মুড়াঁই আরঅ ভালা লেলা জে রে ঐঁটিআই
হাঁক সুনি চনদা আরঅ পেছু বাটে ভালি
সাধেক ননঅদ লুড়কিকে দেখে রে পাউঅলি
নাহান বিনু দেখাই ধধঅরচঅ হউ॥

সেহঅ খনে চনদাঁই ভালা কুলহিকেরি মুড়ে
বেসিআমেক ডালা রাখলি বাঁধেকেরি পিঁড়ে
লুড়কিকে চজে চনহাঁই নাহান রে করাইকে
মুড় অঁচড়ি বাঁধি দেলেইক বাঁধ পিঁড়ে বসাইকে
জখন আরঅ হেই গেলেইক মাথা বাঁধাবাঁধি
বেসিআমেক ডালা চনদাঁই লেলি মুড়ে লাদি

ডাইল আর তিঅন লেই লুড়কি ডহরলি হউ॥

ননঅদ ভউজি চলে লাগঅত বড়ি টহঅবরৈ
সাঁউরু ধাঁউরু দিঅ ভাই রহঅত অহঅ ডহঅরৈ
গাছেক নউআ নউআ পাত খাত তড়ি তড়ি
কখনঅ আরঅ ধুরা মাখি রিঝেঁ লটাগড়ি
আচঅক নজঅরৈ বাঝঅল চনদাকর বেসিআমঅ
দিঅ ভাইএঁ সঁচে লাগঅত করঅব একঅ কামঅ

গাছেক উপরলে লুচকি নুড়অব হউ॥

এহে ঠানি দিঅ ভাই গাছে রে উঠঅলা
একঅ লেদা ডাইরৈ ভালা এহঅ রে রহঅলা
চনদাঁই অরাক মনেক ভাভ দেখিকে বুঝঅলি
জখন আরঅ পাস ভালা পঁহচাপহঁচি হেলি
বেসিআম লুচকেক তাকতরঅম করঅত দিঅ ভাইএঁ
চনদাঁই টাঁটি মটা করি कहলেইন রে হাঁকাইএ

বেসিআম লুচকেক আস না করিহা হউ॥

সাঁউরু ধাঁউরু গিজড়ে লাগঅত বেসিআম নুড়েক লভে
চনদাঁই কহেইন হামঅর খেইল দেখা ইধাঁউ তবে
দিঅ ভাইকে টুপ টুপ কহেক তুরা খমচি
কাঁখ বগঅলে বগচাই লেইল জেসে লউআ কচি
চনদাকর কাঁখ বগঅলে সাঁউরু রে ধাঁউরু
বগচি রহলা ভালা নিকাস ছিনঅ সরু

চনদা লুড়কি চলঅত টরটরাই হউ॥

কানহু বিরাঁই নাদি নাদি কাঠঅ রে টানঅইএ
কানহুকে দেখি চনদাঁই আরঅ মনে রে ঠানঅইএ
এঁই জদি মুঁড়েক বেসিআম এহঅ রে ঝাঁপটঅইএ
কিনা করে হেতি ভালা বুঝি নি উঠঅইএ
সাঁচি সাঁচি চলেই চনদা লুড়কিকর সঁগেঁ
পাইখ পাখুড় চেরবেরাত জেঁই জেসঅন টঁগেঁ

চনদাক আঁখি কানহু বিরাক বাটে হউ॥

সাঁউরু ধাঁউরুই আগুবাটে কানহু বিরাকে দেখি
ডরেঁ অরাক গাতেক লহু গেলেইন ভালা সুখি
কানহু বিরেঁ দেখলে আরঅ নেহি রে ছাড়অতাক
ঠেঁগেঁ ধরি ঘুরাই ঘুরাই কাচড়াই রে মারঅতাক
বুইধ ধরি চনদাক গাতেঁ চলগিতি দেউঅলঅ
চনদাঁই তখন বাঁহি ভালা এহঅ রে ঝাড়অলঅ

দিঅভাই পুচকি পারাল জিউ মুড় জাঁকি হউ॥

চিহঅড় লতাক দড়িঁই কানহুই কাঠ টানেই একাই
চনদাকর ডহঅর ভালা গেলাহেইক রে টেকাই
তখন আরঅ চনদামনিঁই বুইধ রে করঅইএ
এক গাড়ি কাঠকে নেগা হাঁথে রে ধরঅইএ
ধরিকে গাতেকর বলে দেলেইক এহ দাবি
কাঠ ঘসকি নদিঁই ভালা গেলেইক জে রে নাভি

চিহঅড় দড়িক বাঁধঅন পুচকি গেইল হউ॥

কাঠ বহি জাইক কানহুক দেখেই রে নজঅরেঁ
কেসে কিনা হেলেইক ভালা সঁচেই রে অনতরেঁ
বারঅ বছর কাঠ টানি হেউএক নি এসঅনঅ
কেসে পুচকি গেলেইক চিহঅড় দড়িক রে বাঁধঅনঅ
কনে তবে খলি দেলা দেখাইকে বিরালি
রাগেঁ কানহু চাইরঅ বাটেঁ করেই ভালাভালি

চনদা আর লুড়কিকে দেখি পাউঅল হউ॥

লুড়কিকে লেইএ চনদা চলেই রে সটসটাই
কানহু বিরা হাউআ লেখেঁ লেলেইক জে রে এঁটিআই
ডহঅর ছেঁকি ছাতি ফুলাই কহেই এঁড়ি উঁচকাই
চিহঅড় দড়িক কাঠ বাঁধনা দেলে কাহে পুচকাই
হেঁট উপঅর ভালি কানহুকে চনদাঁই দেলেইক কহি
আউএক ডহঅর মঁই ভালা পাউএহেলঁ নিহি

খলি দেলাইঁ সেহঅ খাতির হউ॥

রাগেঁ তখন কানহু বিরাঁই দেখাউএ লাগঅল টেড়হি
মর কাম ভাঁড়ি দেলে ডহঅর ইধাঁউ দেবঁ বেড়হি
চনদাঁই কহেইক টেড়হি নিহি সিখ দেলঁ তকে
এসঅন কাম করেঁ জেটাঁই নাম করবথু লকে
এহে কহি চনদা আপঅন চলে রে লাগঅলি
ভেকাক নিঅর কানহু বিরা কথাঁই গেলাক ঢুলি

পেছুআই ঘুরঅলঅ আপঅন কামে হউ॥

লুড়কি চনদা ননদ ভউজি চলঅত রে গালমারি
ডালাকর ঘুঁঘুরা বাজেই সুনে লাগেইক ভারি
ঝুনুর ঝুনুর বাজেই ঘুঁঘুর চলঅনেকর চাইলেন্
হেলঅক মারঅইএ লুড়কিক হাঁথে ধরঅল ডাইলেন্
সাত সঅ গরখিআ ভালা অহঅ রে ডহঅরেঁ
গরু চরাই নাচঅত খেলঅত হ্বেকর লহঅরেঁ

ঘুঁঘুরেক সবঅদ সুনি পাউঅলঅ হউ॥

হিঁদে হুঁদে ভালি সভে কহাকহি হেউঅত
কন চাসাঁই ঘুঁঘুর বাঁধঅল গাইগরু রে আনঅত
কেঁহু কহঅত ঘাঁটি ঘুঁঘুর কিনাউবেঁই গলাকে
পিঁধাউবেইন কুইলা সাঁউনা সাঁউনি ধলি রে ধলাকে
লুড়কি চনদা পাসেঁ পাসেঁ এহঅ রে হেই গেলা
চাসাকর ঘাঁটি নহেইক বুঝি রে পাউঅলা

ডালাঁই বাঁধঅল বাজঅতঅ ঘুঁঘুরা॥

বেসিআম লেইএ চাকুআ বাইদেঁ চনদা রে পঁহচলি
চাইরঅ বাটেঁ আরঅ ভালা হুলকে রে লাগঅলি
সহঅদেবাই এক ধেইআনে আইড় রে ছলঅইএ
কনঅ বাটেঁ আরঅ ভালা নেহি রে ভালঅইএ
এক টিঠেঁ ভালেইক চনদাই আপঅনঅ সঁইআকে
বসাউঅল নজঅর জেসঅন বঁখলিই মছঅরিকে

সঁচেইস মনে হাঁকাউতেইক নঅ নিহি হউ॥

কতিখনঅ বাদেঁ ভালা সঁচেই মনে মনে
মুড়েঁকর বেসিআম এহঅ নাভাই দেতা কনে
পাসেঁ একঅ সিমঅইর গাছা এহঅ রে রহঅইএ
রসেঁ রসেঁ জাইকে চনদাই সিমঅইরকে কহঅইএ
সুনে রে সুনে সিমঅইর বচঅনঅ হামঅরি
মুড়েঁকর বেসিআম নাভাই দেবে টুইএক ধরি

তাতঅল ভাতেঁ মুঁড় পড়ি জাইস হউ॥

চনদাকর কথা সুনি সিমঅইরেঁ গাত ঝাড়ি
নিহি পারঅম কহিকুনে মুড় দেলেইক রে লাড়ি
সিমঅইরেক কথা সুনি চনদা হেলি দুখি
নেহঅর করি গসতঅল কথা এহঅ রে দেহেইক ফুঁকি
কিনা করঅম কিনা নেহি সঁচেই মনে মনে
গাছ হেইকুন এতেক নিঠুর হেলা রে কেসঅনে

চনদাকর মুড়অ জলে লাগেইক হউ॥

রাগেঁ দুখেঁ চনদাই কহেইক সুনে রে সিমঅরি
নেহঅর বিনতিই বুঝলে নিহি দুখঅ রে হামঅরি
সলঅ জজন বাইড় হেতঅউ কহঁ হামি তকে
দামি কহি নি গলবথু এহে বসমতাক লকেঁ
ফুলেঁ নেহি হেতঅউ মধু চনদাকর সাপানতেঁ
গজা গজা কাঁটা আরঅ হেতঅউ গটা গাতেঁ
ফুলেঁ তর মহঅকঅ নি হেতঅউ হউ॥

সিমঅইর তর ছাড়ি চনদা এহঅ রে চলঅইএ
পাসেঁ একঅ পারাস গাছ আরঅ রে নলঅইএ
পারাসকে জাইকুনে কহেইক মনেঁ ধরি বলঅ
সুনে সুনে অরে পারাস মনে নাহু করেঁ খলঅ
তাতঅল ভাত মুড়েঁ হামঅর দগদগাই জে ভারি
ডালাটা নাভাউঅম হামে দেবে টুইএক ধরি

রাখঅবে তঁই হামঅরি এহে বাত হউ॥

চনদাক কথা সুনি পারাস মু টা পেচঅ করি
কহে লাগঅল হামে নিহি দেবঁ ডালা ধরি
কাঠকাইঠা জবাব সুনি এহঅ রে চনদাক মনে
পঘলি উঠলেইক রাগ হদকঅল আইগ জেসঅনে
চনদাকর রাগ ভাব দেখিকে নজঅরেঁ
পারাস তঅ থরথরাই কাঁপে লাগেই ডরেঁ

লারিপারি কহেইক জে নেহঅরেঁ হউ॥

সুনে চনদা তকে দেখি গেলঁ হামি ডরাই
রাগ পাঁছি মুড়েক বেসিআম মর গাতে দেঁ টেঁড়রাই
পারাসেকর কথাই চনদাঁই টেঁড়রাই রে বেসিআমঅ
গাত সগঅর আরঅ ভালা সরঅবরঅ ঘামঅ
একঅ তুলসিগাছ ভালা রহেইক ঘেঁসাঘেঁসি
পারাসেকর সঁগে ভালা আরঅ এহঅ রে মিলিমেসি

চনদাকর বেসিআম নাভাই দেইল হউ॥

পারাস গাছ আরঅ ভালা.লেদা হেইএ গেলেইক
মনেক দুখেঁ চনদাকে এহঅ রে কহঅলেইক
দেখেঁ চনদা হামঅর দসা হাইরে কিনা হেলি
বেসিআম নাভাইএ ভালা কমঅর ভাঁগি গেলি
চনদাঁই কহেইক এসনে রহেঁ দুখ নাহু করেঁ মনেঁ
তর গুন গাহবথু এহঅ রে দুনিআকর লকজনেঁ
তর ফুলেঁ জগঅত হেতেইক আলঅ হউ॥

তুলসিকে কহেইক তবে হরঅখৌ মন ভিজাই
তর সুখঅর পাত ভালা লাগতঅউ জে পুজাই
সভেকাই বাসবথু ভালঅ সুনে হামঅর কথা
জতেক দিন চাঁদ সুরুজ এহঅ রে বসঅমতা
বেসিআম রাখি চনদাঁই আরঅ ভালেইক সঁইআধনে
হাঁকাউবেই নঅ নিহি ভালা সঁচেই মনে মনে

সহদেবা বাঝাইল আপঅন কামে হউ॥

সহঅদেবা কনঅ বাটেঁ নেহি রে ভালঅইএ
আপঅন কামে এক ধেইআনে মনঅ রে ভুলাইএ
চনদাকে দেখি ভালা বাগাল রে মুনিসা
কহাকহি করে লাগঅত ছাড়ি কামেক দিসা
গলাকর পুতঅহুই আবু এতেক দিনেক বাদেঁ
বেসিআম লেই আউলাহি দেখা কিআ মনেক সাধেঁ

নউআ হাঁখেঁ চারভিজা নুড়অব হউ॥

সহদেবা উঠেই নিহি এহঅ রে কাম ছাড়ি
সেহঅ দেখি মুইনসারা কহঅত রে মুড় লাড়ি
সহদেবা নাহু উঠঅলে কেসে উঠঅব হামরা
আগুআই উঠি বেসিআম খালে কহতেইন কামচরা
তখন আরঅ এক মুনিসেঁ কহঅলঅ রে উঠি
ভুখেঁ পেট জরেইস হামঅর আইখগিলা জাইস ফুটি

চালা হামরা আগুই নুড়ি লিঅ হউ॥

সভে বাগাল মুনিস ভালা পাঁতাসাইর বসঅলঅ
লুড়কিঁই আরঅ সভেকাইকে পতরি রে দেউঅলঅ
চনদাঁই তখন ভাত তিঅন এহঅ রে পরসঅইএ
খাইএক চাখি মিঠা মিঠা কথা রে বরসঅইএ
গুনগান গাহে লাগঅত সভে নুড়অইআরা
চনদাকর মনে গাঁথাই পিঅরা পিঅরা

অরসন পরসন লেই পেট ভরি খালা হউ॥

বাগাল মুনিস সভেকাকর খাউআ রে হেউঅলঅ
সহদেবা তাউ ভালা নেহি রে আউঅলঅ
চনদা আরঅ ভালি ভালি রহঅলি রে বসি
মন করেইক অকঅবকঅ ধিরঅজ জাই জে ধসি
লাজ সরঅম সাঁচি মনে হাঁকাউএ পারেইক নেহি
লুড়কিকে তখন ভালা উঠঅলি রে কহি

তরাক দাদাকে টুএক হাঁকাউআহাক হউ॥
আপঅন দাদাকে লুড়কিঁই ডাকঅইএ তখনঅ
বেসিআম খাই লেঁ দাদা কহেইক ঘনেঘনঅ
কতেক খন ডাঁড়হাই রহঅব আউএ চাঁড়করি
নেহঅর বিনতিঁই ডাকেইক ভালা এহঅ রে রেগ ধরি
সহদেবাঁই সুনিকুনে নিহি রে সুনঅলঅ
আপঅন কামে হেঁটমুড়েঁ ভুলি রে রহঅলঅ

বাগাল মুনিস ভালঅত আর হাঁসঅত হউ॥
হার ছাড়ি সহদেবা নেহি রে আউঅইএ
বহুক আনঅল বেসিআম ভালা নেহি রে খাউঅইএ
লুড়কিকর হাঁকান খেলেইক গটা রে মুলুকঅ
সহদেবাক কানঅ জেসে খেতেকর ভুলুকঅ
চনদাঁই সঁচেইস বারঅ বছঅর হেলাহেইক পুরঅনঅ
তাউ কাহে সঁইআক হামঅর ধচঅর রে এসঅনঅ

কিনা করঅম সঁচেই আপঅন মনে হউ॥
নিজেকর সঁইআকে চনদাঁই পাস আনেক লাগি
বুড়হাবাপ মাহামাঁইকে আসিসঅ জে মাগি
রাঁধা-বাঁটা-বেসিআম আনা সঁইআ দেখেক আসেঁ
কেসে করি মু দেখঅম নিহি আউলে পাসেঁ
কিনা সাঁচি চনদাঁই আরঅ খাইএক মুড়ে লাদি
ননঅদ সঁগে ঘার ডহরঅলি এহঅ রে কাঁদি কাঁদি
ডহঅরে একঅ কেঁদ গাছ দেখঅলঅ হউ॥

ডাইর ভাঁগা কেঁদ পাকঅল দেখিকে নজঅরেঁ
ঠমকি ডাঁড়হালি চনদা এহঅ রে ডহঅরেঁ
লুড়কিকে কহে লাগঅল সূনা ননঅদ কানে
কেঁদ পাকঅল খাইএক আস জাগঅলি মর মনে
তরাকর দাদাকে হাঁকাই কহাহাক এহে কথা
হামকে এখন কেঁদ পাকঅল পাড়িকুনে দেতা

নিহি তঅ হামি ঘার নাহ জাম হউ॥

লুড়কিঁই তখন সহদেবাকে এহঅ রে ডাকঅলঅ
পাড়ি দেবে আউ দাদা কেঁদঅ রে পাকঅলঅ
কেঁদ পাকঅল বিনু ভউজি ঘারা নেহি জাতি
অড়ি ধরি বসি দেইল ভুখেঁ আহি তাতি
বহিনেক হাঁকে সহদেবা আউঅলঅ হেঁটমুড়াই
চাটান একটা উঠাইকুনে কেঁদগাছে দেইল বাজড়াই

লদবদাই গিরি গেইল কেঁদ পাকঅল হউ॥

হেঁটমুড়েঁ সহদেবা জেসঅনঅ আউঅলঅ
কাকঅউ নি ভালি অহে লেখেঁ ঘুরিকে জাউঅলঅ
কিআ বহিন কিআ বহু কাকরঅ রে সঙ্গে
এক টুমঅ নি কহলেইন কথা গেলা অহঅ টংগে
নজঅর ভরি দেখলেইক চনদাঁই আপঅনঅ সঁইআকে
মনে মনে বাখান পাড়েই অকইরমাহা মাটিকে

এহে মাটিক খাতির গিরঅলঅ গাছেক ফর হউ॥

সূনা লুড়কি এহঅ কেঁদ খাম নিহি হামে
মাটিক গিরঅল ফরেঁ ভালা ধুরা বালি দমেঁ
পাসে আরঅ নিমগাছ একঅ রে দেখঅলঅ
নিমফর খাইএক আস ননদকে কহঅলঅ
ডাকাহাক তরাক দাদাকে নিম পাড়ি দেতা
লুড়কিঁই আরঅ সুনি আপঅন ভউজিকর কথা
নিম পাড়ে দাদাকে হাঁকাউঅল হউ॥

বহিনেকর ডাক সুনি সহদেবাই কাম ছাড়ি
হেঁটমুড়েঁ আইকুনে নিম দেলেইক পাড়ি
কাকরঅ সঁগে কনঅ কথা নেহি জে কহঅলা
ডহর ভালি আপঅন মনে এহঅ রে চলি গেলা
চনদাঁই আরঅ একটি নিম কুড়হাইকে চাখঅলঅ
মুটা কিচঅকাচঅ করি এহঅ রে ফেঁকঅলঅ
নিম তিতাঁই জিউ ভিড়কি গেইল হউ॥

সহদেবাই হার বাহেই মনেকেরি সুখেঁ
এহে বাটেঁ চনদাক হিআ ফাটি জাইক রে দুখেঁ
বারঅ বছঅর বাদেঁ ভালা আউলি সঁইআ ঠিনে
দেখাসুনা গালমারা করেলাই এতি দিনে
নাহ পুরলেইক মনেক আস মিছাই রে হেঁসরানি
ভাভিগনি চনদাকর গাতেক রকঅত পানি

ফুঁফুআই লাগেই কাপাড় হঁসতি হঁসতি হউ।
চনদাক মনে একঅ বুইধ রে আউঅলঅ
সঁইআকে বিড়ি দেখেক মকা রে পাউঅলঅ
হারেক একটা হাঁসা গরু অকঅর বাপু ধনে
জইতুক দেরঅহেক ভালা বিহাকেরি খনে
হাঁসা গরুটাকে চনদাঁই ডাকলেইক জখঅনঅ
মুড় পুচকা দেইএ হাঁসা এহঅ রে তখঅনঅ
উমকি আউঅল চনদাকেরি ঠিন হউ॥

বুঁটা ছাড়ি হাঁসাক পেছুঁই সহদেবা বিরা
হঅহিঁ হঅহিঁ কহি ইড়কেই মনঅ রে অথিরা
হাঁসাকে ডাকিকে চনদাঁই কহেইক রে ডাঁড়হাবে
হামঅরি কথা ভালা এহঅ রে রাখঅবে
চনদাকর কথাই আরঅ হাঁসা রে গরু
থির হেইকুন চনদাক ঠিনে ডাঁড়হাই সুরুখুরু
হাঁথ বুলাই দেলেইক গটা গাতেঁ হউ॥

ইড়কি আউএই সহদেবা হাঁসাকে রে দেখি
আপঅনঅ তিরিআ সঁগে নেহি চঅইখাচখি
নেগা হাঁথোঁ হাঁসাগরু ধরিকে জতঅনে
লেই গেলেইক কামেক ঠহঅর চিহঅডেক বাঁধঅনে
রাউ কাড়হা তঅ ধুরেক কথা ইধাঁউ চনদাকে
মুড় ঘুরাই ভাললেক নিহি অজান লক লেখোঁ
চনদা ডাঁড়হাল ডাঁড়হালে রহঅলি হউ।।

বানঠাক ফাঁফরেন চনদা

লুড়কিকে কহেইক চনদাঁই সূনা হউ ননঅদি
পাসেই বহি জাইক ভালা এহঅ রে কাঁসাই নদি
কাঁসাই কিনারে দিঅ জাপ হামরা চালা
আড়সি নিআর ইজঅর পানিই ধউএ এহঅ ডালা
ননঅদ ভউজি গালমারি চলে রে লাগঅলঅ
দেখেইতে দেখেইতে কাঁসাই কিনারে পঁহচলঅ
ইজঅর কাঁসাই বহেই নিরাধার হউ॥

কাঁসাইএক পানিই চনদাঁই আরঅ ডালা রে ধউঅইএ
লুড়কি কিনারেন বসি চাইরঅ বাটঅ দেখঅইএ
জখঅন আরঅ ডালা ভালা ধউঅলঅ হেউঅলঅ
চনদা এবের ডালাক মাঝে এহঅ রে বসঅলঅ
উফলি উফলি মইধ কাঁসাই চলিএ রে গেলি
সেহঅ দেখি লুড়কি আরঅ ডরে বাউলি হেলি
ডাকে লাগঅল আপঅনঅ দাদাকে হউ॥

চাঁড়েমাড়ে আউবে দাদা বহু জাহঅউ বহাই
চৈঁচাই চৈঁচাই কাঁদেই লুড়কি কেসে পাউতি রেহাই
বহিনিক চৈঁচানি ভালা সহদেবাই সূনি
কুদলে আইকে পুঁছে লাগঅল কিনা হেলঅউ নুনি
ডরেন থরথরি লুড়কিক কথা নিহি বাহারাই
কাঁসাই মইধ দেখাই দেলেইক হাঁথেকর ইসারাই
উফলি উফলি জাই জে তিরিআ হউ॥

সহদেবাই তুরতা তুরতি বুইধ রে ধরঅলঅ
লমছর লমছর কাঠ বাঁধি এঁগসি রে করঅলঅ
এঁগসিই আরঅ একটা ভালা ফাঁইস রে জড়িকে
নদিকর মাঝে দেলেইক এহঅ রে ফেভড়িকে
চনদাকে এহঅ সহদেবাই নেহি রে ভালঅইএ
ফাঁইসেকর দড়া চনদাক মুড়ে রে বাঝঅইএ
চনদাঁই আরঅ পুচকাইএ দেইক হউ॥

সহদেবাই ফাঁইস ফেভড়ি জতেক ধাঁউ বাঝাইএ
লাগেইতে লাগেইতে চনদাঁই এহঅ রে পুচকাইএ
নদিকর হেলঅকে ভালা ডালা জাইক উফঅলি
লুড়কি আর সহদেবা ভালা রহলা ভালি ভালি
কনঅ করি চনদাকে উঠাউএ জে লারঅলঅ
ভাই বহিন কিনারে বসি সঁচে রে লাগঅলঅ
আইখেক অলঅত হেলি চনদারানি হউ॥

পানিই ভাসি জাই চনদা ডালাকর উপঅরৈ
লুড়কি সহদেবাক আঁখি ছপঅ ছপঅ লরৈ
সঁচে লাগঅল ঘারৈ জাইকে কিনা রে কহঅবঅ
আপঅন মাই বাপকে ভালা কেসঅনে বধঅবঅ
লর পঁছি পঁছি দিঅ ভাইঅ রে বহিনি
ঘার বাটেঁ ডহরলা মনে লেই দুখানি

চনদা কিনা আউতি ঘুরি ঘার হউ॥
লুড়কিই কহেই বিসরঅবেই ভউজিকে মই কেসে
সভে কিছু হেলেইক দাদা তহঅরি রে দসৈ
বারঅ বছঅর পুরুন করি তকে খজি খজি
নিজেক হাঁথৈ রাঁধি বাঁটি আউরহি ভউজি
রাউ তঅ ধুরেক কথা ভালি নি দেখলেসিক
অকঅর আনঅল বেসিআমটাউ মুহৈ নি দেলসিক
কিনা লাইএ রহতি হামরাক ঘারৈ গউ॥

কথা সুনি সহদেবাই মুড়অ রে ঠঁকঅইএ
খেপা নিঅর নিজেক তালৈ এহঅ রে বকঅইএ
হামে কিনা করলঁ ভালা নি বুঝি নি জানি
জিনগানি ভর রহি গেলি এহঅ রে পসতানি
কবে কবেই বারঅ বছঅর গেলাহেইক জে বিতি
খেইআলে নাহু রাখে পারলঁ রহলঁ কামে মাতি
বারঅ বছঅর বাহারে রহা হেলি মিছা হউ॥

চনদা ভাসি জাই ভালা নি জানঅল রে দেসেঁ
কাঁহাঁ জাইস সেহঅ বানার নেখেইক রে হৃদিসেঁ
দুখ দিখ লাগঅল ভালা এহঅ রে জিনগানি
আগুবাটেঁ আহেইক কিনা দেখেই নিহি ঠানি
বহঅনতি কাঁসাইএক পানি এহঅ রে হেলকঅইএ
ইধাঁউ হিঁদে উধাঁউ হুঁদে ডালাকে ঠেলকঅইএ

নেখেইক চনদাক জিউএকর ডর হউ॥

কতেক ধুর গেলি চনদা এহঅ রে নিহি দিসা
মনে নিহি ভুখ পিআস নিদ রে আলিসা
কাঁসাই কিনারে ভালা বানঠা মুচি বিরঅ
তপ সাধঅন করেই আরঅ বারঅ রে বহঅরঅ
চড়কা খুখড়াক মুড় ভালা কুকরুঁগটুঁগ করি
ডাকি উঠঅলঅ আরঅ রেগঅ রে ধরি

বানঠা মুচিই আইখ উঘরাউঅল হউ॥

বারঅ বহঅর বানঠা মুচিই আইখঅ নি খলঅইএ
আইখ খলি চাইরঅ বাটেঁ এহঅ রে ভালঅইএ
নদিক পানিই ভালি দেখেই আপঅনঅ নজঅরেঁ
কনে আরঅ উফলি জাই ডালাকর উপঅরেঁ
নিখরাইকে ভালি দেখেই পাঁছি মনেক ধিঁধা
পসটঅ করি চিনহি লেলেইক হেকি তঅ রে চনদা

বারঅ বহঅরে তপ সাধঅন সিধ হেলি হউ॥

চনদাকে ধরেক খাতির এহঅ রে বানঠা মুচি
কিনা করঅম কিনা নেহি পাউএই নিহি সাঁচি
নদিকর হেলঅকে চনদা এহঅ রে উফলি জাই
ধরঅম ধরঅম করি বানঠা বালিই জাই রে থাসাই
বারেঁ বারেঁ ফুসি জাই নিহি পাইকে ধরা
পানি উপঅর কাচাড খাই হেলাক জে আধমরা

চনদাকে ধরে নিহি পারঅল হউ॥

চন্দাই কহেইক অরে বানঠা দেহিক বল দেখাই
বগঅড় কাম করে গেলে মরবে রেকাই রেকাই
মর বাটে নজঅর দেলে মরেই হেতঅউ তকে
বাঁচাউএলাই নি পারবথু দুনিআক কনঅ লকে
তঁই কন মঁই কনে সাঁচি দেখি মনে
বিন বুঝি কিআ আসে ডাকসিক মরঅনে

চিমটি হেইকুন জাইস না নদি ডেগে হউ॥

নিরাস হেইকে বানঠা ভালা দেহি রে মচড়াইএ
কিনারেঁ উঠিকে গড় হাঁথ রাগে রে কাচড়াইএ
মুহেক সিঁকার ফসকি গেলে জেসে বনুআ জনুআর
বানঠা মুচিকরঅ দসা হেলেইক সেহঅ নিআর
বাঘলাজা হেইএ বানঠাই দেলেইক রে মুড় গাড়ি
দেহিক বেলেক ফুটানিটাই এহঅ রে গেলেইক ঝাড়ি

নিজকে দুসে লাগেই মনে মনে হউ॥

ডালাক উপঅর ভাসেই চন্দা মনেকেরি দুখেঁ
কতিধুরঅ জাইএ ভালা দেখঅলঅ রে আইখে
লুগাফাটা কাচঅত ভালা রজঅল রজঅলিনে
ভাসি ভাসি আউলি চন্দা অরাকর ঠিনে
রজঅল রজঅলিনিঁই আরঅ চন্দাকে রে দেখি
হাইটাটকা হেইএ গেলা রাউ লেলেইন টেকি

বহুত খন ভালিএ রহঅলা হউ॥

বহুত খনঅ বাদেঁ দিঅক কথা রে উসরঅলঅ
রজঅলিনিঁই চন্দাকে ভালা আঁকড়াই ধরঅলঅ
পুঁছে লাগঅল আনার বানার এসঅন কাহে দসা
রাজাক বেটি পানিঁই ভাসেই কাহে মলিন ভেসা
চন্দাই তখন উলগি দেলেইক মনেকেরি কথা
একে একে সুনাই দেলেইক জিনগানিকর বেথা
রজঅল রজঅলিনে সুনঅত মন দেইএ হউ॥

টুমে টুমে উচরাউলি চনদাঁই দুখেকর কেহেনি
কাম ছাড়ি কান অনাই রজঅল রজঅলিনি
মাই বাপেঁ বিহা দেলা মনেকেরি সুখেঁ
জানঁ নেহি গিরে হেতি এসঅনঅ রে দুখেঁ
মাইএঁ একঅ কিরা দেলেইক সঁইআকে হামঅরঅ
মকে জেসে ভালঅত নিহি বারঅ রে বহঅরঅ
জানঁ নিহি কিনা খাঁখুসেঁ কিরা হউ॥

সঁইআই মরঅ সেহঅ কিরা লেলা জে মুড়পাতি
বিহা করি ঘার ছাড়ি ফরকঅলা রাতারাতি
বারঅ বহঅর একঅ টাঁইডেঁ বসঅতঅ করঅলা
হামঅরি নজঅরেঁ ভালা নিহি রে গিরঅলা
গনি দেখঁ বারঅ বহঅর পুরন রে হেউঅলঅ
সঁইআক সঁগে দেখা করেক আসা জে জাগঅলঅ
বেসিআম রাঁধি গেলঁ সঁইআ ঠিনে হউ॥

হামঅর লেগঅল বেসিআম ভালা সঁইআই নিহি খালা
এক ধাঁউঅ মর বাটে নেহি রে ভালঅলা
কেঁদ পাড়া, নিম পাড়া কতেক কিনা করাউলেই
হারেক হাঁসা গরু পুচকাই নিজেই ধরাই দেলেই
কিরাক দিন বিতলাহেইক নেহি জানঅত মনে
কামে বুঝি বিসরঅলাহাত দিনা রে গনঅনে
রাগেঁ মঁই কাঁসাইএঁ ভাসঅলঁ হউ॥

আউএইতে আউএইতে ভালা বানঠা রে মুচি
মকে ধরেক খাতির করেহেলাক নাচানাচি
অকঅর ঠিন লে বাঁচিকুন সুনে রে রজঅলিনি
তরাকে চিনহিকে আউলঁ এহঅ রে তরাক ঠিনি
নদিআ কিনারে ডাঁড়হাই বানঠাকর নজঅরঅ
এখনঅ মকে টুঁড়তে আহে গিধেকর নিঅরঅ
এহে চনদাক মান ভরঅম হিঁচডেক নেসাঁই হউ॥

রজঅল আর রজঅলিনিই সুনি দুখেক কথা
চনদাকে কহে লাগঅল বুঝলিঅ তহঅর বেথা
দিঅ পারানিই ভালা উঠঅলঅ রে কহি
আর তকে ভাসি ভাসি জাই দেবঅউ নেহি
তকে হামরা লেই জাবঅউ হামরাকর সঁগেঁ
নিজেক নিঅর রহবে তঁই এহঅ রে নিজঅ টংগেঁ

চনদাহঁ মনে পাউলি বল হউ।।

রজঅল আর রজঅলিনিই কাচি লুগাফাটা
দুইটা গাঁইঠ করঅল আরঅ করি রে ভাগবাঁটা
চনদাকে মাঝেঁ করি ঘারা রে ডহরঅইএ
রজঅলিনি আগুঁই আগুঁই এহঅ রে চলঅইএ
চনদাকর পেছুঁই পেছুঁই চলঅইএ রজঅলঅ
সুখ দুখেক গালমারি এহঅ রে তিনলকঅ

ডেগেঁ ডেগেঁ ডহঅরঅ থিআই হউ।।

তিনঅ লক চলে লাগঅল এহঅ রে ডর পঁছি
ডহঅর টেকি ডাঁড়হাই আহে বানঠা রে মুচি
আঁইখ লাল করি ভালা বাঘাকে জেসঅনঅ
বাঁহি মলকাই হাঁগকার মারেই এহঅ রে ঘনেঘনঅ
আগুঁই আগুঁই রজঅলিনি চলেই রে মুড় উঠাই
লুগাকেরি মঠ ধরি নেগাহাঁথেক মুঠাই

ডরাই নিহি বানঠাকর হাঁগকারে হউ।।

সেহঅ খনে রজঅলেঁ ভালা এহঅ রে কহঅইএ
নউআ লহুঁই বানঠাই আরঅ গুরু নিহি চিনহঅইএ
চিমটিক পাঁখা গজাইল লেখেঁ হেলাহেইক রে মতি
কতেক বড়অ বির হেকে এহঅ রে দেখে হেতি
রজঅলিনিই কহেই তবে বানঠা রে দুসমনঅ
তর কাপাড়েঁ নাচেক এবের এহঅ রে মরঅনঅ
একে মুকাঁই ভাগঅবঁ তহঅর দাঁত হউ।।

রজঅল রজঅলিনি চনদা নিডঅরে চলঅইএ
সুগনি লেখেঁ বানঠা মুচিই চনদাকে নলঅইএ
হিবড়া হিবড়ি অরা ভালা হেলা রে জখঅনঅ
বানঠা মুচিই ছাতি থাপড়াই কহঅইএ তখঅনঅ
চনদাকে হামে আবু লেলে জাম ঝাঁপঅটিকে
ঘারেক সভা করঅম আরঅ রাজাকর বেটিকে

একঅর লাগি করলাই সাধঅন হউ॥

লুগাক মট ভুঁইএঁ রাখি রজঅল রজঅলিনি
সমসি ডাঁড়হালা দিঅ সেহঅ কাথা সুনি
রজঅলিনিই কহেইক আরঅ এহঅ রে বানঠাকে
কতেক বলিআন হেকিস ছুই দেখিহিঁ চনদাকে
সনকা পাটিক লেখেঁ ভাঁগি দেবঅউ রে হাঁথগড়অ
টেটাই টেটাই মরে হেতঅউ করবে ঘড়ঘড়অ

পাউবে তঁই আদানেকর ফর হউ॥

রজঅলিনিক কথা সুনি রাগেঁ রে গুরগুরাই
বানঠা বেইমানে কহেই রৌগিআ আঁখি ঘুরাই
জিউ জদি রাখেক আহঅউ দেখেঁ হউ তঁই ডহঅর
টেক দেলে হামঅর হাঁথেঁ মরঅন আহঅউ তহঅর
চনদাকে ধরেক খাতির বানঠা রে আগুআইএ
রজঅলিনিই ঠেলকি দেলেইক গিরঅল অদড়াঁগ হেইএ

অবাপ কহি চেঁচাই উঠঅলাক হউ॥

রাগেক চটেঁ বানঠা মুচি এহঅ রে তিড়কি উঠি
ইড়কি জাইএ ধরলেইক রজঅলিনিক রে চুইল ঝুঁটি
সেহঅ খনে রজঅল ধবাঁই ধরি বানঠাক ঘাড়েঁ
তলগি লেইএ লেবদি দেলেইক গিরলাক রে বাদাড়েঁ
বাদাড় ভাঁগি বানঠা আরঅ লড়হাইএ ঠেসঅলঅ
রজঅল রজঅলিনি ভালা হারুলঅ হেউঅলঅ

চনদাকে বানঠাই রগদি ধরঅলেইক হউ॥

হাই হাই করে লাগঅল রজঅল রজঅলিনি
চনদাকে লেইএ গেলেইক দেখাইকে মসিআনি
রজঅলিনিই মুড় কাচড়াই কহেইক রে সইআকে
কন ভেদেঁ আনলিঅউক ঘুরাই এহঅ রে চনদাকে
রাজাক বেটি ভালঅই তঅ গউ ভাসি জাইহেলি
ঘুরাই আনি হামরাই দেলিঅউক মরঅন খালে ঠেলি
এহে পাপ কাঁহাঁ রাখঅবঅ হউ॥

কাঁদি কাঁদি তিরিআকে বুঝাউএক রজঅলেঁ
নখ নি দুখাতেক চনদাক বুড়হাবাপেক বলেঁ
পাপি বানঠা মুচিক বল হেই জাতেক হিনঅ
আগুবাটেঁ খেলেইক অকঅর মরঅনেক দিনঅ
জেসঅন চনদা তেসনে রহতি মানে রে ভরঅমে
ফাঁড়া কাটি বাহারাতি অঁই করঅমেক ধরঅমে

বুড়হাবাপকে এহেটাই মর সেঁউরন হউ॥
বানঠা মুচিই চনদাকে জবঅরি জে করি
টানি হিঁচড়ি লেগেইক ভালা এহঅ রে হাঁখে ধরি
চনদাঁই কহেইক অরে পাপি ছাড়ি দে তঁই মকে
নিহেলে মরে হেতঅউ কহি দেহঁ তকে
হাঁগকার মারি কহেই বানঠাঁই মঁই বিরেক বিরঅ
মর হাঁথলে ছাড়াই লেগতঅউ আহে কনে মিরঅ
হামঅর তাখঅড় জানঅত নিহি কনে হউ॥

বানঠাকর গড়েক ভারেঁ পাখঅড় হেউএক গুঁড়া
চলেইতে চলেইতে পঁহচি গেলা কুলহিক মুড়া
কুলহিক মুড়া পঁহচি বানঠাঁই চনদাকে কহঅইএ
বারঅ বছঅর হামে আরঅ উপাসঅ রহঅইএ
এহেঠিনে এখঅন ধরঅম পুজা রে করঅবঅ
তাকঅর বাদেঁ আহাৰ পানি এহঅ রে ধরঅবঅ
তঁই চনদা ইঠিন বসিকে রহঅবে হউ॥

লারিপারি চনদা আরঅ বসি রে রহঅলি
রাগ দুখ মনেক ভিতঅর উঠেই রে দহঅলি
বানঠা আরঅ গটা গউরা এহঅ রে ঘুরঅইএ
গনি গনি সাতসঅ কাড়া জগাডঅ করঅইএ
কুলহিক মুড়াই ধরঅম পুজাঁই আরঅ রে বসঅলঅ
ধরি ধরি সাতসঅ কাড়া বলি রে করঅলঅ

চনদা রহঅলি মুড় ঘুরাই হউ॥

সাতসঅ কাড়া বেনাই সনাই বানঠা মুচিই আরঅ
বড়অ বড়অ হাঁড়ি ভালা করঅলঅ জগাডঅ
মটা মটা মুড়হা খজি এহঅ রে আনঅইএ
ডভা লেখেঁ ভানঅস ভালা আরঅ রে বেনাইএ
সাতসঅ কাড়া রাঁধি বানঠাঁই খালাক আমভাপুরি
ফেঁকানঅ নাহ হেলেইক আরঅ এহঅ রে বনখুরি

খাইকুনে ঢেকাইরঅ পাড়অইএ হউ॥

ডহরঅলঅ বানঠা এবের চনদাকে রে লেইএ
আগুঁই আগুঁই চলেই চনদা ছিছির বিছির হেইএ
কতিধুরঅ আরঅ ভালা এহঅ রে জাউঅলঅ
একটা তেঁতঅইর গাছ আরঅ দেখে রে পাউঅলঅ
ঝাঁপঝাঁপুইড়া পুননা গাছ ভালা ফরে গাদাগাদি
চনদাঁই কহেইক এহে তেঁতঅইর পাড়ি দেবে জদি

সুনেঁ বানঠা খাইতেলিঅন হামে হউ॥

সেহঅ কথা সুনি বানঠাঁই নি করঅলঅ ডেরি
হনু নিআর উঠি দেলেইক গাছেকর উপঅরি
তেঁতঅইর গাছ হিলাউলাক এহঅ রে পড়পড়াই
তুরুতে তেঁতঅরি ভালা গিরঅলঅ ঝড়ঝড়াই
তেঁতঅরি দেখিকে চনদাঁই ভাভিগনি মনে
মু ফুটি কহে লাগঅল সুনে বানঠা সুনে
ভুঁইএঁ গিরঅল তেঁতঅরি নিহি খাবেইন হউ॥

১১
তখঅন চনদাঁই ভিজঅল মাটি এহঅ রে কড়অইএ
সেহঅ মাটিই লউআ ভালা এহঅ রে গড়হঅইএ
মাটিকেরি লউআ আরঅ গাছে দেলেইক টাঁগি
তঁতঅরি রাখে कहলেইক বানঠাকে এহঅ রে টুঁগি টুঁগি
সেহঅ তঁতঅইর খাম হামে कहি দেলেইক ফুটি
কথা নাহ্ সিরাইতে বানঠা গাছে দেলেইক উঠি
এহে মকাঁই চনদা দেইল পারাই হউ॥

জিউ লেইএ পারাই চনদা ভালেই নিহি পেছু
নিহি বুঝেই কাঁটা খঁচা হেঁটঅ আরঅ টিচু
তঁতঅইর পাড়ি ভুলঅল বানঠা গাছেকর উপঅরেঁ
আচঅক দেখেই অহঅ ধুরেঁ চনদাকর নিঅরেঁ
চনদা পারালি বাছেঁ মনে জাগঅল ধিঁধা
গাছ উপঅর লে হাঁক পাড়েই চনদা রে চনদা

মাটিক লউআই হুঁকাইরঅ জে দেইক হউ॥
লউআ ভততি তঁতঅইর লেইএ বানঠা রে নাভঅলঅ
চনদাকে আরঅ ভালা দেখি নি পাউঅলঅ
হিঁদে হুঁদে ভালি দেখেই বুঁড়অ এহঅ ঝাড়া
চনদা চনদা ডাকে লাগঅল নি পাউআইক সাড়া
চনদা পারালাহি বুঝি লেলাক মনে মনে
উমকি কুদঅলঅ বানঠা চনদাকেরি টানে

লউআ ভততি তঁতঅরি লেইএ হউ॥
বানঠা মুচি কুদেই ভালা ডহঅরেঁ ডহঅরেঁ
চনদাকে দেখি নিহি পাউএইক রে নজঅরেঁ
চনদাঁই কহেই বুড়হাবাপ সেঁউরহঁ মঁই তকে
বানঠামুচিক হাঁথলে তঁই বাঁচাউবে গউ মকে
আড়হর কাঁটাকর বনেঁ চনদা এহ রে সামহালি
জিউ বাঁচাউএক ঠহঅর ভালা অহঅটাই রে দেখঅলি
বানঠা মুচিই খজি নি পাউঅলেইক হউ॥

ইবাট উবাট খজি বানঠাই কিনা বুঝি মনে
সামহালাক রে ভালি ভালি আড়হর কাঁটাক বনে
সুড়ুক সাড়াক সবঅদ সুনি চনদাঁই লেলি বুঝি
বনেক ভিতঅর সামহালাক বানঠা মকে খজি খজি
এহে বন লে বাহারাই ভালা পারাই রে হেতি
ঝুঁড়পিটা খজি বুলেইস বানঠা বেইমান মতি

চনদা পারালি বনঅ ছাড়ি হউ॥

কাঁটাবনে বাঝাই বানঠা গিরঅলঅ অজবঝাই
চলা তঅ ধুরেক কথা ডাঁড়হাই নি পারেই সঝাই
লতেপাঠেঁ লটঅপটঅ গিরি মাহাকাইঠেঁ
বহুত নিঅর কাঁটা আরঅ হুঁড়াইক গটা গাঠেঁ
জড়অ হাঁথে বুড়হাবাপকে করঅইএ সৈঁউরনঅ
এহে ফেচাঁগ লে ভালা বাঁচাউএঁ মর জিউ ধনঅ

কাঁটা বন লে বাহার করেঁ মকে হউ॥

বাড়হঅনেঁ বাড়হলে বাছা বুইধ নাহু গিআনঅ
দেহিক বলেঁ কেহু নিহি হেউঅত বলিমানঅ
ফরিটাঁই কাঁটা ভালা কাটি রে দেউঅবে
তবেই তঅ কাঁটাবন লে বাহারঅ হেউঅবে
মনে বানঠাক চেতন হেইল এহঅ রে ঠানঅলঅ
ফরি ধরি কাঁটা আরঅ এহঅ রে কাটঅলঅ

ডহঅর করি হেলাক বন বাহার হউ॥

কাঁটাবন ছাড়ি বানঠা এহঅ রে কুদঅইএ
চনদাকে টুঁড়হি টুঁড়হি আরঅ রে খজঅইএ
চনদা তখঅন গউরাকর আহি কুলহি মুড়াঁই
থকিতে সাঁথাই ভালা বড়গাছেকর জুড়াঁই
আপঅন বাপেক মইস কাড়া চরঅত ডাগঅর ঘাঁসেঁ
দেখিকুনে চিনহি চনদা গেলি অরাক পাসেঁ
কহে লাগঅল দুখেকেরি বাত হউ॥

খজি খজি বানঠামুচি হাজির হেলাক উহাঁ
জিউএকর ডরেন্ চনদা পঁহচি আহি জাঁহাঁ
বানঠাকে দেখি জতেক মইসি রে কাড়া
ঘাড় উঠাই রেকাঁই রেকাঁই দেখিক মাথাঝাড়া
রগদে লাগঅলঅ ভালা কাড়া মইস জতেকে
সিঁঘেঁ সিঁঘেঁ গুতাউথিক এহঅ রে বানঠাকে

বানঠা গিরঅলঅ খিজুর ধুঁধেঁ হউ
রাউ নি ফুটেইক বানঠাক জড়অ হাঁথ করি
বুড়হাবাপকে সেরঁঅইএ এহঅ রে কাঁইতে গিরি
বাড়হঅনে বাড়হঅলে বানঠা বুইধ নি গিআনঅ
বকতা ফুটঅলেইক বানঠাক করিকে ধেইআনঅ
অঁগঅমারি জাল বানঠাঁই দেইল রে লেবদাইএ
টুঁটিআ লেখেঁ কাড়া মইস গেলা রে ডাবাইএ

বাঝাইএ রহঅলা একেঠিন হউ॥
ছাগঅইর নিঅর ধরি ধরি কাড়া রে মইসিকে
বলি দেউএ লাগঅল বানঠাঁই রাগি রে রুসিকে
চনদাক বাপেক জতেক মইস কাড়া চরেহেলা
বানঠা বেইমানেক হাঁথেঁ সভে রে মরি গেলা
থারাথাইর গিরি রহঅল মুড় কাটঅল দেহি
চিল সুগনি ডাকে লাগঅত এহঅ রে রহি রহি
বানঠা কুদে লাগঅল চনদাকর পেছুঁই হউ॥

চনদা ইড়কঅইএ ভালা আগুপেছু ভালি
সহে নিহি পারেই আরঅ জিউএক কলবলি
কতিধুরেঁ আরঅ একঅ ভেড়াকে দেখঅইএ
কাঁদি কাঁদি লরেঝারেঁ অকে রে ডাকঅইএ
চনদাক হাঁকেঁ ভেড়া ভালা পাসেঁ রে আউঅলঅ
দুখেক কথা চনদাঁই অকে সুনাইএ লাগঅলঅ
বানঠাক ঠিনলে করঅবে তঁই রেহাই হউ॥

চনদাক কথা সুনি ভেড়া কুলহিকেরি মুড়াই
বানঠাকে টেকাউএক তেঁহেঁ রহঅলঅ রে ডাঁড়হাই
গাঁউ ভিতঅর ঢুকঅলি চনদা জিউএকর ডরেঁ
একঅ বুড়হিঁই ধান ঘাঁটেই দেখঅলি নজঅরেঁ
বুড়হিক ঠিনেঁ জাইএ সুনাইলেইক মনেক দুখঅ
বুড়হিঁই কহেইক মঁই রহেইতে হেউইস নাহ্ ধুকপুকঅ
দেবঁ তকে লুকাইএক ঠহঅর হউ॥

হাঁগকার মারি বানঠা মুচি কুদালে আউঅইএ
কুলহি মুঁড়াই ভেড়াই ভালা ডহঅরঅ ছেঁকঅইএ
বানঠাকে দেখি ভেড়াই সিঁগ রে মুড় হিলাই
হাঁঠুই হাঁঠুই বজঅড় দেই দেলেইক রে টিলাই
হাঁঠুকের দুখানিঁই মুচি অসানেঁ দেইল বসি
গাতেকেরি বল আরঅ সভে গেলেইক ধসি
বুড়হাবাপেক করঅইএ সোঁউরন হউ॥

বাড়হনে বাড়হলে বাছা বুইধ নিহি গিআনঅ
ভেড়াকর গুতানিঁই ভালা মরঅনঅ সমানঅ
জেসঅনঅ জুহা ভালা তেসঅনঅ ডাবাউবে
এহঅ চেতঅন আরঅ আউঅলঅ রে ভাভেঁ
বলঅ ধরিকে বানঠাই এহঅ রে হাঁগকারি
ভেড়াকে ধরঅল রাগেঁ ঝাঁপঅটি রে মারি
ফরি লেইএ দেলেইক বলি হউ॥

রটপটাই চলেই বানঠা বাধা ফাঁদা মেইড়ি
রাগেঁ গুরগুরাই আরঅ দাঁতেকর কড়কড়ি
গাঁউ ভিতঅর ঢুকি ভালা অহঅ বুড়হিকে জে দেখি
জন বুড়হিঁই চনদাকে ভালা লুকাউরহেইক টেকি
চনদাকর বানার জখঅন পুঁছলেইক রে বুড়হিকে
উলটা বাট দেখাই দেলেইক এহঅ রে মুচিকে
চনদাকে খজি নি পাউলেইক হউ॥

রাজাক বেটি চনদা আরঅ চাইরঅ খুঁট ভালি
লুকাই লুকাই আপঅন জনঅম টিঁড়া রে পঁহচলি
বানঠাই আরঅ খজি খজি উহাঁ রে দেখঅইএ
চাঁড়েমাড়ে চনদা ভালা ডেহরি রে ডেগঅইএ
চনদাকঅর গড়েঁ রহেইক ভালা বাঁক রে পিঁধঅলঅ
দুআরা ডেগঅইতে একঅ পুচকি রে রহঅলঅ

বানঠা মুচিই পঁচিরেঁ মুড় বাজড়াউএই হউ॥

চনদাকর বাঁক কুড়হাই এহঅ রে বানঠা মুচি
কিনা করঅত এবের ভালা মনে দেখেই সঁচি
ভাভেইতে ভাভেইতে একঅ বুইধ রে আউঅলঅ
গাঁউএক কুলহি মুড়াই বাঁকেক দকান রে খলঅলঅ
বাঁক কিনেক খাতির চনদা বাহারাতি জখঅনঅ
উখনে ধরঅবেই অকে করঅলঅ রে ঠানঅনঅ

বসি রহঅল অহরঅ পহঅর হউ॥

দকান খলি বানঠা মুচি চনদাকে জহঅইএ
কতিদিনঅ এসনে করি এহঅ রে রহঅইএ
রাজাক বেটি হেউএই নিহি ঘার লে বাহারঅ
বানঠাকর খাটলেইক নিহি এসঅন ফাঁদেক চারঅ
কিনা করে হেতি ভালা সঁচঅইএ এখঅনে
দসঅর এক বুইধ মুচিক জাগঅলঅ রে মনে

দকান ছাড়ি ধরঅলঅ ডহঅর হউ॥

আপঅন ভাভেঁ বানঠাই একঅ বুইধ রে ধরঅলঅ
সভে বাঁধেক পানি ভালা এক বাঁধেঁ করঅলঅ
জখন আরঅ নাহানে আউতি রাজাকর বেটি
সেহঅ মকাঁই মানে মানে ধরেক আস বাঁপঅটি
খাউআ পিআ দসঅর কাম সভেকিছু ছাড়ি
বাঁধেকেরি পিঁড়েঁ বানঠা রহলাক ডেরাগাড়ি
জেসঅনঅ পাহারা বসঅলঅ হউ॥

বানঠাকর খাতিরেঁ ভালা চনদাকর জিবঅনঅ
দগদইগা আইগেক উপঅর তপেই রে জেইসনঅ
মহিচাঁদ রাজা আরঅ গঁগাদরি রানি
বেটিকরঅ দুখেঁ অরাক বাড়হঅইএ দুখানি
রাইতদিন সাঁচে লাগঅত এহঅ রে মুড় ধরি
বানঠাকর হাঁথলে বেটি বাঁচাউবেথিক কেসে করি
সাঁচি সাঁচি হেই জাত জেরা হউ॥

একঅদিনঅ চনদাঁই আপঅন বাপুকে কহঅইএ
তহঅর ঠিনে হামঅর একটা কথা জে রহঅইএ
সাঁউরু ধাঁউরু দুঅ ভাই হেকঅত বড়ি বিরঅ
অরাকে ডাকিহিন ভালা মন রে হেতঅউ থিরঅ
অরাক সাঁগেঁ লড়হাই করি মরেই জদি বানঠা
হেলেই হামরাক গুচি জাতি এহঅ রে বাটেক কাঁটা
সুনিকে রাজাঁই মনে পাউলাক বল হউ॥

বেটিক কথাঁই মহিচাঁদ লক দেইএ নাহ ডাকাই
সাঁউরু ধাঁউরু ডাকে গেলা এহঅ রে নিজে একাই
কতিখনে পঁহচঅলা অরাকর ঠেহঅড়অ
একে একে কহে লাগঅল সভে রে বানারঅ
বানঠা মুচিকে ভালা হেতঅন জে মারেলাই
সেহঅ খাতির আউলাইঁ তহরাকে ডাকেলাই

নিহেলে মর বেটিক কুল রাখা হেতি দাই হউ॥
মহিচাঁদেক কথা সুনি সাঁউরু ধাঁউরু বিরঅ
বানঠাক সাঁগে লড়েক খাতির করঅইএ ততবিরঅ
আপঅন মাঁইএক ঠিনেঁ জাইকে কহঅলঅ রে বাতঅ
জিতকারেক আসিস দেঁ মাঁই মুড়েঁ রাখি হাঁথঅ
হামরাকর হাঁথেঁ বানঠা মুচি রে মরঅতঅউ
তর মাঁই গউ কনঅ ভাভনা নিহি জে রহঅতঅউ
বানঠা মারি ঘারা ঘুরঅবঅ হউ॥

সাঁউরু ধাঁউরুক মাইএঁ ভালা কিনা সাঁচি মনে
দুই কড়হাঁই দুখ তাতে দেইল রে তখঅনে
আপঅন বেটাধনে ভালা আঁকড়াই রে ধরঅলঅ
আদঅর আসিস চুমা খাইএ বিদাই রে করঅলঅ
দিঅ ভাই বিদাই লেল এহঅ রে মাইএক ঠিনে
ছাতি ফুলাই চলে লাগঅল নিজেকর ধেইআনে
পঁহচি গেলা রাজাকর ঠহঅর হউ॥

গঁগাদরি রানিক ভালা সাঁহাস জাগঅল মনে
দিঅ ভাইকে রাঁধিবাঁটি খাউআউলেইন জতঅনে
সুনাউলেইন বানঠা মুচিক বিদদাপ রিতিঘিতি
চনদা বেটি ঘারেক কুনাই কাঁদেই দিনারাতি
সভে সুনি সাঁউরু ধাঁউরু আইগেকর সমানঅ
ডহরঅলা জাঁহাঁ আহে বানঠা রে বেইমানঅ
গড়েক ভরৈঁ মাটি কাঁপে লাগঅই হউ॥

সেহঅ বাঁধেক পিঁড়েঁ আহে বানঠা দুসটুমতি
সাঁউরু ধাঁউরু দুঅ ভাই জাত ফুলাই ছাতি
সেহঅ বাঁধেঁ হড়বড়াইএ এহঅ রে দেলা হেলি
বানঠাকে জেসঅন ভালা বিঁড়ুরেঁ দেলেইক ঠেলি
অরাক সাঁগে বানঠা মুচিক লড়হাই রে বারঅলঅ
দিনরাইত এক করি লড়হাই রে চলঅলঅ

কেহু নিহি হেউঅত হারাহারি হউ॥
জাঁতাজাঁতি মুকামুকি বজঅড় মুড়েঁ মুড়েঁ
ঠেলাঠেলি ধকলাধকলি কাচড়াত দহঅড় ঝুঁড়েঁ
বতঅর বুঝি বানঠামুচিই ধাঁউরুকে রে গিরাইএ
বলি দেইএ দেলেইক ভালা নিঠুর খেইল লড়হাইএ
সাঁউরু ধাঁউরুক মাইএঁ আরঅ এহঅ রে দেখঅলেইক
একঅ কড়হাক দুখ ভালা রেঁগিআ হেইএ গেলেইক
একবেটা লড়হাইএঁ মরি গেইল হউ॥

ভাইএকর মরঅনঅ দেখি সাঁউরু এহঅ বিরা
লড়হাই করে ঠেসি গেলাক মন রে অথিরা
লড়হেইতে লড়হেইতে সাঁউরু পিছলি জে গিরঅলঅ
বানঠা মুচিই অকঅউ ভালা বলি রে দেউঅলঅ
সাঁউরু ধাঁউরুক মাইএঁ আরঅ এহঅ রে দেখঅইএ
দসঅর কড়হাক দুখঅ ভালা রেঁগিআ রে হেউঅইএ
কাঁদে লাগঅল আছাড়ি কাছাড়ি হউ॥

সাঁউরু ধাঁউরু মরি গেলা লড়হাইএ রে নাভি
কিনা জে করঅত চনদাঁই কাঁদেই ভাভি ভাভি
মর কুল বাঁচাই দেতাক কনে এহে পাপিকে মারি
কনে এসঅন আহে বিরঅ গুচাউতাক দুখ ভারি
নিরাস হেলা মহিচাঁদ সাঁউরুরাক মরঅনে
পানি বিনু লত জেসে লরুআই রে ধরঅনে
রাজাঘারেঁ হাঁড়ি নি চঘঅইএ হউ॥

মহিচাঁদ রাজা আর গঁগাদরি রানি
বসিকুনে সলহা করঅত মনে রে দুখানি
ঠমঅকি ঠমঅকি চনদা আউলি রে তখঅনঅ
বেটিক মু দেখি রাজাক কাঁদেইক রে পরানঅ
বানঠাকর সঁগে লড়হেক এহঅ রে নাহ জাঁগড়া
জিউএক ডরেঁ কেহু নিহি লাগে খজঅত ঝগঅড়া
বানঠাক ডরেঁ রাজাউ ঘারেঁ আহে সামহাই হউ॥

চনদাঁই কহেই সূনা তরা কথা জে হামঅরি
বানঠাকে তঅ মরেই হেতেইক নহে উ অমঅরি
অকে মারেক খাতির আর বির নি খজে হেতঅন
গউরা বাজারেই সেহঅ বির বসঅত করি আহঅন
পিঠঅই চাঁদেক বেটা লেউরি বির মাহাজনঅ
অকঅর হাঁথেই বানঠাকর আহেইক জে মরঅনঅ
অহিঁ পারঅত হামঅর কুল রাখেলাই গউ॥

গঁগাদরি রানিঁই ভালা বেটিক কথা সুনি
মুটা বাঁকাই মাথা হিলাই কথা দেলেইক ধুনি
বাগালেকর বেটা আরঅ টংগে নঅ চলঅনে
বাঘেক সঁগে লড়হে জাতাক পেতিআতা রে কনে
বাগালেকর বেটাঁই ভালা কাহে কথা সুনতাক
হামরাক খাতির কাহে আরঅ বানঠাক সঁগেঁ লড়তাক
হামঅর তঅ পততুক নিহি হেউএইস গউ॥

লেউরিক নাম সুনিকুনে রাজা মহিচাঁদঅ
সঁচে লাগঅল কথাটা তঅ কহেই নি মদঅ
লেউরি জে বির হেকে জানঅত রে সভেকাই
বড়অ বড়অ কাম ভালা করঅলাহে একাই
সাতসঅ হাঁথিক বল আরঅ আহেইক লেউরিক গাতৈ
বানঠাকে মরেই হেতেইক এহঅ রে অকঅর হাঁথৈ
ফুলি উঠলেই রাজাকুর ছাতি হউ॥

মহিচাঁদে কহেইক এবের আপঅন রে রানিকে
কমজর বির সঁচসিক নতঅই এহঅ রে লেউরিকে
নি বুঝিকে বকিস কাহে করিস বকঅর বকঅর
বানঠাকে মারেক তাখঅড় আহেইক জে অকঅর
সঁইআক কথা সুনি রানিঁই সঁচিবুঝি দেখি
কহে লাগঅল ভুলটা তঅ লেলঁ মঁই মাখি

লেউরি তঅ হেকে বিরেক বির হউ॥
রাজাঁই কহেই জাইঁ হামে লেউরিকর ঠিনেঁ
অঁই ছাড়া গতি নাহ এসঅন দুখেক দিনেঁ
গঁগাদরি রানিঁই তখন কহেই আঁচঅর মোটি
তরা নিহি লেউরি ঠিনে জাহিঅ দুঅ মাঁইবেটি
রাজাঁই কহেই জাবেহে তঅ জা মানে মানে
তরাক কথা জেসে আরঅ নাহ জাইক বানঠা কানে
বাড়িঁই বাড়িঁই আনাগনা করাই বেইস হউ॥

বাড়িক ডহঅরেঁ মাঁই বেটি এহঅ রে ডহরঅলা
আগু পেছু দেহিনা নেগা ভালি ডহঅরঅ চলঅলা
ধান ঘাঁটঅনি বুড়হিক সঁগে দেখা রে হেউঅলঅ
কাঁহাঁ জাহিআ বুড়হিঁই তখন পুঁছে রে লাগঅলঅ
চনদাঁই কহেইক লেউরিক ঠিনে জাহিঅ গউ বুড়হিমাঁই
আড়ে কথা নাহু রাখিকে সাঁচাটাই দেলঁ সুনাই

বুড়হিকে জে চিনহঅলাহেইক চনদাঁই হউ॥
বুড়হিঁই কহেই লেউরি এখন রজঅলেক ঘার গেলাক
টুইএক আগুই হামঅর সঁগে গালমারে জে হেলাক
চনদাকে লেইএ ভালা এহঅ রে গঁগাদরি রানি
রজঅলেক ঘার ডহরঅলা ভালা এহঅ ভাভিগনি
মাঁইবেটি পঁহচিকুনে এহঅ রে দেখঅইএ
ফুলেক সঁগে বসি লেউরিঁই পাসা জে খেলঅইএ

চনদাকে দেখি লেউরি চকাই গেইল হউ॥
গঁগাদরি রানি ভালা এহঅ রে কাঁদি কাঁদি
লেউরিকে নেহঅর করি কহেইক ধরি বাঁধি
বির বলিআন তরা ভালা মরাইকুন বানঠাকে
কুল মান রাখি আরঅ বাঁচাউআহাক চনদাকে
অহঅ জে বেইমানেক তেঁহেঁ বেটিকর জিবঅনঅ
দিনে রাইতেঁ তড়পঅইএ থিরঅ নহেইক মনঅ

তরা নিহিতঅ বাঁচাউএক আর কেহু নেখঅত হউ॥
লেউরি চনদাঁই ভালাভালি আঁখি নি ঘুরঅইএ
ববা সাজঅল দিঅ ভালা কথা নি সরঅইএ
সেহঅ দেখি রজঅল ধবিঁই মুড়অ লাড়অলঅ
দিঅকর মাঝেঁ ভালা কথা রে পাড়অলঅ
কিনা এবেইর করঅবে ফুল দেখেঁ বুঝিসুঝি
রাজাক বেটি আউলাহঅউ তকে খজি খজি
কথা রাখবে নঅ ঘুরাই পাঠাউবেসিক হউ॥

লেউরিই কহেই সুনৈ ফুল রহেইতে জিউ মরঅ
দেখে নিহি পারঅম ভালা এহে দুখ চনদাকরঅ
বানঠাক সঁগে লড়অম হামি ভাঁগবেই অকঅর সৈখি
আউড়িকর নিঅরঅ ভালা ধরি দেবেই ফেঁকি
পুননা রাগ আহি হামঅর অকঅর রে উপরঅ
এহে পাইড়ে বদলা লেউএক হেলাহি বতঅরঅ
হামঅর হাঁখেই আহেইক বানঠাক মরঅন হউ॥

লেউরিকর কথা সুনি চনদারা মাই বোটি
নিরাস মনে সাঁহাঁস পাউলা বিরেক সঁগে ভেঁটি
বুড়হাবাপকে সৈঁউরে লাগঅল গঁগাদরি রানি
ঝমরঅল লতেঁ জেসে পাউলেইক বরিসাকর পানি
ছাতি ফুলাই কহেই লেউরিই ঘার চলি জা তরা
বানঠা মুচিক ডরৈঁ আরঅ নাহু হেইহা মনমরা
বেইমানেক সিরালাহেইক চার হউ॥

রজঅলিনিই সভে সুনি কিনা জে বুঝঅলি
মানে মানে লেউরিক ঘার এহঅ রে কুদঅলি
ধসঅক ধসঅক চলেই ভালা গাড়া হেউএক ভাঁজৈ
ফুলিনেঁ ফুলিনেঁ দেখাদেখি ডহঅরঅ মাঝেঁ
ঠিলিআ লেইএ দাউনি ভালা এহঅ রে জাই হেলি
ফুলিনকে দেখি আরঅ ঠমঅকি ডাঁড়হালি
পুঁছে লাগঅল আনারঅ বানার হউ॥

লেউরিক হাঁথে বানঠাক মরঅন

রজঅলিনিই দাউনিকে এহঅ রে কহঅইএ
একঅ কথা সুনেঁ ফুলিন কহেক জে রহঅইএ
বানঠা মুচিক সঁগেঁ ফুল এহঅ রে লড়হে জাতা
অকঅর সঁগ লড়হিকুন জিতে নিহি পারতা
বানঠা ডাগঅর বির হেকে এহঅ রে সুনে কানে
কথাটা কহেক লাগি হামে আউলঁ মানে মানে

সঁইআকে তঁই বারুন করিহঁ হউ॥

দাউনিই পুঁছেই কহেঁ ফুলিন এহঅ রে মর পাসেঁ
বানঠাক সঁগেঁ লড়হে জাতা কিনা রে খাঁখুসেঁ
রজঅলিনিই কহে লাগঅল সুনঅল সভে কথা
লেউরিক বহুক সুনিকুনে ঘুরি গেলেইক মাথা
কাঁথেকেরি ঘেইলা ভালা ফসকি রে গিরঅলঅ
দাউনি তঅ ঘেইলা ছাড়ি ঘারা রে ঘুরঅলঅ

গিরঅল ঘেইলা গিরঅলে রহঅল হউ॥

দাউনি ঘার ঘুরিকুনে সঁচেই নিজেক মনে
কিনা বুইধ করে হেতি এহঅ রে এখঅনে
ঘার ভিতঅরেঁ বুলি বুলেই ফরিটাকে খজি
অদেখুতে পাড়অন তরেঁ দেলেইক আরঅ গাঁজি
সঁইআকর আইখে জেসে মালুম নাহ হেউঅইএ
তেসঅন করি ঠানিঠুনি এহঅ রে রাখঅইএ

মনগুমানে দাউনি বসি জে রহঅলি হউ॥

টুইএক বাদে লেউরি বিরা ঘারা রে সামহাইএ
আসি মন লহাক ফরি ভালা এহঅ রে খজঅইএ
হিঁদেহুঁদে ভালিভুলি ফরি নতঅই দেখিকে
পুঁছে লাগঅল তিরিআকে এহঅ রে ডাকিকে
দাউনিই কহেই ফরি কাঁহাঁ কেসে জানঅম হামে
কিনা দরকার আহেইক ফরিক জাবেহে কিনা কামে
লেউরিই তখন সভে সুনাই দেইল হউ॥

সইআক কথা সুনি দাউনিই করে লাগঅই মানা
বানঠাক সগেঁ লড়হা মানে মরঅন ডাকি আনা
জানিবুঝি হামে ভালা জাই দেবঅহন নেহি
আঁকড়াই ধরঅলেইক আরঅ আইথে লরেক বহি
লেউরিই তখন কহেইক ভালা আপঅনঅ তিরিআকে
এতেক দিন তঁই ঘার করি চিনহিস নিহি মকে

দেখাই দেহঁ হামঅরি জাঁগড়া হউ॥

বাড়িই একটা খিজুরগাছ এহঅ রে রহঅইএ
অহে গাছেক পাসেঁ লেউরি সনসনাই জাউঅইএ
একঅ হাঁথেঁ ফেড়টাই সকতাই এহ রে ধরঅলেইক
জিরুআ ঘাঁসেক লেখে আরঅ উপড়াইএ জে দেলেইক
পইনা লেখেঁ লেইএ লেউরি এহঅ রে চলঅলঅ
তিরিআকে আরঅ ভালা ঘুরি নিহি ভালঅলঅ

দাউনিই তখন ইড়কি ফরি লেগি দেইল হউ॥

রাগেঁ গরঅগরঅ লেউরি চলেই রে গরগরাই
গড়েকেরি ভরেঁ ডহঅরেকর মাটি দহঅলাই
হাঁগকারঅ মারেই আরঅ এহঅ রে ডেগি টেকা
জাএইতে ডহঅরঅ মাঝেঁ লুড়কিক সগে দেখা
লুড়কিকে কহেইক লেউরিই এহঅ রে আদঅরে
একাই কাঁহাঁ চলিস বহিন এসনঅ পহঅরে

সেহঅ কথা সুনাউএঁ তঁই মকে হউ॥

লুড়কিই কহেইক সুনেঁ দাদা গিরঅলাই বেজেঁ
টআই টআই আউলাই এহঅ রে ভউজিক খজেঁ
গউরাবাজারেঁ আইকুন পাউল জে বানারঅ
বানঠাক ডরেঁ ভউজি নিহি ঘারেকর বাহারঅ
লেউরিই কহেই সুনেঁ বহিন মারবেই রে বানঠাকে
সেহঅ খাতির চলল হামি গাছঅ রে উপড়াইকে
সেরিআই দেবেই চনদাক বাটেক কাঁটা হউ॥

লুড়কিঁই কহেই সুনৈঁ দাদা মনটা করি থিরঅ
বানঠামুচি হেকে ভালা সাতসঅ বিরেক এক বিরঅ
অকে মরা নহেইক দাদা অলঅটেকর কামঅ
মুলুকেকর বির কাঁপঅত সুনলে অকর নামঅ
তঁই জদি বানঠা সঁগে এহঅ রে লড়হবে
তাকঅর আগু হামঅর সঁগে এহঅ রে লড়হবে

তর জাঁগড়া পরখি দেখঅম হউ॥

হাঁসি উড়াই দেলেইক লেউরিঁই লুড়কিক কথাটাকে
কহে লাগঅল তঁই কিনা পরখঅবে রে মকে
কথা নাহু সিরাইতে ভালা কাঁসিকেরি কাঁড়েঁ
বিঁধে লাগঅল লুড়কিঁই লেউরিকর তর ভইড়েঁ
চলে নিহি পারেই বিরা জলঅন গটা দেহি
উলুঁগ মাটিক গাছ জেসে কন বাউএ গেলেইক ঢহি

বসলাক লেউরি অবঅস হেইএ হউ॥

লুড়কিঁই কহেই বানঠাক সঁগ নিহি সাজঅউ লড়া
বুঝে পারল বানঠা মারেক নেখঅউ জে তর জাঁগড়া
মর কথা সুনৈঁ দাদা হেবে রে জিতকারঅ
এখনে চলি জাঁই তঁই রজঅলেকর ঘারঅ
অকঅর ঠিনেঁ আহেইক ভালা বানঠা মারেক উপাই
নি খজলে নিহি দেতঅউ রাখঅলাহে লুকাই

এহে কহি লুড়কি ডহরঅলি মসিঘার হউ॥

লুড়কিক কথা লেউরিকর লাগলেইক রে কানে
ফুল ঘার উজালাক এহঅ রে তখঅনে
ফুলঘারঅ পঁহচি বিরা রজঅলকে কহঅইএ
বানঠা বধেক উপাই ফুল তহঅর ঠিন রহঅইএ
একে একে সেহঅ কথা মকে রে কহঅবে
চাঁড়াচাঁড়ি কহেঁ তঁই সুগুম নি রহঅবে

বানঠা নাহু মারি থিরঅ নহি মন হউ॥

রজঅলেন্ কহে লাগঅল ধরিকে লাতাইডঅ
বানঠা মুচিকর বড়ি হেলাহেইক ভালা বাইডঅ
অকে মরাউএ হেলে ফুল এহঅ রে গটা গাঠে
খুর বাঁধি লেউএ হেতঅউ জিউ বাঁচাউএক হঁতে
অঁগঅমেরি জাল আহেইক এহঅ রে বানঠাকর
বাক্বাইএ মরাউতঅউ ভালা নিহি হেলে সতঅর
সেহঅ কথা মনেঁ রাখঅবে হউ॥

লেউরি তখন বিঁড়ুর লেখেঁ লাপিত ঘারা গেলাক
তুরুত আরঅ খুর লেইএ এহঅ রে লটঅলাক
গটা গাঠে খুর ভালা আরঅ রে বাঁধঅলঅ
কনঅঠিনঅ বাদ ভালা নেহি রাখঅলঅ
রজঅল কহেই মহঁ জাম তহঅরি জে সঁগেঁ
মঁই জেসঅন কহঅম উটা করবে সেহঅ টঁগেঁ
হেলেই বানঠা হেতাক হারুল হউ॥

দুঅ ফুল একে সঁগেঁ বাহারঅ হেউঅলঅ
রজঅলেন্ আরঅ একটি আড়সি রে লেউঅলঅ
বাঁধেক আইড পঁহচি গেলা এহঅ রে দুই ফুলঅ
রজঅলেন্ তখন মনেক কথা আরঅ জে কহঅলঅ
বাঁধ আগাডেক মহঁআ ফেড়েঁ লুকাই রহঅম হামে
আড়সিকর ইঁগগিতেঁ ফুল ঠেসবে জে তঁই কামে
আড়সি ঘুরাউলে নাভঅবে তঁই পানিঁই হউ॥

গটা গাঁউএক তাঁতি ভালা ডরেঁ রে মরঅতঅ
বাঁধেক ধাইরেঁ দেখলে বানঠাই রগদি রে মারঅতঅ
পানি বিনু লুগা ভিজা নেহি রে হেউঅইএ
লুগা বুনা কাম ভালা অটকি রে রহঅইএ
জতেক তাঁতিঁই তখন আরঅ সলহা রে করঅলঅ
ছুটমুট হউআরাকে খাপড়ি রে দেউঅলঅ
কহে লাগঅল পানি আনিহা তরা হউ॥

থাপড়ি লেইএ তাঁতি ছউআ পানি আনে গেলা
আপঅন আপঅন থাপড়িই আরঅ এহঅ রে ভরঅলা
বানঠা মুচিই সেহঅ দেখি কুদঅলঅ সঁসাটি
রাগে গরঅগরঅ বিরা ধরলা রে টাঁটি
ছউআরাকর মুড় ধরি এহঅ রে চিপঅইএ
থাপড়িই থাপড়িই মুড় ভালা দেলা রে থপাইএ

মু কান ছালাই গেলেইন ছউআক হউ॥
লেউরি রজঅল দুঅ ফুল ফারাকে ডাঁড়হাই রহি
এসঅন নিঠুর কাম দেখি গাঠে রে দহঅদহি
বানঠাকে মরাউএ লেউরি হেউএই আরিগুরি
রজঅল কহেই থিরাই ফুল টেকাউএক হাঁথে ধরি
কাঁদি কাঁদি তাঁতি ছউআ ঘারা রে উজালা
সেহঅ দেখি সভে তাঁতিই করে লাগঅল সলা

বানঠাক খাতির জিঁঅতে মরঅন দসা হউ॥
জতেক তাঁতিই সলহা করি এহঅ রে ডাববাঁধি
বানঠাকে মরাউএক হঁতে ডহরঅলা রে নাদি
বাঁধেক পিঁড় পঁহচি সভে এহঅ রে দেখঅইএ
জইড় তরেঁ বসি বানঠা জইড় ফর চাখঅইএ
জতেক তাঁতিই ভুসডাঁগেঁ গেদে রে লাগঅলঅ
কতিখন বাদেঁ মুচিই ভালা করঅট ঘুরাউঅলঅ
পিটি পিটি সভে তাঁতি থকি গেলা হউ॥

বানঠা মুচিই কহেই ভালা তাঁতিরাকে ভালি
কনঅ সুঁড়াউএ নি পারলেহে ভালা এবের হামঅর পালি
রাগেঁ লাল আইখ বানঠাক তাঁতিরাকে ধরি
একে একে ফেঁকি দেলেইন কচুকাটা করি
বেইমানেক হাঁথলে ভালা কেউ নি পাউলা রেহাই
রকঅতেকর নদি আরঅ এহঅ রে দেলেইক বহাই
হাঁগকারে মাটি কাঁপাই দেইল হউ॥

এহঅ খনেঁ রজঅল ধবিঁই কহেইক রে লেউরিকে
একঅর বাদেঁ জাঁই ফুল বুড়হাবাপ সেঁউরিকে
মহ্লল গাছেক আড় লে আড়সি দেখাউবেঁই জখঅনঅ
বাঁধেক পানিঁই হেলবে ফুল তঁহি রে তখঅনঅ
ডেগেঁ ডেগেঁ জাঁইতকে ধবিঁই আড়সি দেখাই দেলা
সেহঅ দেখি লেউরি উবকি পানিঁই হেলি গেলা

কভাঁগ সবঅদেঁ বানঠা চমকি গেইল হউ॥

লেউরি বিরাকে ভালা বাঁধেঁ হেলঅল দেখি
রাগেঁ বানঠা মুচিঁই ভালা কহেই হাঁকি হাঁকি
কাকরঅ হুকুমে তঁই পানিঁই রে নাভঅলে
আইজ তকে মরেই হেতঅউ হামঅরি খাভঅলে
ঢাল ঝলকাইএ বানঠাঁই ফরি রে ঝলকাইএ
লেউরিঁই ততেক অসঅসিরে পানি রে হেলকাইএ

বাঁহিঁ মলকাইএ দেখাই দেইল হউ॥

রজঅল ধবিঁই আড়ে রহি আড়সি রে দেখাইএ
দুঅ বির ঠেসি গেলা এহঅ রে লড়হাইএ
দিঅ বিরেক নাদঅনিঁই ভালা ঝড়অই পালহা পাতঅ
রাঁই রাঁই আইখ ঘুরা ফুলাই আপঅন গাতঅ
বানঠা জখন আরঅ ভালা উচকি রে উঠঅইএ
লেউরি তখন সাঁক চিলহেক নিঅরঅ উড়অইএ

রজঅলেঁ তঅ ভালেই গাছেক আড় লে হউ॥

লেউরি আরঅ জখন ভালা ভুঁইএঁ রে নাভঅলঅ
আঁগঅমেরি জালা বানঠাঁই এহঅ রে ডাবঅলঅ
লেউরিকর গাতে বাঁধঅল খুরেকেরি ধারেঁ
জাল কাটাই ছিঁটাই গেলেইক বুইধকেরি জরেঁ
লড়হে লাগঅল দিঅ বিরঅ নেহি রে হারাহারি
অমান সমান চলেইক ভালা এহঅ রে মারামারি

দহলি দহলি উঠঅইএ মাটি হউ॥

সাতদিন সাতরাইত লড়হাই রে চলঅইএ
দিঅ বিরেক কনঅ বির পেছু নি ভালঅইএ
গটা গউরাক লক ভালা এহঅ রে ধুরেঁ ডাঁড়হাই
লেউরি আর বানঠা বিরেক দেখঅহত রে লড়হাই
বানার পাইএ মুলুকেক লক আউঅত চাঁড়াচাঁড়ি
দেখেইতে বিরেকর লড়হাই ঘারেক কাম রে ছাড়ি

ঢাল ফরি ঝলকেইক ঘনে ঘনে হউ॥

সিরালে নি সিরাইক লড়হাই জিতকার হেতাক কনে
রজঅলেঁ আরঅ ভালা সঁচেই মনেঁ মনেঁ
লড়হি লড়হি ফুল মর হেলাহে জে ভুখেঁ
কনঅ তঅ খাইএক ভালা দেউএ হেতেইক অকে
মহল লাঠা আনিকুনে দেলেইক ভালা ফেঁকি
লড়হেইতে লড়হেইতে লেউরিই লেলেইক জে রে লকি

খাইএ খাইএ লড়হে লাগঅল হউ॥

লড়হি লড়হি বানঠা মুচি কাহিল রে হেউঅলঅ
অসান হেইএ লেউরিকর গড়েঁ রে গিরঅলঅ
লেউরিই রাগেঁ ফরি উঠাই বলি দেউএক হঁতে
কাঁদি কাঁদি তখন বানঠাই কহেইক জড়অ হাঁথেঁ
মরাউইস নাহু মকে লেউরি বাঁচাউএ মর জিউ
করঅম নিহি এসঅন কাম জিবঅনে আর কবঅউ

তরঠিনে হারুল হেলঁ মই হউ॥

সভে লকেঁ কহঅত ভালা ধুরলে চেঁচাই চেঁচাই
এসঅন পাপি বেইমানকে নাহু রাখসিক বাঁচাই
লকজনেক কথা লেউরিই কানেঁ রে সুনঅলঅ
বানঠাকে দেখি আরঅ দইআ রে জনমঅলঅ
তখন আরঅ মনে ভালা বুঝিসুঝি দেখি
হাঁথেক ঢাল ফরি লেউরিই এহঅ রে দেলেইক ফেঁকি
পানি আনি বানঠাকে পিআউলেইক হউ॥

পানি পিকে নিকাস ধরি হেলেইক বানঠাক বলঅ
লড়হেক তেঁহেঁ আরঅ ভালা উচকি রে উঠঅলঅ
ঘুরি আরঅ দিঅ বিরেক লড়হাই আদাবাদি
ছাতি ফুলাই আরঅ বানঠাই কহে লাগঅল নাদি
জতেক খন বল ভালা আহি হামঅর অঁগেঁ
বিরেক নিঅর লড়হি জাম এহঅ রে তর সঁগেঁ
তকে জে রে নেহি ছাড়বঁ হউ॥

দিঅ বিরেক লড়হাই আরঅ চলেইক বহুত খনঅ
গিরি গেলাক বানঠা এবেইর হেরাউলাক চেতঅনঅ
লেউরিঁই কহেই আর তর নেখঅউ কনঅ মিনা
গাঁউঘার বিসাউলাহিস তঁহি এতেক দিনা
এক ভুল করঅরহঁ দসঅর আর করঅম নেহি
বলি দেলেইক বানঠাকে এহে কথা কহি

বানঠাক দেহি দুই খেজা হেউঅলঅ হউ॥
বানঠাকর কাটঅল মুড় এহঅ রে জাগঅলঅ
লেউরিকর হাঁঠুঁই হাঁঠুঁই বজড়ে রে লাগঅলঅ
এহঅ দেখি লেউরি বিরা সঁচেই রে এখঅনে
কাটঅল মুড়েক সঁগ ভালা লড়হঅম জে কেসঅনে
তখন আরঅ বুড়হাবাপকে করঅইএ সোঁউরনঅ
তুরুতে বাঁচেকর উপাই হেলেইক রে সরঅনঅ

তখন লেউরিঁই ফুলকে জে ডাকঅলঅ হউ॥
রজঅলেঁ ফুলকে ভালা কহে লাগঅল তবে
এঁড়ি বজড়াই ফুল কুঁআঁ এবেইর রে কড়অবে
তখন আরঅ লেউরিঁই ভালা এঁড়ি রে বজড়াইএ
এঁড়িক বজঅড়েঁ আরঅ কুঁআ রে কড়াইএ
রজঅল কহেই মর কথা সুনে এবেইর ফুলঅ
অহে কুঁআই ফেঁকি দিহিঁ বানঠাকর মুড়অ
লেউরিঁই তখঅন অহঅটাই করঅলঅ হউ॥

বানঠাকর কাটঅল মুড় আজগঅইবি নিআরঅ
উচকি উঠঅলঅ ভালা কুঁআকর বাহারঅ
লেউরিকর হাঁঠুই হাঁঠুই বজঅড়অ মারঅইএ
জেহঅ বাটেঁ জাই বিরা পেছু নি ছাড়অইএ
রজঅলকে তখন আরঅ এহঅ রে কহঅইএ
কহেঁ ফুল আরঅ কিনা উপাই রে রহঅইএ

কুঁআই ফেঁকঅল মুড় উঠি গেইল হউ॥

রজঅল কহেই সুনৈঁ ফুল কথাটা ধরঅবে
সাতসঅ গাড়ি কাঁটা ভালা জগাড়অ করঅবে
সেহঅ কাঁটা কুঁআঁ মুহেঁ দেউএ হেতঅউ জাঁতা
হেলেই নিহি উঠতেইক ঘুরি বানঠাক কাটঅল মাথা
ফুলেক কখাঁই লেউরিঁই আর সাতসঅ রে গাড়ি
কাঁটা কাটি মুহাউঅল এহঅ রে চাঁড়াচাঁড়ি

কাটঅল মুড় ফেঁকি কাঁটা দেলেইক কুঁআই হউ॥

লেউরি হেলাক বিরেক বির বানঠাকে রে মারি
গটা গউরা বাজার ভালা কহঅত বলিহারি
সাবাইস দেউএ লাগঅত আরঅ ছউআ লে রে বুড়হা
বানঠাক দেহি গিরি রহঅল জেসঅন কাটঅল মুড়হা
গাঁউএক লক নাহাত বাঁধেঁ মনেকেরি সুখেঁ
ছটপটাই মরেহেলা সভে পানিকেরি দুখেঁ

দিঅ ফুল ঘার ডহরলা হউ॥

চনদাক কানৈঁ পঁহচি গেলেইক এহঅ রে বানারঅ
বানঠামুচি মরঅলাহে বাঁচি নেখে আরঅ
হরখি উঠঅলেইক মন পাপিকর মরঅনৈঁ
বুড়হাবাপকে সেঁউরঅইএ এহঅ রে এক মনৈঁ
নেখেইক ডর দুখেক বঝা মন হেলেইক থিরঅ
নাহাই জাইএক খাতির ভালা করঅইএ ততবিরঅ
ডাকঅলঅ ঘারেক কামিনিআ হউ॥

আপুই পেছুই কামিন লেইএ চলেই রাজাক বেটি
নাহানে ডহরলি ভালা এহঅ রে কমঅর মেটি
চনদাকে কহেইক আরঅ একঅ রে কামিনেঁ
বানঠা কেসঅন রহেহেলাক দেখঅবঅ এখঅনে
সভে মিলি কুঁআ ঠিনে এহঅ রে পঁহচলা
সাত সঅ গাড়ি কাঁটা ভালা আরঅ রে গুচাউলা
কাটঅল মুড় উঁচকি উঠঅলঅ হউ॥

কাটঅল মুড় দেখি ভালা সভেকাই চমঅকি
ডরে মরি সেরিআইকে ডাঁড়হালা ঠমঅকি
সাঁহাস করি এক কামিনেঁ সেহঅ মুড় ধরি
কুঁআক ভিতঅরে ভালা ঘুরি দেলেইক ভরি
সাতসঅ গাড়ি কাঁটা সভে দেই দেলেইক ডাবা
সভে সাঁগি নাভি গেলা বাঁধেকেরি গাভা

রিঝেঁ রঁগেঁ করঅইএ নাহান হউ॥

তেলঅ মাখঅইএ কেহু খইরঅ মাখঅইএ
লুগা কাচিকুচি কেহু ডিঁগাইএ রাখঅইএ
কতেক দিনা বাদেঁ ভালা নাহান রে জুটঅলঅ
বানঠা মরি মনেক ডর সভে রে টুঁটঅলঅ
হাঁসি খেলি নাহান সারি সভেকাই ডহরঅলা
ভিজঅল লুগাফাটা আরঅ গাঁইঠে রে বাঁধঅলা
মুড়েক চুইল সুখাই সুখাই হউ॥

চনদাক ধরঅম পুজা

নাহাই ঘার ঢুকি চনদাঁই বাপুকে কহঅইএ
তরঠিন মর বাপু নেহঅর জে রহঅইএ
এহে পিঁধঅল লুগা ভালো নেহি জে গউ ছাড়অম
ধরঅম পুজা হামে বাপু এহঅ রে করঅম
সারভার তঁই এখঅন জগাড করি দেবে
জতেক আরঅ কুটুম বাটুম আরঅ জে নেউতবে
মহিচাঁদেঁ সিঁকারঅ করঅল হউ॥

রাজাঁই তখন গতেক লককে এহঅ রে ডাকঅলঅ
নেউতনেক আপাভার বাঁটি রে দেউঅলঅ
দিগাদিগ চলি গেলা রাজাকর আড়হানে
আপুস কুটুম হিতমিতান সভেকে নেউতনে
টিঁড়অরা দেলেইক গটা গউরা রে বাজারেঁ
সভেকাইএ জানি গেলা এহঅ রে ঘারে ঘারেঁ
মুহাজুহা চলে জে লাগঅল হউ॥

ধরঅম পুজাক দিন ভালো এহঅ রে আউলেইক চলি
কুটুমবাটুম আউএ লাগঅল আরঅ রে হিআ খলি
জেদিন আরঅ ভাঁগাবার এহঅ রে হেউঅলঅ
রাজা রানি চনদাঁই ভালো বারঅ রে করঅলঅ
মাহারাইএক নামে আরঅ জাগঅর জরাই সাঁঝেঁ
গটা রাতি জাগি রহলা কুটুম জনেক মাঝেঁ
গিঠেঁ কখাঁই মাহারাই সৈঁউরন হউ॥

ভিনসারেঁ নাহাই আইকে মহিচাঁদঅ রাজাঁই
তুলসি পিঁড়হাঁই মাহারাই সৈঁউরি বসি গেলা পুজাঁই
গঁগাদরি রানি আরঅ চনদা রে দুলাড়ি
এক ধেইআনেঁ রহলা ডাঁড়হাঁই জড় হাঁথঅ করি
পুজাঁই পাখুড় আর পাঁঠাছাগঅইর বলি রে দেউঅলঅ
রকঅতেকর টিকা লেইএ পুজা রে নিপটঅলঅ
চলে লাগঅল রাঁধাক আড়াপাটা হউ॥

জখন আরঅ ভাত রাঁধি মাড় রে ঢারঅইএ
এক ঘেঁচা মাড়নদি এহঅ রে বহঅইএ
কতেক দেসেক রাজা ভালা আউঅত হুজা হুজা
নেউতা পাই মহিচাঁদেক ঘারেঁ ধরঅম পুজা
মাড়ঢ়ারা নদি দেখি ভালা ডরেঁ রে মরঅইএ
কেহু আরঅ সাঁহাঁস ধরি ডেগে নি পারঅইএ

মাড়ঢ়ারা নদিক উপারেই রহি গেলা হউ॥

লেউরি আর রজঅল ভালা হরখঅলঅ চিতঅ
রাজাঘার আউঅত রিঝেঁ এহঅ রে গাহি গিতঅ
ধুর লে আরঅ দমে লক আইখেঁ রে দেখঅইএ
রজঅল কহেই বঁক ভালা এহঅ রে রহঅইএ
ফুলেক কথা সুনি লেউরিঁই কহেই নহঅত বঁখঅ
অরা হেকঅত মহিরাজাক নেউতঅইনা লকঅ

চালৈঁ দেখঅব কিনা জে করঅহত হউ॥

চলেইতে চলেইতে রজঅল লেউরিকে কহঅইএ
সুনেঁ ফুল হামঅর মনেঁ এহঅ রে জাগঅইএ
লকগিলাকে ফেভড়ি দেবেইন এহঅ রে ধরি ধরি
লেউরিঁই কহেই হেলে তঅ সভেকাই জাতা মরি
সঁচে কিনা করঅবে ফুল এহঅ রে তখঅনে

ভজ খাবে নঅ মুদদার ফেঁকঅবে বুঝি দেখেঁ মনে

পঁহচি গেলা জাঁহাঁ লকেক ভিড় হউ॥

মাড়ঢ়ারা নদি বহেইক হবঅকি ডবঅকি
সভে লককে আরঅ ভালা রাখলাহেইন টেকি
কেহু নিহি পাইরাই খজঅত বহাই জাইএক ডরেঁ
সেহঅ দেখি লেউরিঁই তখঅন সঁচঅইএ অনতরেঁ
একটা সিমঅইর গাছ ভালা এহঅ রে দেখঅলঅ
তুরুত উপড়াই আনি আরঅ গিরাইএ দেউঅলঅ
গাছেক উপঅর চলি সভে পাইরালা হউ॥

রজঅল ধবঁই কহেই এবের রইসকালি রে টংগেঁ
হামরা নিহি জাপ ফুল ভালা এখরাকর সঁগেঁ
মাড়ঢ়ারা নদি এখন হামরা নেহি রে ডেগঅবঅ
সিমঅইর গাছেক আড়ানটুঁড়িই নেহি রে চঘঅবঅ
রজঅল আরঅ মাড়ঢ়ারা নদি অলঅঠেঁ ডেগঅইএ
লেউরিঅ সেহঅ দেখি অহঅটাই রে করঅইএ

সাজি টুইএক এঁড়িটা জবড়াইএ হউ॥

চনদা আরঅ বারঅ জড় ডাঁগুআলকে রে লেইএ
টহঅবরেঁ ঘুরেইস ভালা এহঅ রে টহঅল দেইএ
সভেকাইকে কহেইন ভালা নেহঅরেঁ ঘুরি ঘুরি
হইলমাইল নাছ করি সভে খাহিহা আমভাপুরি
কুটুমজন আউঅত জাত লাতাইড় নিহি ছিঁটেক
তাতলে তাতঅল খাইএক ভালা জুলেক লে রে উঠেক

লকজনে গহগহাইক রাজাঘার হউ॥

লকেক ভিড়েঁ মেসি গেলা লেউরি রে রজঅলঅ
চনদাকর আইখোঁ ভালা এহঅ রে বারঅলঅ
তখন আরঅ রাজাক বেটিই খাতিরেঁ ডাকি আনি
একটা খাঁধাঁই বসাই দেলেইন আরঅ পিএক পানি
কহে লাগঅল এতেক ভিড়েঁ নতঅই বসিহা তরা
খাইএক আনি দেহিঅন ভালা রিচেক ধিরঅজ ধরা

এহে কহি চনদা চলি গেলি হউ॥

চনদা এবের হেঁইড়সারেঁ বসঅলি তুরুতে
মাসপিঠা করে লাগঅল এহঅ রে নিজেক হাঁথে
দুই নিঅর পিঠা করলি পিরিতেকর নেসাঁই
লেউরিক ভাগেক গিলাঁই ভালা সিদধি দেলেইক মেসাই
জখন আরঅ পিঠা বনা এহঅ রে হেউঅলঅ
দুই থারিঁই সাজাইকুনে অখরাকে দেউঅলঅ

দিঅ ফুল পিঠা নুড়ে ঠেসঅলা হউ॥

মাসপিঠা দেখি ভালা দিঅ ফুলেঁ রে লভেঁ
সাকাসেইক খাইকুনে সিরাই দেলা সভে
ভরঅল পেটে রজঅল ভালা এহঅ রে ঢেকরঅইএ
রমে রমে লেউরিকে নেসাঁই রে গাড়অইএ
নিদেঁ জে গিরঅলঅ বিরা এহঅ রে অচেঠাঁই
রজঅল সঁচেই পিঠাক গদেঁ ফুল গেলাক নিদাই

বসি রহলাক ফুলেকেরি পাসেঁ হউ॥

ফুলেক ঠিনে বসি বসি রজঅল গেলাক থকি
ঘার জাইএক আহেইক ভালা বড়ি রে অকবকি
হাঁকাই হাঁকাই জিগিড়জিটা কুঁসকাঁসঅ নি করেই
জেসঅন ঘলটঅল তেসনে ফুল নেহি রে লড়েই চড়েই
কিনা জে করঅত রজঅল সঁচেই মনে মনে
বতঅর বুঝি রাজাক বোটি আউলি রে তখনে

ভিতরিআ হাঁসিঁই পুঁছে লাগঅল হাল হউ॥

লেউরিকে দেখাই রজঅল কহেইক রে চনদাকে
ফুল হামঅর নিদেঁ অঘঅর উঠেই নিহি হাঁকে
তঁহিঁ কহেঁ করঁ কিনা এখঅন ভালা হামে
ঘার তঅ মকে জাইএ হেতি চাঁড় আহি দমে
এসঅন হালেঁ জাঁউ জদি ফুলকে মঁই ছাড়ি
বিহানে জাই মকে আরঅ গাইরেঁ দেতাক গাড়ি

গিরি গেলঁ মাহা ফেচাঁগে হউ॥

চনদাঁই কহেই সুনে রজঅল জা তরা ঘারঅ
তহর ফুলেক হামি আরঅ রহঅম পাহারাদারঅ
রাজাক বোটিক কথাঁই রজঅল ঘারা রে ডহরলঅ
রাতিআ আঁধারেঁ ভালা চলে রে লাগঅলঅ
চনদা বসি রহলি ভালা লেউরিকরঅ পাসেঁ
লেউরিক মুটা ছুই আর সঁচেই বহুত আসেঁ

সভে লকজন খাইদাই চলি গেলা হউ॥

সিদ্ধিক নেসাঁই অঘঅর ভালা পিঠঅইচাঁদেক বেটা
কতিখনঅ বাদেঁ আরঅ হেলেইক অকঅর চেঠা
ভালি দেখেই রাজাক বেটি পাসেঁ আহি বসি
রজঅলকে নি পাউএইক দেখা কঁদে গেলাক খসি
ফুল ফুল হাঁকাই ভালা নিহি মিলেইক সাড়া
নিহি জানাইকে গেলাক কাঁহাঁ হেইকে হামঅর ছাড়া

ঘার বাহার করেইক জে সাঁই সাঁই হউ॥

চনদাঁই কহেইক তহঅর ফুল ঘার গেলাহন চলি
কতেকখনে অগরি ভালা রহতঅহন ভালি ভালি
তরা এবেইর করবেহে কিনা সাঁচি দেখা মনে
রাইত তঅ দমে হেলাহেইক লেগি রাখতন কনে
খাইদাই গেলা সভে আপঅন আপঅন ঘারঅ
সঁড়গি রহলে তরা ভালা বড়াসাঁপ নিঅরঅ

রাইতটা রহা জাবেহে বিহানে হউ॥

লেউরিঁই কহেই ঘার জাম হেউঅক জতেক রাইতঅ
চনদাঁই তখন ঝাঁপটি ভালা ধরলেইক অকঅর হাঁথঅ
একে একে মনেক কথা দেলেইক জে রে সুনাই
তরাকেই মঁই সাঁইআ মানিঅন সূনা কান অনাই
লেউরিঁই কহেই ঘারেঁ হামঅর তিরিআধন আহি
তহঁ তঅ বিহঅলি হেকিস ভিনু ভিনু থাহি

এসঅন কথা সাজেইক নাহু আর হউ॥

চনদাঁই তখন লেউরিকে কহেইক কাঁদি কাঁদি
সূনা তবে হামঅর কথা নাহু মানবেহে জদি
এহে জিউ রাখঅম নিহি কহি দেইহন তরাকে
তহঅর খাতিরে মরঅন হামঅর জানতা সভে লকে
সাঁচি দেখা সভেলে পহিল এহঅ রে ছুটুক খনে
করলাহিআ বিহা মকে কিরা খাই আপন মনে
তবে কেসে হেউঅম নি তহঅর হউ॥

লেউরিই কহেই বুঝাই মই এহঅ রে কথাটা
মেনেক তর মাইবাপেঁ কিনা মানি লেবথু ইটা
তাকঅর উপঅর হেকিস মর মসিকর পুতঅছ
গটা মুলুক জানথু তকে সহদেবাক বহু
বারঅ বছর রহঅলাহিস একঅ সসুরঘারেঁ
এখন জদি রহিস ভালা তাকঅরঅ বাহারেঁ

দুইকুলেক মান জাতেইক বহি হউ॥

চনদাঁই তখন কহেই কথা এহঅ রে লেউরিকে
কুল মান ধরঅম করঅম কহেইহা কনটাকে
বানঠা মুচিই মকে লেইএ করঅল ছিছিলিলি
কাঁহাঁ রহঅত সইআ সসুর কহা মকে থলি
জৈই মকে জিউ দেলা বাঁচাই দেলা মানঅ
তৈঁহি হামঅর জিউএক ধন তৈঁহি জে আপঅনঅ

তরাকে লেইএ করঅম সঁগসার হউ॥

চনদাকর কথাই লেউরি গেলাক রে লটপটাই
সঁচেই মনে আরঅ ভালা বাঝালঁ কন লেঠাই
হারুল হেইকে কহেইক ভালা এহঅ রে চনদাকে
কহেঁ তবে উপাই কিনা করে হেতি মকে

চনদাঁই কহেই বাহার ভালা চলি জাপ ছাড়ি ঘারা
দুইদিন বাদেই পারাব তবে রহলেইক জে দিনধরা

কুলহি মুড়াই রহবেহে ডাঁড়হাই হউ॥

দিন ধরা হেল বাদেঁ.চনদারাক ঘার ছাড়ি
লেউরি লটঅল ঘার ভালা মুড় লাড়ি লাড়ি
খাইদাই রাজাক বেটি এহঅ রে সুতঅলি
কতেক দিনেক মনেক দুখঅ আরঅ জে গুচঅলি
মহিচাঁদ রাজা আর গঁগাদরি রানি
অখরাউ সুতঅলাহাত ভালা করি আহাৰ পানি
বিহানেঁ সুরুজ উগলি ঝলমলাই হউ॥

লেউরি আর চনদাক পারাই জাউআ

কথা দেউঅল দিনে লেউরি এহঅ রে কুলহিমুড়াই
চনদাকে ভালে লাগঅল নিঠাকাঠা ডাঁড়হাই
পাসেঁ একটা তালগাছ ডাগঅরঅ দেখঅইএ
সেহঅ গাছেক টুইএঁ ভালা আরঅ রে চঘঅইএ
রিচিক বাদেঁ রাজাক বেটি এহঅ রে আউঅলি
লেউরিকে হিঁদে হুঁদেঁ দেখে জে লাগঅলি

লেউরিই তখন থুঁকঅ ফেঁকঅইএ হউ॥

ফেঁকঅল থুঁক চনদাকর গাত্তেঁ রে গিরঅলঅ
তখন আরঅ গাছেক উপঅর এহঅ রে নজরাউঅলঅ
লেউরি তখন গিজড়েই ভালা টুইএক উপঅর উঠি
সেহঅ দেখি রাজাক বেটিই কহেই রে মু ফুটি
চাঁড় করি গাছ লে নাভা উগেইসাহি বেরা
গাঁউএক লকেঁ বানার পাউলে করতা ঘাঘঅর ঘেরা
সরসরাই লেউরি গাছ লে নাভঅল হউ॥

লেউরি আর চনদা ভালা ধরঅল রে ডহঅর
কাঁহাঁ জাতা জানঅত নেহি কনঅ ঠেকান ঠহঅর
কতিধুর লে দেখে পাউলা একটা খেড়হেক ঘারঅ
চালেক উপঅর সুখঅল পালহা উড়েইক জে হুর হারঅ
একটি বুড়হি আরঅ ঘারেক পিঁড়হাঁই আহি বসি
তেঁহি তঅ হেকি ভালা গাঁউএক মাইলান রে মসি
পঁহচি গেলা অকঅর পাসেঁ হউ॥

মাইলান মসিকে লেউরিই কহঅইএ নেহঅরি
পানি রিচেক দেঁ নঅ বুড়হি পিআসেঁ জাই মরি
মাইলান মসিই তখন ভালা পুঁছঅইএ বানারঅ
কনে হেকিহা কাঁহা জাইহা কাঁহা তরাক ঘারঅ
চনদাঁই তখন সুনাই দেলেইক জিনগানিকর কেহনি
মাইলান মসিক হেলেইক দইআ সেহঅ কথা সুনি
পানি আনি দেলেইন দিঅকে হউ॥

মাইলান মসিক ঠিনলে ভালা চনদা আর লেউরি
চলে লাগঅল চাঁড়ে চাঁড়ে উজু ডহঅর ধরি
কতিধুরঅ গেলা ভালা নেখেইক নাপাজঁখা
ধারপাসেক গাঁউ ভুঁই নাল্ পাউঅত দেখা
চলেইতে চলেইতে ভালা অঝাইড়ঝাড় বনে
সামহাইএ গেলা আরঅ এহঅ দিঅ বানে

বনেক ডহঅর সিরালে নি সিরাই হউ॥

লেউরি চনদা চলে লাগঅল ডহঅরঅ রে ধরি
পারাই জাহাত কাকরঅ জেসঅন করলাহাত চরি
ডহরেকর মাঝেঁ একঅ বনঅ রে পাউঅলঅ
বনেকর ভিতঅরে ভালা রাতি রে হেউঅলঅ
একঅ বড়অ গাছ ভালা এহঅ রে দেখিকে
লেউরিই তখন কহেই ভালা আরঅ রে চনদাকে

এহে গাছফেড়েঁ রাতিআ বিতাউঅব হউ॥

অহে গাছে লাগ লাগাইন এহঅ রে রহঅতঅ
অখরাকে দেখি ভালা কহাকহি রে হেউঅতঅ
লাগাইনে এবের লাগকে আরঅ কহেইক কানে কানে
খাইএক দেখি ধিরঅজ হামঅর ধরেই নি পরানে
খাইএক টুঁড়হে আইজ নিহি জাই হেতি বাহারঅ
মুহেক পাসেঁ পঁহচঅলাহেইক মন জঁখেক আহাঅ

চালা এখন খাপ আমভা পুরি হউ॥

লাগে কহেই সুনে লাগাইন মানা করঁ তকে
অখরাকে খাইএক কথা কহিস নাল্ মকে
হামরাক নিঅর হেকঅত অরা দিঅ রে পারানি
কতেক আসেঁ ডেরা লেলা নিডর ঠানিত ঠানি
লাগাইনে নি সুনি বারুন রাগে রে গরগরাই
আহার করেক তেঁহেঁ গাছ লে নাভেই রে সরসরাই
লাগ রহি গেলাক গাছ উপঅরে হউ॥

লেউরি আর চনদা ভালা এহঅ রে নিচিতে
অঘর নিদেঁ ডুবি আহাত আলিসে থকিতে
লাগাইনে তঅ লেউরিকে চাভি রে দেউঅলঅ
বিসেক জলঅনে বিরা চঁচাই রে উঠঅলঅ
চনদাকে তখন ভালা ডাকে রে লাগঅইএ
সঁইআকর চঁচানি সুনি চনদা রে জাগঅইএ

ভালি দেখেই লেউরি সাঁপেক খাভঅলেঁ হউ॥
ডেরি নাহু করি চনদাঁই ফরি ধরি হাঁথেঁ
হুমচিকুনে মারেইক চট লাগাইনেকর গাঠেঁ
দুই গৌঁড়া হেইএ ভালা তুরুত গেলি মরি
লাগাইন বিনু লাগ ভালা বাঁচেই কেসে করি
সাঁপিনেক খাভঅলে ভালা লেউরিঅ মরঅলঅ
কিআ জে করঅতঅ চনদা দুখেঁ রে ধরঅলঅ

কাঁদে লাগঅল সঁইআকে করাঁই লেই হউ॥
সঁইআক দুখেঁ কাঁদেই চনদা তিরিআক দুখেঁ লাগঅ
কনে জে লেতা ভালা কাকঅর দুখেক ভাগঅ
বনেকর ভিতঅরেঁ চনদাঁই করঅইএ রদঅনঅ
খজি নিহি পাউএই ঠহঅর করেই কিনা এহে খনঅ
বুড়হাবাপ মাহামাঁইকে সঁউরেই একঅ মনে
উপাই রে জাগঅলেইক ভালা অখরাকে সঁউরনে

মুহাউঅল দাউআই সিকঅড় বাকঅড় হউ॥
দাউআই বাকঅড় ছেঁছি ভালা এহঅ রে জতঅনে
লেউরিকে সুঁঘাই আর লাথি দেলেইক রে অহে খনে
দাউআইএকর গুনেঁ লেউরি জিআই রে উঠঅলঅ
চনদাকর মনে ভালা আসা রে জাগঅলঅ
সেহঅ দেখি লাগে আরঅ কহঅইএ চনদাকে
নেহঅর কর বাঁচাই দেঁ তঁই হামঅরি তিরিআকে
চনদাক মনে দইআ জনমলঅ হউ॥

চনদাঁই তখন লাগাইনেকর দেহিআ রে জড়াই
নিজেক হাঁথেক দাউআই ভালা দেলেইক জে ছুআই
লাগাইন বাঁচি গেলি ঘুরি দাউআইএকর গুনে
সরসরাই উঠঅলি গাছ সঁইআকেরি ঠিনে
লেউরি আর চনদা ভালা বনেকর ডহঅরোঁ
মনেক সুখোঁ চলে লাগঅত রিবোকর লহঅরোঁ
ডেগোঁ ডেগোঁ বন পাইরালা হউ॥

পিআসোঁ ফাটঅইএ ছাতি টাঁটি জাই রে সুখি
বনেকর ভিতঅরোঁ কাঁহুঁ পানি নি পাই দেখি
চলেইতে চলেইতে আরঅ ভুখঅ রে লাগঅলঅ
বনেক মাঝোঁ ফরেক গাছ নেহি রে দেখঅলঅ
আরঅ কতিধুরঅ চলি সিরাই বনেক ডহঅর
মুড়েকর উপঅরোঁ বেরা এহঅ রে দুপঅহর
সঁচঅত মনে খাই হেতেইক কিনা হউ॥

কতিধুরে একটা গাঁউ দেখি রে পাউঅইএ
গাঁউ ভালি ভালি আরঅ এহঅ রে জাউঅইএ
কুলহিমুড়া পঁহচিকুনে লেউরিঁই কহেই তবে
তঁই চনদা এহে ঠিনে এহঅ রে রহঅবে
গাঁউ সামহাই চার হাঁড়ি হামে রে আনঅবঅ
কুলহিক মুড়াঁই রাঁধঅন বাঁটঅন হামরা রে করঅবঅ
তঁই কাঠঝাড়ি জহড়াই রাখেঁ হউ॥

অহঅ গাঁউএক কুলহি মুড়াঁই নাগড়া টাঁগঅল আহেইক
আন মুলুকেক লক হেলে বাজাই ঢুকে হেউএক
নেহি জানেই লেউরিঁই উটা সামহালাক গাঁউ ভিতঅরোঁ
মাইলান মসিঁই পাউলেক সেহঅ রে বতঅরোঁ
লেউরিকে করে লাগঅল এহঅ রে নাতানুড়া
কখনঅ আরঅ ধুরা ছিঁটেই কখনঅ পালহা গুঁড়া
লেউরি তঅ গিরলাক ফেসাইদে হউ॥

মাইলান মসিক ফাঁদে লেউরিক ছটপটাইক জিবনঅ
ছাড়ি দে গউ মাইলান মসি করে লাগঅল নেহরঅনঅ
মাইলান মসিই কহেইক ভালা এহঅ রে লেউরিকে
হামঅর সঁগে পাসা আরঅ খেলে হেতঅউ তকে
জিতি গেলে ছাড়ি দেবঁ হারলে বনাউবঁ ভেড়া
ভুঁইঘারাই সামহাই দেবঁ পাউবে নিহি ছাড়া

লেউরি তখন রাজি হেউঅলঅ হউ।

মাইলান মসিক সঁগে লেউরি বসঅল পাসাখেলাই
মাইলান মসিই বসাই দেলেইন তিনকুনে তিন বিলাই
বিলাইএকর মুড়েঁ ভালা আলঅ রে জরঅইএ
চখঅ চখঅ আইখ আরঅ এহঅ রে ঘুরঅইএ
কতিখনঅ পাসা খেলা চলে রে লাগঅলঅ
লেউরি তঅ সেহঅ খেইলেন্ এহঅ রে হারঅলঅ

মাইলান মসি হাঁসঅলঅ খটখটাই হউ॥

লেউরিকে সনাক ভেড়া এহঅ রে দেলেইক করি
ভুঁইঘারাই সামহাই দেলেইক আরঅ রে বাঁধি ধরি
কুলহিক মুড়াই ভালেইক চনদাই এহঅ রে লেউরিকে
এখনঅ আরঅ কাহে ভালা নি আউএই ঘুরিকে
কনঅ ফেরেঁ গিরলা পাছে এহে মনে ঠানি
গনঅন করিকে সাঁচা এহঅ রে পাউলি জানি

সনাক ভেড়া করলাহেইক লেউরিকে হউ॥

লেউরিক লাগি কাঁদে লাগঅল চনদাকর মনঅ
বুড়হাবাপ মাহামাইকে তখন করঅইএ সৈঁউরনঅ
কহেই ভালা কিনা করঁ দিসা দিহা দেখাই
লেউরি বিনু কেসে বাঁচঅম এহঅ রে একাই
মনেক ভিতঅর আউলেইক দিসা অখরাকর সৈঁউরনে
লেউরিকে বাঁচাউএক তেঁহেঁ কুদঅলি তখঅনে
পঁহচি গেলি মুদিকেরি দুআইর হউ॥

মুদিকাকা সমুদ ধরি ডাকে লাগঅল চনদাঁই
কামে বাঝাই রহেহেলাক মুদি আপঅন ধাঁধাঁই
রাজাক বেটিক ডাকৈঁ মুদি ঘার লে রে বাহারাইএ
কিনা কহিস কনে হেকিস কথা রে ফইরছাউএঁ
চনদাঁই তখন সভে কথা कहলেইক রে মুদিকে
তিনটা আরঅ ইঁদুর ভালা ধরি দেবে মকে

তাকঅর খাতির দেবঁ হামি কড়ি হউ॥

মুদি তখন ইঁদুর ধরে এহঅ রে গেলা চলি
অকরঅ দুআইরৈঁ চনদা বসি রে রহঅলি
হাঁথৈঁ হাঁড়ি পঁআরনুড়া লেইকুনে রে সঁগৈঁ
খেতেক আইড়েঁ আইড়েঁ ঘুরেই এহঅ রে আপঅন টঁগৈঁ
হেহঅলমাটি সুঁঘি দাঁজিভাঁজি রে চলঅলঅ
একঅ গাড়হাঁই ইঁদুর আহাত মনে রে ঠানঅলঅ
ধুঁগা দেইএ তিনকুড়ি ইঁদুর ধরঅল হউ॥

ইঁদুর লেইএ ঘুরলাক মুদি চনদাকর ঠিনি
বাছি বাছি তিনটা ইঁদুর লেলেইন ভালা কিনি
ইঁদুর লেইএ চলেই চনদা মাইলানেক কুলহি মুড়া
মাইলানেকর কানৈঁ পঁহচাই দেলেইক নাগড়া গুঁড়া
বাজনা সুনি মাইলান বুড়হি সটসটাই আউঅলি
চনদাকে আরঅ ভালা দেখি রে পাউঅলি

ঝাপ করি ধরলেইক চনদাক হাঁথ হউ॥
বুড়হিঁই কহেই হাঁসি হাঁসি হিলেইক গটা অঁগঅ
পাসা খেলে হেতঅউ তকে আবু জে মর সঁগঅ
জিতি গেলে ছাড়ি দেবঁ সুনেঁ ভালঅ করি
হারি গেলে ভেড়ি করি রাখবঁ খাঁধাঁই ভরি
রাজি হেইএ বসলি চনদা এহঅ রে পাসা খেলাঁই
মাইলান মসি বসি গেলি সঁগে তিনটি বিলাই
জাখরাক মুড়েঁ আলঅ জরঅইএ হউ॥

তিনঅ বিলাইএঁ আরঅ ভালা খেইল রে করঅইএ
চনদাকর নজঅইর তখন চাইরঅ ধাইর ঘুরঅইএ
হারাউলিঅ কহেই বুড়হিঁই এহঅ রে মুড় লাড়ি
চনদাঁই তখন মানে মানে ইঁদুর দেলেইন ছাড়ি
ইঁদুর দেখি তিনঅ বিলাই পিদকঅলা জেজাহার
মাইলান মসি হারি গেলি চারা নি চললেইক আর
পাসাখেলাই চনদা জিতি গেলি হউ॥

চনদাঁই এবের কহেইক ভালা মাইলান রে মসিকে
রাগেঁ জলঅনেঁ আরঅ কমঅর জে মেটিকে
হারি জে গেলাহিস বুড়হি পার পাউবে তঁই কাঁহাঁ
আনি দেঁ মর সঁইআঁ ধনেঁ রাখলাহেসিক জাঁহাঁ
মাইলান মসিই দেখাই দেলেইক ভুঁইঘারা রে ডেরা
উহাঁই আহঅউ সঁইআ তর হেইকে সনাক ভেড়া
নিজেক আইখোঁ চিনহি লেবসিক জাঁই হউ॥

ভুঁইঘারা সামহাই চনদা দেখঅইএ নজঅরেঁ
অগনতি সনাক ভেড়া ভেভাত রে ভিতঅরেঁ
চিনহে নেহি পারেই ভালা কনটা হেকঅত সঁইআ
বুড়হাবাপকে সেঁউরি তখন মাগেইক আসিস দইআ
আসিস দইআই দিসা পাউলি নাউআ দেখাই জেটা
তর সঁইআ লাগঅউ ভালা বুঝি লেঁ সেহটা

নাউআ চিনহি ধরলেইক ছপ করি হউ॥
নাউআ ভেড়া ধরি চনদাঁই পঁছি গাতেক লুগাঁই
জিঅন ফুল আরঅ ভালা দেলেইক জে সুঁঘাই
সঁগে সঁগে সেহঅ ভেড়া লেউরি রে হেউঅলঅ
সাত রাজাক ধন চনদাঁই এহঅ রে পাউঅলঅ
লেউরি চনদা চলে লাগঅল ছাড়ি সেহঅ গাঁউঅ
কতিধুরঅ জাইএ ভালা লেলা টুইএক ঠাঁউঅ
ভুখ পিআসেঁ হেলা জেরা হউ॥

সেহঅ খনেঁ লেউরিঁই ভালা চনদাকে কহঅইএ
আলহাইনা মুলুকে ভাই সাঁউরা রে রহঅইএ
অকঅর ঠিনেই জাপ হামরা এহঅ রে সঁচঅলঅ
গাল মারি মারি দিঅ ভালা উখঅনে ডহরঅলঅ
কতিখনেঁ পঁহচি গেলা আলহাইনা মুলুকঅ
গবঅরেক ডিঁগ দেখি মেটি গেলেইন ভুখঅ

ভাইএঁ ভাইএঁ দেখা জে হেউঅলঅ হউ॥

কতিদিনঅ বাদেঁ ভালা ভাইএঁ ভাইএঁ দেখা
সঁগসার করি সাঁউরা হিঁআ রহঅলাহে একা
পুঁছাপুঁছি করে লাগঅল আনারঅ বানারঅ
সাঁউরাই আরঅ লেলেইক ভালা মাইবাপেক খজপুঁছারঅ
চনদাকে দেখি আরঅ কহেইক রে দাদাকে
কাঁহাঁ পাউলেসিক দাদা এহঅ রে চনদাকে

একঅর বিহা তঅ সহঅদেবাক সঁগ হউ॥

লেউরিঁই তখন একে একে ঘটঅন দেলেইক কহি
রাজাক বেটি চনদাক আইখোঁ লরেকেরি বহি
সভে কথা সুনঅল সাঁউরাই কনঅ নাত্ত বাকি
ভাতেক অধঅন দেউএ কহলেইক তিরিআকে ডাকি
সঁইআক কখাঁই সাঁউনিঁই ভালা দেলেইক দুধেক অধঅন
ভাতঅ রাঁধঅলি ভালা আরঅ রাঁধঅলি তিঅন

সভেকাই খালা আমভাপুরি হউ॥

লেউরি চনদা দিঅ লক হুবেকর লহঅরেঁ
কতিদিনা রহিগেলা সাঁউরাকর ঠহঅরেঁ
চনদাকে দেখি সাউনিক নেহি রে পসাইএ
দাউনিকর ধনেঁ ভালা বাঁটা রে বসাইএ
সাঁউরাকর ডরেঁ আরঅ কহে পারেই নিহি
দেখাইক চলঅনেঁ তবে ফুটেই রহি রহি
চনদাঁই বুঝঅলি আড়ে ঠাড়াহে হউ॥

সহদেবা বির আরঅ সাতসঅ রে ফউদ লেইএ
চনদাকর খজঁ ভালা টউরি রে বুলঅইএ
লেউরি চনদাক কানৈঁ আরঅ গেলেইক বানারঅ
কহে লাগঅল এহে মুলুকৈঁ রহঅব নিহি আরঅ
সাঁউরাকে এহঅ কথা নেহি জানাউলা
মানৈঁ মানৈঁ দিঅ লক এহঅ রে পারালা

কাঁহাঁ জাতা জানঅত নিহি কনঅ হউ॥

এক মুলুক দুই মুলুক তিন মুলুক গেলা
কতেক গাঁউ টাঁইড় টিকঅর এহঅ রে পাইরালা
কতিধুরৈঁ আরঅ ভালা সহদেবাকে দেখঅইএ
কিনা করঅব কিনা নিহিঁ দিঅ রে সঁচঅইএ
তখন আরঅ পারাই লাগঅল দসঅর ডহঅর ধরি
সহঅদেবাক সিঁকরা আইখে গেলা আরঅ গিরি

হাঁগকার মারি রগদে লাগঅল হউ॥

দিঅলক পারাইতে ভালা এহঅ রে তখনঅ
আগুবাটেঁ দেখঅত আরঅ একঅ অরুন বনঅ
সেহঅ বনৈঁ দুঅলক সামহাইএ রে দেলা
বনেকর ভিতঅরৈঁ ভালা লুকাইএ রহঅলা
ফউদ লেইএ সহদেবা এহ রে আউঅইএ
লেউরি চনদাকে আরঅ খজি নি পাউঅইএ

টুঁড়হি টুঁড়হি হেলা থকাথকি হউ॥

সহদেবাঁই তখন আরঅ হুকুমঅ করঅইএ
চনদাকর আসা ভালা নেহি রে ছাড়অইএ
এক দুই তিন করি বনঅ রে ডুঁগঅরি
সাতধাঁউ ঘুরঅল ভালা গাছেঁ রে চট মারি
এবেইর ফউদ ঘুরে লাগঅল বনেকর ভিতঅরঅ
চনদাঁই তখন লেউরিকে করি দেলেইক সতঅরঅ
তরা এখন আগুআইকে জাবেহে হউ॥

লেউরিঁই কহেই সুনৈ চনদা কথাটা হামঅরি
মসিক বেটাক সঁগ লড়হাই করঅম কেসে করি
অকঅর সঁগেঁ লড়হম নিহি ঠানলাই মনে
সেহঅ খাতির পারাই বুলই ঝুঁড়ে ঝাড়ে বনে
চনদাই কহেই এসঅন করি কতেক জে পারাবেহে
রগদানি খাই তরা মরবেহে আর মকঅউ মরাউবেহে

কনঅ একটা উপাই তঅ করা হউ॥

লেউরিঁই এবের কহে লাগঅল কিনা উপাই হেতি
তঁহি কহেঁ এসঅন হালৈ কেসে রে জিউ বাঁচতি
চনদাই কহেই সমসি ডাঁড়হা জিউএঁ নাহু মারিহান
সেহঅ দেখি সহদেবাক হেউএক জেসে চেতান
বির হেকিহা বিরেক নিঅর মানি লে লড়হাই
তহঅর পাসেঁ পাসেঁ ভালা মঁইঅ রহঅম ডাঁড়হাই

সাঁপঅ নিহি মরতাক আর ডাঁগঅ নিহি ভাঁগতি হউ॥

সাতসঅ ফউদেঁ আরঅ ভালা কাঁড়অ রে ছাড়অইএ
চনদাই তখন সভে কাঁড় খঁইছাঁই রে ভরঅইএ
কাঁড় ছাড়ি ছাড়ি ফউদ এহঅ রে থকঅলা
নিজৈ নিজৈ আরঅ ভালা হারুল হেইএ গেলা
সহদেবাই তখন লাজেঁ এহঅ রে মু ঘুরাই
ফউদ লেইএ ডহরলা আপঅন দেসেক ডেরাঁই

চনদাকর আসা ছাড়ি দেলেইক হউ॥

সেহঅ খনৈ লেউরি চনদা চলে রে লাগঅলঅ
মইধ বনৈ পানি পিআস এহঅ রে জাগঅলঅ
টাঁটিআ সুখাইএ জাই রাউটা লেহেইক টানি
হঁদে হঁদে ভালি দেখঅত কাঁছ নেখেইক পানি
দেখঅত একটি বঁখ ভালা উড়ি রে জাউঅইএ
লেউরিঁই তখন পানিক টউআ বঁখকে পুঁছঅইএ
কাঁহাঁ গেলে হামরা পানি পাউঅব হউ॥

বঁখেঁ কহেই পুরুব মুহেঁ এহঅ রে জাউঅবে
জজঅন ধুরেঁ একঅ খালেঁ পানি রে পাউঅবে
বঁখেকেরি কথা মানি চনদা আরঅ লেউরি
পানিক টানেঁ চলে লাগঅল পুরুব ডহঅর ধরি
কতিধুরেঁ আরঅ সেহঅ খালঅ রে পাউঅলঅ
অহে খালেক পানি হেলঘেঁটরাইল দেখঅলঅ

চনদাঁই কহেই এহে পানি নিহি পিঅব হউ॥

লেউরি চনদা চলে লাগঅল লেইএ পিআস জালা
নেহি দেখাইক বাঁধ পখঅইর কনঅ নদি নালা
কতিধুরেঁ একঅ কাড়া বাগাল রে দেখঅইএ
পাসেঁ জাইকে আরঅ ভালা এহঅ রে পুঁছঅইএ
সুনেঁ সুনেঁ কাড়া বাগাল কহি দেঁ হামরাকে
কাঁহাঁক পানি পিআউসিন রে মইসিনি কাড়াকে

বাগালেঁ তখন কহিকে সুনাউএই হউ॥

হা ভালা অহঅঠিনে দহ একটা আহেইক
আড়সি নিঅর পানি ভালা এহঅ রে ঝলকেহেইক
লেউরিই কহেই পিআসেঁ ভাই ছতি জাইস রে সুখাই
বড়ি উবগার করলে তঁই আইজ পানিক ঠানিত দেখাই
চনদা লেউরি দহেক বাটেঁ চলে রে লাগঅলঅ
বাগালেঁ তখন পেছু বাটলে এহঅ রে ডাকঅলঅ

একটা কথা সুনি লিহা মর হউ॥

বাগালেকর কথা সুনি এহঅ রে দিঅ লকে
কিনা কহেহিস ভালা পুঁছঅইএ বাগালকে
বাগালেঁ কহেই সেহঅ দহেঁ আহেইক একটা ডরঅ
বসঅত করি আহে একঅ সাঁপা রে ডাগঅরঅ
দিনাম মকে দেউএ হেউএই একটা একটা কাড়া
পানি ছুআ নহেইক সঝা সেহঅ পাউনা ছাড়া
বুঝি সুঝি জাবে সেহঅ দহেঁ হউ॥

বাগাল মুহেঁ সুনি কথা লেউরিঁই দেলেইক কহি
আইজ লে তকে অহঅ পাউনা দেউএ হেতঅউ নিহি
মঁই লাগঁ লেউরি বির জানঅত এহে সসাগরা
সাঁপেঁ আবু বুঝি জাতাক কাকঅর কতেক জাঁগড়া
এহে কহি লেউরি চনদা চলে রে লাগঅলঅ
ডাগঅর দহেক কিনারেঁ ভালা এহঅ রে পঁহচলঅ
ফরিটা লেউরিঁই ধরলাক সকতাই হউ॥

ডেগেঁ ডেগেঁ পানি ধাইর নাভঅত অকঅবকঅ
দহেকেরি পানি ভালা লেউএ দুইএক ঢকঅ
দহেকেরি পানি আরঅ হেলকি রে উঠঅলঅ
পাস ভিড়েইতে লেউরিঁই সাঁপাকে কাটঅলঅ
বগবগাই রকঅত বাহরাল লাল হেলেইক পানি
এক মিটকেঁ ফুরালেইক ভালা সাঁপেকর জিনগানি

চনদাঁই কহেই ই দহেক পানি আর নি পিঅব হউ॥

দনিরাজাক গেড়িআ জাব লেউরিঁই রে কহঅলঅ
দুঅলক তখন আরঅ চলেইতে লাগঅলঅ
জখন আরঅ গেড়িআ ধাইর এহঅ রে পঁহচলা
পানিঁই নাভি পিএক কথা আরঅ রে সঁচঅলা
বারঅ জড় পাহরাদারেঁ লেলখিন ভালা ঘেরি
নিফিকিরেঁ পানি পিঅত চনদা আর লেউরি

পহঅরিরা লেউরিকে ধরঅল হউ॥

জখন আরঅ পাহরাদারেঁ লেউরিকে ধরঅলঅ
লেউরিঁই তখন একে একে ঝুঁইটাই রে মারঅলঅ
ফেঁকাই ফেঁকাই কাচাড খাত জতেক পাহরাদারঅ
নাক কান আইখ ছালাই লহুঁই ঝরঅঝরঅ
জিউ লেইএ পারাত সভে লেউরিকে জে ডরাই
বাঁকা রাজাক ঘার সামহাই কাঁপঅত থরথরাই
মুহেঁ নিহি ফুটেইন কনঅ কথা হউ॥

বাঁকা রাজাক ঘারেঁ জখন সভে পাহারাদারঅ
ডরেঁ মরি সটঅল ভালা চুঁটিআকর নিআরঅ
সেহঅ দেখি রাজাঁই আরঅ পুঁছে লাগঅল বাতঅ
কেথিক ডরেঁ তরাক ভালা কাঁপঅহন গড়হাঁথঅ
কাঁহাক হেঁকিহা কিনা বেউরা ফুটি তরা কথা
হামঅর ঘারেঁ সামহাইকুনে গুটিআই নাহু রহা
পাহারাদারেঁ মনেঁ পাউলা বল হউ॥

একেঁ একেঁ কহে লাগঅল সুন্য রাজা তরা
দনিরাজাক পাহারাদার লাগিঅ জে হামরা
গেড়িআ রাখা করেহেলিঅ দসঅর দিনেক লেখেঁ
কন বাটেলেঁ আউলাক বির এহঅ পাহাড় জঁখেঁ
পানিঁই নাভেক লেইএ ভালা হেলেইক ছেঁকাছেঁকি
হামরাকে আউড়ি লেখেঁ ঝুঁটিআই দেলাক ফেঁকি
মু কান ছালাই লালে লাল হেলি হউ॥

বাঁকা রাজা তখন আরঅ চঘি হাঁথিক পিঠেঁ
সাজিসুজি চলে লাগঅল এহঅ রে গেড়িআ বাটেঁ
জখন আরঅ গেড়িআ ভালা পঁহচি রে গেলা
লেউরি চনদাক সঁগে আরঅ দেখাদেখি হেলা
বাঁকা রাজাঁই কহেই ভালা লেউরিকে উখনে
মর হাঁথিক সঁগেঁ তঁই লড়হবে জে এহে খনে
চিনভঁ তকে হেকিস কতেক বড়অ বির হউ॥

হাঁথিকে দেখিকে চনদাঁই এহঅ রে চিনহঅইএ
মর বাপেক হাঁথি ভালা গউর মহঅন হেউঅইএ
বাঁকা রাজাকে আরঅ দেলাহেইক সাবাইসি
এহঅ রাজাক কাম দেখি আদঅরেঁ ভালঅবাসি
চনদাঁই এবেইর গউর মহঅনকে কহেইক তবে সুন্য
এরা তর বহনঅই হেকথু কথাটা তঁই জানে
ভেঁট লেইএ পিঁধাউইহিন ফুলেক মালা হউ॥

লেউরি আরঅ হাঁথি ভালা লড়হে রে লাগঅইএ
সালা আর বহনঅইএক লড়হাই চনদাঁই দেখঅইএ
বাঁকা চাঁদ রাজা আরঅ ভালেই ডাঁড়হাই ডাঁড়হাই
নেহি বুঝে পারেই ভালা সালা বহনঅইএক লড়হাই
ভেঁট আঁকাইড় লেইএ ভালা এহঅ রে মহঅনে
ফুলেক মালা পিঁধাই দেলেইক লেউরিকে জতঅনে
রাজা তঅ হকচকাই গেলা হউ॥

রাজাঁই ঠানেই হাঁথি মর বড়ি বলিমানঅ
তবে কাহে এহে বিরকে দেলেইক বিরেক মানঅ
তখন আরঅ বাঁকা রাজাঁই লেউরিকে পুঁছঅইএ
তর চিনহাপ জানেক তেঁহে মন রে নাচঅইএ
লেউরিঁই তখন সভে কিছু দেলেইক রে খলি কহি
নাম সুনি রাজাক মন ভালা হাঁসেইক রহি রহি

জড় হাঁথ করি ঘারা জে ডহরঅলা হউ॥

ভুখ পিআসেঁ চনদাক মন গিরেই রে ঝামঅরি
লেউরিঁই কহেই চালে জাব মামাঘার হামঅরি
তখন আরঅ দিঅ লক চলে রে লাগঅলা
হরদি বাজার মামাঘার পঁহচিএ রে গেলা
ভেইগনা মর আউলা ঘার এহঅ রে এতিদিনেঁ
কমতি নি করেই ভালা আদঅরঅ জতঅনেঁ

দেখে আউঅত গাঁউএক আরঅ লক হউ॥

দুই চাইর দিন ভালা এহঅ রে বিতি গেলেইক
একদিন লেউরিঁই অকঅর মামাকে কহঅলেইক
নাহাইলাই জাম হামে করঅলাহঁ সাধঅ
দেখাই দেবেহে কাঁহাঁ আহেইক সভেলে বড়অ বাঁধঅ
কতেকদিন লে নাহাঁউ নিহি এহঅ রে ডাবকা ফাড়ি
ভেইগনাক কথা সুনি মামাঁই কহেইক মুড়অ লাড়ি
চালা তবে দুঅ মামা ভেইগনা সঁগেই জাপ হউ॥

মামা ভেইগনা দুঅ লক এহঅ রে চলঅলা
দনিরাজাক বাঁধ ভালা পঁহচিএ রে গেলা
বাঁধ তঅ দেখঅইএ আরঅ সমুনদর নিআরঅ
হেলঅক মারেইক ঘনে ঘনে জেসঅনঅ পাহাড়অ
দনিরাজাঁই খেইল খেলেই বাঁধেকেরি ধারিঁই
সেহঅ দেখি মামাকে তখন কহেইক আরঅ লেউরিঁই
অহঅঠিন কিনা খেইল করঅহত হউ॥

মামাঁই কহেইক লেউরিকে উ তঅ দনিরাজা হেকে
আপঅন মনে খেইল খেলেই ধুর লে ভালঅত লকে
সেহঅ দেখি সুনি লেউরিক পসালেইক রে নেহি
উড়ামালঅট দেউএ লাগঅল এহঅ রে তাহাতাহি
দনিরাজাক সেহঅ দেখি মনে রাগ ধরঅলঅ
দউগি আইকুন লেউরিকে থাপঅড় রে মারঅলঅ
লেউরিঁই দেলেইক বাতাফাড়া ফাড়ি হউ॥

দনিরাজা মরি গেলাক লেউরিক সঁগে লড়হি
দেখি লেউরিক মামাক আইখ আচঅক গেলেইক চড়হি
বাপ রে বাপ এসঅন বির হেকঅত ভেইগনা মরঅ
বাতাফাড়া ফাড়ি দেলেইক দনিকর গতঅরঅ
লেউরিকে তখন কহে লাগঅল এহঅ রে সাহাঁস করি
সুনা ভেইগনা একটা কথা রাখি দিহা হামঅরি

তরা ছাড়া হেতেইক নিহি এহে কাম হউ॥

তেলি রাজা আহে ভালা রহঅড় জে নগঅরেঁ
হামরাকে সাঁতাই মারঅত অহঅরে পহঅরেঁ
মরাবাঁচা সমান ভেইগনা অকঅর জালাঁই পড়ি
ঘারেকর খামখুঁটা জেসঅন হিলেইক লড়ি লড়ি
মামাক কথা সুনি লেউরিঁই এহঅ রে সাঁচি মনে
কহে লাগঅল রহঅড় নগঅর জাপ জে এখঅনে
দেখবেইক কেসঅন হেকে তেলিরাজা হউ॥

রহঅড় নগঅর পঁহচি গেলা দিঅ মামা ভেইগনা
সামহাই গেলা আরঅ ভালা রাজাকর আঁগঅনা
তেলিরাজা কহি ভালা এহঅ রে হাঁকাইএ
হাঁক সুনি রাজা আরঅ বাহারালাক বাঁকাইএ
লেউরিকে দেখি আরঅ ভালি হেঁট উপঅরঅ
কহে লাগঅল কিনা কহিস চিনহাপ কিনা তরঅ

কিনা কামে হামঅরি দুআরা হউ॥

লেউরিক মামাই কহেই তখন রাউটা ডাঁঠঅ করি
এরা হামঅর ভেইগনা হেকঅত নাম হেকেইক লেউরি
এরাক সঁগেঁ আইজ ভালা তঁহি রে লড়হঅবে
বিরেঁ বিরেঁ আইজ আরঅ এহঅ রে গিরঅবে
তেলি রাজাই তখন আরঅ কহঅইএ হাঁগকারি
গাধা আইজ আউলাহে বাঘেকর দুআরি

মনেক আস পুরাই দেবঁ তর হউ॥

বিরেঁ বিরেঁ আরঅ ভালা লড়হাই রে হেউঅলঅ
চখঅ চখঅ ফরি ভালা এহঅ রে ঝলকঅলঅ
লড়হি লড়হি দিঅ বিরেঁ বেরা দেলখিক ঘুরাই
কতিখনঅ বাদেঁ লেউরিই এহঅ রে দেলেইক হারাই
তেলিরাজা লইরঅ হেইএ ভুঁইএঁ গিরি গেলা
লেউরিক সঁগে লড়হি লড়হি মরঅন ডাকি লেলা

তেলিরাজাক ছঅ তিরিআ রাঁড় হেলা হউ॥

মুহেঁ মুহেঁ ছপলি গেলেইক লেউরি বিরেক কথা
কাকরঅ মনে হব আরঅ কাকরঅ মনে বেথা
মুলুকেকর লকেঁ ভালা লেউরিকে রে ঘেরি
নেহঅর বিনঅতি করঅত এহঅ রে জিগিড় ধরি
সভেকর ঠিন তিন খাঁড়ি করি কড়ি রে পাউঅবে
জদি দুসটু ফড়িঁগগা রাজাকে তঁই রে মারঅবে
লেউরি তঅ রাজি হেইএ গেলা হউ॥

সভে লক চুড়পে লাগঅল এহঅ রে রিঝোরগেঁ
লেউরি বির লড়তাক ভালা ফড়িঁগগাকর সঁগেঁ
সেহঅ লড়হাই দেখেক খাতির মন রে অথিরা
একঅর বাদেই জানাতেইক ভালা কনে কেসন বিরা
মলঅক মারি ফড়িঁগগা রে ঘুরেই কমঅর মেটি
গড়েকর ধমঅসে আরঅ কাঁপি জাইক রে মাটি

দেহিক বল তউলেই অকঅর কনে হউ॥

মুড় উঠাই চলেই লেউরি এহঅ রে আপঅন জাঁকে
গাঁউএক লকেঁ চিনহাই দেলথিক ফড়িঁগগা রাজাকে
মলকি চলঅল লেউরি ফড়িঁগগাকে রে ভালি
সেহঅ দেখি ফড়িঁগগাছঁ পাতলাক রে তালি
পুঁছে লাগঅল কন দেসেক রাজা রে হেউঅইএ
হামঅর সঁগেঁ আরঅ ভালা লড়হেক আস জাগঅইএ

তঁই মকে এখনে জানাউএঁ হউ॥

সেহঅ কথা সুনি লেউরিই কহি দেলেইক নামঅ
দুসটুরাকে মরাউএক ভালা হেকি হামঅর কামঅ
সেহঅ সুনি ফড়িঁগগাঁই ভালা ছাড়েই রে হাঁগকারঅ
লড়হি গেলা দুই বির দেখঅতঅ সঁগসারঅ
তিন পহঅরঅ ভালা লড়হাই রে হেউঅলঅ
ফড়িঁগগা রাজা আরঅ হারি রে জাউঅলঅ

চলি গেলাক মরঅনেকর দেসেঁ হউ॥

মুলুক সগঅর জানি গেলা লেউরি রে জিতকারঅ
মামাক সঁগেঁ এবৈইর লেউরি চলেই মামাঘারঅ
কতিধুরে আরঅ ভালা পাউঅলঅ রে দেখি
তেলিরাজাক ছঅ তিরিআ আহাত ডহঅর ছেঁকি
পাসেঁ পঁহচঅইতে আরঅ এহঅ রে ছঅ রানি
লেউরিকে ধরি ভালা করঅত টানাটানি

কহে লাগঅল তকে নি ছাড়বঅউ হউ॥

ছই রানিই আরঅ ভালা এহঅ রে লেউরিকে
আপঅন ঘার লেই গেলথিক হাঁথোঁ রে ধরিকে
চনদাকে ছাড়ি লেউরি উহাঁই রহি গেলা
ছই রানি আরঅ ভালা আসাপতি হেলা
দিনেক দিনে ছই রানি বুড়হাবাপেক দইআই
সভেকাই হেলা আরঅ এহঅ রে বেটাক মাঁই
ঘার সঁগসার হেলেইক জে আলঅ হউ॥

তবে কতিদিনা লেউরি আরঅ রে রহঅইএ
একদিনা তিরিআরাকে বসাইএ কহঅইএ
তরা ছাড়াউ আহি হামঅর আরঅ রে সঁগসারঅ
মর বিনু অরাউ ভালা দেখঅত আঁধারঅ
আর ইহাঁ রহঅম নিহি বিদাই দিহা মকে
ছইরানিই বিদাই তখন দেলথিক একে একে

লেউরি ডহরঅল আপঅন মামাঘার হউ॥
লেউরি ছাড়া হেইএ চনদা মামাসসুর ঘারেঁ
কাঁদি কাঁদি মরেই সুখি ছিঁটঅল লত নিআরেঁ
কতেক দিনা বাদেঁ লেউরি মামাঘার আউঅলঅ
চনদাকর মলিন মু ভালা দেখি রে পাউঅলঅ
সঁইআধনে দেখি চনদাক টেকাইক নিহি কাঁদঅনা
চইখেক লরেঁ আরঅ ভালা মানেইক নি বাঁধঅনা
লেউরিকে ধরি নিহি ছাড়েইক হউ॥

মামাঘার লে লেউরি চনদা বিদাই রে লেউঅলঅ
গউরা বাজারেক ডহঅর এহঅ রে ধরঅলঅ
কতিখনে পঁহচি গেলা গউরা রে বাজারঅ
একঅ বাঁধেক আইডেঁ ভালা বেনাউলাক জে ঘারঅ
নিজেক ঘার সসুর ঘার কাঁছঁ নিহি গেলা
অহঅ ঠিনেই দিঅ লক এহঅ রে রহঅলা
মনেক সুখেঁ দিনঅ জে বিতেইন হউ॥

লেউরি চনদা আর দাউনিক মিলন

বুড়হা মাইবাপ আর দাউনিকে ছাড়ি
চনদাকে লেইএ লেউরি ঘুরেই পাঁখা ঝাড়ি
এতেক দিনে মাই বাপকে রাখেইন নি খেইআলৈ
দাউনি তিরিআ ভালা আহি কেসন হালৈ
জবে লে গেলাহে সইআ বিসরি এহে ঘারঅ
খাটিলুটি আনি চনদাই চালাউএই সংসারঅ
নাগা নি করেই সাসসসুরেক সেবাই হউ॥

লেউরিকর বাপ-মাই পিঠঅইচাঁদ আর লতা
উমঅইর ভারেঁ হেরাউলাহাত কাম করেক বুতা
দুধ বেচেই দাউনিইই ভালা গাঁউ বুলি বুলি
সাস সসুরেক মু ভালি নিজেক দুখঅ রে ভুলি
বুড়হা বুড়হি গুমরে লাগঅত এহঅ রে মুড় ধরি
বেটারাকর কথা ভালা মনে করি করি

দাউনিই বধাউএইন ছউআ লেখেঁ হউ॥

জেহঅ বাটেঁ দাউনি আরঅ দুধা বেচে জাউঅইএ
চনদাকর সঙ্গে একদিন দেখা রে হেউঅইএ
চনদাই আরঅ দুধ কিনলি দেই দবঅড় দামঅ
আরঅ কহঅল দুধ দেবে এহঅ রে দিনামঅ
চেইর চেইর দুধ কিনেই দেই রে দবঅড় কড়ি
সাস সসুরেক পাসেঁ দাউনি এহঅ রে দেই ফদড়ি
দিঅ সইতিনিক নতঅই চিনহা চিনহি হউ॥

দবঅড় দামে দাউনিই ভালা দুধ রে বেচঅইএ
বুড়হাবুড়হিক মনে আরঅ দইসত রে বহঅইএ
চেইর দামে দুধ কিনেই কনে রে ভাইগমানি
বুড়হিই কহেই লুকাই ছাপাই আউঅম হামি জানি
ঘুরিদিন দাউনি আরঅ দুধ বেচে রে গেলি
অকর পেছুই পেছুই বুড়হি অলঅতে ডহরঅলি
পঁহচি গেলি চনদা লেউরিক ঠাউ হউ॥

দাউনিক ঠিনে চনদাঁই জখন দুখ রে কিনঅইএ

বুড়হিঁই তখন চনদাকে এহঅ রে চিনহঅইএ

রসেঁ রসেঁ হেলি বুড়হি অরাক পাসাপাসি

কাঁদে জে লাগঅলি আরঅ লরেঁ ভাসাভাসি

কাঁদনা সুনি লেউরি আরঅ সঁসাটি আউঅলঅ

আপন বুড়হি মাঁইকে ভালা এহঅ রে দেখঅলঅ

বুড়হিঁই লেউরিকে ধরঅলেইক আঁকড়াই হউ॥

মাঁই কাঁদেই বেটা কাঁদেই কাঁদঅত চনদা দাউনি

টুঁটলে নি টুঁটেই ভালা বুড়হিকর খিজলানি

কহে লাগেই বাপ জে তর দুখেঁ হেলাহাত কানা

নিহি পারেই আগুক লেখেঁ করে কাহঁ আনাগনা

দুখ বিপঅদ ভুলি ভালা তহঅর রে তিরিআই

হামরাকর সেবা করেই আরঅ নিহি পারালি ধেরিআই

চালৈঁ পুতা তঁই আপঅন ঘার গউ॥

মাঁই বেটা দুই পুতঅহ আউলা আপঅন ঘারঅ

হবেকর গহগহিঁই নাচেই ঝামরল রে সঁগসারঅ

হাঁসি খেলি দিন বিতাউঅত দিঅ রে সহিতিনি

এক মাঁইএক পেটেক জেসে জামা রে বহিনি

বুড়হা বুড়হিক ঘারেঁ ভালা সনাক দিন আর রাতি

বিতঅল দুখ বিসরি গেলা জরেইক সুখেক বাতি

দুই চারি মাস বিতি জে গেইল হউ॥

লেউরি আরঅ জবে লে ভালা ঘারা রে আউঅলঅ

চনদাকে তিরিআ কহি এহঅ রে মানঅলঅ

মহিচাঁদ রাজা আরঅ গঁগাদরি রানি

এবেইর কিনা করে হেতি দেখঅত ঠানি ঠানি

মাহারাই গিত সূনা এহঅ রে একঅ মনে

দুখ নিহি আউঅইএ ভালা সাধেকর জিবঅনে

ইজঅর ডহঅর পাউবেহে থানাই হউ॥

আলহাইনা মুলুকে সাঁউরা এহঅ রে ধনে পুতাই
জিনগানি পুহাই ভালা করঅমেক বলবুতাই
গাই গরুক গঠ আরঅ বাড়হঅত দিনে দিনে
পাহাড় নিঅর গবর ডিঁগ ইঠিন রে উঠিনে
সাঁউরা আর সাউনিকর ধনেক ডুঁগরি দেখি
কল দেসেক লকেক আরঅ লাগলেইন রে পকপকি
খতি করে লাগঅল খলেঁ ছলেঁ হউ॥

ডাব বাঁধি আউলা কল এহঅ রে সলহা করি
গাই গরু গাতেক জরেঁ লেগে খজথিন ধরি
জখন আরঅ সাঁউরাই ভালা হানতা রে দেউঅলঅ
কলরাকর সঁগেঁ আরঅ লড়হাই রে হেউঅলঅ
একবাটে কল জাতি দসঅর বাটে সাঁউরা
রাইত দিন লড়হাই চলেইক লেউরিই পাউলাক বেউরা
ঠানে লাগঅল একঅর উপাই হউ॥

সাজিগজি লেউরি ভালা এহঅ রে কুদঅইএ
চাঁড়েঁ মাড়েঁ পঁহচি গেলাক লড়হাইএকর ভুঁইএঁ
দাদাকে দেখিকে সাঁউরাই মনে পাউলাক বলঅ
একে একে কাটে লাগঅল এহঅ রে জতেক কলঅ
লেউরি সাঁউরাই আরঅ ভালা আইখে রে দেখঅইএ
জই ঠপা কলেক রকঅত ভুঁইএঁ রে টপকঅইএ
ততেক কল বির হেউঅত সিরজন হউ॥

লড়হি লড়হি দিঅভাই এহঅ রে ঠানঅইএ
জতেক মারিঅন কল বির ততেক রে জনমঅইএ
কিনা করে হেতি ভালা লড়হাইএ থকাথকি
কনঅ আরঅ উপাই ভালা নিহি পাউঅত দেখি
সাত দিন সাত রাইত লড়হাই রে চলঅলঅ
লড়হাইএক সুড়ুরে খাউআ পিআ রে বিসরঅলঅ
দিঅ তরঅফেঁ ঘুরাউঅত নিহি মুড় হউ॥

আলহাইনা মুলুকে চলেইক জিঅমরঅ লড়হাই
এহে বাটেঁ চনদা ঘার বাহারাই আর সামহাই
কতেক দিন বিতি গেলেইক সঁইআ নি লটঅইএ
মনে দইসত বাছে কনঅ বিঘনঅ রে ঘটঅইএ
তখন আরঅ চনদাঁই ভালা হাঁথঅ গনে লাগঅলি
লড়হাই ভুঁইএক আনার বানার সভে বুঝি গেলি
সঁচঅত মনে কিনা করে হেতি হউ॥

তখন আরঅ চনদা আপঅন কঁখঅ রে চিরি
পুতাকে আনঅলঅ ভালা এহঅ রে বাহার করি
কহে লাগঅল সুনৈ পুতা কহঁ হামে তকে
তঁই এবৈইর চলি জাবে আলহাইনা মুলুকে
তর বাপ আর কাকা ভালা কল জাইতেক সঁগেঁ
কতেক দিন লে লড়হি জাহাত বল খাটাই অঁগেঁ
তাছঁ নিহি হেউঅত জিতকার হউ॥

সুনেঁ পুতা মর কথা জাঁই রে চাঁড়েমাড়েঁ
তঁই নাছঁ গেলে জিততা নেহি মরতা কলেক কাঁড়েঁ
রনজিত নামে বেটা জানবথু রে তকে
বিরেকর মাইন দেবথু দুনিআইএক লকেঁ
মাঁইএক কথা সুনি পুতা আঁউআরে পাতারে
ঘলটি ঘলটি জাই লাগঅল এহঅ রে নিডরে
পঁহটি গেলাক আলহাইনা মুলুক হউ॥

রনজিত ঘুরে লাগঅল এহঅ রে ঘলটি ঘলটি
কলরাকর গুন চাইল সভে গেলেইন পালটি
ছুইত ছুআইত হেই গেলেইক লড়হাই ভুঁইএক মাটি
সড়সড়াই বুলেই বিরা এহঅ রে গুনকাটি
আর নিহি সিরজাত কল ভুঁইএঁ রকঅত গিরলে
কেহু কাটালা কেহু পারালা ঝুঁড়পাত চিরলে
লেউরি সাঁউরা হেলা জিতকার হউ॥

কল মারি দিঅ ভাইএঁ মনে ধরি সানঅ
কাটাইল দেহি নদিঁই ফেঁকঅত এহঅ রে রান রানঅ
কাঠকুচাক নিঅর দেহি বহি চলি গেলা
লেউরি সাঁউরা মনকে থিরাই ঘার রে সামহালা
খনেক বাদেঁ লেউরিঁই ভালা ছাড়ি ভাইএক ঘারঅ
মনেক সুখেঁ ডহরলা গউরা রে বাজারঅ

পেছুঁই পেছুঁই চলেই রনজিত হউ॥

ডহঅরেঁ চলেইতে লেউরি পঁহচি রে বাঁইড়াথানে
বাঁইড়া পাহড় দেউএক কথা জাগলেইক রে মনে
জাইএক খনে লেউরিঁই ভালা করেই রে মানসিকঅ
সধ নি করি ঘার সামহা হেতেইক নিহি ঠিকঅ
হিঁদে হুঁদে ভালি বুলেই এহঅ রে ডহঅরেঁ
রনজিতকে আরঅ ভালা দেখঅলেইক নজঅরেঁ

অকেই ধরি দেলেইক বলি করি হউ॥

আঁউআরে পাতারে আলছউআ বলি দেইকে লেউরি
মনেক আস পুরাইকুনে ঘারা গেলাক ঘুরি
সঁইআকে রিঝাইল দেখি চনদাঁই রে কহঅইএ
মুহঅ ভালি হেউএই মালুম জিতকার রে হেউঅইএ
রনজিতকে নাহু দেখি আরঅ পুঁছঅইএ বানারঅ
তরা জে একাই একাই ঘুরলেহে ঘারঅ

কাঁহাঁ রহলঅ সাধেক বেটা হউ॥

কন বেটা কাকঅর বেটা লেউরিঁই রে পুঁছঅইএ
রাগেঁ দিখেঁ চনদাঁই তখঅন কাপাড় রে ঠঁকঅইএ
কহে লাগঅল হামরাক বেটা এহঅ রে রনজিতঅ
জাকঅর খাতিরে তরাক হেলঅহন ভালা জিতঅ
তরাক ঠিন গেলাক বেটা আঁউআরে পাতারেঁ
কল জাইত ভাগলা ভালা গুনেঁ হউ তাকঅরেঁ

অহে বেটা ছাড়ি আউলেহে কাঁহাঁ হউ॥

তিরিআকর কথা সুনি লেউরি রে চমকলঅ
আসমান চিри মুড়েঁ জেসন ঠেরঅ রে গিরলঅ
আছাড়ি কাচাড়ি ভুঁইএ বেটাকেরি সগেঁ
কিনা হেলেইক জানে খজঅত ঘারেকেরি লগেঁ
বিকলাই লাগেই জিতকার এহঅ রে ঠানেহেলঁ
নিজেক ঠিনে নিজেই আইজ হারিএ জে গেলঁ

ধিক ধিক এহে পাপি জিনগানি হউ॥

দাউনি চনদা বুড়হা বুড়হিঁই পুঁছে লাগঅল বাতঅ
লেউরিঁই তখন কহেই ভালা মুড়েঁ বজড়াই হাঁথঅ
নি জানি নি চিনহি মানসিক খাতির সধানে
নিজেকর বেটাকেই দেলেঁই বলি রে বাইড়াথানে
এসন জিতকারেক হামঅর কিনা রহলি দামঅ
গটা সঁগসার ছি ছি করতা সুনলে হামঅর নামঅ

এহে জিউ রাখঅম নিহি আর হউ॥

সঁইআক হাল দেখি চনদাঁই কহেইক রে বধঅ দেইএ
কাচাড় খাইএ নাহু মরিহা ধিরঅজ হেজা হেইএ
এহে লটাপানি লেইএ চলি জা সটসটাই
রনজিতেক গাঠেঁ ভালা দিহাক তরা ছিমকাই
বেটা হামরাক বাঁচি উঠতাক সুনা জুইতসিরেঁ
লেউরি তখন কুদি গেলাক বড়ি রে ততবিরেঁ

পঁহচি গেলাক বাঁইড়াথানেক পাস হউ॥

বুড়হাবাপকে সঁউরি লেউরিঁই লটাকেরি পানি
রনজিতেক গাঠেঁ ভালা দেলেইক রে ছিমকানি
দেখেইতে দেখেইতে আরঅ কাটঅল মুঁড় আর দেহি
জড়িঅ জে গেলেইক ভালা সমঅই সহলেইক নেহি
গড়হাঁথ ঝাড়ি রনজিত বিরা কাঁদি রে উঠঅলঅ
লেউরিঁই আরঅ সঁগেঁ সঁগে করাঁই রে লেউঅলঅ
বেটা লেইএ একনিকাসেঁ ঘার পঁহচঅল হউ॥

বিরেক বেটা বির রনজিত পঁহচলাক রে ঘারঅ
আলঅ হেই গেলেইক ভালা পিঠঅইএক সঁগসারঅ
বানার পাইএ গউরাক লক এহঅ রে আউঅলঅ
পিঠঅইচাঁদেক ঘার আরঅ পরঅব টাঁইড় হেউঅলঅ
সভেকাকর মুহেঁ ভালা হাঁসি উঠেইন ফুটি
রনজিতকে করাঁই লেউএক চলেইক লুটালুটি
নাতি পাইকে বুড়হা বুড়হি নাচে লাগলা হউ॥

গঁগাদরি রানি আর মহিচাঁদঅ রে রাজা
বাজবাজনাঁই পিঠঅই টিঁড়হা পঁহচি গেলা সঝা
লেউরিঁই তখন মানে গুমনে দেলেইন পানিক লটা
গড়লাগি বসে দেলেইন করাঁই দেলেইন বেটা
রজঅল রজঅলিনি দিঅঁই ফদড়ে রে লাগঅলঅ
ধনি গরিব ফরঅক আইজ কাঁহাঁ রে রহঅলঅ
দুধেঁ পানিঁই মেসি একাল হেই গেলেইক হউ॥

মহিচাঁদেঁ কহে লাগঅল লেউরি চনদাক ঠিনে
মনেক কথা সুন্য মর আইজ এহে হুবেক দিনে
মর ধন খেতি বাড়ি জতেক আহি আরঅ
আইজ লে সামহাল করিহা তরা দেলিঅন আপাভারঅ
আর নিহি পারঁ উভে উমঅইর হেলি ভারি
একঅর বাদেঁ তরাই হামরাক বাপহারি মাঁইহারি
সভেকাই সুনি করলা সাবাইস হউ॥

সুনা সুনা সভেকাই এহঅ রে মন থিরাই
মাহারাই গিত ভালা এহেঠিনে গেলেইক সিরাই
বড়অ ছটঅ গুরু গিআন কেহু নতঅই ভুলিহা
আপঅন সমাজ জিনগানিঁই ধরঅম মানি চলিহা
মাহারাই গিত কথা পরসিহা সভে ঠিনে
সভেকর ঠিনে এহঅ আস রহলি হামঅর মনে
হিআ ভরি কহা মাহারাই হউ॥

~ मिश्रान ~

লেখঅইআরাক চিনহাপ

সমভূনাথ মাহাতঅ (বঁসরিআর)

মাই : সারদা মাহাতঅ

বাপ : দাতারাম মাহাতঅ

ঠেকান : গাঁউ : হেঁটজাড়ি, ডাকঘার : উপরজাড়ি

থানা : আড়সা, জেলা : পুরাইলা, (পঃ বঃ)

মবাইল নমবর - ৯৯৩২৫৮৭৯৪০

চিসঅল পঁথি : সতিঘাট (ছেইব), ভাঁউঅর, উদঅম ভাখি নেতৈ কুড়মালি
ছাপাই মুহালঃ ধরমেক ডহরে কাঁটা, সিরজন গাথা,
টুম পঁথি, সাড়াভাঁড়ার।



সকতিপদঅ মাহাতঅ (বঁসরিআর)

বাপ : সুকদেব মাহাতঅ

মাই : বিনাপানি মাহাতঅ

গাঁউ : চিটিডি, ডাক আর থানা : আড়সা

জেলা : পুরাইলা, (পঃ বঃ)

মবাইল নমবর - ৯৭৪৯১৪৭০৫৮

চিসঅল পঁথি : ভিনসার, রিমিবিমি, সৈঁউরনি জাগরন গিত,
বাঁকা সিঁথা খঁপাঁই গোঁদাফুল, মাইএক হাঁথে বেটিক জিবন।



সমভূনাথ আর সকতিপদঅ বঁসরিআরেক
সঁগিআ সঁজুআনিই নিখরাল পঁথি : লতে লতে বিহাগিত,
লতে লতে করম গিত, পুরখেনি সঁহরই গিত, কুড়মালি চারি



ISBN 978-93-5773-805-7



9 789357 738057